



Manua il Secondo Volume.
che contiene il libro sesto che
tratta le malattie esterne. 9/
libro settimo, e ottavo, che tratta
no le malattie Chirurgiche 3

BIBL. NAZ.

Vitt. Emanuele III.

RACCOLTA

VILLAROSA

B

802

NAPOLI



~~605477~~
547368

Rac. Vill. B.
802

A. CORN. CELSI

MEDICINAE LIBRI OCTO

EDITIO PRIMA NEAPOLITANA

SECUNDUM ALTERAM

LEONARDI TARGAE

EMENDATA

AD USUM COLLEGH MEDICOCHIRURGICI

VOL. I.



NEAPOLI MDCCCXVIII.

TYPIS PORCELLI.

1000

CLARISSIMO EQUITI

III

DOMINICO COTUNNIO

ARCHIATRO NEAPOLITANO

IN REGIO ARCHIGYMNASIO ANATOMES PROFESSORI

IN MAGNO INCURABILIVM NOSOCOMIO MEDICO

PLURIUM ACADEMIARVM SÖCIO.

Cum illud sit in more positum, institutoque maiorum, ut libri in lucem publicam prodituri illustrium virorum inscriptione decorentur; excipe pro Tua in me benevolentia, Vir praeclarissime atque humanissime, primam hanc Neapolitanam A. Cornelii Celsi editionem; quae tanti licet auctoris nomine praefulgeat, praecipuo tamen ornamento careret, si in ipsa propemodum fronte, nomine atque

que auspiciis tuis minime cohonestaretur. Universa enim litterarum respublica novit Te iam inde ab ultima adolescentiae tuae memoria de anatomicis, caeterisque medicorum facultatibus adeo esse optime meritum, ut Neapolitano nomini non minus splendoris nostra hac aetate ipse attuleris, quam Romanae Genti Celsus olim comparaverit. Accedit quod Tu recentioribus utique disciplinis mirum quantum instructus non illos imiteris, qui iisdem leviter imbuti antiquitatis sapientiam despiciere minime verentur; sed veterum Scriptorum, ac Medicorum praesertim qui opera ac nomina sua posteritati commendarunt, doctrinam animo ebibisti, atque Celsianae tum medicinae, tum linguae studio laudem non vulgarem videris adsequutus. Denique quum ad recte suspiciendum, absolvendumque hoc opus ipse mihi stimulos identidem addideris: et exemplar, ad quod esset exigendum, mihi indicaveris; par aequumque duxi Te omnino illi patronum demereri, tuoque dicere nomini; ut aliquod grati mei animi proferrem monumentum, quod quidem antumo Tibi fore gratissimum. Quae cum ita se habeant, adolescentuli, ad quorum manus
haec

haec editio pervenerit, duplici potissimum
 perfruentur utilitate; siquidem cum La-
 tini scriptoris documenta perlegent, at-
 que expendent, tum etiam Mecaenatis
 mei eruditionem opportune repetent, ac
 prae oculis habebunt. Quin etiam spe-
 randum utique videtur fore ut ipsi, si
 sapient, tuam in Deum pietatem, li-
 beralitatem in egenos, iustitiam, tem-
 perantiam, caeterasque, quibus excel-
 lis, virtutes, sibi ad imitandum pro-
 ponant: quod sane hac tempestate vi-
 tiis omnibus foecundissima, maximo illis
 erit emolumento. Vive interim, Neapoli-
 tanae Medicinae Nestor; ac Te Patriae
 ornandae, amicisque beandis quam diu-
 tissime praestes. Vale.

Dabam Neapoli IV. Kal. Sept.
 A. R. S. MDCCCXVIII.

Humillimus et addictissimus servus
 GABRIEL PORCELLIUS.

LECTORI BENEVOLO

TYPOGRAPHUS.

Cum A. Cornelii Celsi innumerae propemodum editiones Halberti Fabricii, Halberti Halterii, aliorumque Bibliographorum, qui eas enumerare satagerunt, memoriam, stylumque fatigaverint; admodum dolendum erat, nullam omnino huiusce Auctoris, scientia et eruditione commendatissimi, e praelis Neapolitani hactenus prodiisse. Quare ut illustrium Medicorum hortamentis, et studiosae iuventutis votis satis tandem fieret, non abs re duxi meos huic operi typos tantisper addicere; et clarissimi Dominici Cournii sententiam sequutus recentiore Leonardi Targae editionem caeteris anteponendam, atque exemplaris loco retinendam censi. At vero non mediocre mihi auxilium praebuerunt duo viri, quorum alter Latinae linguae, alter medicinae peritia plurimum valet; ut id conferret uterque, quod vel ad ipsam Targae recensionem emendandam requiri videbatur. Hi autem, quum ad Collegii Medicochirurgici, quod disciplinae studiorumque fama floret, usum ac splendorem hunc libellum concinnarent; idcirco variantes lectiones, adnotationes, aliaque id genus, lectionis potius impedimenta, quam adiumenta ex industria respuerunt, ne adolescentuli operis pen-

VIII

su ac impendio magis gravarentur. Porro librorum in capita divisiones, capitumque sectiones a Lindenio acceptae heic sarctae tectaeque servantur; immo et lemmata, quibus capitum argumenta indicantur, suo loco apposita sunt. Spero igitur accuratissimam hanc Celsi editionem tibi, amice lector, non minus utilitatem, quam oblectamentum fore adlaturam.

AD

AD LECTOREM.

Si qua est ars, quam singulari studio ac diligentia Graeci excoluerint, ea certe Medicina est, quae in Oriente summo semper in honore habita ex Aegypto, ut ceterae fere omnes, una cum Philosophia in Graeciam migravit. Ea quippe antiquis temporibus sapientiae pars habebatur, et quidem potissima, utpote quae corpori medetur, quocum animus ipse tam arcta societate coniungitur. Qui in ea inter veteres excelluerint, multi celebrantur: quorum praecipuus Hippocrates Cous, tanta vir auctoritate, ut Medicorum princeps etiamnum habeatur. Huius autem sectator inter Latinos A. Cornelius Celsus, non is quidem ingenio cum illo comparandus, sed scribendi arte atque elegantia procul dubio longe superior. Nam Medicinam totam octo libris complexus adeo scite in suas partes distribuit, dilucideque explicavit, ut nihil amplius desiderari posse videatur. Itaque valde dolendum est praeclarum opus idemque utilissimum temporis iniuria plurimis mendis, nec sane levibus, refertum ad nostram aetatem pervenisse. Non defuere quidem Viri doctrina atque eruditione praestantes, qui ea tollere conati sint; sed tamen nulla eius operis editio hactenus apparuit satis probanda, ne Lindeniana quidem ipsa, unde posteriores ceterae derivantur; licet ea unanimi fere consensu omnium optima existimetur. Nam quaedam, quae

quae recte habebant, Lindenius corruptit; alia, corrupta cum essent, ex coniectura, quae plerumque fallacissima est, restituit. Illud vero minime ferendum, quod cum in multis antiquos Codices sequutus sit, de eo sigillatim non admonuit; ut dubius incertusque haereas, quænam sit cuique lectioni fides adhibenda. Tria haec vitia Vir Summus Ioannes Baptista Morgagnus iampridem animadvertit, et quid in singulis peccatum sit, editis VIII. in Celsum doctissimis Epistolis, diligenter, ut solet, adnotavit; multis insuper, quae nec Lindenius, nec alius quisquam attigerat, emendatis. Ad haec plura indicavit, quae manifesto depravata sunt, nec tamen perspicui potest quo pacto corrigi queant. Haec cum ita sint, ut Celsus pristinae integritati, quantum fieri potest, restituitur, unde potissimum auxilium petendum est? Nimirum ab antiquis Codicibus, qui si emendati sint, veram scripturam exhibent; si mendosi, homini sagaci interdum indicant. Hac ego persuasione ductus cum superioribus annis iter per Italiam instituissem, Codices mss. consului, qui in Vaticana ac Medicea Bibliotheca asservantur, eosque cum editis (nam hos fere omnes iampridem mihi comparaveram) diligentissime contuli. Atque utinam id facere Morgagnus potuisset! Multo sane pauciora in Celso haberemus, quae legentibus negotium facerent. Ego enim, qui doctrina illi sum atque ingenio adeo inferior, multo plus, quam initio speraveram, ex eorum collatione profeci. Nec tamen omnes sunt eiusdem notae. Sed hi
eu-

cuiusmodi sint , et quae cuiusque aetas atque auctoritas , Index ostendet , quem huic epistolae subiiciam . Illud modo affirmare possum , cam me Celsi editionem dare , in qua vix ullus sit nostris coniecturis locus . Etenim in ea nihil fere reperitur , quod ex iis Codicibus , quos supra dixi , aut manuscriptis , aut editis petatum non sit . Quoniam vero e manuscriptis antiquissimus est Codex Mediceus Primus , illud curavi , ut quae in eo scripta sunt , pleraque , etiam si vitiosa essent , adnotarentur . Quid istuc , inquires ? Scilicet ut perspicacior aliquis ex iis ipsis veram , si fieri possit , lectionem eliceret : quae causa fuit quamobrem ex aliis quoque Codicibus variantia exciperem . Porro singulos libros in capita capitumque sectiones divisi , ut Lindenio placuit , lemmatibus tantum reiectis ; eo quod Celsi loca ex eius editione afferri solent , quae ubique fere usu recepta est , omnesque Bibliothecas occupat . Atque ego eius editionis celebritati hoc quoque dedi , ut in quibus a nostra discrepat , singula describerem ; ne ab ullo , qui postremam hanc habet , prior illa desideretur . Ceterum ii libri in Codice Mediceo Primo , cuius magna utique auctoritas est , una eademque serie continenter sunt scripti : ex quo colligi posse videtur , divisionem illam antiquam non esse . Ea certe , ut plerumque non sit inepta , a veterum Scriptorum ingenio maxime abhorret , atque adeo ipsius Celsi , cuius ea non minima laus , quod res diversas ac suapte natura separatas singulari artificio coniunxerit , Itaque si quando

do ille caput nominat , vox haec eo sensu fortasse accipienda est , quo illam Latini Scriptores usurpant , ut res quasdam significant ab aliis distinctas , haud tamen ab iisdem prorsus seiunctas atque distractas . Huiusmodi sunt *capita epistolae* apud Tullium , Suetonium , aliosque .

Ex iis , quae hactenus dicta sunt , satis apparet , id unum mihi curae fuisse , ut Celsi textum quam emendatissimum darem ; cum Auctor miro orationis nitore ipse per se perspicuus nullo egeat commentario . Equidem non negaverim quaedam esse vocabula artis propria , quae aliquid habeant obscuritatis ; sed iis explicandis Lexicon Celsianum sufficere existimabitur , si tantum erit otii , praesertim valetudine tam infirma crebrisque adeo tentationibus vexata , ut quod dudum inchoatum est , possim aliquando perficere . Vale .

AD EVNDEM.

Ex iis quae praefatus sum ad priorem Celsi Editionem a me procuratam, atque ex Epistolis Caietani Cognolati et Jo. Bapt. Morgagni Editioni illi et huic quoque adiectis, intelligi potest, me tunc temporis adversa valetudine affectum fuisse. Haec causa fuit, ob quam opus exeunte An. MDCCLXVI. edi coeptum, non nisi An. MDCCLXIX. ineunte absolutum fuerit. Id vix eram consequutus, cum febricula quae me iamdiu male habebat, gravior facta est, aliaque huic incommoda accesserunt; ut Lexici Celsiani perficiendi cogitatione, ac medici munere dimissis, quieti animi corporisque me tradere sim coactus. Hac vitae ratione aliquot annos servata, morbum depuli, viresque paulatim refeci, non ita tamen, ut tutum crediderim pristina studia statim suscipere. Sed res incidit, quae me pellexit ad ea redire. Nam Vir Clarissimus Ludovicus Bianconus mihi exemplum dono misit duodecim epistolarum quas in Celsum scripsit, quaeque An. MDCCLXXX. editae sunt. Ex his cognovi in Vaticana Bibliotheca Celsi Codicem asservari, Mediceo illo qui omnium antiquissimus ferebatur, vetustiorcin. Is, quum ego alios septem illius Bibliothecae Codices cum libris editis contuli, fortasse ignorabatur: mihi certe ostensus non fuit. Igitur curavi, ut a perito aliquo et diligenti homine Codex ille describeretur, mihiq[ue] exemplum mit-

mitteretur. Sed difficile fuit huiusmodi hominem reperire: post longum tamen tempus ope spectati, mihiq̃ue amicissimi viri repertus est. Is fuit Rinaldus Santolonus, unus ex Bibliothecæ Custodibus, qui illius Codices iamdiu tractabat, perspectosque habebat. Codicem ille quam accuratissime se descripturum suscepit, si tempus ei daretur ad rem perficiendam necessarium: quippe cum multis aliis occupationibus distentus, non posset, nisi per intervalla quæ ab his vacua haberet, rem exsequi. Pactum igitur est, ut exemplum per partes mitteret: earumque primam An. MDCCLXXXVI. ultimam quatuor post annos accepi: tempore litterarum studiis minime opportuno. Gravissimo enim bello exorto, res tum publicæ, tum privatae tota Italia afflictae sunt. Tandem mihi licuit animum operi manumque admoveere, ac Celsum accuratius recensere, auxilio Codicis Vaticanæ, de quo paulo superius dixi, aliorumque librorum, quibus in adornanda priore Editione carueram. Atque in contextu quidem rationem hanc sequutus sum: ubi Codex Mediceus, quem Primum, et Vaticanus, quem Octavum nomino, atque Editio Lindeniana consentiunt, eam scripturam servavi, nisi si ratio repugnabat: ubi hi libri manifesto mendosi erant, aliorum librorum, sive scriptorum, sive editorum lectionem, quæ recte se habebat, reposui: in locis quos, cum in libris omnibus corrupti essent, Lindenius, sive ex sua, sive ex aliorum coniectura restituit, eius lectionem retinui. Ipse quoque non-

nul-

nulla ex coniectura emendavi, aut quomodo emendari possint, exposui. Pauca quae ex margine in textum irrepserant, sustuli; alia quae glossemata videri possint, uncis inclusi. Quas vero adnotationes in priore Editione textui subieci, cum alia detrahenda, alia adiicienda, multa etiam essent mutanda, satius duxi eas reficere, quam interpolare; variantesque lectiones, unde sumptae sint, indicare; modo sic: *Caesarius legit etc. Lindenius legit etc.* nonnumquam sic: *Lindenius perperam legit etc.* Quae sunt parvi momenti, sic: *Alii legunt etc.*

Vitam Cornelii Celsi a Rhodio scriptam, quae in Lindeniana et posterioribus Editionibus omnibus habetur, omisi; quia erroribus referta est: quorum aliquos notavit Morgagnus Epist. I. Item Compendium omisi, quod duodecim suarum in Celsum epistolarum confecit Bianconus a fratribus Luchtmans rogatus, et ab illis vulgatum est Lugduui Batavorum An. MDCCLXXXVI. una cum Celso ex mea recensione Patavii edito An. MDCCLXIX. Quaedam Eruditissimus ille Vir recte tradidit; sed invicem alia minus probanda. Et sane non multa sunt, quae de Celso pro certis haberi possint. Praenomen quidem Auli ei fuisse, non Aurelii, ut in plerisque libris legitur, extra omnem dubitationem est. Nam Hieronymus Rubeus, qui suas in hunc auctorem adnotationes An. MDCVII. absolverat, hoc earum initium fecit: *Vetus codex Vaticanus manuscriptus inscriptionem libri sexti sic habet: Auli Cornelii Celsi liber sextus, idemque Medicinae primus. Quod Auli praenomen*

eo magis in Cornelio Celso placet, quod Aurelii Romanae familiae nomen fuit, Aulus autem Corneliae praenomen. Id ille ex Livio in quibusdam illustribus Cornelii probat; atque animadvertit, pro nota A. (quae in Fastis Consularibus, ut in nummis Liciniae, Posthumiae, aliarumque Romanarum familiarum, et Vitellii Imperatoris, Aulum significat) indoctos aliquos librarios Aurelii nomen ipsis magis notum scripsisse. In Codice Mediceo 1. et Vaticano VIII. aut omittitur praenomen, aut est A. ut ex meis adnotationibus apparet; et Vaticanus in fine libri quinti ita habet: AVLLI CORNELI LIB. V. EXPL. Incipit Lib. VI. Feliciter. Ne Celsi quidem cognomen in gente Cornelia inusitatum fuisse, idem Rubeus ostendit; nam ex Fastis, An. Urbis MDCCCLXVI. Consul fuit L. Juventius Celsus.

Romanum fuisse Celsum ex nobilissima gente Cornelia, idem Rubeus putat. Sed Romae Cornelii alii patricii, alii equestris, alii plebei ordinis, alii libertini generis fuerunt. Corneliū nostrum ingenuum fuisse, et liberaliter educatum, ex summo veri studio, summaque prudentia et aequitate coniici potest. *Veri amorem, ut Morgagnus animadvertit, satis ostendit laudata ab ipso lib. 8. cap. 4. simplex veri erroris confessio; praecipueque in eo ministerio, quod utilitatis causa posteris traditur; ne qui postea decipiantur eadem ratione, qua quis ante deceptus est: prudentiam vero et aequitatem cum illa lib. 7. cap. 14. verisimile est id a quoque praetermissum, quod*

quod ipse non cognoverat, a nullo id quod non viderat fictum, tum haec lib. 2. cap. 14. oportet autem neque recentiores viros in iis fraudare, quae vel reppererunt, vel recte sequuntur; et tamen ea quae apud antiquiores aliquos posita sunt, auctoribus suis reddere. Omitto, inquit, de eodem genere alia ad conformandos cum legentium, tum scribentium mores spectantia. Inter haec sunt illa, quae alibi dixit, Celsum initio cap. 18. lib. 6. posuisse. Romanum fuisse Celsum, Rubeus, ut modo dixi, existimat; Morgagnus hoc amplius: *Etsi ex Romanis gentibus familiae plures ab Urbe in Colonias migrari: ego tamen nihil prohibere, imo pleraque convenire video, ut Celsum nostrum Romae potius, quam alibi et natum esse et vixisse, opiner. Sic autem loquor propterea quia si alterum petas ut ipsius, aut aliorum idoneo testimonio confirmem, non facile possim. At Romanum, id est non externum fuisse, non Plinii solum auctoritate, aut geminata M. Fabii testificatione, sed et Celsi ipsius compluribus locis ostendam, ut ubi lib. 4. cap. 7. nostri, inquit, anginam vocant: apud Graecos nomen, prout species est; aut ubi lib. 8. cap. 1. nostri scultula operta, ὀμπλάτης Graeci nominant. Idemque confirmant quae initio posuit cap. 18. lib. 6. atque; ut alios alibi omitam; tres loci uno in capite pariter 18. lib. 7. Auctoritates Plinii, et Quintiliani inferius opportuniori loco afferam.*

Quaeritur etiam Medicusne Celsus fuerit, an
Cels. T. I. b non

XVIII

non fuerit . Plinius qui multis annis post Celsum vixit , videlicet Tito Vespasiano imperante lib. 29. Hist. Natur. cap. 1. sect. 8. ita scribit: *Solum hanc, medicinam, artium Graecarum nondum exercet Romana gravitas in tanto fructu . Paucissimi Quiritium attigere, et ipsi statim ad Graecos transfugae: immo vero auctoritas aliter quam Graece eam tractantibus, etiam apud imperitos expertesque linguae non est:* et lib. 1. qui Index est Scriptorum, quorum testimonio in opere suo utitur, iis in libris, in quibus Celsum nominat, non inter Medicos, sed inter Auctores eum ponit . Morgagnus tamen animadvertit, ne Julium Bassum quidem, et Sextium Nigrum inter Medicos, sed inter Auctores ab eo fuisse positos: quos Clericus Hist. Medic. Parte 2. lib. 3, cap. 11. Asclepiadis assecclas fuisse Dioscoridis testimonio docet. Sed Dioscorides tradit, in describendis plantis, animalibus, rebus metallicis ad medicinae usum pertinentibus, et in disputando de earum facultatum causis, versatos esse . Qua in re Asclepiadem sequuti videntur; qui, ut ait Plinius lib. 26. cap. 3. sect. 7. *medicinam ad causas revocando, totam coniecturae fecit;* ideoque inter Auctores potius, quam inter Medicos ab eo positi sunt . Idem Plinius lib. 20. 21. 23. 24. 26. Bassum, et Nigrum graece scripsisse tradit; ut ex iis Romanis fuisse videantur, qui ad Graecos transfugerint .

Rubens, Casaubonus, Lindenius, Morgagnus existimant, Medicinam Celsum exercuisse: non enim inter discrepantes illustrium Medicorum
ten-

sententias suam, nisi Medicum, potuisse interponere, qui non doctrina, sed usu et observatione excelleret; in eamque rem loca quaedam produci solent: *Neque ignoro quosdam dicere, omne auxilium necessarium esse incrementibus morbis, non cum iam per se finiuntur. Quod non ita se habet. Potest enim morbus etc.* lib. 2. cap. 14. *Ego autem medicamentorum dari potiones, et alvum duci non nisi raro debere concedo; non ideo tamen id agendum, ut aegri vires convellantur, existimo; quoniam ex imbecillitate summum periculum est.* lib. 3. cap. 3. *Ego tum hoc puto tentandum, cum parum cibus semel, et post febrem datus prodest* cap. 11. eiusdem libri. Celsum proinde putant non ita exercuisse medicinam, ut qui mercedis causa solent, sed tamen ut in gravioribus casibus ab amicis, et ab egenis se pateretur adiri, et consuli. Mihi verisimile quoque videtur, nonnumquam ab aegro aliquo, sive cognato, sive amico rogatum fuisse ut se inviseret, consilioque iuvaret; vel etiam ut de curatione iudicaret, quae ipsi a medicis adhibebatur: atque ita quae recte, quae minus bene cederent notando, de iis quae in aliorum libris legerat, iudicium suum ferre potuisse. Quidam eam quoque medicinae partem quae manu curat, Celsum exercuisse putant, quod fieri non possit, ut tam difficilia ad describendum non ante perfecit, qui sic descripserit. Morgagno tamen eum Chirurgorum operibus attente interfuisse et credibilis videtur, et satis esse. Cum igitur ubi de hac parte agit;

ita loquatur : *Ego sic restitutum esse neminem memini . lib. 7. cap. 7. sect. 6. Neque audiendi sunt qui osse nudato diem tertium expectant , ut tunc excidant : - ante inflammationem enim tutius omnia tractantur . lib. 8. cap. 2. In omni fissio fractove osse protinus antiquiores medici ad ferraamenta veniebant , quibus id exciderent . Sed multo melius est ante emplastra experiri , quae calvariae causa componuntur . cap. 4. eiusdem libri . Cum , inquam , in hac parte ita loquatur , similiter in illa quoque quae victu medetur , potuit dicere : *Neque ignoro quosdam dicere , omne auxilium necessarium esse incrementibus morbis , non cum iam per se finiuntur etc. Ego autem medicamentorum dari potiones , et alvum duci non nisi raro debere . concedo etc. Ego tum hoc puto tentandum , cum etc. Quin etiam verisimile est , eadem ratione nonnumquam loquutum esse in libris de Agricultura , et de Re Rhetorica ; neque tamen et Agricola , et Medicus , et Rhetor Celsus fuit .**

Est etiam inter Eruditos Viros quaestio de aetate , qua Celsus opus suum , quod Artes inscripsit , ediderit . Quintilianus , Orator . Instit. lib. 5. cap. 1. haec tradit : *Scriptis de eadem materia , rhetorica , non pauca Cornificius , aliqua Stertinius , nonnihil Pater Gallio „ accuratius vero priores Gallione Celsus , et Laenas . Morgagnus Epistola 1. in Celsum retulit haec Plinii verba ex lib. 14. cap. 2. Graecinus , qui alioqui Cornelium Celsum transcripsit ; id est super helvenaca , de qua ibi loquitur-*

tur vite, Celsi ille iudicium descripsit. Epistola autem IV. ait Celsum scripsisse, ut tardissime, ante Claudii imperium: idque confirmat insigni illo elogio Corn. Taciti in Agricola: *Pater Julii, Agricolae, Julius Graecinus senatorii ordinis, studio eloquentiae, sapientiaeque notus, iisque virtutibus iram Cati Caesaris meritis: namque Marcum Silanum accusare iussus, et quia abnuerat, interfectus est.* Ex superius allato Quintiliani loco Morgagnus docet, qua aetate Celsus scripserit conicere posse qui forte sciant, quo anno Gallio pater, sive is ad quem ab L. Seneca fratre liber missus est de *Vita Beata*, sive alius fuerit, sua de eloquentia praecepta emisit. Id summa cura persequutus Bianconus, ostendit, Patrem Gallionem eum fuisse, qui sibi in filium adoptavit fratrem natu maiorem L. Senecae philosophi: illumque eloquentem et in rebus rhetoricis iudicem Messalae Corvini magni oratoris temporibus, huiusque familiarem fuisse, ex eo M. Senecae loco Suasoriae tertiae apparere: *Memini nos ab auditione Nicetis ad Messalam venisse. Nicetes suo impetu valde Graecis placuerat. Quaerebat a Gallione Messala, quid illi visus esset Nicetes?* Gallio ait Plena Deo. Quoties audierat aliquem ex his declamatoribus quos scholastici Caldos vocant, statim dicebat Plena Deo. Ipse Messala numquam aliter ab auditione hominis ventientem interrogabat, quam ut diceret, numquid Plena Deo. Praeterea animadvertit Bianconus, Auctorem Dialogi de Oratore *Cels. T. I.*

ribus, sive Quintilianus, sive Tacitus fuerit, tradidisse, *Corvinum usque ad medium Augusti principatum, Asinium paene ad extremum durasse*. Cum igitur, inquit Celsus prior Gallione scripserit, manifestum est primis Augusti annis scripsisse. Sed Seneca dixit Gallionem Messalae temporibus de rebus rhetoricis iudicem habitum fuisse; non tamen illo vivente scripta sua emisisse. Fieri igitur potuit, ut aliquot annis postquam Messala e vita migraverat, ea emisserit. Ex quo sequitur, ut Celsus post medium Augusti imperium Artes ediderit.

Idem Bianconius primis Augusti annis Celsum scripsisse ex eo quoque colligit, quod nullam Antonii Musae mentionem fecit, qui, ut tradit Plinius lib. 19. Cap. 1. sect. 5. *Augustum contraria medicina gravi periculo exemerat: videlicet An. V. DCCXXXI. cum, ut scribit Svetonius in eius Vita cap. 81: destillationibus iecinore vitato ad desperationem redactus contrariam et ancipitem rationem medendi subire; et quoniam calida fomenta non proderant, frigidis eurari coactus, auctore Antonio Musa*. Sed verisimile est, Celsum ideo Musam haud nominasse, et quia neque contrariae medicinae primus auctor est, et ipse eam medendi rationem minus probat. Lib. 3. cap. 9. *Neque hercule, inquit, ista euratio nova est, qua nunc quidam traditos sibi aegros, qui sub cautioribus medicis trahebantur, interdum contrariis remediis sanant. Siquidem apud antiquos quoque ante Herophilum et Erasistratum, maximeque post Hippocratem*
fuit

fuit Petro quidam, quid febricitantem hominem ubi acceperat, multis vestimentis operiebat, ut simul calorem ingentem, sitimque excitaret; deinde ubi paulum remitti coeperat febris, aquam frigidam potui dabat; ac si moverat sudorem, explicuisse se aegrum iudicabat; si non moverat, plus etiam aquae frigidae ingerebat etc. Et intra haec omnis eius medicina erat; eaque non minus grata fuit iis quos Hippocratis successores non refecerant, quam nunc est iis quos Herophili et Erasistrati aemuli diu tractos non expedierunt. Neque ideo tamen non est temeraria ista medicina: quia plures, si protinus a principiis exceperit, interimit. Sed cum omnibus eadem convenire non possint, fere quos ratio non restituit, temeritas adiuvat. Ideoque eiusmodi medici melius alienos aegros, quam suos nutriunt.

Affertur a Biancono etiam locus libri 1. cap. 4. de Oratore, ubi Cicero Crassum inducit ita loquentem: *Neque vero Asclepiades is, quo nos medico amicoque usi sumus, tum cum eloquentia vincebat, ceteros medicos, in eo ipso quod ornatè dicebat, medicinae facultate utebatur, non eloquentiae.* Cum igitur, inquit, Crassus de Asclepiade ut de homine qui inter vivos non erat, loquatur; ipse autem Crassus An. V. DCLXIII. e vita migraverit, necesse est illum uno saltem ante hunc anno obiisse; et Themisonem qui ei in medicina successit, annum aetatis tricesimum attingisse, ut Romani salutem ei suam credere non dubitent.

rent. Et quoniam Celsus in pro. lib. 1. ita scribit: *Asclepiades medendi rationem ex magna parte mutavit. Ex cuius successoribus Themison nuper ipse quoque quaedam in senectute mutavit*; sequitur Celsum nuper, id est primis Augusti anni scripsisse.

Sed illa L. Crassi cum M. Antonio disputatio commentitia est; atque evidens est, in libris de Oratore M. Tullium, dum optimi oratoris imaginem studuit effingere, suam ipsius nobis exhibuisse. Pearceius illorum librorum argumenta exponens, *Plerumque fit*, inquit, *ut cum invidia audiatur, qui aliis praecipit, qui enim conatur docere, se superiorem fore in eo quod docet, pollicetur. Hanc igitur invidiam a se Cicero artificio removit, cum sub personis L. Crassi, et M. Antonii, Oratorium superioris saeculi facile principum. Quod Cicero ipse ostendit in Epist. ad Leptam, quae inter familiares lib. VI. est 17. Oratorem meum, inquit, tantopere a te probari, vehementer gaudeo. Mihi quidem sic persuadeo, quidquid habuerim iudicii in dicendo, in eum librum contulisse. Qui si est talis, qualis tibi videri dicis, ego quoque aliquid sum: sin aliter, non recuso, quin, quantum de libro illo, tantumdem de mei iudicii fama detrahatur. Ceterum eandem fere rationem in sententia stia explicanda in Tusculanis, Academicis, aliisque philosophicis libris sequutus est Cicero. Quod ad Asclepiadem pertinet, Plinio standum puto, qui lib. 26. cap. 3. sect. 7. ita scribit: *Asclepiades aetate Magni Pompeii*
oran-*

*orandi magister, nec satis in arte ea quae-
stuosus, ut ad alia, quam ad forum, sa-
gacis ingenii, huc, ad medicinam, repente
se convertit: et lib. 29. cap. 1. rect. 5. Au-
ditor eius, Asclepiadis, Themison fuit, qui
quae inter initia scripserat, illo mox receden-
te a vita, ad placita sua mutavit. Cum au-
tem Celsus ipse in proëmio dicat, Themisonem
nuper quaedam in senectute deflexisse, osten-
dit, se non quidem primis Augusti annis, sed
tamen eo vivente Artes edidisse. Ex his, aliis-
que supra allatis conficitur, Celsum inter Scri-
ptores aureae, ut vocant, aetatis esse reponen-
dum: quod satis esse debet Biancono, qui id
demonstrandum sibi proposuit.*

Sed iam ad Quintilianum revertendum est,
cuius de Celso iudicium paulo supra retuli,
ubi de aetate qua ille vixit, multis egi. Libro
autem 12. cap. 1. Instit. Orator. ita scribit:
*M. Censorius Cato idem Orator, idem histo-
riae conditor, idem iuris, idem rerum rusti-
carum peritissimus . . . quam multa, imo
paene omnia tradidit Varro? Quod instru-
mentum dicendi M. Tullio defuit? Quid plu-
ra? cum etiam Cornelius Celsus mediocri
vir ingenio, non solum de his omnibus con-
scripserit artibus, sed amplius rei militaris, et
rusticae etiam, et medicinae praecepta reli-
querit? Sed, ut animadvertit Morgagnus, is
Quintiliani locus, cum Celso haud multum
aequus, tum etiam quam revera sit, multo
iniquior videri potest, non attendentibus vi-
delicet mediocri virum ingenio ibi Celsum di-
ci-*

ci, ubi contentione quasi quadam facta, Scriptores longe ingeniosissimi, et in his Homerus, Plato, Aristoteles, M. Tullius colaudantur. De Re Militari Celsum scripsisse testatur etiam Vegetius, qui de eadem agens lib. 1. cap. 8. profitetur fidelissime se dicturum quae Cato . . scripsit: quae Cornelius Celsus, quae Frontinus . . perstringenda duxerunt. Idem Quintilianus lib. 10. cap. 1. Supersunt, inquit, qui de philosophia scripserunt, quo in genere paucissimos romanae litterae tulerunt. M. Tullius, qui, ut ubique, Platonis aemulus extitit . . Scripsit non parum multa Cornelius Celsus Scepticos sequutus, non sine cultu ac nitore. Jo. Alberto Fabricio videtur de hoc nostro accipiendum ait, quod S. Augustinus praef. lib. de Haeresibus opiniones omnium philosophorum usque ad tempora sua sex non parvis voluminibus Celsum quemdam absolvisse. Vide Supplem. Biblioth. Latinae. Id eo credibilius videtur, quod Quintilianus, ut supra dixi, de Historia quoque Celsum scripsisse innuit, Scepticos sequutus. Scilicet in rebus opinabilibus Scepticos sequutus est, ut in proëmio lib. 1. ubi ait: Quae demum causae vel secundam valetudinem praestent, vel morbos excitent; quomodo spiritus, aut cibus, vel trahatur, vel digeratur, ne sapientiae quidem professores scientia comprehendunt, sed coniectura persequuntur. Cuius autem rei non est certa notitia, eius opinio certum reperire remedium non potest; et in proëmio lib. 7.
Si-

Siquidem in morbis cum multum natura conferat, eademque saepe salutaria, saepe vana sint, potest dubitari secunda valetudo medicinae, an corporis beneficio contigerit. Non item Scepticos sequutus est, ubi de Agricultura, de Medicina, de Re Rhetorica, de Militari praecepta tradidit: nullus enim fructus ad Agricolas, ad Medicos, ad Rhetores, ad Duces ex perpetua dubitatione provenisset.

Itaque, cum de his omnibus artibus scripserit, iure Columella lib. 2. cap. 2. R. R. *Cornelium Celsum non solum agricolationis, sed etiam universae naturae prudentem virum appellavit.*

Sed antequam dico quibus praecedentibus morborum timor subsit, non alienum videtur exponere quae tempora anni, quae tempestatum genera, quae partes aetatis, qualia corpora maxime tuta, vel periculis opportuna sint. Non quod non omni tempore, in omni tempestatum genere, omnis aetatis, omnis habitus homines per omnia genera morborum et aegrotent, et moriantur: sed quod frequentius tamen quaedam eveniant; ideoque utile sit scire unumquemque, quid, et quando maxime caveat *pro. l. 2.* Morgagnus in Epist. 1. in Celsum retulit haec Plinii verba ex lib. 14. cap. 2. *Graecinus, qui aliqui Cornelium Celsum transcripsit; id est super helvenaca de qua ibi loquitur, vite Celsi ille iudicium descripserit.* Epistola autem IV. ait Celsum scripsisse, ut tardissime, ante Claudii imperium: idque confirmat insigni illo elogio Corn. Taciti in Agricola, quod *super-*

XVIII

perius attulimus, p. 14. Columella lib. 2. cap. 2. ita scribit: *Julius Atticus, et Cornelius Celsus nostrae aetatis celeberrimi auctores*; et lib. 3. cap. 7. *Celsus, et Atticus, quos in re rustica maxime nostra aetas probavit*. Bianconus Epistola VI. ita scribit: *Ego quoque contendo ex. gr. Marchionem Scipionem Maffeiū, et Ludovicum Muratorium, utrumque mihi maxime cognitum, quavis utrique multo me seniores, atque Europae noti ex multis eorum scriptis, annis prius fortasse triginta, quam ego nascerer*. Eademque ratione ego quoque possum dicere, doctissimum, mihiq̃ amicissimum virum Josephum Torellum meae aetatis fuisse, quamvis annos natus LIX. decesserit: cum ego tunc annum agerem LXII. nunc autem ad LXXX. pervenerim.

IDEM

Vt alimenta sanis corporibus Agricultura, sic sanitatem aegris Medicina promittit. Haec nusquam quidem non est: siquidem etiam imperitissimae gentes herbas, aliaeque prompta in auxilium vulnorum, morborumque noverunt. Verumtamen apud Graecos aliquanto magis, quam in ceteris nationibus, exulta est: ac ne apud hos quidem a prima origine, sed paucis ante nos saeculis; utpote cum vetustissimus auctor Aesculapius celebretur. Qui quoniam adhuc rudem et vulgarem hanc scientiam paulo subtilius excoluit, in deorum numerum receptus est. Huius deinde duo filii, Podalirius et Machaon, bello Troiano ducem Agamemnonem secuti, non modicam opem commilitonibus suis attulerunt. Quos tamen Homerus non in pestilentia, neque in variis generibus morborum aliquid attulisse auxilii; sed vulneribus tantummodo ferro et medicamentis mederi solitos esse proposuit. Ex quo apparet, has partes medicinae solas ab iis esse tractatas; easque esse vetustissimas. Eodemque auctore disci potest, morbos tum ad iram deorum immortalium relatos esse, et ab iisdem opem posci solitam. Verique simile est, inter nulla auxilia adversae valetudinis, plerumque tamen eam bonam contigisse ob bonos mores, quos neque desidia, neque luxuria vitiant: siquidem haec duo corpora prius in Graecia, deinde apud nos affligerunt. Ideoque multiplex ista medicina, neque olim, neque apud alias gentes

Cels. T. I. A

tes necessaria, vix aliquos ex nobis ad senectutis principia perducit. Ergo etiam post eos de quibus, retuli, nulli clari viri medicinam exercuerunt; donec maiore studio litterarum disciplina agitari coepit; quae ut animo praecipue omnium necessaria, sic corpori inimica est. Primoque medendi scientia sapientiae pars habebatur; ut et morborum curatio, et rerum naturae contemplatio sub iisdem auctoribus nata sit: scilicet iis hanc maxime requirentibus, qui corporum suorum robora, quieta cogitatione, nocturnaue vigilia minuerant. Ideoque multos ex sapientiae professoribus peritos eius fuisse accepimus; clarissimos vero ex iis Pythagoram, et Empedoclem, et Democritum. Huius autem, ut quidam crediderunt, discipulus Hippocrates Cous, primus quidem ex omnibus memoria dignis, ab studio sapientiae disciplinam hanc separavit: vir et arte et facundia insignis. Post quem Diocles Carystius, deinde Praxagoras et Chrysippus, tum Herophilus et Erasistratus sic artem hanc exercuerunt, ut etiam in diversas curandi vias processerint. Iisdemque temporibus in tres partes medicina ducta est: ut una esset quae victu; altera quae medicamentis; tertia quae manu mederetur. Primam *διαίτητικήν*, secundam *φαρμακευτικήν*, tertiam *χειρουργικήν* Graeci nominarunt. Eius autem quae victu morbos curat, longe clarissimi auctores, etiam altius quaedam agitare conati, rerum quoque naturae sibi cognitionem vindicarunt, tamquam sine ea trunca et debilis medicina esset. Post quos Serapion primus omnium, nihil hanc rationalem disciplinam pertinere ad medicinam professus, in usu tantum et experimentis eam posuit. Quem Apollonius, et Glaucias, et aliquanto post Heraclides Tarentinus, aliique non mediocres viri secuti, ex ipsa professione se *ἐμπειρικούς* appellaverunt. Sic in duas partes ea quoque quae victu curat medicina divisa est; aliis rationalem artem, aliis usum tantum si-

sibi vindicantibus : nullo vero quidquam post eos , qui supra comprehensi sunt , agitante , nisi quod acceperat : donec Asclepiades medendi rationem et magna parte mutavit . Ex cuius successoribus Themison nuper ipse quoque quaedam in senectute deflexit . Et per hos quidem maxime viros salutaris ista nobis professio increvit .

Quoniam autem ex tribus medicinae partibus , ut difficillima , sic etiam clarissima est ea quae morbis medetur , ante omnia de hac dicendum est . Et quia prima in ea dissensio est , quod alii sibi experimentorum tantummodo notitiam necessariam esse contendunt : alii , nisi corporum rerumque ratione comperta , non satis potentem usum esse proponunt : indicandum est quae maxime ex utraque parte dicantur , quo facilius nostra quoque opinio interponi possit . Igitur ii qui rationalem medicinam profitentur , haec necessaria esse proponunt : abditarum et morbos continentium causarum notitiam ; deinde evidentium ; post haec etiam naturalium actionum ; novissime partium interiorum . Abditas causas vocant , in quibus requiritur ex quibus principiis nostra corpora sint , quid secundam , quid adversam valetudinem faciat . Neque enim credunt posse eum scire quomodo morbos curare conveniat , qui unde hi sint ignoret . Neque esse dubium quin alia curatione opus sit , si ex quatuor principiis vel superans aliquid vel deficiens adversam valetudinem creat ; ut quidam ex sapientiae professoribus dixerunt : alia , si in humidis omne vitium est ; ut Herophilo visum est : alia , si in spiritu ; ut Hippocrati : alia , si sanguis in eas venas quae spiritui accommodatae sunt transfunditur , et inflammationem , quam Graeci *πλημονήν* nominant , excitat ; eaque inflammatio talem motum efficit , qualis in febre est ; ut Erasistrato placuit : alia , si manantia corpuscula per invisibilia foramina subsistendo iter

claudunt; ut Asclepiades contendit. Eum vero recte curaturum, quem prima origo causae non fefellerit. Neque vero inficiantur, experimenta quoque esse necessaria; sed ne ad haec quidem aditum fieri potuisse, nisi ab aliqua ratione contendunt. Non enim quidlibet antiquiores viros aegris inculcasse; sed cogitasse quid maxime conveniret, et id usu explorasse, quo ante coniectura aliqua duxisset. Neque interesse an nunc iam pleraque explorata sint, si a consilio tamen coeperunt. Et id quidem in multis ita se habere. Saepe vero etiam nova incidere genera morborum, in quibus nihil adhuc usus ostenderit; et ideo necessarium sit animadvertere unde ea coeperint; sine quo nemo reperire mortalium possit, cur hoc quam illo potius utatur. Et ob haec quidem in obscuro positas causas persequuntur. Evidentes vero eas appellant, in quibus quaerunt, initium morbi calor attulerit, an frigus; fames, an satietas; et quae similia sunt. Occursum enim initio dicunt eum qui originem non ignorarit. Naturales vero corporis actiones appellant, per quas spiritum trahimus et emittimus, cibum potionemque et assumimus et concoquimus: itemque per quas eadem haec in omnes membrorum partes digeruntur. Tum requirunt etiam quare venae nostrae modo submittant se, modo attollant, quae ratio somni, quae vigiliae sit: sine quorum notitia neminem putant vel occurrere, vel mederi morbis intra haec nascentibus posse. Ex quibus quia maxime pertinere ad rem concoctio videtur, huic potissimum insistunt; et duce alii Erasistrato, teri cibum in ventre contendunt; alii Plistonico Praxagorae discipulo, putrescere; alii credunt Hippocrati, per calorem cibos concoqui: acceduntque Asclepiadis aemuli, qui omnia ista vana et supervacua esse proponunt; nihil enim concoqui, sed crudam materiam, sicut assumpta est, in corpus omne dudu-

duci. Et haec quidem inter eos parum constant: illud vero convenit, alium dandum cibum laborantibus, si hoc; alium, si illud verum est. Nam si teritur intus, eum quaerendum esse qui facillime teri possit; si putrescit, eum in quo hoc expeditissimum est; si calor concoquit, eum qui maxime calorem movet: at nihil ex his esse quaerendum, si nihil concoquitur; ea vero sumenda, quae maxime manent qualia assumpta sunt. Eademque ratione cum spiritus gravis est, cum somnus aut vigilia urget, eum mederi posse arbitrantur, qui prius illa ipsa qualiter eveniant perceperit. Praeter haec cum in interioribus partibus et dolores et morborum varia genera nascantur, neminem putant his adhibere posse remedia qui ipsas ignoret. Necessarium ergo esse incidere corpora mortuorum, eorumque viscera atque intestina scrutari; longaeque optime fecisse Herophilum et Erasistratum, qui nocentes homines a regibus ex carcere acceptos vivos inciderint, considerarintque, etiamnum spiritu remanente, ea quae natura ante clausisset, eorumque positum, colorem, figuram, magnitudinem, ordinem, duritiem, mollitiem, laevorem, contactum; processus deinde singulorum, et recessus; et sive quid inseritur alteri, sive quid partem alterius in se recipit. Neque enim cum dolor intus incidit, scire quid doleat, eum qui qua parte quodque viscus intestinumve sit non cognoverit: neque curari id quod aegrum est, posse ab eo qui quid sit ignoret. Et cum per vulnus alicuius viscera patefacta sunt, eum qui sanae cuiusque colorem partis ignoret, nescire quid integrum, quid corruptum sit: ita ne succurrere quidem posse corruptis. Aptiusque extrinsecus imponi remedia, compertis interiorum et sedibus et figuris, cognitaque eorum magnitudine: similesque omnia quae proposita sunt, rationes habere. Neque esse

crudele, sicut plerique proponunt, hominum nocentium, et horum quoque paucorum, suppliciiis remedia populis innocentibus saeculorum omnium quaeri.

Contra ii qui se *ἐμπειρικοὺς* ab experientia nominant, evidentes quidem causas, ut necessarias, amplectuntur: obscurarum vero causarum, et naturalium actionum quaestionem ideo supervacuum esse contendunt, quoniam non comprehensibilis natura sit. Non posse vero comprehendi, patere ex eorum quide his disputarunt discordia; cum de ista re, neque inter sapientiae professores, neque inter ipsos medicos conveniat. Cur enim potius aliquis Hippocrati credat, quam Herophilo? cur huic potius, quam Asclepiadi? Si rationes sequi velit, omnium posse videri non improbables; si curationes, ab omnibus his aegros perductos esse ad sanitatem. Itaque neque disputationi, neque auctoritati cuiusquam fidem derogari oportuisse. Etiam sapientiae studiosos maximos medicos esse, si ratiocinatio hoc faceret; nunc illis verba superesse, deesse medendi scientiam. Differre quoque pro natura locorum genera medicinae; et aliud opus esse Romae, aliud in Aegypto, aliud in Gallia. Quod si morbos eae causae facerent, quae ubique eadem essent, remedia quoque ubique eadem esse debuissent. Saepe etiam causas apparere, ut ptilipititudinis, vulneris; neque ex his patere medicinam. Quod si scientiam hanc non subiiciat evidens causa, multo minus eam posse subiicere, quae in dubio est. Cum igitur illa incerta, incomprehensibilis sit, a certis potius, et exploratis petendum esse praesidium; id est iis quae experientia in ipsis curationibus docuerit; sicut in ceteris omnibus artibus. Nam ne agricolam quidem, aut gubernatorem disputatione, sed usu fieri. Ac nihil istas cogitationes ad medicinam pertinere eo quoque disci, quod qui diversa de his senserint, ad eandem tamen sanitatem homines perduxerint. Id enim fecis-

cisse, quia non ab obscuris causis, neque a naturalibus actionibus, quae apud eos diversae erant; sed ab experimentis, prout cuique responderant, medendi vias traxerint. Ne inter initia quidem ab istis quaestionibus deductam esse medicinam, sed ab experimentis. Aegrorum enim qui sine medicis erant, alios propter aviditatem primis diebus protinus cibum assumpsisse, alios propter fastidium abstinuisse; levatumque magis eorum morbum esse, qui abstinerant. Itemque alios in ipsa febre aliquid edisse, alios paulo ante eam, alios post remissionem eius, optime deinde iis cessisse, qui post finem febris id fecerant. Eademque ratione alios inter principia protinus usos esse cibo pleniore, alios exiguo; gravioresque eos factos, qui se implerant. Haec similiaque cum quotidie inciderent, diligentes homines notasse, quae plerumque melius responderent: deinde aegrotantibus ea praecipere coepisse. Sic medicinam ortam, subinde aliorum salute, aliorum interitu, perniciose discernentem a salutaribus. Repertis deinde iam remediis, homines de rationibus eorum disserere coepisse: nec post rationem, medicinam esse inventam; sed post inventam medicinam, rationem esse quaesitam. Requiritur etiam ratio idem doceat, quod experientia, an aliud: si idem, supervacuam esse; si aliud, etiam contrariam. Primo tamen remedia exploranda summa cura fuisse; nunc vero iam explorata esse: neque aut nova genera morborum reperiri, aut novam desiderari medicinam. Quod si iam incidat mali genus aliquod ignotum, non ideo tamen fore medico de rebus cogitandum obscuris; sed eum protinus visurum, cui morbo id proximum sit; tentaturumque remedia similia illi quae vicino malo saepe succurrerint; et per eius similitudinem opem reperturum. Neque enim se dicere, consilio medicum non egere, et irrationale animal hanc artem posse praestare;

sed has latentium rerum coniecturas ad rem non pertinere; quia non intersit, quid morbum faciat, sed quid tollat; neque ad rem pertineat quomodo, sed quid optime digeratur; sive hac de causa concoctio incidat, sive de illa; et sive concoctio sit illa, sive tantum digestio. Neque quae rendum esse quomodo spiremus, sed quid gravem tardumque spiritum expediat; neque quid venas moveat, sed quid quaeque motus genera significant. Haec autem cognosci experimentis. Et in omnibus eiusmodi cogitationibus in utramque partem disseri posse; itaque ingenium et facundiam vincere; morbos autem, non eloquentia, sed remediis curari. Quae si quis elinguis usu discreta bene norit, hunc aliquanto maiorem medicum futurum, quam si sine usu linguam suam excoluerit. Atque ea quidem de quibus est dictum, supervacua esse tantummodo; id vero quod restat, etiam crudele: vivorum hominum alvum atque praecordia incidi; et salutis humanae praesidem artem, non solum pestem alicui, sed hanc etiam atrocissimam inferre; cum praesertim ex iis quae tanta violentia quaerantur, alia non possint omnino cognosci, alia possint etiam sine scelere. Nam colorem, laevorem, mollitiem, duritiem, similiaque omnia, non esse talia, inciso corpore, qualia integro fuerint: quia cum, corporibus inviolatis, haec tamen metu, dolore, inedia, cruditate, lassitudine, mille aliis mediocribus affectibus saepe mutantur; multo magis verisimile est, interiora, quibus maior mollities, et lux ipsa nova fit, sub gravissimis vulneribus et ipsa trucidatione mutari. Neque quidquam esse stultius, quam quale quid vivo homine est, tale existimare esse moriente, immo iam mortuo. Nam utrumquidem, qui minus ad rem pertineat, spirante homine posse diduci: simul atque vero ferrum ad praecordia accessit, et discissum transversum septum est,

est, quod membrana quadam superiores partes ab inferioribus diducit (*διάσπαγμα* Graeci vocant) hominem protinus animam amittere : ita mortui. demum praecordia, et viscus omne in conspectum latrocinantis medici dari necesse est tale, quale mortui sit, non quale vivi fuit. Itaque consequi medicum, ut hominem crudeliter iugulet : non ut sciat, qualia vivi viscera habeamus. Si quid. tamen sit, quod adhuc spirante homine conspectui subiiciatur, id saepe casum offerre curantibus. Interdum enim gladiatorem in arena, vel militem in acie, vel viatorem a latronibus exceptum sic vulnerari, ut eius interior aliqua pars aperiatur, et in alio alia : ita sedem, positum, ordinem, figuram, similiaque cognoscere prudentem medicum, non caedem, sed sanitatem molientem ; idque per misericordiam discere, quod alii dira crudelitate cognorint. Ob haec ne mortuorum quidem lacerationem necessariam esse ; quae, etsi non crudelis, tamen foeda sit ; cum aliter pleraque in mortuis se habeant : quantum vero in vivis cognosci potest, ipsa curatio ostendat.

Cum haec per multa volumina, perque magnae contentionis disputationes a medicis saepe tractata sint atque tractentur ; subiiciendum est, quae proxima vero videri possint. Ea neque addicta alterutri opinioni sunt, neque ab utraque nimium abhorrentia ; sed media quodammodo inter diversas sententias : quod in plurimis contentionibus deprehendere licet, sine ambitione verum scrutantibus ; ut in hac ipsa re. Nam quae demum causae vel secundam valetudinem praestent, vel morbos excitent ; quomodo spiritus, aut cibus, vel trahatur, vel digeratur, ne sapientiae quidem professores scientia comprehendunt, sed conjectura prosequuntur. Cuius autem rei non est certa notitia, eius opinio certum reperire remedium non po-

potest . Verumque est , ad ipsam curandi rationem nihil plus conferre , quam experientiam . Quamquam igitur multa sint ad ipsas artes proprie non pertinentia , tamen eas adiuvant , excitando artificis ingenium . Itaque ista quoque naturae rerum contemplatio , quamvis non faciat medicum , aptiorem tamen medicinae reddit . Verique simile est et Hippocratem , et Erasistratum , et quicumque alii non contenti febres et ulcera agitare , rerum quoque naturam ex aliqua parte scrutati sunt , non ideo quidem medicos fuisse , verum ideo quoque maiores medicos extitisse . Ratione vero opus est ipsi medicinae , etsi non inter obscuras causas , neque inter naturales actiones , tamen saepe . Est enim haec ars coniecturalis ; neque respondet ei plerumque non solum coniectura , sed etiam experientia . Et interdum non febris , non cibus , non somnus subsequitur , sicut assuevit . Rarius , sed aliquando morbus quoque ipse novus est : quem non incidere , manifeste falsum est ; cum aetate nostra quaedam , ex naturalibus partibus carne prolapsa et arente , intra paucas horas expiraverit sic , ut nobilissimi medici neque genus mali , neque remedium invenerint . Quos eo nihil tentasse iudico , quia nemo in splendida persona periclitari coniectura sua voluerit ; ne occidisse , nisi servasset , videretur : veri tamen simile est , potuisse aliquid cogitari , detracta tali verecundia ; et fortasse responsurum fuisse id quod aliquis esset expertus . Ad quod medicinae genus neque semper similitudo aliquid confert ; et si quando confert , tamen id ipsum rationale est , inter multa similia genera et morborum , et remediorum , cogitare , quo potissimum medicamento sit utendum . Cum igitur talis res incidit , medicus aliquid oportet inveniat , quod non utique fortasse , sed saepius tamen etiam respondeat . Petet autem novum quoque consilium , non ab rebus
la-

latentibus (istae enim dubiae et incertae sunt) sed ab iis quae explorari possunt ; id est evidentibus causis . Interest enim , fatigatio morbum , an sitis , an frigus , an calor , an vigilia , an fames fecerit , an cibi vinique abundantia , an intemperantia libidinis . Neque ignorare hunc oportet , quae sit aegri natura : humidum magis , an magis siccum corpus eius sit ; validi nervi , an infirmi ; frequens adversa valetudo , an rara ; eaque , cum est , vehemens esse soleat , an levis ; brevis , an longa : quod is vitae genus sit secutus , laboriosum , an quietum ; cum luxu , an cum frugalitate . Ex his enim , similibusque saepe curandi nova ratio ducenda est .

Quamvis ne haec quidem sic praeteriri debent , quasi nullam controversiam recipiant . Nam et Erasistratus non ex his fieri morbos dixit ; quoniam et alii , et iidem alias post ista non febricitarent : et quidam medici saeculi nostri , sub auctore , ut ipsi videri volunt , Themisone , contendunt , nullius causae notitiam quidquam ad curationes pertinere ; satisque esse , quaedam communia morborum intueri . Siquidem horum tria genera esse ; unum adstrictum , alterum fluens , tertium mixtum . Nam modo parum excernere aegros , modo nimium ; modo alia parte parum , alia nimium . Haec autem genera morborum modo acuta esse , modo longa : et modo increscere , modo consistere , modo minui . Cognito igitur eo quod ex his est , si corpus adstrictum est , digerendum esse ; si profluvio laborat , continendum ; si mixtum vitium habet , occurrendum subinde vehementiori malo . Et aliter acutis morbis medendum ; aliter vetustis ; aliter increscentibus ; aliter subsistentibus ; aliter iam ad sanitatem inclinatis . Horum observationem medicinam esse : quam ita finiunt , ut quasi viam quamdam , quam *μίσδορος* Graeci nominant , eorumque quae in morbis communia sunt , contemplati-

cem

cem esse contendant. Ac neque rationalibus se, neque experimenta tantum spectantibus adnumerari volunt: cum ab illis eo nomine dissentiant, quod in coniectura rerum latentium nolunt esse medicinam; ab his eo, quod parum artis esse in observatione experimentorum credunt. Quod ad Erasistratum pertinet, primum ipsa evidentia eius opinioni repugnat; quia raro, nisi post horum aliquid, morbus venit. Deinde non sequitur, ut quod alium non afficit, aut eundem alias, id ne alteri quidem, aut eidem tempore alio noceat. Possunt enim quaedam subesse corpori, vel ex infirmitate eius, vel ex aliquo affectu, quae vel in alio non sunt, vel in hoc alias non fuerunt; eaque per se non tanta, ut concitent morbum; tamen obnoxium magis aliis iniuriis corpus efficiant. Quod si contemplationem rerum naturae; quam non temere Medici sibi vindicant; satis comprehendisset, etiam illud scisset, nihil omnino ob unam causam fieri, sed id pro causa apprehendi, quod contulisse plurimum videtur. Potest autem id, dum solum est, non movere, quod iunctum aliis maxime movet. Accedit ad haec, quod ne ipse quidem Erasistratus; qui transfuso in arterias sanguine febrem fieri dicit, idque nimis repleto corpore incidere; reperit, cur ex duobus aequè repletis, alter in morbum inciderit, alter omni periculo vacarit: quod quotidie fieri apparet. Ex quo disci potest, ut vera sit illa transfusio, tamen illam non per se cum plenum corpus est, fieri; sed cum horum aliquid accesserit. Themisonis vero aemuli, si perpetua, quae promittunt, habent, magis etiam quam ulli, rationales sunt. Neque enim, si quis non omnia tenet, quae rationalis alius probat, protinus alio novo nomine artis indiget; si modo, quod primum est, non memoriae soli, sed rationi quoque insistit. Sin, quod vero propius est, vix ulla perpetua praecepta me-

di-

dicinalis ars recipit, iidem sunt, quod ii, quos experimenta sola sustinent: eo magis quoniam, compresserit aliquem morbus, an fuderit, quilibet etiam imperitissimus videt: quid autem compressum corpus resolvat, quid solutum teneat, si a ratione tractum est, rationalis est medicus; si, ut ei qui se rationalem negat, confiteri necesse est, ab experientia, empiricus. Ita apud eum morbi cognitio extra artem, medicina intra usum est. Neque adiectum quidquam empiricorum professioni, sed demptum est; quoniam illi multa circumspiciunt, hi tantum facillima, et non plus, quam vulgaria. Nam et ii qui pecoribus ac iumentis medentur, cum propria cuiusque ex mutis animalibus nosse non possint, communibus tantummodo insistent: et exteræ gentes, cum subtilem medicinae rationem non noverint, communia tantum vident: et qui ampla valetudinaria nutriunt, quia singulis summa cura consulere non sustinent, ad communia ista confugiunt. Neque, hercules, istud antiqui medici nescierunt, sed his contenti non fuerunt. Ergo etiam vetustissimus auctor Hippocrates dixit, mederi oportere, et communia, et propria intuentem. Ac ne isti quidem ipsi intra suam professionem consistere ullo modo possunt: siquidem et compressorum et fluentium morborum genera diversa sunt; faciliusque id in iis quæ fluunt, inspicere potest. Aliud est enim sanguinem, aliud bilem, aliud cibum vomere; aliud deiectionibus, aliud torminibus laborare; aliud sudore digeri, aliud tabe consumi. Atque in partes quoque humor erumpit, ut in oculos, auresque: quo periculo nullum humanum membrum vacat. Nihil autem horum sic, ut aliud, curatur. Ita protinus in his a communi fluentis morbi contemplatione ad propriam medicina descendit. Atque in hac quoque rursus alia proprietatis notitia sæpe necessaria est; quia non eadem omnibus, etiam in si-

mi-

milibus casibus, opitulatur: siquidem certae quaedam res sunt, quae in pluribus ventrem aut adstringunt, aut resolvunt; inveniuntur tamen, in quibus aliter, atque in ceteris, id eveniat. In his ergo communium inspectio contraria est, propriorum tantum salutaris. Et causae quoque aestimatio saepe morbum solvit. Ergo etiam ingeniosissimus saeculi nostri medicus, quem nuper vidimus, Cassius, febricitanti cuidam, et magna siti affecto, cum post ebrietatem cum premi coepisse cognosset, aquam frigidam ingessit. Qua ille epota, cum vini vim miscendo fregisset, protinus febrem somno et sudore discussit. Quod auxilium medicus opportune providit, non ex eo quod aut adstrictum corpus erat, aut fluctabat; sed ex ea causa, quae ante praecesserat. Estque etiam proprium aliquid et loci et temporis, istis quoque auctoribus: qui cum disputant, quemadmodum sanis hominibus agendum sit, praecipiunt, ut gravibus aut locis aut temporibus magis vitetur frigus, aestus, satietas, labor, libido; magisque ut conquiescat iisdem locis, aut temporibus, si quis gravitatem corporis sentit; ac neque vomitu stomachum, neque purgatione alvum sollicitet. Quae vera quidem sunt; a communibus tamen ad quaedam propria descendunt. Nisi persuadere nobis volunt, sanis quidem considerandum esse, quod coelum, quod tempus anni sit; aegris vero non esse: quibus tanto magis omnis observatio necessaria est, quanto magis obnoxia offensae infirmitas est. Quin etiam morborum in iisdem hominibus aliae atque aliae proprietates sunt: et qui secundis aliquando frustra curatus est, contrariis saepe restituitur. Plurimaeque in dando cibo discrimina reperiuntur; ex quibus contentus uno ero. Nam famem facilius adolescens, quam puer; facilius in denso coelo, quam in tenui; facilius hieme, quam aestate; facilius uno cibo, quam prandio quoque

assuetus; facilius inexercitatus, quam exercitatus homo sustinet. Saepe autem in eo magis necessaria cibi festinatio est, qui minus inediam tolerat. Ob quae concipio, eum qui propria non novit, communia tantum intueri debere; eumque qui nosse propria potest, illa quidem non oportere negligere, sed his quoque insistere. Ideoque, cum par scientia sit, utiliore tamen medicum esse amicum, quam extraneum. Igitur, ut ad propositum meum redeam, rationalem quidem puto medicinam esse debere: instrui vero ab evidentibus causis; obscuris omnibus, non a cogitatione artificis, sed ab ipsa arte reiectis. Incidere autem vivorum corpora, et crudele, et supervacuum est: mortuorum, discantibus necessarium. Nam positum et ordinem nosse debent: quae cadavera melius, quam vivus et vulneratus homo, repraesentant. Sed et cetera, quae modo in vivis cognosci possunt, in ipsis curationibus vulneratorum paulo tardius, sed aliquanto mitius usus ipse monstrabit. His propositis, primum dicam, quemadmodum sanos agere conveniat; tum ad ea transibo, quae ad morbos curationesque eorum pertinebunt.

C A P U T I.

QUEMADMODUM SANOS AGERE CONVENIAT .

Sanus homo, qui et bene valet, et suae spontis est, nullis obligare se legibus debet; ac neque medico, neque alicui egere. Hunc oportet varium habere vitae genus: modo ruri esse, modo in urbe, saepiusque in agro; navigare, venari, quiescere interdum, sed frequentius se exercere: siquidem ignavia corpus hebetat, labor firmat; illa maturam senectutem, hic longam adolescentiam reddit. Prodest etiam interdum balneo, interdum aquis
sci-

frigidis uti ; modo ungi , modo id ipsum negligere ; nullum cibi genus fugere , quo populus utatur ; interdum in convivio esse , interdum ab eo se retrahere ; modo plus iusto , modo non amplius assumere ; bis die potius , quam semel cibum capere , et semper quam plurimum dummodo hunc concoquat . Sed ut huius generis exercitationes cibique necessarii sunt ; sic athletici supervacui . Nam et intermissus propter civiles aliquas necessitates ordo exercitationis corpus affligit ; et ea corpora , quae more eorum repleta sunt , celerrime et senescunt , et aegrotant .

De Concubitu.

Concubitus vero neque nimis concupiscendus , neque nimis pertimescendus est : rarus , corpus excitat , frequens , solvit . Cum autem frequens , non numero sit , sed ratione aetatis et corporis , scire licet , eum non inutilem esse , quem corporis neque languor , neque dolor sequitur . Idem interdum peior est , noctu tutior : ita tamen , si neque illum cibus , neque hunc cum vigilia labor statim sequitur . Haec firmis servanda sunt ; cavendumque , ne in secundae valetudine adversae praesidia consumantur .

C A P U T II.

QUAE IMBECILLIS SERVANDA SINT.

At imbecillis , quo in numero magna pars urbanorum , omnesque pene cupidi litterarum sunt , observatio maior necessaria est : ut quod vel corporis , vel loci , vel studii ratio detrahit , cura restituat . Ex his igitur , qui bene concoxit , mane tuto surget ; qui parum , quiescere debet , et si mane surgendi necessitas fuerit , redormire : qui non concoxit ,

coxit, ex toto conquiescere; ac neque labori se, neque exercitationi, neque negotio credere. Qui crudum sine praecordiorum dolore ructat, is ex intervallo aquam frigidam bibere, et se nihilo minus continere. Habitare vero aedificio lucido, perflatum aestivum, hibernum solem habente; cavere meridianum solem, matutinum et vespertinum frigus; itemque auras fluminum atque stagnorum; minimeque, nubilo coelo, soli aperienti se committere, ne modo frigus, modo calor moveat: quae res maxime gravedines destillationesque concitat. Magis vero gravibus locis ista servanda sunt; in quibus etiam pestilentiam faciunt. Scire autem licet, integrum corpus esse, cum quotidie mane urina alba, deinde rufa est: illud concoquere, hoc concoxisse significat. Ubi expectatus est aliquis, paulum intermittere: deinde, nisi hiems est, fovere os multa aqua frigida debet. Longis diebus meridiari potius ante cibum; sin minus, post eum: per hiemem potissimum totis noctibus conquiescere. Sin lucubrandum est, non post cibum id facere, sed post concoctionem. Quem interdiu vel domestica, vel civilia officia tenuerunt, huic tempus aliquod servandum curationi corporis sui est. Prima autem eius curatio, exercitatio est; quae semper antecedere cibum debet: in eo qui minus laboravit, et bene concoxit, amplior; in eo qui fatigatus est, et minus concoxit, remissior. Commode vero exercent clara lectio, arma, pila, cursus, ambulatio; atque haec non utique plana commodior est; siquidem melius ascensus quoque et descensus, cum quadam varietate corpus movet; nisi tamen id perquam imbecillum est. Melior autem est sub dio, quam in porticu; melior, si caput patitur, in sole, quam in umbra; melior in umbra, quam parietes aut viridia efficiunt, quam quae tecto subest; melior recta, quam flexuosa. Exercitationis autem plerum-

Cels. T. I.

B

que

que finis esse debet sudor, aut certe lassitudo quae citra fatigationem sit: idque ipsum modo minus, modo magis faciendum est. Ac ne his quidem, athletarum exemplo, vel certa esse lex, vel inmodicus labor debet. Exercitationem recte sequitur, modo unctio vel in sole, vel ad ignem; modo balneum, sed conclavi quam maxime et alto et lucido et spatioso. Ex his vero neutrum semper fieri oportet; sed saepius alterutrum, pro corporis natura. Post haec paulum conquiescere opus est. Ubi ad cibum ventum est, nunquam utilis est nimia satietas; saepe inutilis nimia abstinencia: si qua intemperantia subest, tutior est in potione, quam in esca. Cibus a salsamentis, oleribus, similibusque rebus melius incipit: tum caro assumenda est, quae assa optima, aut elixa est. Conditia omnia duabus de causis inutilia sunt; quoniam et plus propter dulcedinem assumitur, et quod modo par est, tamen aegrius concoquitur. Secunda mensa bono stomacho nihil nocet; in imbecillo coarcescit. Si quis itaque hoc parum valet, palmulas, pomaeque, et similia melius primo cibo assumit. Post multas portiones quae aliquantum sitim excesserunt, nihil edendum est: post satietatem, nihil agendum. Ubi expletus est aliquis, facilius concoquit, si quidquid assumpsit, potione aquae frigidae includit; tum paulisper invigilat; deinde bene dormit. Si quis interdum se implevit, post cibum neque frigori, neque aestui, neque labori se debet committere: neque enim tam facile haec inani corpore, quam repleto nocent. Si quibus de causis futura inedia est, labor omnis vitandus est.

C A P U T III.

OBSERVATIONES QUÆDAM , PROUT RES NOVAE INCIDUNT ,
ET CORPORUM GENERA , ET SEXUS , ET ÆTATES ,
ET TEMPORA ANNI SUNT .

Atque hæc quidem pene perpetua sunt . Quasdam autem observationes desiderant et novae res , et corporum genera , et sexus , et ætates , et tempora anni . Nam neque ex salubri loco in gravem , neque ex gravi in salubrem transitus satis tutus est . Ex salubri in gravem , prima hieme ; ex gravi in eum , qui salubris est , prima æstate transire melius est . Neque vero ex multa fame nimia satietas , neque ex nimia satietate fames idonea est . Periclitaturque , et qui semel , et qui bis die cibum continenter contra consuetudinem assumit . Item neque ex nimio labore subitum otium , neque ex nimio otio subitus labor , sine gravi noxa est . Ergo cum quis mutare aliquid velit , paulatim debet assuescere . Omnem etiam laborem facilius vel puer vel senex , quam insuetus homo sustinet . Atque ideo quoque nimis otiosa vita utilis non est ; quia potest incidere laboris necessitas . Si quando tamen insuetus aliquis laboravit , aut si multo plus , quam solet , etiam is qui assuevit , huic ieiuno dormiendum est : multo magis , si etiam os amarum est , vel oculi caligant , aut venter perturbatur . Tum enim non dormiendum tantummodo ieiuno est ; sed etiam in posterum diem permanendum ; nisi cito id quies sustulit . Quod si factum est , surgere oportet , et lente paulum ambulare . At si somni necessitas non fuit , quia modice magis aliquis laboravit , tamen ingredi aliquid eodem modo debet . Communia deinde omnibus sunt post fatigationem cibum sumpturis , ubi paulum ambulaverunt , si balneum non est , calido

loco, vel in sole, vel ad ignem ungi, atque sudare; si est, ante omnia in tepidario sedere; deinde, ubi paulum conquieverunt, intrare et descendere in solium; tum multo oleo ungi, leniterque perfricari; iterum in solium descendere: post haec os aqua calida, deinde frigida fovere. Balneum his fervens idoneum non est. Ergo si nimium alicui fatigato pene febris est, huic abunde est loco tepido demittere se inguinibus tenus in aquam calidam, cui paulum olei sit adiectum: deinde totum quidem corpus, maxime tamen eas partes quae in aqua fuerunt, leniter perfricare ex oleo, cui vinum et paulum contriti salis sit adiectum. Post haec omnibus fatigatis aptum est cibum sumere, eoque humido uti; aqua, vel certe diluta potione esse contentos; maximeque ea quae moveat urinam. Illud quoque nosse oportet, quod ex labore sudanti frigida potio perniciosissima est; atque etiam cum sudor se remisit, itinere fatigatis inutilis. A balneo quoque venientibus Asclepiades inutilem eam iudicavit: quod in iis rerum est, quibus alvus facile, nec tuto, resolvitur, quique facile inhorrescunt; perpetuum in omnibus non est, cum potius naturale sit, potione aestuantem stomachum refrigerari. Quod ita praecipio, ut tamen fatear, ne ex hac quidem causa sudanti adhuc frigidum bibendum esse. Solet etiam prodesse, post varium cibum, frequentesque dilutas potiones, vomitus; et postero die longa quies, deinde modica exercitatio. Si assidua fatigatio urget, invicem modo aqua, modo vinum bibendum est, raroque balneo utendum. Levatque lassitudinem etiam laboris mutatio; eumque quem novum genus laboris pressit, id quod in consuetudine est, reficit. Fatigato quotidianum cubile tutissimum est: insolitum contra, lassat. Quod enim contra consuetudinem est, nocet, seu molle, seu durum est.

Pro-

Proprie quaedam ad eum pertinent, qui ambulando fatigatur. Hunc reficit in ipso quoque itinere frequens frictio; post iter, primum sedile, deinde unctio: tum calida aqua in balneo magis inferiores partes, quam superiores foveat. Si quis vero exustus in sole est, huic in balneum protinus eundum, perfundendumque oleo corpus et caput; deinde in solium bene calidum descendendum est; tum multa aqua per caput infundenda, prius calida, deinde frigida. At ei qui perfrixit, opus est in balneo primum involuto sedere, donec insudet; tum ungi; deinde lavari: cibum modicum, portiones meracas assumere. Is vero qui navigavit, et nausea pressus est, si multam bilem evomuit, vel abstinere a cibo debet, vel paulum aliquid assumere: si pituitam acidam effudit, utique sumere cibum, sed assueto leviores: si sine vomitu nausea fuit, vel abstinere, vel post cibum vomere. Qui vero toto die vel in vehiculo, vel in spectaculis sedit, huic nihil currendum, sed lente ambulandum est: lenta quoque in balneo mora, dein coena exigua prodesse consueverunt. Si quis in balneo aestuat, reficit hunc ore exceptum, et in eo retentum acetum: si id non est, eodem modo frigida aqua assumpta.

Ante omnia autem norit quisque naturam sui corporis: quoniam alii graciles, alii obesi sunt; alii calidi, alii frigidiores; alii humidi, alii sicci; alios adstricta, alios resoluta alvus exercet: raro quisquam non aliquam partem corporis imbecillam habet. Tenuis vero homo implere se debet, plenus extenuare, calidus refrigerare, frigidus calefacere, madens siccare, siccus madefacere: itemque alvum firmare is cui fusa, solvere is cui adstricta est: succurrendumque semper parti maxime laboranti est.

De causis, quae implent corpus.

Implet autem corpus modica exercitatio, frequentior quies, unctio, et, si post prandium est, balneum, contracta alvus, modicum frigus hieme, somnus et plenus et non nimis longus, molle cubile, animi securitas, assumpta per cibos et potiones maxime dulcia et pingua, cibus et frequentior et quantus plenissimus potest concoqui.

De his, quae extenuant corpus.

Extenuat corpus aqua calida, si quis in eam descendit, magisque si salsa est, in ieiuno balneum, inurens sol, et omnis calor, cura, vigilia, somnus nimium vel brevis vel longus; lectus per aestatem, terra; hieme, durum cubile; cursus, multa ambulatio, omnisque vehemens exercitatio, vomitus; deiection, acidae res et austerae et semel die assumptae, et vini non perfrigidi potio ieiuno in consuetudinem adducta.

Cum vero inter extenuantia posuerim vomitum et deiectionem, de his quoque proprie quaedam dicenda sunt. Eiectum esse ab Asclepiade vomitum in eo volumine, quod de tuenda sanitate composuit, video: neque reprehendo, si offensus eorum est consuetudine, qui quotidie eiiciendo, vorandi facultatem moliantur. Paulo etiam longius processit: idem purgationes quoque eodem volumine expulit. Et sunt eae perniciosae, si nimis valentibus medicamentis fiunt. Sed haec tamen submovenda esse, non est perpetuum; quia corporum temporumque ratio potest ea facere necessaria, dum et modo, et non nisi cum opus est, adhibeantur. Ergo ille quoque ipse, si quid iam corruptum esset, expelli debere, confessus est. Ita non ex toto res condem-

nam

manda est . Sed esse eius etiam plures causae possunt ; estque in ea quaedam paulo subtilior observatio adhibenda .

De Vomitu .

Vomitus utilior est hieme , quam aestate : nam tunc et pituitae plus , et capitis gravitas maior subest . Inutilis est gracilibus , et imbecillum stomachum habentibus : utilis plevis et biliosis omnibus , si vel nimium se replerunt , vel parum concoxerunt . Nam sive plus est , quam quod concoqui possit , periclitari ne corrumpatur , non oportet : sive corruptum est , nihil commodius est , quam id , qua via primum expelli potest , eiicere . Itaque ubi amari ructus cum dolore et gravitate praecordiorum sunt , ad hunc protinus confugiendum est . Idem prodest ei cui pectus aestuat , et frequens saliva , vel nausea est ; aut sonant aures , aut madent oculi , aut os amarum est ; similiterque ei qui vel coelum , vel locum mutat ; iisque quibus , si per plures dies non vomuerunt , dolor praecordia infestat . Neque ignoro inter haec praecipui quietem : quae non semper contingere potest agendi necessitatem habentibus ; nec in omnibus idem facit . Itaque istud luxuriae causa fieri non oportere , confiteor ; interdum valetudinis causa recte fieri , experimentis credo : cum eo tamen , ne quis qui valere et senescere volet , hoc quotidianum habeat . Qui vomere post cibum vult , si ex facili facit , aquam tantum tepidam ante debet assumere ; si difficilius , aquae vel salis , vel mellis paulum adficere . At qui mane vomiturus est , ante bibere mulsum , vel hysopum , aut esse radiculam debet ; deinde aquam tepidam , ut supra scriptum est , bibere . Cetera quae antiqui medici praeceperunt , stomachum omnia infestant . Post vomitum , si stomachum omnia in-

festant. Post vomitum, si stomachus infirmus est, paulum cibi, sed huius idonei, gustandum, et aquae frigidae cyathi tres bibendi sunt; nisi tamen fauces vomitus exasperarit. Qui vomuit, si mane id fecit, ambulare debet, tum ungi, deinde coenare: si post coenam, postero die lavari, et in balneo sudare. Huic proximus cibus mediocris utilior est; isque esse debet cum pane hesterno, vino austero meracco, et carne assa, cibusque omnibus quam siccissimis. Qui vomere bis in mense volet, melius consullet, si biduo continuerit, quam si post quintumdecimum diem vomuerit; nisi haec mora gravitatem pectori faciet.

De Deiectionibus.

Deiectio autem a medicamento quoque petenda est, ubi venter suppressus parum reddit, ex eoque inflationes, caligines, capitis dolores, aliaque superioris partis mala increscunt. Quid enim inter haec adiuvari possunt quies et inedia, per quae illa maxime eveniunt? Qui deicere vult, primum cibis vinisque utatur iis quae hoc praestant; dein, si parum illa proficiant, aloën sumat. Sed purgationes quoque, ut interdum necessariae sunt, sic, ubi frequentes sunt, periculum afferunt. Assuescit enim non ali corpus; cum omnibus morbis obnoxia maxime infirmitas sit.

De his, quae calefaciunt, et refrigerant corpus.

Calefacit autem unctio, aqua salsa, magisque si calida est, omnia salsa, amara, carnosae, si post cibum est, balneum, vinum austereum. Refrigerat in ieiuno et balneum, et somnus, nisi nimis longus est; omnia acida; aqua quam frigidissima; oleum, si aqua miscetur.

De

De his , quae humidant , et siccant .

Humidum autem corpus efficit labor minor , quam ex consuetudine , frequens balneum , cibus plenior , multa potio ; post haec ambulatio et vigilia : per se quoque ambulatio multa et vehemens , et matutinae exercitationi non protinus cibus adiectus ; ea genera escae quae veniunt ex locis frigidis et pluviis et irriguis . Contra siccant immodica exercitatio , fames , unctio sine aqua , calor , sol immodicus , frigida aqua , cibus exercitationi statim subiectus , et is ipse ex siccis et aestuosis locis veniens .

De his , quae alvum adstringunt , et solvunt .

Alvum adstringit labor , sedile , creta figularis corpori illita , cibus imminutus , et is ipse semel die assumptus ab eo qui bis solet ; exigua potio , neque adhibita , nisi cum cibi quis quantum assumpturus est , cepit ; post cibum quies . Contra solvit aucta ambulatio atque esca , motus qui post cibum est , subinde potiones cibo inmixtae . Illud quoque scire oportet , quod ventrem vomitus solum comprimit , compressum solvit : itemque comprimit is vomitus qui statim post cibum est ; solvit is qui tarde supervenit .

De aetatum varietate .

Quod ad aetates vero pertinet , inedia facillime sustinent mediae aetates , minus iuvenes , minime pueri et senectute confecti . Quo minus fert facile quisque , eo saepius debet cibum assumere ; maximeque eo eget , qui increscit . Calida lavatio et pueris et senibus apta est . Vinum dilutius pueris , senibus meracius ; neutri aetati , quae inflationes movent ,

vent. Iuvenum minus, quae assumant, et quomodo curentur, interest. Quibus iuvenibus fluxit alvus, plerumque in senectute contrahitur: quibus in adolescentia fuit adstricta, saepe in senectute solvitur. Melior est autem in iuvene fusior, in senectute adstrictior.

De varietate temporum.

Tempus quoque anni considerare oportet. Hieme plus esse convenit; minus, sed meracius bibere; multo pane uti, carne potius assa; modice oleribus; semel die cibum capere, nisi si nimis venter adstrictus est. Si prandet aliquis, utilius est exiguum aliquid, et ipsum siccum sine carne, sine potione sumere. Eo tempore anni calidis omnibus potius utendum est, vel calorem moventibus. Venus tum non aequè perniciosa est. At vere paulum cibo demendum, adiiciendumque potioni, sed dilutius tamen bibendum est; magis carne utendum, magis oleribus; transeundum paulatim ad elixa ab assis. Venus eo tempore anni tutissima est. Aestate vero et potione et cibo saepius corpus eget; ideo prandere quoque commodum est. Eo tempore aptissima sunt et caro et olus; potio quam dilutissima, ut et sitim tollat, nec corpus incendat; frigida lavatio, caro elixa, frigidi cibi, vel qui refrigerent. Ut saepius autem cibo utendum, sic exiguo est. Per autumnum, propter coeli varietatem, periculum maximum est. Itaque neque sine veste, neque sine calceamentis prodire oportet, praecipueque diebus frigidioribus; neque sub dio noctu dormire, aut certe bene operiri. Cibo vero iam paulo pleniore uti licet; minus, sed meracius bibere. Poma nocere quidam putant, quae immodice toto die plerumque sic assumuntur, ne quid ex densiore cibo remittatur: ita non haec, sed consum-

ma-

inatio omnium nocet . Ex quibus in nullo tamen minus , quam in his , noxae est . Sed his uti non saepius , quam alio cibo , convenit . Denique aliquid densiori cibo , cum hic accedit , necessarium est demi . Neque aestate vero , neque autumnio utilis venus est : tolerabilior tamen per autumnum ; aestate in totum , si fieri potest , abstinendum est .

C A P U T IV.

DE HIS , QUIBUS CAPUT INFIRMUM EST .

Proximum est , ut de iis dicam , qui partes aliquas corporis imbecillas habent . Cui caput infirmum est , is si bene concoxit , leniter perfricare id mane manibus suis debet ; nunquam id , si fieri potest , veste velare ; ad cutem tonderi ; utileque lunam vitare , maximeque ante ipsum lunae solisque concursum , sed numquam post cibum ; si cui capilli sunt , eos quotidie pectere ; multum ambulare , sed , si licet , neque sub tecto , neque in sole ; utique autem vitare solis ardorem , maximeque post cibum et vinum ; potius ungi , quam lavari ; numquam ad flammam ungi , interdum ad prunam . Si in balneum venit , sub veste primum paulum in tepidario insudare , ibi ungi , tum transire in calidarium ; ubi insudarit , in solium non descendere , sed multa calida aqua per caput se totum perfundere , tum tepida , deinde frigida ; diutiusque ea caput , quam ceteras partes , perfundere ; deinde id aliquandiu perfricare ; novissime detergere , et ungere . Capiti nihil aequae prodest ; atque aqua frigida : itaque is cui hoc infirmum est , per aestatem id bene largo canali quotidie debet aliquandiu subiicere . Semper autem , etiamsi sine balneo unctus est , neque totum corpus refrigerare sustinet , caput tamen aqua frigida perfundere . Sed cum ceteras partes attingi nolit , demittere id , ne ad cer-

vices aqua descendat, eamque, ne quid oculis, aliusve partibus noceat, defluentem subinde manibus ad hoc regerere. Huic modicus cibus necessarius est, quem facile concoquat; isque, si ieiunio caput laeditur, assumendus etiam medio die est; si non laeditur, semel potius. Bibere huic assidue vinum dilutum, lene, quam aquam, magis expedit; ut cum caput gravius esse coeperit, sit quo confugiat: eique ex toto neque vinum, neque aqua semper utilia sunt; medicamentum utrumque est, cum invicem assumitur. Scribere, legere, voce contendere, huic opus non est, utique post coenam; post quam ne cogitatio quidem ei satis tuta est: maxime tamen vomitus alienus est.

CAPUT V.

DE HIS, QUI LIPPITUDINE, GRAVEDINE, DESTILLATIONE, TONSILLISQUE LABORANT.

Neque vero iis solis quos capitis imbecillitas torquet, usus aquae frigidae prodest; sed iis etiam quos assiduae lippitudines, gravedines, destillationes, tonsillaeque male habent. His autem non caput tantum quotidie persuadendum, sed os quoque multa frigida aqua fovendum est; praecipueque omnibus quibus hoc utile auxilium est, eo utendum est, ubi gravius coelum Austri reddiderunt. Cumque omnibus inutilis sit post cibum aut contentio, aut agitatio animi; tum iis praecipue qui vel capitis, vel arteriae dolores habere consuerunt, vel quoslibet alios oris affectus. Vitari etiam gravedines, destillationesque possunt, si quam minime, qui his opportunus est, loca, aquasque mutat; si caput in sole protegit, ne incendatur, neve subitum ex repentino nubilo frigus id moveat; si post concoctionem ieiunus caput radit; si post cibum neque legit, neque scribit.

CA-

C A P U T VI.

AD SOLUTAM ALVUM REMEDIA .

Quem vero frequenter cita alvus exercet, huic opus est pila, similibusque superiores partes exercere; dum ieiunus est, ambulare; vitare solis nimium ardorem, continua balnea; ungi citra sudorem; non uti cibus, variis, minimeque iurulentis, aut leguminibus, oleribusve iis quae celeriter descendunt; omnia denique fugere quae tarde concoquuntur. Venatio, durique pisces, et ex domesticis animalibus assa caro maxime iuvant. Numquam vinum salsum bibere expedit, ne tenue quidem, aut dulce; sed austerum et plenius, neque id ipsum pervetus. Si mulso uti volet, id ex decocto melle faciendum est. Si frigidae potiones ventrem eius non turbant, his utendum potissimum est. Si quid offensae in coena sensit, vomere debet; idque postero quoque die facere; tertio, modici ponderis panem ex vino esse, adiecta uva ex olla, vel ex defrutō, similibusque aliis: deinde ad consuetudinem redire. Seniper autem post cibum conquiescere; ac neque intendere animum, neque ambulatione quamvis leni dimoveri,

C A P U T VII.

REMEDIA AD COLI DOLOREM .

At si laxius intestinum dolere consuevit, quod colum nominant, cum id nihil nisi genus inflationis sit, id agendum est, ut concoquat aliquis, ut lectione, aliisque generibus exerceatur; utatur balneo calido, cibus quoque et potionibus calidis; denique omni modo frigus vitet; item dulcia omnia, leguminaque, et quidquid inflare consuevit.

CA-

CAPUT VIII.

QUAE AGENDA SINT STOMACHO LABORANTIBUS.

Si quis vero stomacho laborat, legere clare debet; post lectionem ambulare; tum pila, vel armis, aliove quo genere, quo superior pars movetur, exerceri: non aquam, sed vinum calidum bibere iciunus; cibum bis die assumere, sic tamen, ut facile concoquat; uti vino tenui et austero, et post cibum frigidis potionibus potius. Stomachum autem infirmum indicant pallor, macies, praecordiorum dolor, nausea, nolentium vomitus; in ieiuno dolor capitis. Quae in quo non sunt, is firmi stomachi est. Neque credendum utique nostris est, qui cum in adversa valetudine vinum, aut frigidam aquam concupiverunt, deliciarum patrocinium in accusationem non merentis stomachi habent. At qui tarde concoquunt, et quorum ideo praecordia inflantur, quive propter ardorem aliquem noctu sitire consueverunt, antequam conquiescant, duos tresve cyathos per tenuem fistulam bibant. Prodest etiam adversus tardam concoctionem clare legere, deinde ambulare, tum vel ungi, vel lavari, assidue vinum frigidum bibere, et post cibum, magnam potionem; sed, ut supra dixi, per siphonem: deinde omnes portiones aqua frigida includere. Cui vero cibus accescit, is ante eum bibere aquam egelidam debet, et vomere: at si cui ex hoc frequens deiectio incidit, quoties alvus ei constiterit, frigida portione potissimum utatur.

C A P U T IX.

QUID OBSERVANDUM SIT DOLORE NERVORUM LABORANTIBUS.

Si cui vero dolere nervi solent, quod in podagra chiragrave esse consuevit, huic, quantum fieri potest, exercendum id est, quod affectum est, subiiciendumque labori et frigori: nisi cum dolor increvit, sub quo quies optima est. Venus semper inimica est; concoctio, sicut in omnibus corporis affectibus, necessaria. Cruditas enim id maxime laedit, et quoties offensum corpus est, vitiosa pars maxime sentit.

Ut concoctio autem omnibus vitiis occurrit, sic rursus aliis frigus, aliis calor: quae sequi quisque pro habitu corporis sui debet. Frigus inimicum est seni, tenui, vulneri, praecordiis, intestinis, vesicae, auribus, coxis, scapulis, naturalibus, ossibus, dentibus, nervis, vulvae, cerebro: idem summam cutem facit pallidam, aridam, duram, nigram: ex hoc horrores, tremoresque nascuntur. At prodest invenibus, et omnibus plenis: erectiorque mens est, et melius concoquitur, ubi frigus quidem est, sed cavetur. Aqua vero frigida infusa, praeterquam capiti, etiam stomacho prodest; item articulis, doloribusque qui sunt sine ulceribus; item rubicundis nimis hominibus, si dolore vacant. Calor autem adiuvat omnia quae frigus infestat; item lippientes, si nec dolor, nec lacrimae sunt: nervos quoque qui contrahuntur; praecipueque ea ulcera quae ex frigore sunt: idem corporis colorem bonum facit; urinam movet. Si nimius est, corpus effeminat, nervos emollit, stomachum solvit. Minime vero aut frigus aut calor tuta sunt, ubi subita insuetis sunt. Nam frigus lateris dolores, aliaque vitia; frigida aqua stru-

strumas excitat: calor concoctionem prohibet, somnum aufert, sudore digerit, obnoxium morbis pestilentibus corpus efficit.

CAPUT X.

OBSERVATIO IN PESTILENTIA.

Est etiam observatio necessaria, qua quis in pestilentia utatur adhuc integer, cum tamen securus esse non possit. Tunc igitur oportet peregrinari, navigare: ubi id non licet, gestari, ambulare sub dio, ante aestum, leniter; eodemque modo ungi: et, ut supra comprehensum est, vitare fatigationem, cruditatem, frigus, calorem, libidinem: multoque magis se continere, si qua gravitas in corpore est. Tunc neque mane surgendum, neque pedibus nudis ambulandum est, minimeque post cibum, aut balneum: neque iciuno, neque coenato vomendum est: neque movenda alvus; atque etiam, si per se mota est, comprimenda est: abstinendum potius, si plenius corpus est. Itemque vitandum balneum, sudor, meridianus somnus, utique, si cibus quoque antecessit; qui tamen semel die tunc commodius assumitur; insuper etiam modicus, ne cruditatem moveat. Alternis diebus invicem modo aqua, modo vinum bibendum est. Quibus servatis, ex reliqua victus consuetudine quam minimum mutari debet. Cum vero haec in omni pestilentia facienda sint, tum in ea maxime quam Austri excitarint. Atque etiam peregrinantibus eadem necessaria sunt, ubi gravi tempore anni discesserunt ex suis sedibus, vel ubi in graves regiones venerunt. Ac si cetera res aliqua prohibebit, utique abstinere debebit: atque ita a vino ad aquam, ab hac ad vinum, eo qui supra positus est, modo, transitus ei esse.

A. COR-

A. CORNELII CELSI
ARTIUM LIBER SEPTIMUS

IDEM

MEDICINAE SECUNDUS.

Intantis autem adversae valetudinis signa complura sunt. In quibus explicandis non dubitabo auctoritate antiquorum virorum uti, maximeque Hippocratis; cum recentiores quoque medici, quamvis quaedam in curationibus mutarint, tamen haec illum optime praesagisse fateantur. Sed antequam dico, quibus praecedentibus morborum timor subsit; non alienum videtur exponere, quae tempora anni, quae tempestatum genera, quae partes aetatis, qualia corpora maxime tuta, vel periculis opportuna sint, quod genus adversae valetudinis in quoque timeri maxime possit. Non quod non omni tempore, in omni tempestatum genere, omnis aetatis, omnis habitus homines, per omnia genera morborum et aegrotent, et moriantur: sed quod frequentius tamen quaedam eveniant; ideoque utile sit scire unumquemque, quid, et quando maxime caveat.

C A P U T I.

QUAE ANNI TEMPORA, QUAE TEMPESTATUM GENERA, QUAE PARTES AETATIS, QUALIA CORPORA VEL TUTA, VEL MORBIS OPPORTUNA SINT, ET QUOD VALETUDINIS GENUS IN QUOQUE TIMERI POSSIT.

Igitur salutererrimum ver est; proxime deinde ab hoc, hiems; periculosior aestas; autumnus longe periculosissimus. Ex tempestatibus vero optimae aequales.

Cels. T. I.

C

les

les sunt, sive frigidae, sive calidae: pessimae, quae maxime variant. Quo fit, ut autumnus plurimos opprimat. Nam fere meridianis temporibus, calor; nocturnis, atque matutinis, simulque etiam vespertinis, frigus est. Corpus ergo, et aestate, et subinde meridianis caloribus relaxatum, subito frigore excipitur. Sed ut eo tempore id maxime fit, sic quandocumque evenit, noxium est. Ubi aequalitas autem est, tamen saluberrimi sunt sereni dies; meliores pluvii, quam tantum nebulosi, nubilive: optimique hieme, qui omni vento vacant; aestate, quibus Favonii perflant. Si genus aliud ventorum est, salubriores Septemtrionales, quam Subsolani, vel Austri sunt: sic tamen, ut haec interdum regionum sorte mutantur. Nam fere ventus ubique a mediterraneis regionibus veniens, salubris; a mari, gravis est. Neque solum in bono tempestatum habitu certior valetudo est; sed priores morbi quoque, si qui inciderunt, leviores sunt, et promptius finiuntur. Pessimum aegro coelum est, quod aegrum fecit; adeo ut in id quoque genus quod natura peius est, in hoc statu salubris mutatio sit. At aetas media tutissima est; quae neque iuventae calore, neque senectutis frigore infestatur. Longis morbis senectus, acutis adolescentia magis patet. Corpus autem habilissimum quadratum est, neque gracile, neque obesum. Nam longa statura, ut in iuventa decora est, sic matura senectute conficitur: gracile corpus infirmum, obesum hebes est. Vere autem maxime, quaecumque humoris motu novantur, in metu esse consuerunt. Ergo tunc lippitudines, pustulae, profusio sanguinis, abscessus, quae ἀποσηματα Graeci nominant; bilis atra, quam μελαγχολίαν appellant; insania, morbus comitialis, angina, gravedines, destillationes oriri solent. Ii quoque morbi, qui in articulis, nervisque modo urgent, modo quiescunt; tunc maxime et inchoantur, et repetunt. At aestas

non quidem vacat plerisque his morbis ; sed adiicit febres vel continuas , vel ardentes , vel tertianas , vomitus , alvi deiectiones , auricularum dolores , ulcera oris , caneros , et in ceteris quidem partibus , sed maxime in obscoenis , et quidquid sudore hominem resolvit . Vix quidquam ex his in autumnum non incidit ; sed oriuntur quoque eo tempore febres incertae , lienis dolor , aqua inter cutem , tabes , quam Greci φθίσιν nominant ; urinae difficultas , quam στραγγύριαν appellant ; tenuioris intestini morbus , quem ειλίον nominant ; item laevis intestinorum , quae λεινωπερία vocatur ; coxae dolores , morbi comitiales . Idemque tempus et diutinis malis fatigatos , et ab aestate etiam proxima pressos interimit ; et alios novis morbis conficit ; et quosdam longissimis implicat , maximeque quartanis , quae per hiemem quoque exercent . Neque aliud magis tempus pestilentiae patet , cuiuscumque ea generis est ; quamvis variis rationibus nocet . Hiems autem capitis dolores , tussim , et quidquid in faucibus , in lateribus , in visceribus mali contrahitur , irritat . At ex tempestatibus , Aquilo tussim movet , fauces exasperat , ventrem adstringit , urinam suppressit , horrores excitat , item dolores lateris et pectoris : sanum tamen corpus spissat , et mobilius atque expeditius reddit . Auster aures hebetat , sensus tardat , capitis dolorem movet , alvum solvit , totum corpus efficit hebes , humidum , languidum . Ceteri venti , quo vel huic vel illi propiores sunt , eo magis vicinos his illisve affectus faciunt . Denique omnis calor et iecur et lienem inflamat , mentem hebetat , ut anima deficiat , ut sanguis prorumpat , efficit . Frigus modo nervorum distentionem , modo rigorem infert ; illud σπασμός , hoc σίχαρς Graece nominatur ; nigritiem in ulceribus , horrores in febribus excitat . In siccitatibus acutae febres , lippitudines , tormina , urinae difficultas , articulorum dolores oriuntur : per

imbres, longae febres, alvi deiectiones, angina, cancri, morbi comitiales, resolutio nervorum, quam *παράλυσιν* Graeci nominant. Neque solum interest, quales dies sint, sed etiam quales ante praecesserint. Si hiems sicca Septentrionales ventos habuit, ver autem Austros et pluvias exhibet, fere subeunt lippitudines, tormina, febres, maximeque in mollioribus corporibus; ideoque praecipue in muliebribus. Si vero Austri pluviaeque hiemem occuparunt, ver autem frigidum et siccum est, gravidae quidem feminae, quibus tum adest partus, abortu periclitantur; eae vero quae gignunt, imbecillos, vixque vitales edunt: ceteros lippitudo arida, et, si seniores sunt, gravedines atque destillationes male habent. At si a prima hieme Austri ad ultimum ver continuerunt, laterum dolores, et insania febricitantium, quam *φρένησιν* appellant, quam celerrime rapiunt. Ubi vero calor a primo vere orsus aestatem quoque similem exhibet, necesse est multum sudorem in febribus subsequi. At si sicca aestas Aquilones habuit, autumno vero imbres Austrique sunt, tota hieme quae proxima est, tussis, destillatio, raucitas, in quibusdam etiam tabes oritur. Sin autem autumnus quoque aequae siccus iisdem Aquilonibus perflatur, omnibus quidem mollioribus corporibus, inter quae muliebria esse proposui, secunda valetudo contingit: durioribus vero instare possunt, et aridae lippitudines, et febres partim acutae, partim longae, et ii morbi qui ex atra bile nascuntur. Quod ad aetates vero pertinet, pueri proximique his vere optime valent; et aestate prima tutissimi sunt; senes aestate et autumnii prima parte; iuvenes hieme, quique inter iuventam senectutemque sunt. Inimicior senibus hiems, aestas adolescentibus est. Tum si qua imbecillitas oritur, proximum est, ut infantes, tenerosque adhuc pueros serpentia ulcera oris, quae *ἄφθας* Graeci nominant, vomitus,

nocturnae vigiliae , aurium humor , circa umbilicum inflammationes exerceant . Propriae etiam dentitionum gingivarum exulcerationes , febriculae , interdum distentiones nervorum , alvi deiectiones ; maximeque caninis dentibus orientibus , male habent . Quae pericula plenissimi cuiusque sunt , et cui maxime venter adstrictus est . At ubi aetas paulum processit , glandulae , et vertebrarum , quae in spina sunt , aliquae inclinationes , strumae , verrucarum quaedam genera dolentia ; *ἀκρόχορδορας* Graeci appellant ; et plura alia tubercula oriuntur . Incipiente vero iam pube , ex iisdem multa , et longae febres , et sanguinis ex naribus cursus . Maximeque omnis pueritia , primum circa quadragesimum diem , deinde septimo mense , tum septimo anno , postea circa pubertatem periclitatur . Si qua etiam genera morborum in infantem inciderunt , ac neque pubertate , neque primis coitibus , neque in femina primis menstruis finita sunt , fere longa sunt : saepius tamen morbi pueriles qui diutius manserunt , terminantur . Adolescentia morbis acutis ; item comitialibus , tabique maxime obiecta est : fereque iuvenes sunt , qui sanguinem expuunt . Post hanc aetatem laterum et pulmonis dolores , lethargus , cholera , insania , sanguinis per quaedam velut ora venarum ; *αἱμορροΐδας* . Graeci appellant ; profusio . In senectute , spiritus et urinae difficultas , gravedo , articulorum et renum dolores , nervorum resolutiones , malus corporis habitus ; *καχεξία* Graeci appellant ; nocturnae vigiliae , vitia longiora aurium , oculorum , etiam narium , praecipueque soluta alvus , et , quae sequuntur hanc , tormina , vel levitas intestinorum , ceteraque ventris fusi mala . Praeter haec , graciles , tabes , deiectiones , destillationes , item viscerum et laterum dolores , fatigant . Obesi plerumque acutis morbis , et difficultate spirandi strangulantur ; subitoque saepe moriuntur ; quod in corpore tenuiore vix evenit .

CAPUT II.

DE SIGNIS ADVERSÆ VALETUDINIS FUTURÆ.

Ante adversam autem valetudinem, ut supra dixi, quaedam notae oriuntur: quarum omnium commune est, aliter se corpus habere, atque consuevit; neque in peius tantum, sed etiam in melius. Ergo si plenior aliquis, et speciosior, et coloratior factus est, suspecta habere bona sua debet; quae, quia neque in eodem habitu subsistere, neque ultra progredi possunt, fere retro, quasi ruina quadam, revolvuntur. Peius tamen signum est, ubi aliquis contra consuetudinem emacuit; et colorem decoremque amisit: quoniam in iis quae superant, est quod morbus demat; in iis quae desunt, non est quod ipsum morbum ferat. Praeter haec protinus timeri debet, si graviora membra sunt; si crebra ulcera oriuntur; si corpus supra consuetudinem incaluit; si gravior somnus pressit; si tumultuosa somnia fuerunt; si saepius expergiscitur aliquis, quam assuevit; deinde iterum soporatur; si corpus dormientis circa partes aliquas contra consuetudinem insudat; maximeque si circa pectus, aut cervices, aut crura, vel genua, vel coxas. Item, si marcet animus; si loqui, et moveri piget; si corpus torpet; si dolor praecordiorum est; aut totius pectoris, aut, qui in plurimis evenit, capitis; si salivae plenum os est; si oculi cum dolore vertuntur; si tempora adstricta sunt; si membra inhorrescunt; si spiritus gravior est; si circa frontem intentae venae moventur; si frequentes oscitationes; si genua quasi fatigata sunt; totumve corpus lassitudinem sentit. Ex quibus saepe plura, numquam non aliqua febrem antecedunt. In primis tamen illud considerandum est; num cui saepius horum aliquid eveniat, neque

ideo

ideo corporis ulla difficultas subsequatur. Sunt enim quaedam proprietates hominum, sine quarum notitia non facile quidquam in futurum praesagiri potest. Facile itaque securus est in iis aliquis, quae saepe sine periculo evasit: ille sollicitari debet, cui haec nova sunt; aut qui ista numquam sine custodia sui tuta habuit.

C A P U T III.

QUAE BONA IN AEGROTANTIBUS SIGNA SINT.

Ubi vero febris aliquem occupavit, scire licet, non perichitari; si in latus aut dextrum aut sinistrum, ut ipsi visum est, cubat, cruribus paulum reductis, qui fere sani quoque iacentis habitus est; si facile convertitur; si noctu dormit, interdiu vigilat; si ex facili spirat; si non conflictatur; si circa umbilicum et pubem cutis plena est; si praecordia eius sine ullo sensu doloris aequaliter mollia in utraque parte sunt. Quod si paulo tumidiora sunt, sed tamen digitis cedunt et non dolent, haec valetudo, ut spatium aliquod habebit, sic tuta erit. Corpus quoque quod aequaliter molle et calidum est, quodque aequaliter totum insudat, et cuius febricula eo sudore finitur, securitatem pollicetur. Sternutamentum etiam inter bona indicia est, et cupiditas cibi vel a primo servata, vel etiam post fastidium orta. Neque terrere debet ea febris quae eodem die finita est; ac ne ea quidem quae, quamvis longiore tempore tenuit, tamen ante alteram accessionem ex toto quievit sic, ut corpus integrum, quod *ειληρπινός* Graeci vocant, fieret. Si quis autem incidit vomitus, mixtus esse et bile et pituita debet: et in urina subsidere album, laeve, aequale sic, ut etiam, si quae quasi nubeculae innatarint, in imum deferantur. At venter ei qui a periculo tutus est,

reddit mollia, figurata, atque eodem fere tempore, quo secunda valetudine assuevit; modo convenientia iis quae assumuntur. Peior cita alvus est; sed ne haec quidem terrere protinus debet, si matutinis temporibus coacta magis est, aut si procedente tempore paulatim contrahitur, et rufa est, neque foeditate odoris similem alvum sani hominis excedit. Ac lumbricos quoque aliquos sub fine morbi descendisse, nihil nocet. Si inflatio in superioribus partibus dolorem tumoremque fecit, bonum signum est sonus ventris inde ad inferiores partes evolutus; magisque etiam si sine difficultate cum stercore excessit.

CAPUT IV.

MALA SIGNA AEGROTANTIUM.

Contra gravis morbi periculum est, ubi supinus aeger iacet, porrectis manibus et cruribus; ubi residere vult in ipso acuti morbi impetu, praecipueque pulmonibus laborantibus; ubi nocturna vigilia premitur, etiamsi interdiu somnus accedit; ex quo tamen peior est qui inter quartam horam et noctem est, quam qui a matutino tempore ad quartam. Pessimum tamen est, si somnus neque noctu, neque interdiu accedit: id enim fere sine continuo dolore esse non potest. Aequè vero signum malum est, etiam somno ultra debitum urgeri; peiusque, quo magis sopor interdiu, noctuque continuat. Mali etiam morbi testimonium est, vehementer et crebro spirare; a sexto die coepisse inhorrescere; pus expuere; vix exscreare; dolorem habere continuum; difficulter ferre morbum; iactare brachia et crura; sine voluntate lacrimare; habere humorem glutinosum dentibus inhaerentem; cutem circa umbilicum et pubem macram; praecordia inflammata, dolentia, dura, tumida, intenta; magisque, si haec dextra par-

parte , quam sinistra sunt : periculosissimum tamen est , si venae quoque ibi vehementer agitantur . Mali etiam morbi signum est , nimis celeriter emacrescere ; caput et pedes manusque frigidas habere , ventre et lateribus calentibus , aut frigidas extremas partes acuto morbo urgente ; aut post sudorem inhorrescere ; aut post vomitum singultum esse , vel rubere oculos ; aut post cupiditatem cibi , postve longas febres hunc fastidire ; aut multum sudare , maximeque frigido sudore ; aut habere sudores non per totum corpus aequales , quique febrem non finiant ; et febres eas quae quotidie tempore eodem revertantur ; quaeve semper pares accessiones habeant , neque tertio quoque die levantur ; quaeve sic continuent , ut per accessiones increcant , per decessiones tantum molliantur , neque umquam integrum corpus dimittant . Pessimum est , si ne levatur quidem febris , sed aequae concitata continuat . Periculosum est etiam , post arquatam morbum febrem oriri ; utique si praecordia dextra parte dura manserunt . Ac dolentibus his , nulla acuta febris leviter terrere nos debet ; neque umquam in acuta febre , aut a somno non est terribilis nervorum distentio . Timere etiam ex somno , mali morbi est ; itemque in prima febre protinus mentem esse turbatam , membrumve aliquod resolutum . Ex quo casu , quamvis vita redditur , tamen id fere membrum debilitatur . Vomitus etiam periculosus est sincerus pituitae , vel bilis ; peiorque , si viridis , aut niger est . At mala urina est , in qua subsidunt subrubra et laevia : deterior , in qua quasi folia quaedam tenuia atque alba : pessima ex his , si tamquam ex furfuribus factas nubeculas repraesentat . Diluta quoque atque alba vitiosa est ; sed in phreneticis maxime . Alvus autem mala est , ex toto suppressa : periculosa etiam , quae inter febres fluens conquiescere hominem in cubili non patitur ; utique si quod descendit , est perliquidum , aut albidum ,
aut

aut pallidum, aut spumans. Praeter haec periculum ostendit id quod excernitur, si est exiguum, glutinosum, laeve, album, idemque subpallidum; vel si est aut lividum, aut biliosum, aut cruentum, aut peioris odoris, quam ex consuetudine. Malum est etiam, quod post longas febres siucrum est.

CAPUT V.

DE SIGNIS LONGAE VALETUDINIS.

Post haec indicia, votum est longum morbum fieri; sed et necesse est, nisi occidit. Neque vitae alia spes in magnis malis est, quam ut impetum morbi trahendo aliquis effugiat, porrigaturque in id tempus quod curationi locum praestet. Protinus tamen signa quaedam sunt, ex quibus colligere possumus, morbum, etsi non interemerit, longius tamen tempus habiturum: ubi frigidus sudor inter febres non acutas circa caput tantum, et cervices oritur; aut ubi, febre non quiescente, corpus insudat; aut ubi corpus modo frigidum, modo calidum est, et color alius ex alio fit; aut ubi quod inter febres aliqua parte abscessit, ad sanitatem non pervenit; aut ubi aeger pro spatio parum emacrescit: item si urina modo liquida et pura est, modo habet quaedam subsidentia; si laevia atque alba, rubrae sunt, quae in ea subsidunt; aut si quasdam quasi miculas repraesentat; aut si bullulas excitat.

CAPUT VI.

DE INDICIIS MORTIS.

Sed inter haec quidem, proposito metu, spes tamen superest. Ad ultima vero iam ventum esse testantur nares acutae, collapsa tempora, oculi concavi, frigidae languidaeque aures, et imis partibus
le-

leniter versae, cutis circa frontem dura et intenta, color aut niger aut perpallidus; multoque magis si ita haec sunt, ut neque vigilia praecesserit, neque ventris resolutio, neque inedia. Ex quibus causis interdum haec species oritur, sed uno die finitur: itaque diutius durans, mortis index est. Si vero in morbo vetere iam triduo talis est, in propinquo mors est; magisque si praeter haec oculi quoque lumen refugiunt, et illacrimant; quaeque in iis alba esse debent, rubescunt; atque in iisdem venulae pallent; pituitaque in iis innatans, novissime angulis inhaerescit; alterque ex his minor est; iique aut vehementer subsederunt, aut facti tumidiores sunt; perque somnum palpebrae non committuntur, sed inter has ex albo oculorum aliquid apparet, neque id fluens alius expressit; eademque palpebrae pallent, et idem pallor labra et nares decolorat; eademque labra, et nares, oculique, et palpebrae, et supercilia, aliquave ex his pervertuntur; isque propter imbecillitatem iam non audit, aut non videt. Eadem mors denuntiatur, ubi aeger supinus cubat, eique genua contracta sunt; ubi is deorsum ad pedes subinde delabitur; ubi brachia et crura nudat, et inaequaliter dispergit, neque iis calor subest; ubi hiat; ubi assidue dormit; ubi is qui mentis suae non est, neque id facere sanus solet, dentibus stridet; ubi ulcus quod aut ante, aut in ipso morbo natum est, aridum, et aut pallidum, aut lividum factum est. Illa quoque mortis indicia sunt, ungues, digitique pallidi; frigidus spiritus; aut si manibus quis in febre, et acuto morbo, vel insania, pulmonisve dolore, vel capitis, in veste floccos legit, fimbriasve diducit, vel in adiuncto pariete, si qua minuta eminent, carpit. Dolores etiam circa coxas et inferiores partes orti, si ad viscera transierunt, subitoque desierunt, mortem subesse testantur; magisque si alia quoque signa ac-

cesserunt. Neque is servari potest, qui sine ullo tumore febricitans, subito strangulatur, aut devorare salivam suam non potest; cuive in eodem febris corporisque habitu cervix convertitur sic, ut devorare aequè nihil possit; aut cui simul et continua febris et ultima corporis infirmitas est; aut cui, febre non quiescente, exterior pars friget, interior sic calet, ut etiam sitim faciat; aut qui, febre aequè non quiescente, simul et delirio et spirandi difficultate vexatur; aut qui, epoto veratro, exceptus distentione nervorum est; aut qui ebrius obmutuit. Is enim ferè nervorum distentione consumitur, nisi aut febris accessit, aut eo tempore quo ebrietas solvi debet, loqui coepit. Mulier quoque gravida acuto morbo facile consumitur; et is cui somnus dolorem auget; et cui protinus in recenti morbo bilis atra vel infra vel supra se ostendit; cuive alterutro modo se prompsit, cum iam longo morbo corpus eius esset extenuatum et affectum. Sputum etiam biliosum et purulentum, sive separatim ista, sive mixta proveniant, interitus periculum ostendunt. Ac si circa septimum diem tale esse coepit, proximum est, ut is circa quartumdecimum diem decedat; nisi alia signa meliora peiorave accesserint: quae, quo leviora graviorave subsecuta sunt, eo vel seriores mortem, vel maturiorem denuntiant. Sudor quoque frigidus in acuta febre pestifer est: atque in omni morbo vomitus, qui varius, et multorum colorum est; praecipueque si malus in hoc odor est. Ac sanguinem quoque in febre vomuisse, pestiferum est. Urina vero rubra et tenuis in magna cruditate esse consuevit; et saepe, antequam spatio maturescat, hominem rapit: itaque, si talis diutius permanet, periculum mortis ostendit. Pessima tamen est, praecipueque mortifera, nigra, crassa, mali odoris. Atque in viris quidem et mulieribus talis deterrima est: in pueris vero, quae tenuis et di-

diluta est . Alvus quoque varia pestifera est ; quae strigmentum , sanguinem , bilem , viride aliquid , modo diversis temporibus , modo simul , et in mixtura quadam , discreta tamen , repraesentat . Sed haec quidem potest paulo diutius trahere : in praecipiti vero iam esse denuntiat , quae liquida , eademque vel nigra , vel pallida , vel pinguis est ; utique si magna foeditas odoris accessit . Illud interrogari me posse ab aliquo scio : si certa futurae mortis indicia sunt , quomodo interdum deserti a medicis convalescant ; quosdamque fama prodiderit , in ipsis funeribus revixisse ? Quia etiam vir iure magni nominis Democritus , ne finitae quidem vitae satis certas notas esse proposuit , quibus medici credidissent : adeo illud non reliquit , ut certa aliqua signa futurae mortis essent . Adversus quos ne dicam illud quidem , quod in vicino saepe quaedam notae positae , non bonos , sed imperitos medicos decipiunt ; quod Asclepiades funeri obvius intellexit , quemdam vivere , qui efferebatur : nec protinus crimen artis esse , si quod professoris sit . Illa tamen moderatius subiciam : coniecturalem artem esse medicinam , rationemque coniecturae talem esse , ut cum saepius aliquando responderit , interdum tamen fallat . Si quid itaque vix in millesimo corpore aliquando decipit , id notam non habet ; cum per innumerabiles homines respondeat . Idque non in iis tantum quae pestifera sunt , dico ; sed in iis quoque quae salutaria . Siquidem etiam spes interdum frustratur , et moritur aliquis , de quo medicus securus primo fuit : quaeque mendi causa reperta sunt , nonnumquam in peius alicui convertunt . Neque id evitare humana imbecillitas in tanta varietate corporum potest . Sed est tamen medicinae fides ; quae multo saepius , perque multo plures aegros prodest . Neque tamen ignorare oportet , in acutis morbis fallaces magis notas esse et salutis et mortis .

CAPUT VII.

DE NOTIS, QUAS ALIQUIS IN SINGULIS MORBORUM
GENERIBUS HABERE POSSIT.

Sed cum proposuerim signa quae in omni adversa valetudine communia esse consueverunt; eo quoque transibo, ut, quas aliquis in singulis morborum generibus habere possit notas, indicem. Quaedam autem sunt quae ante febres, quaedam quae inter eas, quid aut intus sit, aut venturum sit, ostendunt. Ante febres, si caput grave est, aut ex somno oculi caligant, aut frequentia sternutamenta sunt, circa caput aliquis pituitae impetus timeri potest. Si sanguis, aut calor abundat, proximum est, ut aliqua parte profluvium sanguinis fiat. Si sine causa quis emacrescit, ne in malum habitum corpus eius decadat, metus est. Si praecordia dolent, aut inflatio gravis est, aut toto die non concocta fertur urina, cruditatem esse manifestum est. Quibus diu color sine morbo regio malus est, hi vel capitis doloribus conflictantur, vel terram edunt. Qui diu habent faciem pallidam et tumidam, aut capite, aut visceribus, aut alvo laborant. Si in continua febre puero venter nihil reddit, mutaturque ei color, neque somnus accedit, ploratque is assidue, metuenta nervorum distentio est. Frequens autem destillatio in corpore tenui longoque, tabem timendam esse testatur. Ubi pluribus diebus non descendit alvus, docet, aut subitam deiectionem, aut febriculam instare. Ubi pedes turgent, longae deiectiones sunt, ubi dolor in imo ventre vel coxis est, aqua inter cutem instat. Sed hoc morbi genus ab ilibus oriri solet. Idem propositum periculum est iis quibus voluntas desidendi est, venter nihil reddit, nisi et aegre et durum, tumor in pedibus est; idemque
mo-

modo dextra, modo sinistra parte ventris, invicem oritur atque finitur. Sed a iecinore id malum proficisci videtur. Eiusdem morbi nota est, ubi circa umbilicum intestina torquentur; *στέρχους* Graeci nominant; coxaeque dolores manent: eaque neque tempore, neque remediis solvuntur. Dolor autem articulorum, prout in pedibus, manibusve, aut alia qualibet parte sic est, ut eo loco nervi contrahantur; aut si id membrum ex levi causa fatigatum, aequè frigido, calidoque offenditur, podagram, chiragramve, vel eius articuli in quo id sentitur, morbum futurum esse denuntiat. Quibus in pueritia sanguis ex naribus fluxit, dein fluere desiit, hi vel capitis doloribus conflictentur necesse est, vel in articulis aliquas exulcerationes graves habeant, vel aliquo morbo etiam debilitentur. Quibus feminis menstrua non proveniunt, necesse est capitis acerbissimi dolores sint, vel quaelibet alia pars morbo infestetur. Eademque iis pericula sunt, quibus articulorum dolores tumoresque sine podagra similibusque morbis oriuntur, et desinunt: utique si saepe tempora iisdem dolent, noctuque corpora insudant. Si frons prurit, lippitudinis metus est. Si mulier a partu vehementes dolores habet, neque alia praeterea signa mala sunt, circa vicissimum diem aut sanguis per nares erumpet, aut in inferioribus partibus aliquid abscedet. Quicumque etiam dolorem ingentem circa tempora et frontem habebit, is alterutra ratione eum finiet; magisque si iuvenis erit, per sanguinis profusionem; si senior, per suppurationem. Febris autem, quae subito sine ratione, sine bonis signis finita est, fere revertitur. Cui fauces sanguine et interdium et noctu replentur sic ut neque capitis dolores, neque praecordiorum, neque tussis, neque vomitus, neque scabricula praecesserit, huius aut in naribus, aut in faucibus ulcus reperietur. Si mulieri inguen

et

et febricula orta est; neque causa apparet, ulcus in vulva est. Urina autem crassa, ex qua quod desidit, album est, significat circa articulos, aut circa viscera dolorem, metumque morbi esse. Eadem viridis, aut viscerum dolorem, tumoremque cum aliquo periculo subesse, aut certe corpus integrum non esse testatur. At si sanguis aut pus in urina est, vel vesica vel renes exulcerati sunt. Si haec crassa carunculas quasdam exiguas quasi capillos habet, aut si bullat, et male olet, et interdum quasi arenam, interdum quasi sanguinem trahit; dolent autem coxae, quaeque inter has superque pubem sunt; et accedunt frequentes ructus, interdum vomitus biliosus; extremaeque partes frigescunt; urinae crebra cupiditas, sed magna difficultas est; et quod inde excretum est, aquae simile, vel rufum, vel pallidum est, paulum tamen in eo levamenti est; alvus vero cum multo spiritu redditur, utique in renibus vitium est. At si paulatim destillat, vel si sanguis per hanc editur, et in eo quaedam cruenta concreta sunt, idque ipsum cum difficultate redditur, et circa pubem interiores partes dolent, in vesica vitium est. Calculosi vero his indiciis cognoscuntur; difficulter urina redditur, paulatimque, interdum etiam sine voluntate destillat; eadem arenosa est; nonnumquam aut sanguis, aut cruentum, aut purulentum aliquid cum ea excernitur; eamque quidam promptius recti, quidam resupinati, maximeque ii qui grandes calculos habent, quidam etiam inclinati reddunt, colemque extendendo, dolorem levant; gravitatis quoque cuiusdam in ea parte sensus est: atque ea cursu, omnique motu augetur. Quidam etiam cum torquentur, pedes inter se, subinde mutatis vicibus, implicant. Feminae vero oras naturalium suorum manibus admotis scabere crebro coguntur: nonnumquam si digitum admovent, ubi vesicae cervicem is urget, cal-

calculus sentiunt. At qui spumantem sanguinem excreant, his in pulmone vitium est. Mulieri gravidæ sine modo fusa alvus elidere partum potest. Eidem si lac ex mammis profluit, imbecillum est quod intus gerit: duræ mammae, sanum illud esse testantur. Frequens singultus, et præter consuetudinem continuus, iecur inflammatum esse significat. Si tumores super ulcera subito esse desierunt, idque a tergo incidit, vel distentio nervorum, vel rigor timeri potest: at si a priore parte id evenit, vel lateris acutus dolor, vel insania exspectanda est: interdum etiam eiusmodi casum, quæ tutissima inter hæc est, profusio alvi sequitur. Si ora venarum, sanguinem solita fundere, subito suppressa sunt; aut aqua inter cutem, aut tabes sequitur. Eadem tabes subit, si in lateris dolore orta suppurationis intra quadraginta dies purgari non potuit. At si longa tristitia cum longo timore et vigilia est, atræ bilis morbus subest. Quibus sæpe ex naribus fluit sanguis, his aut lienis tumet, aut capitis dolores sunt: quos sequitur, ut quaedam ante oculos tamquam imagines obversentur. At quibus magni lienes sunt, his gingivæ malæ sunt, et os olet, aut sanguis aliqua parte prorumpit: quorum si nihil evenit, necesse est in cruribus mala ulcera, et ex his nigrae cicatrices fiant. Quibus causa doloris, neque sensus eius est, his mens labat. Si in ventrem sanguis confluit, ibi in pus vertitur. Si a coxis, et ab inferioribus partibus dolor in pectus transit, neque ullum signum malum accessit, suppurationis eo loco periculum est. Quibus sine febre aliqua parte dolor, aut prurigo, cum rubore et calore est, ibi aliquid suppurat. Urina quoque, quæ in homine parum sano liquida est, circa aures futuram aliquam suppurationem esse denuntiat.

Hæc vero, cum sine febre quoque vel latentium, vel futurarum rerum notas habeant, multo certiora

Cels. T. I.

D

sunt

sunt, ubi febris accessit; atque etiam aliorum morborum tum signa nascuntur. Ergo protinus insania timenda est, ubi expeditior alicuius, quam sani fuit, sermo est, subitaque loquacitas orta est, et haec ipsa solito audacior: aut ubi raro quis et vehementer spirat, venasque concitatas habet, praecordii duris et tumentibus. Oculorum quoque frequens motus; et in capitis dolore offusae oculis tenebrae; vel nullo dolore substante somnus ereptus, continuataque nocte et die vigilia; vel prostratum contra consuetudinem corpus in ventrem sic, ut ipsius alvi dolor id non coegerit; item robusto adhuc corpore insolitus dentium stridor, insaniae signa sunt. Si quid etiam abscessit, et antequam suppureret, manente adhuc febre, subsedit, periculum affert primum furoris, deinde interitus. Auris quoque dolor acutus; cum febre continua vehementique, saepe mentem turbat; et ex eo casu iuniores interdum intra septimum diem moriuntur, seniores tardius: quoniam neque aequae magnas febres experiuntur, neque aequae insaniant: ita sustinent, dum is affectus in pus vertatur. Suffusae quoque sanguine mulieris mammae, furorem venturum esse testantur. Quibus autem longae febres sunt, his aut abscessus aliqui, aut articulorum dolores erunt. Quorum faucibus in febre illiditur spiritus, instat his nervorum distentio. Si angina subito finita est, in pulmonem id malum transit; idque saepe intra septimum diem occidit: quod nisi incidit, sequitur ut aliqua parte suppuret. Deinde post alvi longam resolutionem, tormina; post haec, intestinorum laevitas oritur; post nimias destillationes, tabes; post lateris dolorem, vitia pulmonum; post haec, insania; post magnos fervores corporis, nervorum rigor, aut distentio; ubi caput vulneratum est, delirium; ubi vigilia torset, nervorum distentio; ubi vehementer venae super ulcera moventur, sanguinis profluvium.

Sup.

Suppuratio vero pluribus morbis excitatur. Nam si longae febres sine dolore, sine manifesta causa remanent, in aliquam partem in malum incumbit, in iunioribus tamen: nam in senioribus ex eiusmodi morbo quartana fere nascitur. Eadem suppuratio fit, si praecordia dura, dolentia ante vicesimum diem hominem non sustulerunt, neque sanguis ex naribus fluxit, maximeque in adolescentibus; utique si inter principia aut oculorum caligo, aut capitis dolores fuerunt: sed tum in inferioribus partibus aliquid abscedit. At si praecordia tumorem mollem habent, neque habere intra sexaginta dies desinunt, haeretque per omne id tempus febris; tum in superioribus partibus fit abscessus: ac si inter ipsa viscera non fit, circa aures erumpit. Cumque omnis longus tumor ad suppurationem fere spectet, magis eo tendit is, qui in praecordiis, quam is qui in ventre est; is qui supra umbilicum, quam is qui infra est. Si lassitudinis etiam sensus in febre est, vel in maxillis, vel in articulis aliquid abscedit. Interdum quoque urina tenuis et cruda sic diu fertur, ut alia salutaria signa sint; exque eo casu plerumque infra transversum septum, quod *διάφραγμα* Graeci vocant, fit abscessus. Dolor etiam pulmonis, si neque per sputa, neque per sanguinis detractionem, neque per victus rationem finitus est, vomicas aliquas intus excitat aut circa vicesimum diem, aut circa tricesimum, aut circa quadragesimum, nonnumquam etiam circa sexagesimum. Numerabimus autem ab eo die quo primum febricitavit aliquis, aut inhorruit, aut gravitatem eius partis sensit. Sed hae vomicae modo a pulmone, modo a contraria parte nascuntur. Quod suppurat, ab ea parte quam afficit, dolorem inflammationemque concitat; ipsum calidius est; et si in partem sanam aliquis decubuit, onerare eam ex pondere aliquo videtur. Omnis etiam suppuratio quae nondum oculis patet, sic deprehen-

di potest: si febris non dimittit, eaque interdum levior est, nocta increscit; multus sudor oritur; cupiditas tussendi est, et paene nihil in tussi excreatur; oculi cavi sunt; maxillae rubent; venae sub lingua inalbescunt; in manibus fiunt adunci ungues; digiti, maximeque summi, calent; in pedibus tumores sunt, spiritus difficiliter trahitur; cibi fastidiosa est; pustulae toto corpore oriuntur. Quod si protinus initio dolor et tussis fuit, et spiritus difficultas, vomica vel ante, vel circa vicesimum diem erumpet: si serius ista coeperint, necesse est quidem increcant; sed quo minus cito affecerint, eo tardius solventur. Solent etiam in gravi morbo pedes cum digitis unguibusque nigrescere: quod si non est mors consecuta, et reliquum corpus invaluit, pedes tamen decidunt.

CAPUT VIII.

QUAE NOTAE IN QUOQUE MORBI GENERE VEL SPEM,
VEL PERICULA OSTENDANT.

Sequitur, ut in quoque morbi genere propriae notas explicem, quae vel spem, vel periculum ostendant. Ex vesica dolenti, si purulenta urina processit, inque ea laeve et album subsedit, metum detrahit. In pulmonis morbo, si sputum ipse levatur dolor, quamvis id purulentum est, tamen aeger facile spirat, facile excreat, morbum ipsum non difficulter fert, potest ei secunda valetudo contingere. Neque inter initia terreri convenit, si protinus sputum mixtum est rufo quodam, et sanguine, dummodo statim edatur. Laterum dolores, suppuratione facta, deinde intra quadragesimum diem purgata, finiuntur. Si in iecinore vomica est, et ex ea fertur pus purum et album, salus facilis est: est id enim malum in tunica est. Ex suppurationibus vero eae tolerabiles sunt, quae in exteriorem partem

tem feruntur, et acuuntur: et ex iis quae intus procedunt, eae leviores quae contra se cutem non afficiunt, eamque et sine dolore et eiusdem coloris cuius reliquae partes sunt, sinunt esse. Pus quoque quacumque parte erumpit, si est laeve, album et unius coloris, sine ullo metu est; et quo effuso, febris protinus conquievit, desieruntque urgere cibi fastidium, et potionis desiderium. Si quando etiam suppuratio descendit in crura, sputumque eiusdem factum pro raso purulentum est, periculi minus est. At in tabe eius qui salvus futurus est, sputum esse debet album, aequale totum, eiusdemque coloris, sine pituita; eique etiam simile esse oportet, si quid in nares a capite destillat. Longe optimum est, febrem omnino non esse; secundum est, tantulam esse, ut neque cibum impediat, neque crebraur sitim faciat. Alvus in hac valetudine ea tuta est, quae quotidie coacta, eaque convenientia iis quae assumuntur, reddit; corpus id quod minime tendit, maximeque lati pectoris atque setosi est, cuiusque cartilago exigua, et carnosa est. Super tabem, si mulieri suppressa quoque menstrua fuerunt, et circa pectus atque scapulas dolor mansit, subitoque sanguis erupit, levare morbus solet: nam et tussis minuitur, et sitis atque febricula desinunt. Sed iisdem fere, nisi redit sanguis, vomica erumpit; quae quo cruentior, eo melior est. Aqua autem inter cutem minime terribilis est, quae nullo antecedente morbo coepit; deinde, quae longo morbo supervenit: utique si firma viscera sunt; si spiritus facilis; si nullus dolor; si sine calore corpus est, aequaliterque in extremis partibus macrum est; si venter mollis; si nulla tussis; nulla sitis; si lingua ne per somnum quidem inarescit; si cibi cupiditas est; si venter medicamentis movetur; si per se excernit mollia et figurata; si extenuatur; si urina, et vini mutatione, et epotis aliquibus medicamentis

mutatur; si corpus sine lassitudine est, et morbum facile sustinet: siquidem in quo omnia haec sunt, is ex toto tutus est; in quo plura ex his sunt, is in bona spe est. Articulorum vero vitia, ut podagrae chiragraeque, si iuvenes tentarunt, neque calum induxerunt, solvi possunt: maximeque torminibus leniuntur, et quocumque modo venter fluit. Item morbus comitialis ante pubertatem ortus, non aegre finitur: et in quo ab una parte corporis venientis accessionis sensus incipit, optimum est a manibus pedibusve initium fieri; deinde a lateribus; pessimum inter haec a capite. Atque in his quoque ea maxime prosunt, quae per deiectiones excernuntur. Ipsa autem deiectio sine ulla noxa est, quae sine febre est; si celeriter desinit; si contrectato ventre nullus motus eius sentitur; si extremam alvum spiritus sequitur. Ac ne tormina quidem periculosa sunt, si sanguis et strigmenta descendunt, dum febris ceteraeque accessiones huius morbi absint: adeo ut etiam gravida mulier non solum servari possit, sed etiam partum reservare. Prodestque in hoc morbo, si iam aetate aliquis processit. Contra intestinorum laevitas facilius a teneris aetatibus depellitur; utique si ferri urina, et ali cibo corpus incipit. Eadem aetas prodest, et in coxae dolore, et humerorum, et in omni resolutione nervorum. Ex quibus coxa si sine torpore est, si leviter friget, quamvis magnos dolores habet, tamen et facile, et mature sanatur: resolutumque membrum, si nihilo minus alitur, fieri sanum potest. Oris resolutio etiam alvo cita finitur: omnisque deiectio lippienti prodest. At varix ortus, vel per ora venarum subita profusio sanguinis, vel tormina, insaniam tollunt. Humerorum dolores qui ad scapulas vel manus tendunt, vomitu atrae bilis solvuntur: et quisquis dolor deorsum tendit, sanabilior est. Singultus sternutamento finitur. Longas
de-

deiectiones supprimit vomitus . . Mulier sanguinem vomens , profusis menstruis liberatur . . Quae menstruis non purgatur , si sanguinem ex naribus fudit , omni periculo vacat . . Quae locis laborat , aut difficulter partum edit , sternutamento levatur . . Aestiva quartana fere brevis est . . Cui calor et tremor est , saluti delirium est . . Lienosis bono tormina sunt . . Denique ipsa febris , quod maxime mirum videri potest , saepe praesidio est . . Nam et praecordiorum dolores , si sine inflammatione sunt , finit ; et iecinoris dolori succurrit ; et nervorum distentionem rigoremque , si postea coepit , ex toto tollit ; et ex difficultate urinae morbum tenuioris intestini ortum , si urinam per calorem movet , levat . . At dolores capitis quibus oculorum caligo et rubor cum quadam frontis pruriginē accedunt , sanguinis profusione , vel fortuita , vel etiam petita , submoventur . . Si capitis ac frontis dolores ex vento , vel frigore , aut aestu sunt , gravedine et sternutamentis finiuntur . . Febrē autem ardentem , quam Graeci *νεστωδύ* vocant , subitus horror exsolvit . . Si in febre aures obtusae sunt , si sanguis e naribus fluxit , aut venter resolutus est , illud malum desinit ex toto . . Nihil plus adversus surditatem , quam biliosa alius potest . . Quibus in fistula urinae minuti abscessus , quos *πόματα* Graeci vocant , esse coeperunt , iis , ubi pus ea parte profluxit , sanitas redditur . . Ex quibus cum pleraque per se proveniant , scire licet , inter ea quoque quae ars adhibet , naturam plurimum posse . . Contra , si vesica cum febre continenti dolet , neque venter quidquam reddit , malum atque mortiferum est ; maximeque id periculum est pueris , a septimo anno ad quartumdecimum . . In pulmonis morbo , si sputum primis diebus non fuit , deinde a septimo die coepit , et ultra septimum mansit , periculosum est : quantoque magis mixtos , neque inter se diductos colores habet , tanto deterius . . Et

tamen nihil peius est, quam sincerum id edi, sive rufum est, sive cruentum, sive album, sive glutinosum, sive pallidum, sive spumans: nigrum tamen pessimum est. In eodem morbo periculosa sunt tussis, destillatio, etiam, quod alias salutare habetur, sternutamentum: periculosissimumque est, si haec secuta subita deiectio est. Fere vero quae in pulmonis, eadem in lateris dolore, et mitiora signa, et asperiora esse consuerunt. Ex iecinore si pus cruentum exit, mortiferum est. At ex suppurationibus eae pessimae sunt, quae intus tendunt sic, ut exteriorem quoque cutem decolorent: ex iis deinde quae in exteriorem partem prorumpunt, quae maximae, quaeque planissimae sunt. Quod si ne rupta quidem vomica, vel pure extrinsecus emissio, febris quievit, aut quamvis quieverit, tamen repetit; item si sitis est, si cibi fastidium, si venter liquidus, si pus est lividum et pallidum, si nihil aeger excreat nisi pituitam spumantem, periculum certum est. Atque ex iis quidem suppurationibus, quas pulmonum morbi concitarunt, fere senes moriuntur: ex ceteris iuniores. At in tabe sputum mixtum purulentum, febris assidua, quae et cibi tempora eripit, et siti affligit, in corpore tenui periculum subesse testantur. Si quis etiam in eo morbo diutius traxit, ubi capilli fluunt, ubi urina quaedam araneis similia subsidentia ostendit, atque in sputis odor foedus est; maximeque ubi post haec orta deiectio est, protinus moritur: utique si tempus autumnus est, quo fere, qui cetera parte anni traxerunt, resolvuntur. Item pus expuisse in hoc morbo, deinde ex toto spuere desiisse, mortiferum est. Solet etiam in adolescentibus is morbus ex vomica fistulave oriri: qui non facile sanescunt, nisi si multa signa bonae valetudinis subsequuta sunt. Ex reliquis vero minime facile sanantur virgines, aut eae mulieres quibus super tabem menstrua suppressa

pressa sunt. Cui vero sano subitus dolor capitis ortus est, dein somnus oppressit sic, ut stertat, neque expergiscatur, intra septimum diem pereundum est; magis si, cum alvus cita non antecesserit, palpebrae dormientis non coeunt, sed album oculorum apparet. Quos tamen ita mors sequitur, si id malum non est febre discussum. At aqua inter cutem, si ex acuto morbo coepit, ad sanitatem raro perducitur: utique si contraria iis quae supra posita sunt, subsequuntur. Aequae in ea quoque tussis spem tollit: item si sanguis sursum deorsumque erupit, et aqua medium corpus implevit. Quibusdam etiam in hoc morbo tumores oriuntur, deinde desinunt, deinde rursus assurgunt. Hi tutiores quidem sunt, quam qui supra comprehensi sunt, si attendunt; sed ferre fiducia secundae valetudinis opprimuntur. Illud iure aliquis mirabitur, quomodo quaedam simul et affligant nostra corpora, et parte aliqua tueantur. Nam sive aqua inter cutem quem implevit, sive in magno abscessu multum parvis coit, simul id omne effudisse, aequae mortiferum est, ac si quis sani corporis vulnere factus exsanguis est. Articuli vero cui sic dolent, ut super eos ex callo quaedam tubercula innata sint, numquam liberantur: quaeque eorum vitia vel in senectute coeperunt, vel ad senectutem ab adolescentia pervenerunt, ut aliquando leniri possunt, sic numquam ex toto finiuntur. Morbus quoque comitialis post annum quintum et vicesimum ortus aegre curatur; multoque aegrius is, qui post quadragesimum annum coepit; adeo ut in ea aetate aliquid in natura spei, vix quidquam in medicina sit. In eodem morbo, si simul totum corpus afficitur, neque ante in partibus aliquis venientis mali sensus est, sed homo ex improvviso concidit, cuiuscumque is aetatis est, vix sanescit: si vero aut mens laesa est, aut nervorum facta resolutio, medicinae locus non est. Deiectionibus quoque

que si febris accessit; si inflammatio iecinoris, aut praecordiorum, aut ventris; si immodica sitis; si longius tempus; si alvus varia, si cum dolore est, etiam mortis periculum subest: maximeque si inter haec tormina vetera esse coeperunt. Isque morbus maxime pueros absumit usque ad annum decimum: ceterae aetates facilius sustinent. Mulier quoque gravida eiusmodi casu rapi potest; atque etiamsi ipsa convaluit, partum tamen perdit. Quin etiam tormina ab atra bile orsa mortifera sunt; aut si sub his, extenuato iam corpore, subito nigra alvus profluit. At intestinorum laevis periculosior est, si frequens deiectio est; si venter omnibus horis et cum sono, et sine hoc profluit, si similiter noctu et interdiu; si quod excernitur, aut crudum est, aut nigrum, et praeter id, etiam laeve, et mali odoris; si sitis urget, si post potionem urina non redditur, quod evenit quia tunc liquor omnis non in vesicam, sed in intestina descendit; si os exulceratur; si rubet facies, et quasi maculis quibusdam colorum omnium distinguitur; si venter est quasi fermentatus, pinguis atque rugosus; si et cibi cupiditas non est. Inter quae cum evidens mors sit, multo evidentior est, si iam longum quoque id vitium est; maximeque si etiam in corpore senili est. Si vero in tenuiore intestino morbus est, vomitus, singultus, nervorum distentio, delirium, mala sunt. At in morbo arguato durum fieri iecur, perniciosissimum est. Quos lienis male habet; si tormina prehenderunt, deinde versa sunt vel in aquam inter cutem, vel in intestinorum laevitatem, vix ulla medicina periculo subtrahit. Morbus intestini tenuioris nisi resolutus est, intra septimum diem occidit. Mulier ex partu, si cum febre vehementibus etiam et assiduis capitis doloribus premitur, in periculo mortis est. Si dolor atque inflammatio est in iis partibus quibus viscera continentur, frequenter spi-

spirare, signum malum est. Si sine causa longus dolor capitis est, et in cervices ac scapulas transit, rursusque in caput revertitur, aut a capite ad cervices scapulasque pervenit, perniciosus est: nisi vomitum aliquam excitavit, sic ut pus extussiretur; aut nisi sanguis ex aliqua parte prorupit; aut nisi in capite multa porrigo, totove corpore pustulae ortae sunt. Aequae magnum malum est, ubi torpor atque prurigo pervagantur, modo per totum caput, modo in parte; aut sensus alicuius ibi quasi frigoris est; eaque ad summam quoque linguam perveniunt. Et cum in iisdem abscessibus auxilium sit, eo tamen difficilior sanitas est, quo minus saepe sub his malis illi subsequuntur. In coxae vero doloribus, si vehemens torpor est, frigescitque crux et coxa; alius nisi coacta non reddit, idque quod excernitur, mucosum est; iamque aetas eius hominis quadragesimum annum excessit; is morbus erit longissimus, minimeque annuus; neque finire poterit, nisi aut vere, aut aestate. Difficilis aequae curatio est in eadem aetate, ubi humerorum dolor vel ad manus pervenit, vel ad scapulas tendit, torporumque et dolorem creat, neque bilis vomitu levatur. Quaecumque vero parte corporis membrum aliquod resolutum est, si neque movetur, et emacrescit, in pristinum habitum non revertitur; eoque minus, quo vetustius id vitium est, et quo magis in corpore senili est. Omnique resolutioni nervorum ad medicinam non idonea tempora sunt hiems et autumnus; aliquid sperari potest vere et aestate. Isque morbus mediocris vix sanatur, vehemens sanari non potest. Omnis etiam dolor minus medicinae patet, qui sursum procedit. Mulieri gravidae, si subito mammae emacuerunt, abortus periculum est. Quae neque peperit, neque gravida est, si lac habet, a menstruis defecta est. Quartana autumnalis fere longa est; maximeque, quae coepit hieme

sp-

appropinquante . Si sanguis profluxit , deinde secur-
ra est deinentia cum distentione nervorum , pericu-
lum mortis est : itemque si medicamentis purgatum,
et adhuc inanem , nervorum distentio oppressit ; aut
si in magno dolore extremæ partes frigent . Neque
is ad vitam redit , qui ex suspensio , spumante ore ,
detractus est . Alvus nigra , sanguini atro similis ,
repentina , sive cum febre , sive etiam sine hac est ,
perniciosa est .

CAPUT IX.

DE MORBORUM CURATIONIBUS .

Cognitis indiciis quæ nos vel spe consolentur , vel
metu terreant , ad curationes morborum transeun-
dum est . Ex his quædam communes sunt , quæ-
dam propriæ : communes , quæ pluribus morbis
opitulantur ; propriæ , quæ singulis . Ante de com-
munibus dicam : ex quibus tamen quædam non æ-
gros solum , sed sanos quoque sustinent ; quædam
in adversa tantum valetudine adhibentur . Omne ve-
ro auxilium corporis , aut demit aliquam materiam ,
aut adiicit , aut evocat , aut reprimat , aut refrige-
rat , aut calefacit , simulque aut dūrat , aut mollit .
Quædam non uno modo tantum , sed etiam duobus
inter se non contrariis adjuvant . Demitur materia
sanguinis detractio , cucurbitula , deiectione , vo-
mitu , frictione , gestatione , oranique exercitatione
corporis , abstinencia , sudore . De quibus protinus
dicam .

CAPUT X.

DE SANGUINIS DETRACTIONE PER VENAS .

Sanguinem incisa vena mitti novum non est : sed
nullum pene morbum esse , in quo non mittatur ,
no-

novum est . Item mitti iunioribus , et feminis iterum non gerentibus , vetus est : in pueris vero idem experiri , et in senioribus , et in gravidis quoque mulieribus , vetus non est : siquidem antiqui primam ultimamque aetatem sustinere non posse hoc auxilii genus iudicabant ; persuaserantque sibi , mulierem gravidam quae ita curata esset , abortum esse facturam . Postea vero usus ostendit , nihil in his esse perpetuum ; aliasque potius observationes adhibendas esse , ad quas dirigi curantis consilium debeat . Interest enim , non quae aetas sit , neque quid in corpore intus geratur ; sed quae vires sint . Ergo si juvenis imbecillus est , aut si mulier quae gravida non est , parum valet , male sanguis mittitur : emoritur enim vis , si qua supererat , hoc modo crepta . At firmus puer , et robustus senex , et gravida mulier valens , tuto curatur . Maxime tamen in his medicus imperitus falli potest , quia fere minus roboris illis aetatibus subest ; mulierique praegnantem post curationem quoque viribus opus est , non tantum ad se , sed etiam ad partum sustinendum . Non quidquid autem intentionem animi et prudentiam exigit , protinus efficiendum est ; cum praecipua in hoc ars sit , quae non annos numeret , neque conceptionem solam videat ; sed vires aestimet , et ex eo colligat , possit necne superesse , quod vel puerum , vel senem , vel in una muliere duo corpora simul sustineat . Interest etiam inter valens corpus , et obesum ; inter tenue , et infirmum : tenuioribus magis sanguis , plenioribus magis caro abundat . Facilius itaque illi detractionem eiusmodi sustinent ; celeriusque ea , si nimium est pinguis aliquis , affligitur . Ideoque vis corporis melius ex venis , quam ex ipsa specie aestimatur . Neque solum haec considerata sunt ; sed etiam morbi genus quod sit : utrum superans , an deficiens materia laeserit ; corruptum corpus sit , an integrum . Nam si materia vel deest , vel integra est ,

est, istud alienum est: at si vel copia sui male habet, vel corrupta est, nullo modo melius succurritur. Ergo vehemens febris, ubi rubet corpus, plenaeque venae tument, sanguinis detractionem requirit: item viscerum morbi, nervorumque et resolutio, et rigor, et distentio: quidquid denique fauces difficultate spiritus strangulat; quidquid subito suppressit vocem; quisquis intolerabilis dolor est; et quacumque de causa ruptum aliquid intus atque collisum est: item malus corporis habitus, omnesque acuti morbi, qui modo, ut supra dixi, non infirmitate, sed onere nocent. Fieri tamen potest, ut morbus quidem id desideret, corpus autem vix pati posse videatur: sed si nullum tamen appareat aliud auxilium, periturusque sit qui laborat, nisi temeraria quoque via fuerit adiutus; in hoc statu boni medici est ostendere, quam nulla spes sit sine sanguinis detractione, faterique quantus in hac ipsa metus sit: et tum demum si exigetur, sanguinem mittere. De quo dubitari in eiusmodi re non oportet: satius est enim anceps auxilium experiri, quam nullum. Idque maxime fieri debet, ubi nervi resoluti sunt; ubi subito aliquis obmutuit; ubi angina strangulatur; ubi prioris febris accessio pene confecit, paremque subsequi verisimile est, neque eam videntur sustinere aegri vires posse. Cum sit autem minime crudo sanguis mittendus, tamen ne id quidem perpetuum est: neque enim semper concoctionem res expectat. Ergo si ex superiore parte aliquis decidit, si contusus est, si ex aliquo subito casu sanguinem vomit; quamvis paulo ante sumpsit cibum, tamen protinus ei demenda materia est, ne si subsederit, corpus affligat. Idemque etiam in aliis casibus repentinis qui strangulabunt, dictum erit. At si morbi ratio patiatur, tum demum nulla cruditatis suspitione remanente id fiet. Ideoque ei rei videtur aptissimus adversae valetudinis dies secun-

cundus , aut tertius . Sed ut aliquando etiam primo die sanguinem mittere necesse est , sic numquam utile post diem quartum est , cum iam spatio ipso materia et exhausta est , et corpus corrumpit : ut detractio imbecillum id facere possit , non possit integrum . Quod si vehemens febris urget , in ipso impetu eius sanguinem mittere , hominem iugulare est . Expectanda ergo remissio est ; si non decrescit , sed crescere desiit , neque speratur remissio , tunc quoque , quamvis peior , sola tamen occasio non omittenda est . Fere etiam ista medicina , ubi necessaria est , in biduum dividenda est : satius est enim primum levare aegrum , deinde perpurgare , quam simul omni vi effusa fortasse praecipitare . Quod si in pure quoque , aquaque quae inter eutem est , ita respondet , quanto magis necesse est in sanguine respondeat ? Mitti vero is debet , si totius corporis causa sit , ex brachio ; si partis alicuius , ex ea ipsa parte , aut certe quam proxima : quia non ubique mitti potest , sed in temporibus , in brachiis , iuxta talos . Neque ignoro quosdam dicere , quam longissime sanguinem inde , ubi laedit , esse mittendum ; sic enim averti materiae cursum ; at illo modo in id ipsum , quod gravat , evocari . Sed id falsum est : proximum enim locum primo exhaurit ; ex ulterioribus autem eatenus sanguis sequitur , quatenus emittitur ; ubi is suppressus est , quia non trahitur , ne venit quidem . Videtur tamen usus ipse docuisse , si caput fractum est , ex brachio potius sanguinem esse mittendum ; si quod in humero vitium est , ex altero brachio : credo , quia si quid parum cesserit , opportuniore eae partes iniuriae sunt , quae iam male habent . Avertitur quoque interdum sanguis , ubi alia parte prorumpens , alia emittitur : desinit enim fluere qua nolumus , inde obiectis quae prohibeant , alia dato itinere . Mittere autem sanguinem cum sit expeditissimum usum habenti ; tamen ignaro difficil-

li-

limum est. Iuncta enim est venae arteria, his nervi: ita, si nervum scalpellus attingit, sequitur nervorum distentio, eaque hominem crudeliter consumit. At arteria incisa neque coit, neque sanescit; interdum etiam, ut sanguis vehementer erumpat, efficit. Ipsius quoque venae, si forte praecisa est, capita comprimuntur, neque sanguinem emittunt. At si timide scalpellus demittitur, summam cutem lacerat, neque venam incidit. Nonnumquam etiam ea latet, neque facile reperitur. Ita multae res id difficile incipio faciant, quod perito facillimum est. Incidenda ad medium vena est: ex qua cum sanguis erumpit, colorem eius habitumque oportet attendere. Nam si is crassus et niger est, vitiosus est; ideoque utiliter effunditur: si rubet et pellucet, integer est; eaque missio sanguinis adeo non prodest, ut etiam noceat; protinusque is suppressendus est. Sed id evenire non potest sub eo medico qui scit ex quali corpore sanguis mittendus sit. Illud magis fieri solet, ut aequè niger assidue primo die profluet: quod quamvis ita est, tamen si iam satis fluxit, suppressendus est; semperque ante finis faciendus est, quam anima deficiat. Deligandumque brachium superimposito expresso ex aqua frigida penicillo: et postero die adverso medio digito vena ferienda, ut recens coitus eius resolvatur, iterumque sanguinem fundat. Sive autem primo, sive secundo die sanguis, qui crassus et niger initio fluxerat, et rubere, et pellucere coepit, satis materiae detractum est, atque quod superest, sincerum est: ideoque protinus brachium deligandum, habendumque ita est, donec valens cicatricula sit; quae celerime in vena confirmatur.

C A P U T XI.

DE SANGUINIS DETRACTIONE PER CUCURBITULAS.

Cucurbitularum vero duo genera sunt; aeneum, et corneum. Aenea altera parte patet, altera clausa est: cornea, altera parte aequae patens, altera foramen habet exiguum. In aeneum linamentum ardens coniicitur, ac sic os eius corpori aptatur, imprimiturque, donec inhaereat. Cornea per se corpori imponitur; deinde, ubi ea parte qua exiguum foramen est, ore spiritus adductus est, superque cera cavum id clausum est, aequae inhaerescit. Vtraque non ex his tantum materiae generibus, sed etiam ex quolibet alio recte fit. Ac si cetera defecerunt, caliculus quoque, aut pultarius oris compressoris, ei rei commodè aptatur. Vbi inhaesit, si concisa ante scalpello cutis est, sanguinem extrahit; si integra est, spiritum. Ergo ubi materia, quae intus est, laedit, illo modo; ubi inflatio, hoc imponi solet. Vsus autem cucurbitulae praecipuus est, ubi non in toto corpore, sed in parte aliqua vitium est, quam exhauriri ad confirmandam valetudinem satis est. Idque ipsum testimonium est, etiam scalpello sanguinem, ubi membro succurritur, ab ea potissimum parte quae iam laesa est, esse mittendum; quod nemo cucurbitulam diversae parti imponit, nisi cum profusionem sanguinis eo avertit; sed ei ipsi quae dolet, quaeque liberanda est. Opus etiam esse cucurbitula potest in morbis longis, quamvis iam et iis spatium aliquod accessit; sive corrupta materia, sive spiritu male habente: in acutis quoque quibusdam, si et levare corpus debet, et ex vena sanguinem mitti, vires non patiuntur. Idque auxilium ut minus vehemens, ita magis tutum; neque umquam periculosum est, etiamsi in medio fe-

Cels. T. I.

E

bris

bris impetu, etiamsi in cruditate adhibetur. Ideoque ubi sanguinem mitti opus est, si incisa vena praeceps periculum est, aut si in parte corporis etiam vitium est, huc potius confugiendum est: cum eo tamen, ut sciamus, hic ut nullum periculum, ita levius praesidium esse; nec posse vehementi malo, nisi aequae vehemens auxilium succurrere.

C A P U T XII.

DE DEIECTIONE.

Deiectionem autem antiqui variis medicamentis, crebraque alvi ductione in omnibus pene morbis moliebantur: dabantque aut nigrum veratrum, aut filiculam, aut squainam aeris, quam *λεπίδα χαλκῆ* Graeci vocant; aut lactucae marinac lac, cuius gutta pani adiecta abunde purgat; aut lac vel asinum, vel bubulum, vel caprinum, eique salis paulum adiciebant, decoquebantque id, et sublatis iis quae coierant, quod quasi serum supererat, bibere cogebant. Sed medicamenta stomachum fere laedunt: alvus si vehementius fluit, aut saepius ducitur, hominem infirmit. Ergo numquam in adversa valetudine medicamentum eius rei causa recte datur, nisi ubi is morbus sine febre est; ut cum veratrum nigrum aut atra bile vexatis, aut cum tristitia insipientibus, aut iis quorum nervi parte aliqua resoluti sunt, datur. At ubi febres sunt, satius est eius rei causa cibos potionesque assumere, qui simul et alant, et ventrem molliant. Suntque valetudinis genera, quibus ex lacte purgatio convenit.

De alvi ductione.

Plerumque vero alvus potius ducenda est quod ab Asclepiade quoque sic temperatum, ut tamen

ser-

servatum sit, video plerumque saeculo nostro praeteriri. Est autem ea moderatio quam is seculus videtur, aptissima: ut neque saepe ea medicina tentetur, et tamen semel, vel summum bis, non omitatur, si caput grave est; si oculi caligant; si morbus maioris intestini est, quod Graeci *καλόν* nominant; si in imo ventre, aut in coxa dolores sunt; si in stomachum quaedam biliosa concurrunt, vel etiam pituita eo se, humorve aliquis aquae similis confert; si spiritus difficiliter redditur; si nihil per se venter excernit; utique si iuxta quoque stercus est, et intus remanet; aut si stercoris odorem nihil deiciens aeger ex spiritu suo sentit; aut si corruptum est quod excernitur; aut si prima inedia febrem non sustulit; aut si sanguinem mitti, cum opus sit, vires non patiuntur, tempusve eius rei praeteriit; aut si multum ante morbum aliquis potavit; aut si is qui saepe vel sponte; vel casu purgatus est, subito habet alvum suppressam. Servanda vero illa sunt: ne ante diem tertium ducatur; ne ulla cruditate substantive; ne in corpore infirmo, diuque adversa valetudine exhausto; neve in eo cui satis alvus quotidie reddit, quive eam liquidam habet; neve in ipso accessionis impetu, quia quod tum infusum est, alvo continetur, regestumque in caput, multo gravius periculum efficit. Pridie vero abstinere debet aeger, ut aptus tali curationi sit: eo die ante aliquot horas aquam calidam bibere, ut superiores eius partes madescant. Tum immittenda in alvum est, si levi medicina contenti sumus, pura aqua; si paulo valentiori, mulsa; si leni, ea in qua foenum graecum, vel ptisana, vel malva decocta; si reprimendi causa, ex verbenis. Acris autem est marina aqua, vel alia sale adiecto: atque utraque decocta commodior est. Acrior fit adiecto vel oleo, vel nitro, vel melle: quoque acrior est, eo plus extrahit, sed minus facile sustinetur. Idque quod infunditur,

neque frigidum esse oportet, neque calidum; ne alterutro modo laedat. Cum infusum est, quantum fieri potest, continere se in lectulo debet aeger, nec primae cupiditati deiectionis protinus cedere: ubi necesse est, tum demum desiderare. Fereque eo modo dempta materia, superioribus partibus levatis, morbum ipsum mollit. Cum vero quoties res coëgit, desidendo aliquis se exhaust, paulisper debet conquiescere; et ne vires deficiant, utique eo die cibum assumere: qui plenior, an exiguus sit dandus, ex ratione eius accessionis quae expectabitur, aut in metu non erit, aestimari oportebit.

CAPUT XIII.

DE VOMITU.

At vomitus, ut in secunda quoque valetudine saepe necessarius biliosis est, sic etiam in iis morbis quos bilis concitavit. Ergo omnibus qui ante febres horrore et tremore vexantur; omnibus qui cholera laborant; omnibus etiam cum quadam hilaritate insanientibus; et comitiali quoque morbo oppressis necessarius est. Sed si acutus morbus est, sicut in cholera; si febris est, ut inter horrores, asperioribus medicamentis opus non est; sicut in deiectionibus quoque supra dictum est: satisque est ea vomitus causa sumi, quae sanis quoque sumenda esse proposui. At ubi longi valentesque morbi sine febre sunt, ut comitialis, ut insania, veratro quoque albo utendum est. Id neque hieme, neque aestate recte datur; optime vere; tolerabiliter autumno. Quisquis daturus erit, id agere ante debet, ut accepturi corpus humidius sit. Illud scire oportet, omne eiusmodi medicamentum quod potui datur, non semper aegris prodesse, semper sanis nocere.

C A P U T XIV.

DE FRICTIONE.

De frictione vero adeo multa Asclepiades , tamquam inventor eius , posuit in eo volumine quod Communium Auxiliorum inscripsit , ut cum trium tantum faceret mentionem , huius et aquae et gestationis , tamen maximam partem in hac consumpserit . Oportet autem neque recentiores viros in iis fraudare , quae vel reppererunt , vel recte secuti sunt ; et tamen ea quae apud antiquiores aliquos posita sunt , auctoribus suis reddere . Neque dubitari potest , quin latius quidem , et dilucidius , ubi et quomodo frictione utendum esset , Asclepiades praeceperit ; nihil tamen repperit , quod non a vetustissimo auctore Hippocrate paucis verbis comprehensum sit : qui dixit , frictione , si vehemens sit , durari corpus ; si lenis , molliri ; si multa , minui ; si modica , impleri . Sequitur ergo , ut tum utendum sit , cum aut adstringendum corpus est , quod hebes est ; aut molliendum , quod induruit ; aut digerendum in eo , quod copia nocet ; aut alendum id , quod tenue et infirmum est . Quas tamen species si quis curiosius aestimet ; quod iam ad medicum non pertinet ; facile intelliget , omnes ex una causa pendere , quae demit . Nam et adstringitur aliquid , eo dempto quod interpositum , ut id laxaretur , effecerat ; et mollitur , eo detracto quod duritiem creabat ; et impletur , non ipsa frictione , sed eo cibo qui postea usque ad cutem digestionem quadam relaxatam , penetrat . Diversarum vero rerum in modo causa est . Inter unctionem autem et frictionem multum interest . Ungi enim , leniterque pertractari corpus , etiam in acutis et recentibus morbis oportet ; in remissione tamen , et ante cibum : longa vero frictione uti , neque in acutis

his morbis, neque incrementibus convenit; praeterquam cum phreneticis somnus ea quaeritur. Amat autem hoc auxilium valetudo longa, et iam a primo impetu inclinata. Neque ignoro quosdam dicere, omne auxilium necessarium esse incrementibus morbis, non cum iam per se finiuntur. Quod non ita se habet. Potest enim morbus, etiam qui per se finem habiturus est, citius tamen adhibito auxilio tolli: quod duabus de causis necessarium est; et ut quam primum bona valetudo contingat; et ne morbus qui remanet, iterum, quamvis levi de causa, exasperetur. Potest morbus minus gravis esse, quam fuerit, neque ideo tamen solvi; sed reliquiis quibusdam inhaerere, quas admotum aliquod auxilium discutiat. Sed ut levata quoque adversa valetudine, recte frictio adhibetur; sic nunquam adhibenda est febre incremente: verum, si fieri poterit, cum ex toto corpus ea vacabit; si minus, certe cum ea remiserit. Eadem autem modo in totis corporibus esse debet, ut cum infirmus aliquis implendus est; modo in partibus, aut quia eius ipsius membri imbecillitas id requirit, aut quia alterius. Nam et capitis longos dolores ipsius frictio levat; non in impetu tamen doloris: et membrum aliquod resolutum ipsius frictione confirmatur. Longe tamen saepius aliud perfricandum est, cum aliud dolet; maximeque cum a summis, aut a mediis partibus corporis evocare materiam volumus; ideoque extremas partes perfricamus. Neque audiendi sunt, qui numero finiunt, quoties aliquis perfricandus sit. Id enim ex viribus hominis colligendum est: et si is perinfirmus est, potest satis esse quinquagies; si robustior, potest ducenties; inter utrumque deinde, prout vires sunt. Quo fit, ut etiam minus saepe in muliere, quam in viro; minus saepe in puero, vel sene, quam in iuvene, manus dimovendae sint. Denique, si certa membra perfricantur, multa valentique frictio-

ctione opus est. Nam neque totum corpus infirmari cito per partem potest, et opus est quam plurimum materiae digeri, sive id ipsum membrum, sive per id aliud levamus. At ubi totius corporis imbecillitas hanc curationem per totum id exigit, brevior esse debet et lenior; ut tantummodo summam cutem emolliat, quo facilius capax ex recenti cibo novae materiae fiat. In malis iam aegrum esse, ubi exterior pars corporis friget, interior cum siti calet, supra posui. Sed tunc quoque unicum in frictione praesidium est; quae si calorem in cutem evocavit, potest alicui medicinae locum facere.

261.

C A P U T X V.

DE GESTATIONE.

Gestatio quoque longis et iam inclinatis morbis aptissima est: utilisque est et iis corporibus quae iam ex toto febre carent, sed adhuc exerceri per se non possunt; et iis quibus lentae morborum reliquiae remanent, neque aliter eliduntur. Asclepiades etiam in recenti vehementique, praecipueque ardente febre, ad discutendam eam, gestatione dixit utendum esse: sed id periculose fit; meliusque quiete eiusmodi impetus sustinetur. Si quis tamen experi-ri velit, sic experiatur; si lingua non erit aspera, si nullus tumor, nulla durities, nullus dolor visceribus, aut capiti, aut praecordiis suberit. Et ex toto numquam gestari corpus dolens debet, sive id in toto, sive in parte est; nisi tamen solis nervis dolentibus; neque unquam crescente febre, sed in remissione eius. Genera autem gestationis plura sunt; quae adhibenda sunt et pro viribus cuiusque, et pro opibus; ne aut imbecillum hominem nimis digerant, aut humili desint. Lenissima est navi, vel in portu, vel in flumine; vehementior vel in

alto mari navi, vel lectica; etiamnum acrior vehiculo. Atque haec ipsa et intendi et leniri possunt. Si nihil horum est, suspendi lectus debet, et moveri: si ne id quidem est, at certe uni pedi subiiciendum fulcrum est, atque ita lectus huc et illuc manu impellendus. Et lenia quidem genera infirmis conveniunt: valentiora vero iis qui iam pluribus diebus febre liberati sunt; aut iis qui gravium morborum initia sic sentiunt, ut adhuc febre vacent (quod et in tabe, et in stomachi vitiis, et cum aqua cutem subit, et interdum in morbo regio fit) aut ubi quidam morbi, qualis comitialis, qualis insania est, sine febre, quamvis diu, manent. In quibus affectibus ea quoque genera exercitationum necessaria sunt, quae comprehendimus eo loco, quo, quemadmodum sani, neque firmi homines se gererent, praecepimus.

CAPUT XVI.

DE ABSTINENTIA.

Abstinentiae vero duo genera sunt: alterum ubi nihil assumit aeger; alterum ubi non nisi quod oportet. Initia morborum primum famem, sitimque desiderant: ipsi deinde morbi moderationem, ut neque aliud quam expedit, neque eius ipsius nimium sumatur. Neque enim convenit iuxta inediam protinus satietatem esse. Quod si sanis quoque corporibus inutile est, ubi aliqua necessitas famem fecit; quanto inutilius est in corpore etiam aegro? Neque ulla res magis adjuvat laborantem, quam tempestiva abstinentia. Intemperantes homines apud nos, ipsi cibi tempora curantibus dant. Rursus alii tempora medicis pro dono remittunt, sibi ipsis modum vindicant. Liberaliter agere se credunt, qui cum cetera illorum arbitrio relinquunt, in genere cibi liberi sunt; quasi quac-

quaeratur , quid medico liceat , non quid aegro salutare sit . Cui vehementer nocet , quoties in eius quod assumitur , vel tempore , vel modo , vel genere peccatur .

C A P U T X V I I .

D E S U D O R E .

Sudor etiam duobus modis elicitur ; aut sicco calore , aut balneo . Siccus calor est , et arenae calidae , et laconici , et clibani , et quarundam naturalium sudationum , ubi e terra profusus calidus vapor aedificio includitur , sicut super Baïas in myrtetis habemus . Praeter haec sole quoque , et exercitatione is movetur . Vtiliaque haec genera sunt , quoties humor intus nocet , isque digerendus est . Ac nervorum quoque quaedam vitia sic optime curantur . Sed cetera infirmis possunt convenire : sol et exercitatio tantum robustioribus ; qui tamen sine febre , vel inter initia morborum , vel etiam non gravibus morbis tenentur . Cavendum autem est , ne quid horum vel in febre , vel in cruditate tentetur . At balnei duplex usus est . Nam modo , discussis febribus , initium cibi plenioris , vinique firmioris valetudini facit ; modo febrem ipsam tollit . Fereque adhibetur , ubi summam cutem relaxari , evocarique corruptum humorem , et habitum corporis mutari expedit . Antiqui timidius eo utebantur : Asclepiades audacius . Neque terrere autem ea res , si tempestiva est , debet : ante tempus nocet . Quisquis febre liberatus est , simulatque ea uno die non accessit , eo qui proximus est , post tempus accessionis , tuto lavari potest . At si circumitum habere ea febris solita est sic , ut tertio , quartove die revertatur , quandocumque non accessit , balneum tutum est . Manentibus vero adhuc febribus , si eae sunt len-

lentae, levesque iamdiu male habent, recte medicina ista tentatur; cum eo tamen, ne praecordia dura sint, neve ea tumeant, neve lingua aspera sit, neve aut in medio corpore, aut in capite dolor ullus sit, neve tum febris increascit. Atque in iis quidem febribus quae certum circuitum habent, duo balnei tempora sunt; alterum ante horrorem; alterum febre finita: in iis vero qui lentis febriculis diu detinentur, cum aut ex toto recessit accessio; aut si id non solet, certe lenita est; iamque corpus tam integrum est, quam maxime esse in eo genere valetudinis solet. Imbecillus homo iturus in balneum, vitare debet ne ante frigus aliquod experiatur: ubi in balneum venit, paulisper resistere, experiri que, num tempora adstringantur, et an sudor aliquis oriatur: illud si incidit, hoc non secutum est, inutile eo die balneum est; perungendusque is leniter, et referendus est; vitandumque omni modo frigus, et abstinencia utendum. At si temporibus integris, primum ibi, deinde alibi sudor incipit, fovendum os aqua calida; tum in solium descendendum est: atque ibi quoque videndum, num sub primo contactu aquae calidae summa cutis inhorrescat; quod vix tamen fieri potest, si priora recte cesserunt: certum id autem signum inutilis balnei est. Ante vero, an postea quam in aquam calidam se demittat, aliquis perungi debeat, ex ratione valetudinis suae cognoscat. Fere tamen, nisi ubi nominatim, ut postea fiat id, praecipitur, moto sudore leniter corpus perungendum; deinde in aquam calidam demittendum est. Atque hic quoque habenda virium ratio est, neque committeudum, ut per aestum anima deficiat; sed maturius is auferendus, curioseque vestimentis involvendus est, ut neque ad eum frigus adspiret, et ibi quoque, antequam aliquid assumat, insudet. Fomenta quoque calida sunt milium, sal, arena; quodlibet eorum calefactum, et

et in linteum coniectum, si minore vi opus est, etiam solum linteum; at si maiore, extincti titiones, involutique panniculis, et sic circumdati. Quia etiam calido oleo replentur utriculi: et in vasa fictilia, a similitudine quas lenticulas vocant, aqua conicitur; et sal sacco linteo excipitur, demittiturque in aquam bene calidam; tum super id membrum, quod fovendum est, collocatur. Iuxtaque ignem ferramenta duo sunt, capitibus paulo latioribus: alterumque ex his demittitur in eum salem, et aqua super leviter aspergitur; ubi frigere coepit, ad ignem refertur, et idem in altero fit; deinde invicem in utroque: inter quae descendit salsus et calidus succus, qui contractis aliquo morbo nervis opitulatur. His omnibus commune est, digerere id quod vel praecordia onerat, vel fauces strangulat, vel in aliquo membro nocet. Quando autem quoque utendum sit, in ipsis morborum generibus dicitur.

C A P U T XVIII.

QUI CIBI, POTIONESQUE, AUT VALENTIS, AUT MEDIAE,
AUT IMBECILLAE MATERIAE SINT.

Cum de iis dictum sit quae detrahendo iuvant; ad ea veniendum est quae alunt, id est cibum, et potionem. Haec autem non omnium tantum morborum, sed etiam secundae valetudinis communia praesidia sunt: pertinetque ad rem, omnium proprietates nosse; primum ut sani sciant, quomodo his utantur; deinde ut exsequentibus nobis morborum curationes, liceat species rerum, quae assumendae crunt, subiicere, neque necesse sit subinde singulas eas nominare, Scire igitur oportet, omnia legumina, quaecque ex frumentis panificia sunt, generis valentissimi esse (valentissimum voco, in quo plurimum alimenti est); item omne animal quadru-
pes

pes domi natum; omnem grandem feram, quales sunt caprea, cervus, aper, onager; omnem grandem avem, quales sunt anser, et pavo, et grus; omnes belluas marinas, ex quibus cetus est, quaeque his pares sunt: item mel, et caseum. Quo minus mirum est, opus pistorium valentissimum esse, quod ex frumento, adipe, melle, caseo constat. In media vero materia numerari ex oleribus debere ea quorum radices, vel bulbos assumimus; ex quadrupedibus, leporem; aves omnes a minimis ad phoenicepteron; item pisces omnes qui salem non patiuntur, solidive saliantur. Imbecillissimam vero materiam esse omnem caulem oleris, et quidquid in caule nascitur, qualis est cucurbita, et cucumis, et capparitis; omnia poma, oleas, cochleas, itemque conchyliis. Sed quamvis haec ita discreta sint, tamen etiam quae sub eadem specie sunt, magna discrimina recipiunt; aliaeque res alia vel valentior est, vel infirmior. Siquidem plus alimenti est in pane, quam in ullo alio: firmitus est triticum, quam milium; id ipsum, quam hordeum; et ex tritico firmissima siligo, deinde simila, deinde cui nihil ademptum est, quod αὐτόπυρον Graeci vocant; infirmior est ex polline; infirmissimus cibarior panis. Ex leguminibus vero valentior faba, vel lenticula, quam pisum. Ex oleribus valentiora rapa, napique, et omnes bulbi in quibus cepam quoque, et allium numero; quam pastinaca, vel quae specialiter radícula appellatur: item firmitus brassica, et beta, et porrum, quam lactuca, vel cucurbita, vel asparagus. At ex fructibus surculorum valentiores uvae, ficus, nuces, palmulae, quam quae poma proprie nominantur: atque ex his ipsis firmitus quae succosa, quam quae fragilia sunt. Itemque ex iis avibus quae in media specie sunt, valentiores eae quae pedibus, quam quae volatu magis nituntur; et ex iis quae volatu sedunt, firmitus quae grandiores aves quam

quam quae minutae sunt ; ut ficedula et turdus . Atque cae quoque quae in aqua degunt , leviores cibum praestant , quam quae natandi scientiam non habent . Inter domesticas vero quadrupedes levissima suilla est ; gravissima bubula : itemque ex feris , quo maius quodque animal , eo robustior ex eo cibus est . Pisciumque eorum qui ex media materia sunt , quibus maxime utimur , tamen gravissimi sunt , ex quibus salsamenta quoque fieri possunt , qualis lactertus est ; deinde qui ; quamvis teneriores , tamen duri sunt , ut aurata , corvus , sparus , oculata ; tum plani ; post quos etiamnum leviores lupi , mullique ; et post hos , omnes saxatiles . Nèque vero in generibus rerum tantummodo discrimen est , sed etiam in ipsis : quod et aetate fit , et membro , et solo , et coelo , et habitu . Nam quadrupes omne animal , si lactens est , minus alimenti praestat : itemque quo tenerior pullus cohortalis est : in piscibus quoque media aetas , quae nondum summam magnitudinem implevit . Deinde ex eodem sue , ungulae , rostrum , aures , cerebellum ; ex agno , hoedove cum petiolis totum caput aliquanto quam cetera membra leviora sunt : adeo ut in media materia poni possint . Ex avibus colla , alaeve recte infirmissimis adnumerantur . Quod ad solum vero pertinet , frumentum quodque valentius est collinum , quam campestre : levior piscis inter saxa editus , quam in arena ; levior in arena , quam in limo : quo fit , ut ex stagno , vel lacu , vel flumine eadem genera graviora sint : leviorque qui in alto , quam qui in vado vixit . Omne etiam ferum animal domestico levius ; et quodcumque humido coelo , quam quod sicco natum est . Deinde eadem omnia pingua , quam macra ; recentia , quam salsa ; nova , quam vetusta plus alimenti habent . Tum res eadem magis alit iurulenta , quam assa ; magis assa ; quam elixa . Ovum durum valentissimae materiae est ; molle , vel sorbile , im-

be-

becillissimae. Cumque panificia omnia firmissima sint, clota tamen quaedam genera frumenti, ut alica, oryza, ptisana, vel ex iisdem facta sorbitio, aut pulicula, et aqua quoque madens panis, imbecillissimis adnumerari potest.

Ex potionibus vero quaecumque ex frumento facta est, itemque lac, inulsum, defrutum, passum, vinam aut dulces, aut vehemens, aut mustum, aut magnae vetustatis, valentissimi generis est. At acetum, et id vinum quod paucorum annorum, vel austerum, vel pingue est, in media materia est: ideoque infirmis nunquam generis alterius dari debet. Aqua omnium imbecillissima est. Firmiorque ex frumento potio est, quo firmitus fuit ipsum frumentum: firmior ex eo vino quod bono solo, quam quod tenui; quodque temperato coelo, quam quod aut nimis humido, aut nimis sicco, nimiumque aut frigido, aut calido natum est. Mulsum, quo plus mellis habet; defrutum, quo magis incoctum; passum, quo ex sicciore uva est, eo valentius est. Aqua levissima pluvialis est; deinde fontana; tum ex flumine; tum ex puteo; posthac ex nive, aut glacie; gravior his ex lacu; gravissima ex palude. Facilis etiam et necessaria cognitio est naturam eius requirentibus. Nam levis, pondere apparet; et ex iis quae pondere pares sunt, eo melior quaecumque est, quo celerius et calescit et frigescit; quoque celerius ex ea legumina percoquantur. Fere vero sequitur, ut quo valentior quaecumque materia est, eo minus facile concoquatur; sed si concocta est, plus alit. Itaque utendum est materiae genere pro viribus; modusque omnium pro genere sumendus. Ergo imbecillis hominibus, rebus infirmissimis opus est; mediocriter firmos media materia optime sustinet; et robustis apta validissima est. Plus deinde aliquis assumere ex levioribus potest: magis in iis quae valentissima sunt, temperare sibi debet.

CA.

C A P U T XIX.

QUAE NATURA, AC PROPRIETAS CUIUSQUE REI
SIT, QUA VESCIMUR.

Neque haec sola discrimina sunt : sed etiam aliae res boni succi sunt , aliae mali , quas *εὐχύλους* vel *κακοχύλους* Graeci vocant ; aliae lenes , aliae acres ; aliae crassiorem pituitam faciunt , aliae tenuiorem ; aliae idoneae stomacho , aliae alienae sunt : itemque aliae inflant ; aliae ab hoc absunt ; aliae calefaciunt , aliae refrigerant ; aliae facile in stomacho acescunt , aliae non facile intus corrumpuntur ; aliae movent alvum , aliae supprimunt , aliae citant urinam , aliae tardant ; quaedam somnum movent , quaedam sensus excitant . Quae omnia ideo noscenda sunt , quoniam aliud alii vel corpori , vel valetudini convenit .

C A P U T XX.

DE HIS , QUAE BONI SUCCI SUNT .

Boni succi sunt triticum , siligo , alica , oryza , amyllum , tragus , ptisana , lac , caseus mollis , omnis venatio , omnes aves quae ex media materia sunt ; ex maioribus quoque eae quas supra nominavi : medii inter teneros duosque pisces , ut mulus , et lupus : verna lactuca , urtica , malva , cucumis , cucurbita , ovum sorbibile , portulaca , cochleae , palmulae : ex pomis quodcumque neque acerbum , neque acidum est : vinum dulce , vel lenne , passum , defrutum , oleae quae ex his duobus in alterutro servatae sunt : vulvae , rostra , trunculique suum , omnis pinguis caro , omnis glutinosa , omne iecur .

CA-

CAPUT XXI.

DE HIS, QUAE MALI SUCCI SUNT.

Mali vero succi sunt milium, panicum, hordeum, legumina, caro domestica permacra, omnisque caro salsa, omne salsamentum, garum, vetus caseus, siser, radícula, rapa, napi, bulbi, brassica, magisque etiam cyma eius, asparagus, beta, cucumis, porrum, eruca, nasturtium, thynium, nepeta, satureia, hyssopum, ruta, anethum, foeniculum, cuminum, anisum, lapathum, sinapi, allium, cepa, lienes, renes, intestina, pomum quodcumque acidum vel acerbum est, acetum, omnia acria, acida, acerbata, oleum, pisces quoque saxatiles, omnesque qui ex tenerissimo genere sunt, aut qui rursus nimium duri virosique sunt, ut fere quos stagna, lacus, limosique rivi ferunt, quique in nimiam magnitudinem excesserunt.

CAPUT XXII.

QUAE RES LENES, QUAE ACRES SINT.

Lenes autem sunt sorbitio, pulticula, laganum, amyllum, ptisana, pinguis caro, et quaecumque glutinosa est: quod fere quidem in omni domestica fit, praecipue tamen in ungulis, trunculisque suum, in petiolis capitulisque hoedorum et vitulorum et agnorum, omnibusque cerebellis: item qui proprie bulbi nominantur, lac, defrutum, passum, nuclei pinei. Acria sunt omnia nimis austera, omnia acida, omnia salsa, mel, et quidem quo melius est, eo magis: item allium, cepa, eruca, ruta, nasturtium, cucumis, beta, brassica, asparagus, sinapi, radícula, intubus, ocimum, lactuca, maximaque olerum pars.

CA-

C A P U T XXIII.

DE HIS , QUAE CRASSIOREM , QUAEVE TENUIOREM
PITUITAM FACIUNT .

Crassiorem autem pituitam faciunt ova sorbilia , alica , oryza , amyllum , ptisana , lac , bulbi , omnia-
que fere glutinosa . Extenuant eandem omnia salsa ,
atque acria , atque acida .

C A P U T XXIV.

DE HIS , QUAE STOMACHO IDONEA SUNT .

Stomacho autem apta sunt , quaecumque austera
sunt , etiam quae acida sunt , quaeque contacta sale
modice sunt : item panis sine fermento , et elota ali-
ca , vel oryza , vel ptisana ; omnis avis , omnis ve-
natio ; atque utraque vel assa , vel elixa : ex dome-
sticis animalibus bubula : si quid ex ceteris sumitur ,
macrum potius , quam pingue : ex sue ungulae , ro-
stra , aures , vulvaeque steriles : ex oleribus , intu-
bus , lactuca , pastinaca , cucurbita , elixa , siser :
ex pomis cerasum , morum , sorbum , pirum fragi-
le , quale crustuminum vel naevianum est : item pi-
ra quae reponuntur tarentina atque signina ; malum
orbiculatum , aut scandianum , vel amerinum , vel
cotoneum , vel punicum ; uvae ex olla , molle ovum ,
palmulae , nuclei pinei , oleae albae ex dura mu-
ria , eadem aceto intinctae , vel nigrae , quae in
arbore bene maturuerunt , vel quae in passo , de-
frutove servatae sunt : vinum austerum , licet etiam
asperum sit , item resinatum : duri ex media mate-
ria pisces , ostrea , pectines , murices , purpurae ,

Cels. T. I.

F

co-

cochleae : cibi , potionesque vel frigidae , vel fermentes ; absinthium .

CAPUT XXV.

QUAE RES ALIENAE STOMACHO SINT .

Aliena vero stomacho sunt omnia tepida , omnia salsa , omnia iurulenta , omnia praedulcia , omnia pingua , sorbitio , panis fermentatus , idemque vel ex milio , vel ex hordeo , oleum , radices olerum , et quodcumque olus ex oleo garove estur , mel , mulsum , defrutum , passum , lac , omnis caseus , uva recens , ficus et viridis et arida , legumina omnia , quaeque inflare consueverunt : item thymum , nepeta , satureia , hyssopum , nasturtium , lapathum , lapsana , iuglandes . Ex his autem intelligi potest non quidquid boni succi est , protinus stomacho convenire ; neque quidquid stomacho convenit , protinus boni succi esse .

CAPUT XXVI.

DE HIS QUAE INFLANT .

Inflant autem omnia fere legumina , omnia pingua , omnia dulcia , omnia iurulenta , mustum , atque etiam id vinum cui nihil adhuc aetatis accessit : ex oleribus allium , cepa , brassica , omnesque radices , excepto sisere et pastinaca , bulbi , ficus etiam aridae , sed magis virides , uvae recentes , nuces omnes , exceptis nucleis pineis , lac , omnisque caseus ; quidquid denique subcrudum aliquis assumpsit .

De his quae minime inflant.

Minima inflatio fit ex venatione , aucupio , piscibus , pomis , oleis , conchiliis , ovis vel mollibus vel sorbilibus , vino vetere . Faeniculum vero , et anethum inflationes etiam levant .

C A P U T XXVII.

DE HIS , QUAE CALEFACIUNT , AUT REFRIGERANT .

At calefaciunt , piper , sal , caro omnis iurulenta , allium , cepa , ficus arida , salsamentum , vinum , et quo meracius est , eo magis . Refrigerant olera quorum crudi caules assumuntur , ut intubus , et lactuca : item coriandrum , cucumis , elixa cucurbita , beta , mora , cerasa , mala austera , pira fragilia , caro elixa , praecipueque acetum , sive cibus ex eo , sive potio assumitur .

C A P U T XXVIII.

DE HIS , QUAE INTUS FACILE CORRUMPUNTUR .

Facile autem intus corrumpuntur panis fermentatus , et quisquis alius quam ex tritico est , lac , mel ; ideoque etiam lactantia , atque omne pistorium opus ; teneri pisces , ostrea , olera , cascus et recens et vetus , crassa vel tenera caro , vinum dulce , mulsum , defrutum , passum ; quidquid denique vel iurulentum est , vel nimis dulce , vel nimis tenue . At minime intus vitiantur panis sine fermento , aves , et eae potius duriores , duri pisces ; neque solum aurata puta , aut sparus , sed etiam lolligo , locusta , polypus : item bubula , omnisque dura caro ;

eademque aptior est, si macra, si salsa est; omniaque salsamenta; cochleae, murices, purpurae; vinum austerum, vel resinatum.

CAPUT XXIX.

DE HIS, QUAE ALVUM MOVENT.

At alvum movent panis fermentatus, magisque si cibarius vel hordeaceus est; brassica si subcrusta est, lactuca, anethum, nasturtium, ocimum, urtica, portulaca, radícula, capparis, allium, cepa, malva, lapathum, beta, asparagus, cucurbita, cerasa, mora, poma omnia mitia, ficus etiam arida, sed magis viridis, uvae recentes, pingues minutae aves, cochleae, garum, salsamentum, ostrea, pelorides, echini, muscoli, et omnes fere conchulae, maximeque ius earum; saxatiles, et omnes teneri pisces, sepiarum atramentum; si qua caro assumitur, pinguis, eadem vel iurulenta, vel elixa; aves quae nant; mel crudum, lac, lactantia omnia, mulsum, vinum dulce vel salsum, aqua tenera, omnia tepida, dulcia, pingua, elixa, iurulenta, salsa, diluta.

CAPUT XXX.

DE HIS, QUAE ALVUM ADSTRINGUNT.

Contra adstringunt panis ex siligine, vel ex simila; magis si sine fermento est; magis etiam si tostus est, intenditurque vis eius etiam si bis coquitur: pulticula vel ex alica, vel ex panico, vel ex milio; itemque ex iisdem sorbitio; et magis si haec ante fricta sunt: lenticula cui vel beta, vel intubus, vel ambubcia, vel plantago adiecta sit; magisque etiam si illa ante fricta est: per se etiam intubus, vel

vel plantago, vel ambubeia fricta; minuta ole-
ra, brassica bis decocta: dura ova, magisque si as-
sa sunt: minutae aves, merula, palumbus, magis-
que si in posca decoctus est; grus, omnes aves quae
magis currunt, quam volant; lepus, caprea; iecur
ex iis quae sebum habent, maximeque bubulum, ac
sebum ipsum: caseus, qui vehementior vetustate
fit, vel ea mutatione, quam in caseo transma-
rino videmus; aut si recens est, ex melle, mulsove
decoctus: item mel coctum, pira immatura, sorba,
magisque ea quae torminalia vocantur, mala cotonea,
et punica, oleae vel albae vel permaturae, myrta,
palmulae, purpurae, murices, vinum resinatum vel
asperum, item meracum, acetum, mulsum quod
inferbuit; item defrutum, passum, aqua vel tepida
vel praefrigida, dura, id est ea quae tarde pute-
scit; ideoque pluvia potissimum: omnia dura, ma-
cra, austera, aspera, tosta, et in eadem carne, as-
sa potius, quam elixa.

C A P U T XXXI.

DE HIS, QUAE URINAM MOVENT.

Vrinam autem movent quaecumque in horto na-
scentia boni odoris sunt, ut apium, ruta, anethum,
ocimum, mentha, hyssopum, anisum, coriandrum,
nasturtium, eruca, foeniculum: praeter haec aspa-
ragus, capparis, nepeta, thymum, satureia, lapsa-
na, pastinaca, magisque agrestis, radícula, siser,
cepa; ex venatione maxime lepus; vinum tenue, pi-
per et rotundum et longum, sinapi, absinthium,
nuclei pinei.

CAPUT XXXII.

DE HIS QUAE AD SOMNUM APTA SUNT.

Somno vero aptum est papaver, lactuca, maximeque aestiva, cuius cauliculus iam lacte repletus est, morum, porrum.

De his quae sensum excitant.

Sensus excitant nepeta, thymum, satureia, hysopum, praecipueque pulegium, ruta, et cepa.

CAPUT XXXIII.

DE HIS QUAE MATERIAM EVOCAUNT.

Evocare vero materiam multa admodum possunt: sed ea quae ex peregrinis medicamentis maxime constant, aliisque magis quam quibus ratione victus succurritur, opitulantur, in praesentia differam: ponam vero ea quae prompta, et iis morbis de quibus protinus dicturus sum, apta, corpus erodunt, et sic eo, quod mali est, extrahunt. Habent autem hanc facultatem semina erucæ, nasturtii, radiculæ; praecipue tamen omnium sinapi. Salis quoque et fici eadem vis est.

De his quae reprimunt.

Leniter vero simul et reprimunt, et molliunt lana sucida ex aceto vel viuo, cui oleum adiectum sit; contritæ palmulae, fursures in salsa aqua vel aceto decocti. At simul et reprimunt et refrigerant
herba

herba muralis, *παραέριον* vel *παρασίχον* appellant, serpyllum, pulegium, ocimum, herba sanguinalis, quam Graeci *πολύγονον* vocant, portulaca, papaveris folia, capreolique vitium, coriandri folia, hyoscyamum, muscus, siser, apium, solanum, quam *ερύχρον* Graeci vocant, brassicae folia, intubus, plantago, foeniculi semen, contrita pira vel mala, praecipueque cotonea, lenticula, aqua frigida, maximeque pluvialis, vinum, acetum, et horum aliquo madens vel panis, vel farina, vel spongia, vel cinis, vel lana sucida, vel etiam linteolum, creta cimolia, gypsum, melinum; myrteum, rosa, acerbum oleum, verbenarum contusa cum teneris caulibus folia; cuius generis sunt olea, cupressus, myrtus, lentiscus, tamarix, ligustrum, rosa, rubus, laurus, hederæ, panicum, malum. Sine frigore autem reprimunt cocta mala cotonea, malicorium, aqua calida, in qua verbenæ coctae sint, quas supra posui, pulvis vel ex faece vini, vel ex myrti foliis, amaræ nuces.

De his quae calefaciunt.

Calefacit vero ex qualibet farina cataplasma, sive tritici, sive farris, sive hordei, sive erui, vel lolii, vel milii, vel panici, vel lenticulae, vel fabae, vel lupini, vel lini; vel foeni graeci; ubi ea deferbuit, calidaque imposita est. Valentior tamen ad id omnis farina est ex mulso, quam ex aqua cocta. Praeterea cyprinum, irinum, medulla, adeps ex fele, oleum, magisque si vetus est, iunctaque oleo sal, nitrum, git, piper, quinquefolium.

De his quae durant, aut emolliunt.

Fereque quae vehementer et reprimunt, et refrigerant, durant; quae calefaciunt, et digerunt, emol-

liunt : praecipueque ad emolliendum potest cataplasma ex lini vel foeni graeci semine. His autem omnibus , et simplicibus , et permixtis , varie medici utuntur ; ut magis quid quisque persuaserit sibi , appareat , quam quid evidenter compererit .



A. CORNELII CELSI
ARTIUM LIBER OCTAVUS
IDEM
MEDICINAE TERTIVS.

C A P U T I.

DE MORBORUM GENERIBUS.

Provisis omnibus quae pertinent ad universa genera morborum, ad singulorum curationes veniam. Hos autem in duas species Graeci dividerunt; aliosque ex his acutos, alios longos esse dixerunt: ideoque, quoniam non semper eodem modo respondebant, eosdem alii inter acutos, alii inter longos retulerunt. Ex quo plura eorum genera esse manifestum est. Quidam enim breves acutique sunt, qui cito vel tollunt hominem, vel ipsi cito finiuntur: quidam longi, sub quibus neque sanitas in propinquo, neque exitium est: tertiumque genus eorum est, qui modo acuti, modo longi sunt; idque non in febribus tantummodo, in quibus frequentissimum est, sed in aliis quoque fit. Atque etiam praeter hos, quartum est, quod neque acutum dici potest, quia non perimit; neque utique longum, quia, si occurritur, facile sanatur. Ego cum de singulis dicam, cuius quisque generis sit indicabo. Dividam autem omnes in eos qui in totis corporibus consistere videntur, et eos, qui oriuntur in partibus. Incipiam a prioribus, pauca de omnibus praefatus. In nullo quidem morbo minus fortuna sibi vindicare,

re, quam ars potest; utpote cum, repugnante natura, nihil medicina proficiat. Magis tamen ignoscendum medico est parum proficienti in acutis morbis, quam in longis. Hic enim breve spatium est, intra quod, si quod auxilium non profuit, aeger extinguitur: ibi et deliberationi, et mutationi remedium tempus patet; adeo ut raro, si inter initia medicus accessit, obsequens aeger sine illius vitio pereat. Longus tamen morbus cum penitus insedit, quod ad difficultatem pertinet, acuto par est. Et acutus quidem, quo vetustior est; longus autem, quo recentior, eo facilius curatur. Alterum illud ignorari non oportet, quod non omnibus aegris eadem auxilia conveniant. Ex quo incidit, ut alia atque alia summi auctores quasi sola venditaverint, prout cuique cesserant. Oportet itaque, ubi aliquid non respondet, non tanti putare auctorem, quanti aegrum; et experiri aliud atque aliud: sic tamen, ut in acutis morbis cito mutetur, quod nihil prodest; in longis, quos tempus ut facit, sic etiam solvit, non statim condemnetur, si quid non statim profuit; minus vero removeatur, si quid paulum saltem iuvat; quia profectus tempore expletur,

CAPUT II.

QUOMODO MORBI COGNOSCANTUR, ET AN INCRESCANT,
AN MINUANTUR, ET QUAE RATIONE AD INITIUM
QUI LANGUERE INCIPIT, CURARI DEBEAT.

Protinus autem inter initia scire facile est, quis acutus morbus, quis longus sit; non in iis solis, in quibus semper ita se habet; sed in iis quoque in quibus variat. Nam ubi sine intermissionibus accessiones et dolores graves urgent, acutus morbus est: ubi lenti dolores, lentaeve febres sunt, et spatia inter accessiones porriguntur, acceduntque ea
si-

signa quae in priore volumine exposita sunt, longum hunc futurum esse manifestum est. Videndum etiam est, morbus an increseat, an consistat, an minuatur: quia quaedam remedia incrementibus morbis, plura inclinatis conveniunt; eaque quae incrementibus apta sunt, ubi acutus incrementum urget, in remissionibus potius experienda sunt. Incrementum autem morbus dum graviores dolores, accessionesque veniunt; haeque et ante quam proximae, revertuntur, et postea desinunt. Atque in longis quoque morbis, etiam tales notas non habentibus, scire licet incrementum, si somnus incertus est, si deterior concoctio, si foetidiores deiectiones, si tardior sensus, si pigrior mens, si percurrit corpus frigus aut calor, si id magis pallet. Ea vero quae contraria his sunt, decedentis eius notae sunt. Praeter haec in acutis morbis serius aeger alendus est, nec nisi iam inclinatis; ut primo dempta materia impetum frangat: in longis maturius, ut sustinere spatium affecturi mali possit: ac si quando is non in toto corpore, sed in parte est; magis tamen ad rem pertinet, vim totius corporis moliri, quam proprie partis aegrae sanitatem. Multum etiam interest, ab initio quis recte curatus sit, an perperam: quia curatio minus iis prodest, in quibus assidue frustra fuit. Si quis temere habitus adhuc integris viribus vivit, admota curatione momento restituitur.

Sed cum ab iis coeperim quae notas quasdam futurae adversae valetudinis exhibent, curationum quoque principium ab animadversione eiusdem temporis faciam. Igitur si quid, ex iis quae proposita sunt, incidit, omnium optima sunt quies et abstinencia; si quid bibendum est, aqua; idque interdum uno die fieri satis est; interdum, si terrentia manent, biduo: proximeque abstinenciam sumendus est cibus exiguus, bibenda aqua; postero die etiam vinum; deinde invicem alternis diebus modo aqua,

aqua, modo vinum, donec omnis causae metus finiatur. Per haec enim saepe instans gravis morbus discutitur. Plurimique falluntur, dum se primo die protinus sublaturus languorem aut exercitatione, aut balneo, aut coacta deiectione, aut vomitu, aut sudationibus, aut vino sperant. Non quo non interdum id incidat; sed quo saepius fallat, solaque abstinencia sine ullo periculo medeatur: cum praesertim etiam pro modo terroris moderari liceat; et si leviora indicia fuerint, satis sit a vino tantum abstinere, quod subtractum, plus quam si cibo quiddam dematur, adiuvat: si paulo graviora, facile sit non aquam tantum bibere, sed etiam cibo carnem subtrahere; interdum panis quoque minus quam pro consuetudine assumere, humidoque cibo esse contentum, et olere potissimum: satisque sit, tunc ex toto a cibo, a vino, ab omni motu corporis abstinere, cum vehementes notae terruerunt. Neque dubium est, quin vix quisquam qui non dissimulavit, sed per haec mature morbo occurrit, aegrotet.

CAPUT III.

DE FEBRIUM GENERIBUS.

Atque haec quidem sanis facienda sunt, tantum causam metuentibus. Sequitur vero curatio febrium, quod et in toto corpore, et vulgare maxime morbi genus est. Ex his una quotidiana, altera tertiana, altera quartana est: interdum etiam longiore circuitu quaedam redeunt; sed id raro fit. In prioribus et morbi sunt, et medicina. Et quartanae quidem simpliciores sunt. Incipiunt fere ab horrore; deinde calor erumpit; finitaque febre biduum integrum est: ita quarto die revertitur. Tertianarum vero duo genera sunt: alterum eodem modo quo quartana,
et.

et incipiens, et desinens; illo tantum interposito discrimine, quod unum diem praestat integrum, tertio redit: alterum longe perniciosius, quod tertio quidem die revertitur, ex octo autem et quadraginta horis fere sex et triginta per accessionem occupat, interdum etiam vel minus, vel plus; neque ex toto in remissione desistit, sed tantum levius est. Id genus plerique medici *intermittentes* appellant. Quotidianae vero variae sunt, et multiplices. Aliae enim protinus a calore incipiunt, aliae a frigore, aliae ab horrore. Frigus voco, ubi extremae partes membrorum inalgescunt: horrorem, ubi totum corpus intremitt. Rursus aliae sic desinunt, ut ex toto sequatur integritas: aliae sic, ut aliquantum quidem minuatur ex febre, nihilominus tamen quaedam reliquiae remaneant, donec altera accessio accedat: ac saepe aliae vix quidquam aut nihil remittunt, sed continent. Deinde aliae fervorem ingentem habent, aliae tolerabilem: aliae quotidie pares sunt, aliae impares; atque invicem altero die leviores, altero vehementiores: aliae tempore eodem postridie revertuntur, aliae vel serius vel celerius: aliae diem noctemque accessione et decessione implent, aliae minus, aliae plus: aliae cum decedunt, sudorem movent, aliae non movent; atque alias per sudorem ad integritatem venit, alias corpus tantum imbecillius redditur. Accessiones etiam modo singulae singulis diebus fiunt, modo binae pluresve concurrunt: ex quo saepe evenit, ut quotidie plures accessiones remissionesque sint; sic tamen, ut unaquaeque alicui priori respondeat. Interdum vero accessiones quoque confunduntur sic, ut notari neque tempora earum, neque spatia possint. Neque verum est quod dicitur a quibusdam, nullam febrem inordinatam esse, nisi aut ex vomica, aut ex inflammatione, aut ex ulcere: facilius enim semper curatio foret, si hoc verum esset. Sed quod evidentes causae faciunt,

fa-

facere etiam abditae possunt. Neque de re, sed de verbo controversiam movent, qui cum aliter aliterque in eodem morbo febres accedunt, non easdem inordinate redire, sed alias aliasque subinde oriri dicunt. Quod tamen ad curandi rationem nihil pertineret, etiamsi vere diceretur. Tempora quoque remissionum modo liberalia, modo vix ulla sunt.

CAPUT IV.

DE CURATIONUM DIVERSIS GENERIBUS.

Et febrium quidem ratio maxime talis est. Curationum vero diversa genera sunt, prout auctores alios habent. Asclepiades officium esse medici dicit; ut tuto, ut celeriter, ut iucunde curet. Id votum est: sed fere periculosa esse nimia et festinatio et voluptas solet. Qua vero moderatione utendum sit, ut quantum fieri potest, omnia ista contingant, prima semper habita salute, in ipsis partibus curationum considerandum erit. Et ante omnia quaeritur, primis diebus aeger qua ratione continendus sit. Antiqui medicamentis quibusdam datis concoctionem moliebantur; eo quod cruditatem maxime horrebant: deinde eam materiam quae laedere videbatur, ducendo saepius alvum subtrahebant. Asclepiades medicamenta sustulit; alvum non toties, sed fere tamen in omni morbo subduxit: febre vero ipsa praecipue se ad remedium eius uti professus est. Convellendas etiam vires aegri putavit luce, vigilia, siti ingenti sic, ut ne os quidem primis diebus elui sinneret. Quo magis falluntur, qui per omnia iucundam eius disciplinam esse concipiunt. Is enim ulterioribus quidem diebus cubantis etiam luxuriae subscripsit; primis vero tortoris vicem exhibuit. Ego autem medicamentorum dari potiones, et alvum duci

ei non nisi raro debere concedo: non ideo tamen id agendum, ut aegri vires convellantur, existimo; quoniam ex imbecillitate summum periculum est. Minui ergo tantum materiam superantem oportet, quae naturaliter digeritur, ubi nihil novi accedit. Itaque abstinendus a cibo primis diebus, et in luce habendus aeger, nisi infirmus, interdiu est, quoniam corpus ista quoque digerit; isque cubare quam maximo conclavi debet. Quod ad sitim vero somnumque pertinet, moderandum est; ut interdiu vigilet; noctu, si fieri potest, conquiescat: ac neque potest, neque nimium siti crucietur. Os etiam eius elui potest, ubi et siccum est, et ipsi foetet; quamvis id tempus potioni aptum non est. Commodèque Erasistratus dixit, saepe, interiore parte humorem non requirente, os et fauces requirere; neque ad rem male haberi aegrum pertinere. Ac primo quidem sic tenendus est. Optimum vero medicamentum est, opportune cibus datus: qui quando primum dari debeat, quaeritur. Plerique ex antiquis tarde dabant, saepe quinto die, saepe sexto: et id fortasse vel in Asia, vel in Aegypto, coeli ratio patitur. Asclepiades, ubi aegrum triduo per omnia fatigaverat, quarto die cibo destinabat. At Themison nuper, non quando coepisset febris, sed quando desiisset, aut certe levata esset considerabat; et ab illo tempore, expectato die tertio, si non accesserat febris, statim: si accesserat, ubi ea vel desierat, vel, si assidue inhaerebat, certe sese inclinaverat, cibum dabat. Nihil autem horum utique perpetuum est. Nam potest primo die primus cibus dandus esse, potest secundo, potest tertio, potest non nisi quarto, aut quinto; potest post unam accessionem, potest post duas, potest post plures. Refert enim qualis morbus sit, quale corpus, quale coelum, quae aetas, quod tempus anni: minimeque in rebus multum inter se differentibus perpetuum esse praeceptum

ptum temporis potest. In morbo qui plus virium aufert, celerius cibus dandus est: itemque eo coelo quod magis digerit. Ob quam causam in Africa nullo die aeger abstineri recte videtur. Maturius etiam puero, quam iuveni; aestate, quam hieme dari debet. Vnum illud est, quod semper, quod ubique servandum est, ut aegri vires subinde assidens medicus inspiciat, et quamdiu supererunt, abstinencia pugnet; si imbecillitatem vereri coeperit, cibo subveniat. Id enim eius officium est, ut aegrum, neque supervacua materia oneret, neque imbecillitatem fame perdat. Idque apud Erasistratum quoque invenio: qui quamvis parum docuit, quando venter, quando corpus ipsum exinaniretur, dicendo tamen haec esse videnda, et tum cibum dandum, cum corpori deberetur, satis ostendit, dum vires superessent, dari non oportere; ne deficerent consulendum esse. Ex his autem intelligi potest, ab uno medico multos non posse curari: eumque, si artifex est, idoneum esse, qui non multum ab aegro recedit. Sed qui quaestui serviunt, quoniam is maior ex populo est, libenter amplectuntur ea praecepta quae sedulitatem non exigunt; ut in hac ipsa re. Facile est enim dies vel accessiones numerare iis quoque qui aegrum raro vident: ille assideat necesse est, qui, quod solum opus est, visurus est, quando nimis imbecillus futurus sit, nisi cibum acceperit. In pluribus tamen ad initium cibi dies quartus aptissimus esse consuevit.

Est autem alia etiam de diebus ipsis dubitatio; quoniam antiqui potissimum impares sequebantur, eosque, tamquam tunc de aegris iudicaretur, *κρίσιμους* nominabant. Hi erant dies tertius, quintus, septimus, nonus, undecimus, quartusdecimus, unus et vicesimus; ita ut summa potentia septimo, deinde quartodecimo, deinde uni et vicesimo daretur. Igitur sic aegros nutriebant, ut dierum imparium access-

cessionones expectarent; deinde postea cibum, quasi levioribus accessionibus instantibus, darent: adeo ut Hippocrates, si alio die febris desiisset, recidivam timere sit solitus. Id Asclepiades iure ut vanum repudiavit; atque in nullo die, quia par imparve esset, iis vel maius vel minus periculum esse dixit. Interdum enim peiores dies pares fiunt; et opportunius post eorum accessiones cibus datur. Nonnumquam etiam in ipso morbo dierum ratio mutatur; fitque gravior, qui remissior esse consueverat. Atque ipse quartusdecimus par est, in quo esse magnam vim antiqui fatebantur. Qui cum octavum primi naturam habere contenderent, ut ab eo secundus septenarius inciperet; ipsi sibi repugnabant, non octavum, neque decimum, neque duodecimum diem sumendo, quasi potentiores: plus enim tribuebant nono, et undecimo. Quod cum fecissent sine ulla probabili ratione, ab undecimo, non ad tertiumdecimum, sed ad quartumdecimum transibant. Est etiam apud Hippocratem, ei quem septimus dies liberaturus sit, quartum esse gravissimum. Ita, illo quoque auctore, in die pari et gravior febris esse potest, et certa futuri nota. Atque idem alio loco quartum quemque diem, ut in utrumque efficacissimum apprehendit; id est quartum, septimum, undecimum, quartumdecimum, decimumseptimum. In quo et ab imparis ad paris rationem transiit, et ne hoc quidem propositum conservavit; cum a septimo die undecimus, non quartus, sed quintus sit. Adeo apparet, quacumque ratione ad numerum respexerimus, nihil rationis sub illo quidem auctore reperiri. Verum in his quidem antiquos tunc celebres admodum Pythagorici numeri fefellerunt: cum hic quoque medicus non numerare dies debeat, sed ipsas accessiones intueri; et ex his coniectare, quando dandus cibus sit. Illud autem magis ad rem pertinet scire, tum oportet.

teat dari, cum iam bene venae conquieverunt, et
etiannum manentibus reliquiis febris. Antiqui enim
quam integerrimis corporibus alimentum offerebant.
Asclepiades inclinata quidem febre, sed adhuc ta-
men inhaerente. In quo vanam rationem secutus
est: non quo non sit interdum maturius cibus dan-
dus, si mature timetur altera accessio; sed quo
scilicet quam sanissimo dari debeat: minus enim
corrumpitur, quod integro corpori infertur. Ne-
que tamen verum est quod Themisoni videbatur, si
duabus horis integer futurus esset aeger, satius es-
se tum dare; ut ab integro corpore potissimum di-
duceretur. Nam si diduci tam celeriter posset, id
esset optimum: sed cum hoc breve tempus non
praestet, satius est principia cibi a decedente febre,
quam reliquias ab incipiente excipi. Ita si longius
tempus secundum est, quam integerrimo dandus
est; si breve, etiam antequam ex toto integer fiat.
Quo loco vero integritas est, eodem est remissio;
quae maxima in febre continua potest esse. Atque
hoc quoque quaeritur, utrum tot horae expectandae
sint; quot febrem habuerunt; an satis sit primam
partem earum praeteriri, ut aegris incundius insi-
dat, quibus interdum non vacat. Tutissimum est
autem ante totius accessionis tempus praeteriri;
quamvis, ubi longa febris fuit, potest indulgeri
aegro maturius; dum tamen ante minime pars di-
midia praetereatur. Idque non in ea sola febre de
qua proxime dictum est, sed in omnibus ita ser-
vandum est.

CAPUT V.

DE FEBRIUM SPECIEBUS, ET SINGULARUM CURATIO-

NIBUS: ET PRIMO, QUANDO CIBUS

FERRICITANTIBUS DANDUS SIT.

Haec magis per omnia genera febrium perpetua sunt: nunc ad singulas earum species descendam. Igitur si semel tantum accessit, deinde desiit, ea-que vel ex inguine, vel ex lassitudine, vel ex aestu, aliave simili re fuit sic, ut interior nulla causa metum fecerit, postero die, cum tempus accessionis ita transiit, ut nihil moverit, cibis dari potest. At si ex alto calor venit; et gravitas vel capitis vel praecordiorum secuta est; neque apparet quid corpus confuderit; quamvis unam accessionem secuta integritas est; tamen, quia tertiana timeri potest, expectandus est dies tertius: et ubi accessionis tempus praeteriit, cibis dandus est, sed exiguis; quia quartana quoque timeri potest: et die quarto demum, si corpus integrum est, eo cum fiducia utendum. Si vero postero, tertiove, aut quarto die secuta febris est, scire licet morbum esse. Sed tertianarum, quartanarumque, quarum et certus circumitus est, et finis integer, et liberaliter quiescentia tempora sunt, expeditior ratio est: de quibus suo loco dicam. Nunc vero eas explicabo, quae quotidie urgent. Igitur tertio quoque die cibis aegro commodissime datur; ut alter febrem minuat; alter viribus subveniat. Sed is dari debet, si quotidiana febris est quae ex toto desinat, simul atque corpus integrum factum est: si quamvis non accessiones, febres tamen iunguntur, et quotidie quidem increscunt, sed sine integritate tamen remittunt; cum corpus ita se habet, ut maior remissio non expectetur; si altero die gravior, altero levior ac-

cessio est, post graviolem. Fere vero graviolem accessionem levior nox sequitur: quo fit, ut graviolem accessionem nox quoque tristior antecedit. At si continuatur febris, neque levior umquam fit, et dari cibum necesse est, quando dari debeat, magna dissensio est. Quidam, quia fere remissius matutinum tempus aegris est, tunc putant dandum. Quod si respondet, non quia mane est, sed quia remissio est aegro dari debet. Si vero ne tunc quidem ulla requies aegris est, hoc ipso peius id tempus est, quod cum sua natura melius esse debeat, morbi vitio non est: simulque insequitur tempus meridianum, a quo cum omnis aeger fere peior fiat, timeri potest, ne ille magis etiam quam ex consuetudine urgeatur. Igitur alii vespere tali aegro cibum dant. Sed cum eo tempore fere pessimi sunt qui aegrotant, verendum est, ne si quid tunc moverimus, fiat aliquid asperius. Ob haec ad mediam noctem decurro; id est finito iam gravissimo tempore, eodemque longissime distante: secuturis vero antelucanis horis, quibus omnes fere maxime dormiunt; deinde matutino tempore, quod natura sua levissimum est. Si vero febres vagae sunt, quia verendum est, ne cibum statim subsequantur, quodcumque quis ex accessione levatus est, tunc debet assumere. At si plures accessiones eodem die veniunt, considerare oportet, pares ne per omnia sint; quod vix fieri potest; an impares. Si per omnia pares sunt, post eam potius accessionem cibum dari debet, quae non inter meridiem et vespeream desinit: si impares sunt, considerandum est quo distent. Nam si altera gravior, altera levior est, post graviolem dari debet: si altera longior, altera brevior, post longiorem: si altera gravior, altera longior est, considerandum est utra magis affligat; illa vi, an haec tempore; et post eam dandus est. Sed plane plurimum interest, quantae quales

lesque inter eas remissiones sint. Nam si post alteram febrem motio manet; post alteram integrum corpus est; integro corpore cibo tempus aptius est; si semper febricula manet, sed alterum tamen longius tempus remissionis est, id potius eligendum est; adeo ut, ubi accessiones continuantur, protinus inclinata priore dandus cibus sit. Etenim perpetuum est, ad quod omne consilium dirigi potest: cibum quam maxime semper ab accessione futura reducere; et hoc salvo, dare quam integerrimo corpore. Quod non inter duas tantum, sed etiam inter plures accessiones servabitur. Sed cum sit aptissimum tertio quoque die cibum dare; tamen, si corpus infirmum est, quotidie dandus est; multoque magis, si continentes febres sine remissione sunt, quanto magis corpus affligunt; aut si duae pluresve accessiones eodem die veniunt. Quae res efficit, ut et a primo die protinus cibus dari quotidie debeat, si protinus venae conciderunt; et saepius eodem die, si inter plures accessiones subinde vis corpori deest. Illud tamen in his servandum est, ut post eas febres minus cibi detur, post quas, si per corpus liceret, omnino non daretur. Cum vero febris instet, incipiat, augeatur, consistat, decedat, deinde in decessione consistat, aut finiatur; scire licet, optimum cibo tempus esse febre finita; deinde cum decessio eius consistit; tertium, si necesse est, quandocumque decedit; cetera omnia periculosa esse. Si tamen propter infirmitatem necessitas urget, satius esse consistente iam incremento febris aliquid offerre, quam increscente; satius esse instante, quam incipiente: cum eo tamen, ut nullo tempore is qui deficit, non sit sustinendus. Neque hercule satis est, ipsas tantum febres medicum intueri, sed etiam totius corporis habitum, et ad eum dirigere curationem; seu supersunt vires, seu desunt, seu quidam alii affectus interveniunt. Cum vero semper aegros securos age-

re conveniat, ut corpore tantum, non etiam animo laborent; tum praecipue ubi cibum sumpserunt. Itaque si qua sunt quae exasperatura eorum animos sunt, optimum est ea, dum aegrotant, eorum notitiae subtrahere; si id fieri non potest, sustinere tamen post cibum usque somni tempus; et cum experecli sunt, tum exponere.

CAPUT VI.

QUANDO POTIONES FEBRICITANTIBUS DARI EXPEDIAT.

Sed de cibo quidem faciliior cum aegris ratio est; quorum saepe stomachus hunc respuit, etiamsi mens concupiscit: de potione vero ingens pugna est; eo-
que magis, quo maior febris est. Haec enim sitim accendit, et tum maxime aquam exigit, cum illa periculosissima est. Sed docendus aeger est, ubi febris quieverit, protinus sitim quoque quieturam; longioremque accessionem fore, si quod ei datum fuerit alimentum: ita celerius eum desinere sitire, qui non bibit. Necesse est tamen, quanto facilius etiam sani famem quam sitim sustinent, tanto magis aegris in potione, quam in cibo indulgere. Sed primo quidem die nullus humor dari debet, nisi subito sic venae conciderunt, ut cibus quoque dari debeat: secundo vero, ceterisque etiam quibus cibus non dabitur, tamen, si magna sitis urget, potio dari potest. Ac ne illud quidem ab Heraclide Tarentino dictum ratione caret: ubi aut bilis aegrum, aut cruditas male habet, expedire quoque per modicas potiones misceri novam materiam corruptae. Illud videndum est, ut qualia tempora cibo leguntur, talia potioni quoque, ubi sine illo datur, deligantur; aut cum aegrum dormire cupiemus; quod sere sitis prohibet. Satis autem convenit, cum omnibus febricitantibus nimius humor
alie-

alienus sit, tum praecipue esse feminis, quae ex partu in febres inciderunt.

Sed cum tempora cibo potionique febris et remissionis ratio det, non est expeditissimum scire quando aeger febricitet, quando melior sit, quando deficiat; sine quibus dispensari illa non possunt. Venis enim maxime credimus; fallacissimae rei; quia saepe istae leniores celerioresve sunt et aetate, et sexu, et corporum natura; et plerumque satis sano corpore; si stomachus infirmus est, nonnumquam etiam incipiente febre, subeunt et quiescunt; ut imbecillus is videri possit, cui facile daturus gravis instat accessio. Contra saepe eas concitat et resolvit sol, et balneum, et exercitatio, et metus, et ira, et quilibet alius animi affectus: adeo ut, cum primum medicus venit, sollicitudo aegri dubitantis quomodo illi se habere videatur, eas moveat. Ob quam causam periti medici est, non protinus aut venit, apprehendere manu brachium: sed primum residere hilari vultu, percontarique quemadmodum se habeat; et si quis eius metus est, eum probabili sermone lenire; tum deinde eius corpori manum admoveat. Quas venas autem conspectus medici movet, quam facile mille res turbant! Altera res est cui credimus, calor, aequae fallax; nam hic quoque excitatur aestu, labore, somno, metu, solitudine. Igitur intueri quidem etiam ista oportet; sed his non omnia credere. Ac protinus quidem scire, non febricitare eum cuius venae naturaliter ordinatae sunt, teporque talis est, qualis esse sani solet; non protinus autem sub calore motuque febrem esseincipere; sed ita, si summa quoque arida inaequaliter cutis est; si calor et in fronte est, et ex imis praecordiis oritur; si spiritus ex naribus cum fervore prorampit; si color, aut rubore, aut pallore novo mutatus est; si oculi graves, et aut persicci, aut subhumidi sunt; si sudor cum sit, inaequalis

est; si venae non aequis intervallis moventur. Ob quam causam medicus neque in tenebris, neque a capite aegri debet residere; sed illustri loco adversus eum, ut omnes notas ex vultu quoque cubantis perspiciat. Ubi vero febris fuit, atque decrevit, spectare oportet, num tempora, partesve corporis aliae paulum madescant, quae sudorem venturum esse testentur: ac si qua nota est, tunc demum dare potui calidam aquam; cuius salubris effectus est, si sudorem per omnia membra diffundit. Huius autem rei causa continere aeger sub veste satis multa manus debet; eademque crura, pedesque contegere: qua male plerique aegros in ipso febris impetu, potissimeque ubi ardens ea est, male habent. Si sudare corpus coepit, linteum tepescere oportet, paulatimque singula membra detergere. At ubi sudor omnis finitus est, aut si is non venit, ubi quam maxime potuit, idoneus esse cibo aeger videtur, sub veste leniter ungendus est, tum detergendus, deinde ei cibus dandus. Is autem febricitantibus humidus est aptissimus, aut humori certe quam proximus: utique ex materia quam levissima, maximeque sorbitio; eaque, si magnae febres fuerint, quam tenuissima esse debet. Mel quoque despumatum huic recte adiicitur, quo corpus magis nutriatur: sed id, si stomachum offendit, supervacuum est; sicut ipsa quoque sorbitio. Dari vero in vicem eius potest vel intrita ex aqua calida, vel alica elota; si firmus est stomachus; et compressa alvus, ex aqua mulsa; si vel ille languet, vel haec profluit, ex posca. Et primo quidem cibo id satis est. Secundo vero aliquid adici potest, ex eodem tamen genere materiae, vel olus, vel conchylium; vel pomum. Et dum febres quidem increscunt, hic solus cibus idoneus est. Ubi vero aut desinunt, aut levantur, semper quidem incipiendum est ab aliquo ex materia levissima, adiiciendum vero aliquid ex me-

media; ratione habita subinde et virium hominis, et morbi. Ponendi vero aegro varii cibi, sicut Asclepiades praecepit, tum demum sunt, ubi fastidio urgetur, neque satis vires sufficiunt; ut paulum ex singulis degustando, famem vitet. At si neque vis, neque cupiditas deest, nulla varietate sollicitandus aeger est; ne plus assumat, quam concoquat. Neque verum est quod ab eo dicitur, facilius concoqui cibos varios. Eduntur enim facilius: ad concoctionem autem materiae genus et modus pertinent. Neque inter magnos dolores, neque increscente morbo, tutum est aegrum cibo impleri; sed ubi inclinata iam in melius valetudo est.

Sunt aliae quoque observationes in febribus necessariae. Atque id quoque videndum est, quod quidam solum praecipiunt, adstrictum corpus sit, an profluat; quorum alterum strangulat, alterum digerit. Nam si adstrictum est, ducenda alvus est, movenda urina, eliciendus omni modo sudor. In hoc genere morborum sanguinem etiam misisse, concussisse vehementibus gestationibus corpus, in lumine habuisse, imperasse famem, sitim, vigiliam prodest. Utile est etiam ducere in balneum, prius demittere in solium, tum ungere, iterum ad solium redire, multaque aqua fovere inguina; interdum etiam oleum in solio cum aqua calida miscere; uti cibo serius et rarius, tenui, simplici, molli, calido, exiguo; maximeque oleribus, qualia sunt lapathum, urtica, malva; vel iure etiam concharum, musculorumve, aut locustarum: neque danda caro, nisi elixa, est. At potio esse debet magis liberalis et ante cibum, et post hunc, et cum hoc, ultra quam sitis coget: poteritque a balneo etiam pinguius, aut dulcius dari vinum; poterit semel, aut bis interponi graecum salsum. Contra vero, si corpus profluat, sudor coercendus, quies adhibenda erit; tenebris, somnoque, quandocumque volet, utendum; non nisi

nisi leni gestatione corpus agitandum, et pro genere mali subveniendum. Nam si venter fluit, aut si stomachus non continet, ubi febris decrevit, liberaliter oportet aquam tepidam potui dare, et vomere cogere; nisi aut fauces, aut praecordia, aut latus dolat, aut vetus morbus est. Si vero sudor exercet, duranda cutis est nitro, vel sale, quae cum oleo miscentur: ac si levius id vitium est, oleo corpus unguendum; si vehementius, rosa, vel melino, vel myrteo, cui vinum austerum sit adiectum. Quisquis autem fluore aeger est, cum venit in balneum, prius unguendus, deinde in solium demittendus est. Si in cute vitium est, frigida quoque, quam calida aqua melius utetur. Ubi ad cibum ventum est, dari debet is valens, frigidus, siccus, simplex, qui quam minime corrumpi possit, panis tostus, caro assa, vinum austerum, vel certe subausterum; si venter profluit, calidum; si sudores nocent, vomitusve sunt, frigidum.

CAPUT VII.

QUOMODO PESTILENTES FEBRES CURARI DEBEANT.

Desiderat etiam propriam animadversionem in febribus pestilentiae casus. In hac minime utile est aut fame, aut medicamentis uti, aut ducere alvum. Si vires sinunt, sanguinem mittere optimum est; praecipueque si cum dolore febris est: si id parum tutum est, ubi febris levata est, vomitu pectus purgare. Sed in hoc maturius quam in aliis morbis, ducere in balneum opus est; vinum calidum et meracius dare, et omnia glutinosa; inter quae carnem quoque generis eiusdem. Nam quo celerius eiusmodi tempestates corripiunt, eo maturius auxilia, etiam cum quadam temeritate rapienda sunt. Quod si puer est, qui laborat, neque tantum robur eius est, ut

sal-

sanguis mitti possit, cucurbitulis ei utendum est; ducenda alvus vel aqua vel ptisanæ cremore; tum demum levibus cibis nutriendus. Et ex toto non sic pueri, ut viri, curari debent. Ergo, ut in alio quoque genere morborum, parcius in his agendum est: non facile sanguinem mittere, non facile ducere alvum, non cruciare vigilia, fameve, aut nimia siti, non vino curare. Vomitus post febrem eliciendus est; deinde dandus cibus ex levissimis; tum is dormiat; posteroque die, si febris manet, abstineat; tertio ad similem cibum redeat. Dandaque opera est, quantum fieri potest, ut inter opportunitam abstinentiam cibo opportuno, omissis ceteris, nutriatur.

Si vero ardens febris extorret, nulla medicamenti danda potio est; sed in ipsis accessionibus oleo et aqua refrigerandus est; quæ miscenda manu sunt, donec albescant; eo conclavi tenendus, quo multum et purum aerem trahere possit; neque multis vestimentis strangulandus, sed admodum levibus tantum velandus est. Possunt etiam super stomachum imponi folia vitis in aqua frigida tincta. Ac ne siti quidem nimia vexandus est. Alendus maturius est, id est a die tertio; et ante cibum iisdem perungendus. Si pituita in stomacho coit, inclinata iam accessione vomere cogendus est; tum dandum frigidum olus, aut pomum ex iis quæ stomacho conveniunt. Si siccus manet stomachus, protinus vel ptisanæ, vel alicæ, vel oryzae cremor dandus est, cum quo recens adeps cocta sit: Cum vero in summo incremento morbus est, utique non ante quartum diem, magna siti antecedente, frigida aqua copiose præstanda est, ut bibat etiam ultra satietatem; et cum iam venter et præcordia ultra modum repleta, satisque refrigerata sunt, vomere debet. Quidam ne vomitum quidem exigunt; sed ipsa aqua frigida tantum ad satietatem data, pro medicamento utuntur. Vbi utrumlibet factum est, multa veste operiendus est,

est, et collocandus ut dormiat. Fereque post longam sitim et vigiliam, post multam satietatem, post infractum calorem plenus somnus venit, per quem ingens sudor effunditur; idque praesentissimum auxilium est: sed in iis tamen, in quibus praeter ardorem, nulli dolores, nullus praecordiorum tumor; nihil prohibens, vel in thorace, vel in pulmone, vel in faucibus; non ulcus, non deiectio, non profluvium alvi fuit. Si quis autem in eiusmodi febre leviter tussit, is neque vehementi siti conflictatur, neque bibere aquam frigidam debet; sed eo modo curandus est, quo in ceteris febribus praecipitur.

CAPUT VIII.

CURATIO SEMITERTIANAE FEBRIS, QUAE
ἡμικριταῖα DICITUR.

At ubi id genus tertianae est, quod *ἡμικριταῖα* medici appellant, magna cura opus est, ne id fallat. Habet enim plerumque frequentiores accessiones decessionesque, ut aliud morbi genus videri possit; porrigiturque febris inter horas viginti quatuor, et triginta sex; ut quod idem est, non idem esse videatur. Et magnopere necessarium est, neque dari cibum, nisi in ea remissione quae vera est; et ubi ea venit, protinus dari. Plurimique sub alterutro curantis errore subito moriuntur. Ac nisi magnopere aliqua res prohibet, inter initia sanguis mitti debet: tum dari cibus, qui neque incitet febrem, et tamen longum eius spatium sustineat.

C A P U T IX.

CURATIO LENTARUM FEBRIUM .

Nonnumquam etiam lentae febres sine ulla remissione corpus tenent ; ac neque cibo , neque ulli remedio locus est . In hoc casu medici cura esse debet , ut morbum mutet : fortasse enim curationi opportunior fiet . Saepe igitur ex aqua frigida , cui oleum sit adiectum , corpus eius pertractandum est ; quoniam interdum sic evenit , ut horror oriatur , et fiat initium quoddam novi motus ; exque eo , cum magis corpus incaluit , sequatur etiam remissio . In his frictio quoque ex oleo et sale salubris videtur . At si diu frigus est ; et torpor , et iactatio corporis , non alienum est in ipsa febre dare mulsi tres aut quatuor cyathos , vel cum cibo vinum bene dilutum . Intenditur enim saepe ex eo febris ; et maior ortus calor simul et priora mala tollit , et spem remissionis , inque ea curationis ostendit . Neque hercules ista curatio nova est , qua nunc quidam traditos sibi aegros , qui sub cautiore medicis trahebantur , interdum contrariis remediis sanant . Si quidem apud antiquos quoque ante Herophilum et Erasistratum , maximeque post Hippocratem fuit Petro quidam , qui febricitantem hominem ubi acceperat , multis vestimentis operiebat , ut simul calorem ingentem , sitimque excitaret : deinde , ubi paulum remitti coeperat febris , aquam frigidam potui dabat ; ac si moverat sudorem , explicuisse se aegrum iudicabat ; si non moverat , plus etiam aquae frigidae ingerebat ; et tum vomere cogebat . Si alterutro modo febre liberaverat , protinus suillam assam , et vinum homini dabat : si non liberaverat , decoquebat aquam sale adiecto , eamque bibere cogebat , ut

mo-

movendo ventrem purgaret. Et intra haec omnis eius medicina erat; eaque non minus grata fuit iis quos Hippocratis successores non refecerant; quam nunc est iis quos Herophili vel Erasistrati aemuli diu tractos non expedierunt. Neque ideo tamen non est temeraria ista medicina; quia plures, si protinus a principiis exceperit, interimit. Sed cum eadem omnibus convenire non possint, fere quos ratio non restituit, temeritas adjuvat. Ideoque eiusmodi medici melius alienos aegros, quam suos nutriunt. Sed est circumspecti quoque hominis, et novare interdum, et augere morbum, et febres accendere; quia curationem, ubi id quod est, non recipit, potest recipere id quod futurum est.

C A P U T X

REMEDIA IN FEBRIBUS AD CAPITIS DOLOREM, ET
 PRÆCORDIORUM INFLAMMATIONEM, ET
 ARIDITATEM, ET SCABRITIEM
 LINGUAE.

Considerandum etiam est, febres ne solae sint, an alia quoque his mala accedant; id est num caput doleat, num lingua aspera, num praecordia intenta sint. Si capitis dolores sunt, rosam cum aceto miscere oportet; et in id ingerere: deinde habere duo pitacia, quae frontis latitudinem, longitudinemque aequent; ex his invicem alterum in aceto et rosa habere, alterum in fronde; aut intinctam iisdem lanam succidam imponere. Si acetum offendit, pura rosa utendum est; si rosa ipsa laedit, oleo acerbo. Si ista parum invant, teri potest vel iris arida, vel nuces amarae, vel quaelibet herba ex refrigerantibus: quorum quidlibet ex aceto impositum dolorem minuit; sed magis aliud in alio. Juvat etiam panis cum

cum papavere iniectus; vel cum rosa cerussa, spumave argenti. Olfacere quoque vel serpyllum, vel anethum non alienum est. At si in praecordiis inflammatio et dolor est, primo superimponenda sunt cataplasmata reprimentia; ne, si calidiora fuerint, plus eo materiae concurret: deinde ubi prima inflammatio se remisit, tunc demum ad calida et humida veniendum est; ut ea quae remanserint, discutiant. Notae vero inflammationis sunt quatuor, rubor et tumor, cum calore et dolore. Quo magis erravit Erasistratus, qui febrem nullam sine hac esse dixit. Ergo si sine inflammatione dolor est, nihil imponendum est: hunc enim statim ipsa febris solvet. At si neque inflammatio, neque febris, sed tantum praecordiorum dolor est, protinus calidis et siccis fomentis uti licet. Si vero lingua sicca et scabra est, detergenda primum penicillo est ex aqua calida: deinde ungenda mixtis inter se rosa et melle. Mel purgat, rosa reprimit, simulque siccescere non sinit. At si scabra non est, sed arida, ubi penicillo deterasa est, ungi rosa debet, cui cerae paulum sit adiectum.

CAPUT XI.

REMEDIA CONTRA FRIGUS, QUOD FEBREM PRAECEDIT.

Solet etiam ante febres esse frigus; idque vel molestissimum morbi genus est. Vbi id exspectatur, omni potione prohibendus aeger est: haec enim paulo ante data multum malo adiicit. Item niatarius veste multa tegendus est; admovenda partibus iis pro quibus metuimus, sicca et calida fomenta sic, ne statim vehementissimi calores incipiant, sed paulatim increscant; perfricandae quoque cae partes manibus unctis ex vetere oleo sunt, eique adii-

adiiciendum aliquid ex calefacientibus; contentique medici quidam una frictione, etiam ex quolibet oleo, sunt. In harum febrium remissionibus nonnulli tres, aut quatuor sorbitionis cyathos, etiamnum manente febre, dant: deinde, ea bene finita, reficiunt stomachum cibo frigido et levi. Ego tum hoc putotentandum, cum parum cibus, semel et post febrim datus, prodest. Sed curiose prospiciendum est, ne tempus remissionis decipiat: saepe enim in hoc quoque genere valetudinis iam minui febris videtur, et rursus intenditur. Itaque ei remissioni credendum est, quae etiam immoratur, et iactationem, foetoremque quemdam oris, quem ὄζον Graeci vocant, minuit. Illud satis convenit, si quotidie pares accessiones sunt, quotidie parvum cibum dandum: si impares, post graviolem, cibum; post leviolem, equam mulsam.

C A P U T XII.

CURATIO HORRORIS IN FEBRIBUS.

Horror autem eas febres antecedit, quae certum habent circumitum, et ex toto remittuntur; ideoque tutissimae sunt, maximeque curationes admittunt. Nam ubi incerta tempora sunt, neque alvi ductio, neque balneum, neque vinum, neque medicamentum aliud recte datur. Incertum est enim, quando febris ventura sit: ita fieri potest, ut si subito venerit, summa in eo perniciēs sit, quod auxilii causa sit inventum. Nihilque aliud fieri potest, quam ut primis diebus bene abstineat aeger; deinde sub decessu febris eius quae gravissima est, cibumumat. At ubi certus circuitus est, facilius omnia illa tentantur; quia magis proponere nobis et accessionum et decessionum vices possumus. In his autem, cum inveteraverunt, utilis fames non est:

est : primis tantōmodo diebus ea pugnandum est : deinde dividenda curatio est , et ante horror , tum febris discutienda . Igitur cum primum aliquis inhorruit , et ex horrore incaluit , dare ei oportet potui tepidam aquam subsalsam , et vomere eum cogere : nam fere talis horror ab iis oritur , quae biliosa in stomacho resederunt . Idem faciendum est , si proximo quoque circuitu aequae accessit : saepe enim sic discutitur . Iamque quod genus febris sit , scire licet . Itaque sub expectatione proximae accessionis , quae instare tertia potest , deducendus in balneum est : dandaque opera , ut per tempus horroris in solio sit . Si ibi quoque senserit , nihilominus idem sub expectatione quartae accessionis faciat : siquidem eo quoque modo saepe is discutitur . Si ne balneum quidem profuit , ante accessionem allium edat , aut bibat calidam aquam cum pipere : siquidem ea quoque assumpta calorem movent , qui horrorem non admittit . Deinde eodem modo quo in frigore praecceptum est , antequam inhorrescere possit , operiatur ; fomentisque , sed protinus validioribus , totum corpus circumdare convenit , maximeque involutis extinctis estis et titionibus . Si nihilominus horror perruperit , multo oleo calefacto inter ipsa vestimenta perfundatur , cui aequae ex calefacientibus aliquid sit adiectum ; adhibeaturque frictio , quantam is sustinere poterit , maximeque in manibus et cruribus ; et spiritum ipse contineat . Neque desistendum est , etiamsi horror est : saepe enim pertinacia iuvantis malum corporis vincit . Si quid evomuit , danda aqua tepida , iterumque vomere cogendus est ; utendumque eisdem est , donec horror finiatur . Sed praeter haec ducenda alvus est , si tardius horror quiescet : siquidem id quoque exonerato corpore prodest . Ultimaque post haec auxilia sunt gestatio et frictio .

Cibus autem in eiusmodi morbis maxime dandus

Cels. T. I. H est,

est, qui mollem alvum praestet; caro glutinosa; vinum, cum dabitur, austcrum.

CAPUT XIII.

CURATIO QUOTIDIANAE FEBRIS.

Haec ad omnes circumitus febrium pertinent: discernendae tamen singulae sunt, sicut rationem habent dissimilem. Si quotidiana est, triduo primo magnopere abstinere oportet; tum cibis altero quoque die uti. Si res inveteraverit, post febrem experiri balneum et vinum; magisque si, horrore sublato, haec superest.

CAPUT XIV.

CURATIO TERTIANAE FEBRIS.

Si vero tertiana quae ex toto intermittit, aut quartana est, mediis diebus et ambulationibus uti oportet, aliisque exercitationibus, et unctionibus. Quidam ex antiquis medicis Cleophrantus, in hoc genere morborum, multo ante accessionem, per caput aegrum multa calida aqua perfundebat, deinde vinum dabat. Quod, quamvis pleraque eius viri praecepta secutus est Asclepiades, recte tamen praeteriit: est enim anceps. Ipse, si tertiana febris est, tertio die post accessionem dicit alvum duci oportere; quinto post horrorem vomitum elicere; deinde post febrem, sicut illi mos erat, adhuc calidis dare cibum et vinum; sexto die in lectulo detineri: sic enim fore, ne septimo die febris accedat. Id saepe fieri posse verisimile est. Tutius tamen est, ut hoc ipso ordine utamur; tria remedia, vomitus, alvi ductionis, vini, per triduum, id est tertio die et quinto, et

septimo tentare : nec vinum , nisi post accessionem diei septimi libat . Si vero primis diebus discussus morbus non est , inciditque in vetustatem , quo die febris expectabitur , in lectulo se contineat ; post febrem perfricetur ; tum , cibo assumpto , libat aquam ; postero die qui vacat , ab exercitatione unctioneque , aqua tantum contentus , conquiescat . Et id quidem optimum est . Si vero imbecillitas urgebit , et post febrem vinum , et medio die paulum cibi debet assumere .

CAPUT XV.

CURATIO QUARTANÆ FEBRIS .

Eadem in quartana facienda sunt . Sed cum haec tarde admodum finiatur , nisi primis diebus discussa est , diligentius ab initio praecipendum est , quid in ea fieri debeat . Igitur si cui cum horrore febris accessit , caque desiit , eodem die et postero tertioque continere se debet , et aquam tantummodo calidam primo die post febrem sumere ; biduo proximo , quantum fieri potest , ne hanc quidem . Si quarto die cum horrore febris revertitur , vomere , sicut ante praeceptum est ; deinde post febrem modicum cibum sumere , vini quadrantem ; postero tertioque die abstinere , aqua tantummodo calida , si sitis est , assumpta . Septimo die balneo frigus praevenire ; si febris redierit , ducere alvum ; ubi ex eo corpus conquieverit , in unctione vehementer perfricari ; eodem modo sumere cibum et vinum ; biduo proximo se abstinere , frictione servata . Decimo die rursus balneum experiri ; et si postea febris accessit , aeque perfricari , vinum copiosius bibere . Ac sic proximum est , ut quies tot dierum , et abstinentia cum ceteris quae praecipuntur , febrem tollant . Si vero nihilominus remanet , aliud ex toto sequendum

dum est curationis genus ; idque agendum , ut quod-
diu sustinendum est , corpus facile sustineat . Quo-
minus etiam curatio probari Heraclidis Tarentini debet ,
qui primis diebus ducendam alvum , deinde abstinendum in septimum diem dixit . Quod , ut sustinere aliquis possit , tamen , etiam febre liberatus , vix refectioni valebit : adeo , si febris saepius accesserit , concidet . Igitur si tertio decimo die morbus manebit , balneum neque ante febrem , neque post eam tentandum erit ; nisi interdum iam horrore discusso : horror ipse , per ea quae supra scripta sunt , expugnandus . Deinde post febrem oportebit ungi , et vehementer perfricari ; cibum et validum , et fortiter assumere ; vino uti quantum libebit : postero die , cum satis quieverit , ambulare , exerceri , ungi , perfricari fortiter , cibum capere sine vino : tertio die abstinere . Quo die vero febrem expectabit , ante surgere , et exerceri , dareque operam , ut in ipsam exercitationem febris tempus incurrat : sic enim saepe illa discutitur . At si in opere occupavit , tum demum se recipere . In eiusmodi valetudine , medicamenta sunt , oleum , frictio , exercitatio , cibum , vinum . Si venter adstrictus est , solvendus est . Sed haec facile validiores faciunt : si imbecillitas occupavit , pro exercitatione gestatio est : si ne hanc quidem sustinet , adhibenda tamen frictio est : si haec quoque vehemens onerat , intra quietem et unctionem et cibum subsistendum est : dandaque opera est , ne qua cruditas in quotidianam id malum vertat . Nam quartana neminem iugulat : sed si ex ea facta quotidiana est , in malis aeger est : quod tamen , nisi culpa vel aegri vel curantis , nunquam fit .

CAPUT XVI.

CURATIO DUARUM QUARTANARUM.

At si duae quartanae sunt, neque eae quas proposui, exercitationes adhiberi possunt; aut ex toto quiescere opus est, aut si id difficile est, leniter ambulare; considerare diligenter involutis pedibus et capite, quoties febris accessit et desiit, cibum modicum sumere, et vinum; reliquo tempore, nisi imbecillitas urget, abstinere. At si duae febres pene iunguntur, post utramque cibum sumere: deinde vacuo tempore et moveri aliquid, et post unctionem cibo uti. Cum vero vetus quartana raro, nisi vere solvatur; utique eo tempore attendendum est, ne quid fiat, quod valetudinem impediat. Prodestque in vetere quartana, mutare subinde victus genus; a vino ad aquam, ab aqua ad vinum, a lenibus cibis ad acres, ab acribus ad lenes transire; esse radicem, deinde vomere; iureve pulli gallinaei ventrem resolvere; oleo ad frictiones adiacere calefacientia; ante accessionem sorbere vel aceti cyathos duos, vel unum sinapis cum tribus graeci vini salsi, vel mixta paribus portionibus, et in aqua diluta piper, castoreum, laser, myrrham. Per haec enim similiaque corpus agitandum est, ut moveatur ex eo statu quo detinetur. Si febris quiescit, diu meminisse eius diei convenit; eoque vitare frigus, calorem, cruditatem, lassitudinem. Facile enim revertitur, nisi a sano quoque aliquamdiu timeatur.

CAPUT XVII.

CURATIO QUOTIDIANAE FEBRIS, QUAE EX QUARTANA
FACTA SIT.

At si ex quartana quotidiana facta est, cum id vitio inciderit, per biduum abstinere oportet, et frictione uti; aquam tantummodo vespere potui dare. Tertio die saepe fit, ne febris accedat: sed sive fuit, sive non fuit, cibus post accessionis tempus est dandus; et si manet, per biduum abstinentia, quanta maxima imperari corpori potest, et frictione quotidie utendum est.

CAPUT XVIII.

DE TRIBUS INSANIAE GENERIBUS: ET PRIMO DE EIUS CURATIONE, QUAE A GRAECIS *φρένιτις* DICITUR.

Et febrium quidem curatio exposita est. Supersunt vero alii corporis affectus, qui huic superveniunt; ex quibus eos qui certis partibus assignari non possunt, protinus iungam. Incipiam ab insania, primamque huius ipsius partem aggrediar, quae et acuta, et in febre est: *φρένιτις* Graeci appellant. Illud ante omnia scire oportet, interdum in accessione aegros desipere, et loqui aliena. Quod non quidem leve est; neque incidere potest, nisi in febre vehementia; non tamen aequè pestiferum est; nam plerumque breve esse consuevit, levatoque accessionis impetu, protinus mens redit. Neque id genus morbi remedium aliud desiderat, quam quod in curanda febre praeceptum est. Phrenesis vero tum demum est, cum continua dementia esse incipit; aut cum aeger, quamvis adhuc sapiat, tamen quasdam vanas imagines accipit: perfecta est, ubi
mens

mens illis imaginibus addicta est. Eius autem plura genera sunt: siquidem ex phreneticis alii hilares, alii tristes sunt; alii facilius continentur, et intra verba desipiunt, alii consurgunt, et violenter quaedam manu faciunt; atque ex his ipsis, alii nihil nisi impetu peccant, alii etiam artes adhibent, summamque speciem sanitatis in captandis malorum operum occasionibus praebent; sed exitu deprehenduntur. Ex his autem eos qui intra verba desipiunt, aut leviter etiam manu peccant, onerare asperioribus coercionibus supervacuum est: eos vero qui violentius se gerunt, vincere convenit; ne vel sibi vel alteri noceant. Neque credendum est, si vinctus aliquis, dum levare vinculis cupit, quamvis prudenter et miserabiliter loquitur; quoniam is dolus insanientis est. Fere vero antiqui tales aegros in tenebris habebant; eo quod illis contrarium esset, exterreri, et ad quietem animi tenebras ipsas conferre aliquid iudicabant. At Asclepiades, tamquam tenebris ipsis terrentibus, in lumine habendos eos dixit. Neutrum autem perpetuum est: alium enim lux, alium tenebrae magis turbant; reperiunturque in quibus nullum discrimen deprehendi vel hoc, vel illo modo possit. Optimum itaque est utrumque experiri; et habere eum qui tenebras horret, in luce; eum qui lucem, in tenebris. At ubi nullum tale discrimen est, aeger, si vires habet, loco lucido; si non habet, obscuro continendus est. Remedia vero adhibere, ubi maxime furor urget supervacuum est: simul enim febris quoque increscit. Itaque tum nihil nisi continendus aeger est: ubi vero res patitur, festinanter subveniendum est. Asclepiades perinde esse dixit his sanguinem mitti, ac si trucidentur: rationem hanc secutus, quod neque insania esset, nisi febre intenta; neque sanguis, nisi in remissione eius, recte mitteretur. Sed ipse in his somnum multa frictione quaesivit; cum et inten-

tio febris somnum impediat, et frictio non nisi in remissione eius utilis sit. Itaque hoc quoque auxilium debuit praeterire. Quid igitur est? Multa in praecipiti periculo recte fiunt, alias omittenda. Et continua quoque febris habet tempora, quibus, etsi non remittit, non tamen crescit: estque hoc, ut non optimum, sic tamen secundum remediis tempus. Quod si vires aegri patiuntur, sanguis quoque mitti debet. Minus deliberari potest, an alvus ducenda sit. Tum interposito die, convenit caput ad cutem tondere; deinde aqua fovere in qua verbernae aliquae decoctae sint ex reprimentibus; aut prius fovere, deinde tondere, et iterum fovere; ac novissime rosa caput naresque implere: offerre etiam naribus rutam, ex aceto contritam, movere sternumenta medicamentis in id efficacibus. Quae tamen facienda sunt in iis quibus vires non desunt: si vero imbecillitas est, rosa tantum caput, adiecto serpyllo, similive aliquo, madefaciendum est. Utiles etiam in quibuscumque viribus herbae duae sunt, solanum et muralis, si simul ex utraque suco expresso caput impletur. Cum se febris remiserit, fictione utendum est; parcius tamen in iis qui nimis hilares, quam in iis qui nimis tristes sunt. Adversus omnium autem sic insanientium animos gerere se pro cuiusque natura necessarium est. Quorundam enim vani metus levandi sunt; sicut in homine praedivite famem timente incidit, cui subinde falsae haereditates nuntiabantur: quorundam audacia coercenda est; sicut in iis fit, in quibus continendis plagae quoque adhibentur: quorundam etiam intempestivus risus et obiurgatione et minis finendus: quorundam discutiendae tristes cogitationes; ad quod symphoniae, et cymbala, strepitusque proficiunt. Saepius tamen assentiendum, quam repugnandum est; paulatimque, et non evidenter, ab iis quae stulte dicuntur, ad meliora mens adducen-

cenda. Interdum etiam elicienda ipsius intentio; ut fit in hominibus studiosis litterarum, quibus liber legitur, aut recte, si delectantur, aut perperam, si id ipsum eos offendit: emendando enim convertere animum incipiunt. Quin etiam recitare, si qua meminerunt, cogendi sunt. Ad cibum quoque quosdam non desiderantes reduxerunt ii qui inter epulantes eos collocarunt. Omnibus vero sic affectis somnus et difficilis, et praecipue necessarius est: sub hoc enim plerique sanescunt. Prodest ad id, atque etiam ad mentem ipsam componendam, crocinum unguentum cum irino in caput datum. Si nihilominus vigilant, quidam somnum moliuntur potui dando aquam, in qua papaver, aut hyoscyamum decoctum sit: alii mandragorae mala pulvino subiiciunt: alii vel amomum, vel sycamini lacrimam fronti inducunt. Hoc nomen apud Medicos reperio: sed cum Graeci morum *συχάμινον* appellent, mori nulla lacrima est. Sic vero significatur lacrima arboris in Aegypto nascentis, quam ibi *μωροσύχον* appellant. Plurimi decoctis papaveris corticibus, ex ea aqua spongia os et caput subinde foveant. Asclepiades ea supervacua esse dixit; quoniam in lethargum saepe converterent. Praecepit autem, ut primo die a cibo, potione, somno abstinere; vespere ei daretur potui aqua; tum frictio admooveretur lenis, ut ne manum quidem qui perfricaret, vehementer imprimeret; postero deinde die, iisdem omnibus factis, vespere ei daretur sorbitio et aqua, rursusque frictio adhiberetur; per hanc enim nos consecuturos, ut somnus accedat. Id interdum fit, et quidem adeo, ut illo confitente nimia frictio etiam lethargi periculum afferat. Sed si sic somnus non accessit, tum demum illis medicamentis arcessendus est: habita scilicet eadem moderatione, quae hic quoque necessaria est, ne quem obdormire volumus, excitare postea non possimus. Confert etiam aliquid ad

somnum silanus iuxta cadens ; vel gestatio post cibum , et noctu ; maximeque suspensi lecti motus . Neque alienum est , si neque sanguis ante missus est , neque mens constat , neque somnus accedit , occipitio inciso cucurbitulam admoveere ; quae quia levat morbum , potest etiam somnum facere . Moderatio autem in cibo quoque adhibenda est : nam neque implendus aeger est , ne insaniat ; neque ieiunio utique vexandus , ne imbecillitate in cardiacum incidat . Opus est cibo infirmo , maximeque sorbitione , potione aquae mulsae , cuius ternos cyatos bis hieme , quater aestate dedisse satis est .

Alterum insaniae genus est , quod spatium longius recipit ; quia fere sine febre incipit , leves deinde febriculas excitat . Consistit in tristitia , quam videtur bilis atra contrahere . In hac utilis detractio sanguinis est : si quid hanc prohibet , prima est abstinencia ; secunda per album veratrum vomitumque purgatio . Post utrumlibet adhibenda bis die frictio est ; si magis valet , frequens etiam exercitatio ; in ieiunio vomitus : cibus sine vino dandus ex media materia est . Quam quoties posuero , scire licebit etiam ex infirmissima dari posse ; dum ne ea sola quis utatur : valentissima tantummodo esse removenda . Praeter haec servanda alvus est quam tenerrima ; removendi terrores , et potius bona spes afferenda ; quaerenda delectatio ex fabulis , ludisque quibus maxime capi sanus assueverat ; laudanda , si qua sunt , ipsius opera , et ante oculos eius ponenda ; leviter obiurganda vana tristitia ; subinde admonendus , in iis ipsis rebus quae sollicitant , cur non potius laetitiae , quam solitudinis causa sit . Si febris quoque accessit , sicut aliae febres curanda est .

Tertium genus insaniae est , ex his longissimum ; adeo ut vitam ipsam non impediat : quod robusti corporis esse consuevit . Huius autem ipsius species duae sunt . Nam quidam imaginibus , non mente fal-

falluntur; quales insanientem Aiace[m] vel Orestem percepisse poetae ferunt: quidam animo desipiunt. Si imagines fallunt, ante omnia videndum est, tristes, an hilares sint. In tristitia nigrum veratrum deiectionis causa; in hilaritate album ad vomitum excitandum dari debet: idque, si in potione non accipit, pani adiiciendum est, quo facilius fallat. Nam si bene se purgaverit, ex magna parte morbum levabit. Ergo etiam si semel datum veratrum parum profecerit, interposito tempore iterum dari debet. Neque ignorare oportet levio[re]m esse morbum cum risu, quam serio insanientium. Illud quoque perpetuum est in omnibus morbis, ubi ab inferiore parte purgandus aliquis est, ventrem eius ante solvendum esse; ubi a superiore, comprimendum.

Si vero consilium insanientem fallit, tormentis quibusdam optime curatur. Ubi perperam aliquid dixit, aut fecit, fame, vinculis, plagis coercendus est. Cogendus est et attendere, et ediscere aliquid, et meminisse: sic enim fiet, ut paulatim metu cogatur considerare quid faciat. Subito etiam terreri, et expavescere, in hoc morbo prodest; et fere quidquid animum vehementer perturbat. Potest enim quaedam fieri mutatio, cum ab eo statu mens in quo fuerat, abducta est. Interest etiam, is ipse sine causa subinde rideat, an moestus demissusque sit; nam demens hilaritas terroribus iis, de quibus supra dixi, melius curatur: si nimia tristitia est, prodest lenis, sed multa bis die frictio; item per caput aqua frigida infusa, demissumque corpus in aquam et oleum.

Illae communia sunt: insanientes vehementer exerceri debere; multa frictione uti; neque pinguem carnem, neque vinum assumere; cibis uti post purgationem, ex media materia quam levissimis; non oportere esse vel solos, vel inter ignotos, vel inter eos quos

quos aut contemnant, aut negligant; mutare debere regiones, et si mens redit, annua peregrinatione esse iactandos.

Raro, sed aliquando tamen, ex metu delirium nascitur. Quod genus insanientium specie simile, similique victus genere curandum est: praeterquam quod in hoc insaniae genere solo recte vinum datur.

CAPUT XIX.

DE CARDIACIS.

His morbis praecipue contrarium est id genus, quod καρδιακόν a Grecis nominatur; quamvis saepe ad eum phrenetici transeunt: siquidem mens in illis labat, in hoc constat. Id autem nihil aliud est, quam nimia imbecillitas corporis, quod stomacho languente, immodico sudore digeritur. Licetque protinus scire id esse, ubi venarum exigui imbecillique pulsus sunt; sudor autem supra consuetudinem, et modo, et tempore, ex toto thorace et cervicibus, atque etiam capite prorumpit, pedibus tantummodo et cruribus siccioribus atque frigentibus. Acutique id morbi genus est.

Curatio prima est, supra praecordia imponere, quae reprimant, cataplasmata: secunda, sudorem prohibere. Id praestat acerbum oleum, vel rosa, vel melinum, aut myrteum: quorum aliquo corpus leniter perungendum; ceratumque ex aliquo horum tum imponendum est.

Si sudor vincit, delinendus homo est vel gypso, vel argenti spuma, vel cimolia creta, vel etiam subinde horum pulvere respergendus. Idem praestat pulvis ex contritis aridi myrti vel rubi foliis, aut ex austeri et boni vini arida faece: pluraque similia sunt, quae si desunt, satis utilis est quilibet ex via pulvis iniectus. Super haec vero, quo minus corpus in-

insudet, levi veste debet esse contactus, loco non calido, fenestris patentibus sic, ut perflatus quoque aliquis accedat.

Tertium auxilium est, imbecillitati iacentis cibo vinoque succurrere. Cibus non multus quidem, sed saepe tamen nocte ac die dandus est; ut nutriat, neque oneret. Is esse debet ex infirmissima materia, et stomacho aptus. Nisi si necesse est, ad vinum festinare non oportet: si verendum est ne deficiat, tum et intrita ex hoc, et hoc ipsum austerum quidem, sed tamen tenue, meraculum, egelidum subinde et liberaliter dandum est; adiecta polenta, si modo is aeger parum cibi assumit: idque vinum esse debet, neque nullarum virium, neque ingentium; recteque tota die ac nocte vel tres heminas aeger bibet; si vastius corpus est, plus etiam. Si cibum non accipit, perunctum ante perfundere aqua frigida convenit, et tum dare.

Quod si stomachus resolutus parum continet, et ante cibum, et post eum sponte vomere oportet; rursusque post vomitum cibum sumere. Si ne id quidem manserit, sorbere vini cyathum, interpositaque hora sumere alterum. Si id quoque stomachus reddiderit, totum corpus bulbis contritis superillnendum est; qui ubi inaruerunt, efficiunt, ut vinum in stomacho contineatur, exque eo toti corpori calor, venisque vis redeat.

Ultimum auxilium est, in alvum ptisanæ vel alicæ cremorem ex inferioribus partibus indere: siquidem id quoque vires tuetur. Neque alienum est, naribus quoque aestuantis admovere quod reficiat; id est rosam et vinum: et si qua in extremis partibus frigent, unctis et calidis manibus fovere. Per quæ si consequi potuimus, ut et sudoris impetus minuatur, et vita prorogetur, incipit iam tempus ipsum esse praesidio. Ubi in tuto esse videtur, verendum tamen est, ne in eandem imbecillitatem ci-

to recidat: itaque vino tantum remoto, quotidie validiorem cibum debet assumere, donec satis virium corpori redeat.

CAPUT XX.

DE LETHARGICIS.

Alter quoque morbus est, aliter phrenetico contrarius. In eo difficilior somnus, prompta ad omnem audaciam mens est: in hoc marcor, et inexpugnabilis pene dormiendi necessitas. Ἀνδραργον Graeci nominant. Atque id quoque genus acutum est, et nisi succurritur, celeriter iugulat. Hos aegros quidam subinde excitare nituntur, admotis iis per quae sternumenta evocantur, et iis quae odore foedo movent; qualis est pix cruda, lana succida, piper, veratrum, castoreum, acetum, allium, cepa. Iuxta etiam galbanum incendunt, aut pilos, aut cornu cervinum; si id non est, quodlibet aliud. Haec enim cum comburuntur, odorem foedum movent.

Tharrias vero quidam accessionis id malum esse dixit; levatique cum ea decessit: itaque eos, qui subinde excitant, sine usu male habere. Interest autem in decessione expergiscatur aeger, an cum febris non levetur, aut levata quoque ea somnus urgeat. Nam si expergiscitur, adhibere ei ut sopito, supervacuum est: neque enim vigilando melior fit; sed per se, si melior est, vigilat. Si vero continens ei somnus est, utique excitandus est; sed iis temporibus quibus febris levissima est, ut et excernat aliquid, et sumat. Excitat autem validissime repente aqua frigida infusa. Post remissionem itaque perunctum oleo multo corpus, tribus aut quatuor amphoris totum per caput perfundendum est. Sed hoc utemur, si aequalis aegro spiritus crit, si mollia praecordia: sin aliter haec erunt, ea potiora, quae

quae supra comprehensa sunt. Et quod ad somnum quidem pertinet, commodissima haec ratio est.

Medendi autem causa, caput radendum; deinde posca fovendum est, in qua laurus, aut ruta decocta sit: altero die imponendum castoreum, aut ruta ex aceto contrita, aut lauri baccae, aut hedera cum rosa et aceto. Praecipueque proficit et ad excitandum hominem, naribus admotum, et ad morbum ipsum depellendum, capiti frontive impositum sinapi. Gestatio etiam in hoc morbo prodest; maximeque opportune cibus datus, id est in remissione, quanta maxima inveniri poterit. Aptissima autem sorbitio est, donec morbus decrescere incipiat: sic, ut si quotidie gravis accessio est, haec quotidie detur; si alternis, post graviores sorbitio, post leviores mulsa aqua. Vinum quoque cum tempestivo cibo datum non mediocriter adjuvat.

Quod si post longas febres eiusmodi torpor accessit, cetera eadem servanda sunt: ante accessionem autem tribus quatuorve horis castoreum, si venter adstrictus est, mixtum cum scammonia; si non est, per se ipsum cum aqua dandum est. Si praecordia mollia sunt, cibus utendum est plenioribus; si dura, in iisdem sorbitionibus subsistendum; imponendumque praecordiis, quod simul et reprimat, et emolliat.

CAPUT XXI.

DE HYDROPICIS.

Sed hic quidem acutus est morbus. Longus vero fieri potest eorum quos aqua inter cutem male habet; nisi primis diebus discussus est: *Ἰδρωμα* Graeci vocant. Atque eius tres species sunt. Nam modo, ventre vehementer intento, creber intus et motu spiritus sonus est: modo corpus, inaequale est,
tu-

humoribus aliter aliterque per totum id orientibus : modo intus in uterum aqua contrahitur, et moto corpore ita movetur, ut impetus eius conspici possit. Primum *τυμπαίτην*; secundum *λευκοφλεγματίαν*, vel *ύπρσάρκα*; tertium *άσκήτην* Graeci nominarunt. Communis tamen omnium est humoris nimia abundantia: ob quam ne ulcera quidem in his aegris facile sanescunt. Saepe vero hoc malum per se incipit; saepe alteri vetusto morbo, maximeque quartanae supervenit.

Facilius in servis quam in liberis tollitur: quia cum desideret famem, sitim, mille alia taedia, longamque patientiam, promptius iis succurritur qui facile coguntur, quam quibus inutilis libertas est. Sed ne ii quidem qui sub alio sunt, si ex toto sibi temperare non possunt, ad salutem perducuntur. Ideoque non ignobilis medicus Chrysippi discipulus apud Antigonum regem, amicum quemdam eius notae intemperantiae, mediocriter eo morbo implicitum negavit posse sanari. Cumque alter medicus Epirotes Philippus se sanaturum polliceretur; respondit, illum ad morbum aegri respicere, se ad animum. Neque eum res fecellit. Ille enim cum summa diligentia non medici tantummodo, sed etiam regis custodiretur, tamen malagmata sua devorando, bibendoque suam urinam, in exitium se praecipitavit.

Inter initia tamen non difficillima curatio est, si imperata sunt corpori quies, sitis, inedia: at si malum inveteravit, non nisi magna mole discutitur. Metrodorum tamen Epicuri discipulum ferunt, cum hoc morbo tentaretur, nec aequo animo necessariam sitim sustineret, ubi diu abstinuerat, bibere solitum, deinde evomere. Quod si redditur quicquid receptum est, multum taedio demit; si a stomacho retentum est, morbum auget: ideoque in quolibet tentandum non est.

Sed si febris quoque est, haec in primis submo-
ven-

venda est per eas rationes, per quas huic succurri posse propositum est: si sine febre aeger est, tum demum ad ea veniendum est quae ipsi morbo mederi solent. Atque hic quoque quaecumque species est, si nondum nimis occupavit, iisdem auxiliis opus est: multum ambulandum, currendum aliquid est, superiores maxime partes sic perfricandae, ut spiritum ipse contineat; evocandus est sudor, non per exercitationem tantum, sed etiam in arena calida, vel laconico, vel clibano, similibusque aliis; maximeque utiles naturales et siccae sudationes sunt, quales super Baiae in myrtetis habemus. Balneum atque omnis humor alienus est. Ieiunio recte catapotia dantur, facta ex absinthii duabus, myrrhae tertia parte.

Cibus esse debet ex media quidem materia, sed tamen generis durioris: potio non ultra danda est, quam ut vitam sustineat, optimaque est quae urinam movet. Sed id ipsum tamen moliri cibo, quam medicamento melius est. Si tamen res coget, ex iisdem aliquid quae id praestant, erit decoquendum, eaque aqua potui danda. Videntur autem hanc facultatem habere iris, nardum, crocum, cinnamomum, amomum, cassia, myrrha, balsamum, galbanum, ladanum, oenanthe, panaces, cardamomum, heliopus, cupressi semen, uva taminia *capida aegypti* Graeci nominant; abrotonum, rosae folia, acorum, amarae nuces, tragoriganum, styrax, costum, iunci quadrati et rotundi semen; illum *ξύσμιον*, hunc *σχόνρον* Graeci vocant: quae quoties posuero, non quae hic nascuntur, sed quae inter aromata afferuntur significabo. Primo tamen quae levissima ex his sunt, id est rosae folia, vel nardi spica tentanda sunt. Vinum quoque utile est austerum, sed quam tenuissimum.

Commodum est etiam lino quotidie ventrem metiri, et qua comprehendit alvum, notam imponere; posteroque die videre, plenius corpus sit, an exte-

nuetur: id enim quod extenuatur, medicinam sentit. Neque alienum est metiri et potionem eius, et urinam: nam si plus humoris excernitur, quam assumitur, ita demum secundae valetudinis spes est. Asclepiades in eo qui ex quartana in hydropa deciderat, se abstinentia bidui, et frictione usum; tertio die, iam et febre et aqua liberato, cibum et vinum dedisse memoriae prodidit. Hactenus communiter de omni specie praecipi potest: si vehementius malum est, diducenda ratio curandi est.

Ergo si inflatio, et ex ea dolor creber est, utilis quotidianus, aut altero quoque die post cibum vomitus est: fomentis siccis calidisque utendum est. Si per haec dolor non finitur, necessariae sunt sine ferro cucurbitulae: si ne per has quidem tormentum tollitur, incidenda cutis est, et tum his utendum. Ultimum auxilium est, si cucurbitulae nihil profuerunt, per alvum infundere copiosam aquam calidam, eamque recipere. Quin etiam quotidie ter quaterve opus est uti frictione vehementi, cum oleo et quibusdam calefacientibus: sed in hac frictione a ventre abstinendum est. Imponendum vero in eum crebrius sinapi, donec cutem erodat: ferramentisque candentibus pluribus locis venter exulcerandus est, et servanda ulcera diutius. Utiliter etiam scilla cocta delingitur. Sed diu post has inflationes abstinendum est ab omnibus inflantibus.

At si id vitium est, cui λευκοφλέγματιᾱ nomen est, eas partes quae tument, subiicere soli oportet; sed non nimium, ne febriculam accendat: si is vehementior est, caput velandum est: utendumque frictione, madefactis tantum manibus aqua, cui sal et nitrum et olei paulum sit adiectum, sic, ut aut pueriles aut muliebres manus adhibeantur, quo mollior carum tactus sit: idque si vires patiuntur, ante meridiem tota hora; post meridiem semihora fieri oportet. Utilia etiam sunt cataplasmata quae re-
pri-

primunt; maximeque si corpora teneriora sunt. Incidendum quoque est super talum quatuor fere digitis ex parte interiore, qua per aliquot dies frequens humor feratur; atque ipsos tumores incidere altis plagis oportet: concutiendumque multa gestatione corpus est: atque ubi inductae vulneribus cicatrices sunt, adiiciendum et exercitationibus est, et cibus, donec corpus ad pristinum habitum revertatur. Cibus valens esse debet, et glutinosus, maximeque caro: vinum, si per stomachum licet, dulcius; sed ita, ut invicem biduo triduo modo aqua, modo id bibatur. Prodest etiam lactucae marinae, quae grãdis iuxta mare nascitur, semen cum aqua potui datum. Si valens est qui id accipit, et scilla cocta, sicut supra dixi, delingitur. Auctoresque multi sunt, inflatis vesicis pulsandos tumores esse.

Si vero id morbi genus est quo in uterum multa aqua contrahitur, ambulare, sed magis modice oportet; malagma quod digerat, impositum habere; idque ipsum superimposito triplici panno, fascia, non nimium tamen vehementer adstringere. Quod a Tharrìa profectum, servatum esse a pluribus video. Si iecur, aut lienem affectum esse manifestum est, ficum pinguem contusam, adiecto melle, superponere. Si per talia auxilia venter non siccatur, sed humor nihilo minus abundat, celeriori via succurrere, ut is per ventrem ipsum emittatur. Neque ignoro Erasistrato displicuisse hanc curandi viam: morbum enim hunc iecinoris putavit, ita illud esse sanandum, frustra aquam emitti, quae vitiatò illo subinde nascatur. Sed primum non huius visceris unius hoc vitium est: nam et liene affecto, et in totius corporis malo habitu fit. Deinde, ut inde coeperit, tamen aqua nisi emittitur, quae contra naturam ibi substitit, et ieciuori, et ceteris interioribus partibus nocet. Convenitque corpus nihilo minus esse curandum. Neque enim sanat emissus humor,

sed medicinae locum facit, quam intus inclusus impedit. Ac ne illud quidem in controversiam venit, quin non omnes in hoc morbo sic curari possint; sed invenes robusti, qui vel ex toto carent febre, vel certe satis liberales intermissiones habent. Nam quorum stomachus corruptus est, quive ex atra bile huc deciderunt, quive malum corporis habitum habent, idonei huic curationi non sunt. Cibus autem quo die primum humor emissus est, supervacuum est, nisi si vires desunt: insequentibus diebus, et is, et vinum meracius quidem, sed non ita multum dari debet, paulatimque evocandus aeger est ad exercitationes, frictiones, solem, sudationes, navigationes, et idoneos cibos, donec ex toto convalescat. Balneum rarum res amat; frequentiorem in ieunio vomitum. Si aestas est, in mari natare commodum est. Vbi convaleuit aliquis, diu tamen alienus ei veneris usus est.

CAPUT XXII.

DE TABE, ET EIUS SPECIEBUS.

Diutius saepe et periculosius tabes eos male habet, quos invasit. Atque huius quoque plures species sunt. Una est, qua corpus non alitur; et naturaliter semper aliquibus decedentibus, nullis vero in eorum locum subeuntibus, summa macies oritur; et nisi occurritur, tollit. *Αστροφία* hanc Graeci vocant. Ea duabus fere de causis incidere consuevit. Aut enim nimio timore aliquis minus, aut aviditate nimia plus quam debet assumit: ita vel quod deest, infirmat, vel quod superat, corrumpitur.

Altera species est, quam Graeci *καχexία* appellant: ubi malus corporis habitus est; ideoque omnia alimenta corrumpantur. Quod fere fit cum longo morbo vitata corpora, etiamsi illo vacent, refectionem

nem tamen non accipiunt; aut cum malis medicamentis corpus affectum est; aut cum diu necessaria defuerunt; aut cum inusitados et inutiles cibos aliquis assumpsit; aliquidve simile incidit. Huic praeter tabem, illud quoque nomen nunquam accedere solet, ut per assiduas pusulas, aut ulcera summa cutis exasperetur, vel aliquae corporis partes intumescant.

Tertia est, longeque periculosissima species, quam Graeci *phthisis* nominarunt. Oritur fere a capite; inde in pulmonem destillat; hinc exulceratio accedit; ex hac febricula levis fit, quae etiam cum quievit, tamen repetit; frequens tussis est; pus excreatur; interdum cruentum aliquid. Quidquid excreatum est, si in ignem impositum est, mali odoris est: itaque qui de morbo dubitant, hac nota utuntur.

Cum haec genera tabis sint, animadvertere primum oportet, quid sit id quo laboretur. Deinde si tantum non ali corpus apparet, causam eius attendere; et si cibi minus aliquis quam debet assumit, adiacere, sed paulatim; ne si corpus insuetum subita multitudine oneraverit, concoctionem impediat. Si vero plus iusto quis assumere solitus est, abstinere uno die: deinde ab exiguo cibo incipere quotidie adiacere, donec ad iustum modum perveniat. Praeter haec convenit ambulare locis quam minime frigidis, sole vitato; per manus quoque exerceri: si infirmior est, gestari, ungi, perfricari si potest, maxime per seipsum, saepius eodem die et ante cibum, et post eum sic, ut interdum oleo quaedam adiciantur calefacientia, donec insudet. Prodestque ieiuno prehendere per multas partes cutem et attrahere, ut relaxetur; aut imposita resina et abducta subinde idem facere. Utile est etiam interdum balneum, sed post cibum exiguum. Atque in ipso solio recte cibi aliquid assumitur; aut si sine hoc frictio fuit, post eam protinus. Cibi vero

esse debent ex iis qui facile concoquuntur, qui maxime alunt. Ergo vini quoque, sed austeri necessarius usus est. Movenda urina.

At si malus corporis habitus est, primum abstinendum est; deinde alvus ducenda; tum paulatim cibi dandi; adiectis exercitationibus, unctionibus, frictionibus. Utilius his frequens balneum est, sed ieiunis; etiam usque sudorem. Cibus vero opus est copiosis, variis, boni suci, quique etiam minus facile corrumpantur, vino austero. Si nihil reliqua proficiunt, sanguis mittendus est; sed paulatim, quotidieque pluribus diebus, cum eo, ut cetera quoque eodem modo serventur.

Quod si mali plus est, et vera phthisis est, inter initia protinus occurrere necessarium est; neque enim facile is morbus cum inveteravit, evincitur. Opus est, si vires patiuntur, longa navigatione, coeli mutatione sic, ut densius quam id est ex quo discedit aeger petatur: ideoque aptissime Alexandriam ex Italia itur. Fereque id posse inter principia corpus pati debet, cum hic morbus aetate firmissima maxime oriatur, id est ab anno duodevicesimo ad annum quintum et tricesimum. Si id imbecillitas non sinit, nave tamen non longe gestari commodissimum est: si navigationem aliqua res prohibet, lectica, vel alio modo corpus dimovendum est. Tum a negotiis abstinendum est, omnibusque rebus quae sollicitare animum possunt; somno indulgendum; cavendae destillationes, ne si quid cura levarit, exasperent; et ob id vitanda cruditas, simulque et sol, et frigus; os obtegendum, fauces velandae, tussicula suis remediis finienda: et quamdiu quidem febricula incursat, huic interdum abstinencia, interdum etiam tempestivis cibis medendum; eoque tempore bibenda aqua. Lac quoque, quod in capitis doloribus, et in acutis febribus, et per eas facta nimia siti, ac sive praecordia tument, si-
ve

ve biliosa urina est, sive sanguis fluxit, pro veneno est; in phthisi tamen, sicut in omnibus longis difficilibusque febriculis, recte dari potest. Quod si febris aut nondum incursat, aut iam renisit, decurrendum est ad modicas exercitationes, maximeque ambulationes; item lenes frictiones. Balneum alienum est. Cibus esse debet primo acer, ut allium, porrum, idque ipsum ex aceto, vel ex eodem intubus, ocimum, lactuca: deinde lenis, ut sorbitio ex ptisana, vel ex alica, vel ex amylo, lacte adiecto. Idem oryza quoque, et si nihil aliud est, far praestat. Tum invicem modo his cibis, modo illis utendum est, adiiciendaque quaedam ex media materia, praecepueque vel ex prima cerebellum, vel pisciculus, et his similia. Farina etiam cum sevo ovillo caprinove mixta, deinde incocta, pro medicamento est. Vinum assumi debet leve, austcrum. Hactenus non magna mole pugnatur: si vehementior noxa est, ac neque febricula, neque tussis quiescit, tenuarique corpus apparet, validioribus auxiliis opus est. Exulcerandum est ferro candenti, uno loco sub mento, altero in gutture, duobus ad mammam utramque; item sub imi ossibus scapularum, quas *ὠμοσπλάγας* Graeci vocant, sic, ne sanescere ulcera sinamus, nisi tussi finita: cui per se quoque medendum esse manifestum est. Tunc ter quaterve die vehementer extremae partes perfricandae, thorax levi manu pertractandus, post cibum intermittenda hora, et perfricanda crura, brachiaque. Interpositis denis diebus, demittendus est aeger in solium, in quo sit aqua calida et oleum: ceteris diebus bibenda aqua: tum et vinum, si tussis non est, potui frigidum dandum; si est, egelidum. Vtile est etiam in remissionibus quotidie cibos dari: frictiones gestationesque similiter adhiberi: eadem acria quarto, aut quinto die sumere: interdum herbam sanguinalem ex aceto, vel plantaginem esse. Medicamentum est

etiam vel plantaginis succus per se, vel marrubii cum melle iacoccus; ita ut illius cyathus sorbeatur, huius cochleare plenum paulatim delingatur; vel inter se mixta et incocta resinae terebinthinae pars dimidia, butyri et mellis pars altera. Praecipua tamen ex his omnibus sunt victus, vehiculum, et navis, et sorbitio. Alvus cita utique vitanda est. Vomitus in hoc morbo frequens perniciosus est, maximeque sanguinis. Qui meliusculus esse coepit, adicere debet exercitationes, frictiones, cibos: deinde ipse se, suppresso spiritu, perficere: diu abstinere a vino, balneo, venere.

CAPUT XXIII.

DE COMITALI MORBO.

Inter notissimos morbos est etiam is qui comitalis, vel maior nominatur. Homo subito concidit; ex ore spumae moventur; deinde interposito tempore ad se redit, et per se ipsum consurgit. Id genus saepius viros quam feminas occupat. Ac solet quidem etiam longum esse usque ad mortis diem, et vitae non periculosum; interdum tamen eum recens est, hominem consumit: et saepe eum, si remedia non sustulerunt, in pueris veneris, in puelis menstruorum initium tollit. Modo autem cum distentione nervorum prolabitur aliquis, modo sine illa. Quidam hos quoque iisdem, quibus lethargicos excitare conantur: quod admodum supervacuum est; et quia ne lethargicus quidem his sanatur; et quia, cum possit ille numquam expergisci, atque ita fame interire, hic ad se utique revertitur. Ubi concidit aliquis, si nulla nervorum distentio accessit, utique sanguis mitti debet: si accessit, non utique mittendus est, nisi alia quoque hortantur. Necessarium autem est ducere alvum, vel nigro ve-

ratro purgare, vel utramque facere, si vires patiuntur: tum caput tondere, oleoque et aceto perungere: cibum post diem tertium, simul transit hora qua concidit, dare. Neque sorbitiones autem, las, alique molles et faciles cibi, neque caro, minimeque suilla convenit, sed mediae materiae: nam et viribus opus est, et cruditates cavendae sunt. Cum quibus fugere oportet solem, balneum, ignem, omniaque calefacientia: item frigus, vinum, venereum, loci praecipitis conspectum, omniumque terrentium, vomitum, lassitudinem, solitudines, negotia omnia. Vbi tertio die cibus datus est, intermittere quartum, et invicem alterum quemque, eadem hora cibi servata, donec quatuordecim dies transeant. Quos ubi morbus excessit, acuti vim deposuit: ac si manet, curandus iam ut longus est. Quod si non quo die primum id incidit, medicus accessit, sed is qui cadere consuevit, ei traditus est, prolinus eo genere victus habito qui supra comprehensus est, expectandus est dies, quo prolabatur; utendumque tum vel sanguinis missione, vel ductione alvi, vel nigro veratro, sicut praeceptum est: insequentibus deinde diebus per eos cibos quos proposui, vitatis omnibus quae cavenda dixi, nutriendus. Si per haec morbus finitus non fuerit, confugiendum erit ad album veratrum; ac ter quoque aut quater eo utendum, non ita multis interpositis diebus; sic tamen, ne iterum unquam summat, nisi conciderit. Mediis autem diebus vires eius erunt nutriendae, quibusdam, praeter ea quae supra scripta sunt, adiectis. Vbi mane expectatus est, corpus eius leniter ex oleo vetere cum capite, excepto ventre, permulceatur: tum ambulatione quam maxime longa et recta utatur: post ambulationem loco tepido vehementer et diu, ac non minus ducenties, nisi infirmus erit, perfricetur: deinde per caput multa aqua frigida perfundatur; paulum

lum cibi assumat; conquiescat; rursus ante noctem ambulatione utatur; iterum vehementer perfricetur sic, ut neque venter, neque caput contingatur; post haec coenet: interpositisque tribus aut quatuor diebus, uno aut altero acria assumat. Si ne per haec quidem fuerit liberatus, caput radat; ungatur oleo vetere, adiecto aceto et nitro; perfundatur aqua salsa; bibat ieiunus ex aqua castoreum; nulla aqua, nisi decocta, potionis causa utatur. Quidam ingulati gladiatoris calido sanguine epoto tali morbo se liberarunt: apud quos miserum auxilium tolerabile miseriorum malum fecit. Quod ad medicum vero pertinet, ultimum est iuxta talum ex utroque crure paulum sanguinis mittere; occipitium incidere, et cucurbitulas admovere; ferro candenti in occipitio et infra quoque, qua summa vertebra cum capite committitur, adurere duobus locis, ut per ea perniciosus humor evadat. Quibus si finitum malum non fuerit, prope est, ut perpetuum sit. Ad levandum id tantummodo utendum erit exercitatione, multa frictione, cibisque iis qui supra comprehensi sunt: praecipueque vitanda omnia quae ne fierent, excepinus.

C A P U T XXIV.

DE REGIO MORBO.

AEque notus est morbus, quem interdum arquatum, interdum regium nominant. Quem Hippocrates ait, si post septimum diem febricitante aegro supervenit, tutum esse mollibus tantummodo praecordiis substantibus: Diocles ex toto, si post febrem oritur, etiam prodesse; si post hunc febris, occidere. Color autem eum morbum detegit, maxime oculorum, in quibus, quod album esse debet, fit luteum. Soletque accedere et sitis, et dolor capitis,
et

et frequens singultus , et praecordiorum dextra parte durities , et ubi corporis vehemens motus est , spiritus difficultas , membrorumque resolutio : atque ubi diutius manet morbus , totum corpus cum pallore quodam inalbescit . Primo die abstinere aegrum oportet ; secundo ducere alvum : tum si febris est , eam victus genere discutere ; si non est , scammoniam potui dare , vel cum aqua betam albam contritam , vel cum aqua mulsa nuces amaras , absinthium , anisum sic , ut pars huius minima sit . Asclepiades aquam quoque salsam , et quidem per biduum , purgationis causa bibere cogebat , iis quae urinam movent reiectis . Quidam superioribus omis- sis , per haec , et per eos cibos qui extenuant , idem se consequi dicunt . Ego utique si satis virium est , validiora ; si parum , imbecilliora auxilia praefero . Si purgatio fuit , post eam triduo primo modice cibum oportet assumere ex media materia , et vinum bibere graecum salsum , ut resolutio ventris maneat : tum altero triduo validiores cibos , et carnis quoque aliquid esse , intra aquam manere : deinde ad superius genus victus reverti , cum eo , ut magis satietur ; omisso graeco vino , bibere integrum , austerrum ; atque ita per haec variare , ut interdum acres quoque cibos interponat , interdum ad salsum vinum redeat . Per omne vero tempus utendum est exercitatione , frictione : si hiems est , balneo ; si aestas , frigidis natationibus ; lecto etiam , et conclavi cultiore , lusu , ioco , ludis , lascivia , per quae mens exhilaretur : ob quae regius morbus dictus videtur . Malagma quoque quod digerat , super praecordia datum prodest ; vel arida ibi ficus imposita , si iecur aut lienis affectus est .

CAPUT XXV.

DE ELEPHANTIA .

Ignotus autem pene in Italia, frequentissimus in quibusdam regionibus is morbus est, quem *ἐλεφαντίασις* Graeci vocant: isque longis adnumeratur. Totum corpus afficitur ita, ut ossa quoque vitiari dicantur. Summa pars corporis crebras maculas, crebrosque tumores habet; rubor earum paulatim in atrum colorem convertitur; summa cutis inaequaliter crassa, tenuis, dura, mollisque, quasi squamis quibusdam exasperatur; corpus emacrescit; os, surae, pedes intumescunt: ubi vetus morbus est, digiti in manibus pedibusque sub tumore conduntur, febricula oritur, quae facile tot malis obrutum hominem consumit. Protinus ergo inter initia sanguis per biduum mitti debet, aut nigro veratro venter solvi: adhibenda tum, quanta sustineri potest, inedia est: paulum deinde vires reficiendae, et ducenda alvus: post haec, ubi corpus levatum est, utendum est exercitatione, praecipueque cursu: sudor primum labore ipsius corporis, deinde etiam siccis sudationibus evocandus: frictio adhibenda: moderandumque inter haec, ut vires conserventur. Balneum rarum esse debet; cibus sine pinguibus, sine glutinosis, siue instantibus: vinum, praeterquam primis diebus, recte datur. Corpus contrita plantago et illita optime tueri videtur.

CAPUT XXVI.

DE ATTONITIS .

Attonitos quoque raro videmus quorum et corpus et mens stupet. Fit interdum ictu fulminis, interdum
dura

dum morbo: ἀποπληξίαν hunc Graeci appellant. His sanguis mittendus est: veratro quoque albo, vel alvi ductione utendum. Tum adhibendae frictiones, et ex media materia minime pingues cibi; quidam etiam acres; a vino abstinendum.

CAPUT XXVII.

DE RESOLUTIONE NERVORUM.

At resolutio nervorum frequens ubique morbus est: sed interdum tota corpora, interdum partes infestat. Veteres auctores illud ἀποπληξίαν, hoc παράλυσιν nominaverunt: nunc utrumque παράλυσιν appellari video. Soleut autem qui per omnia membra vehementer resoluti sunt, celeriter rapi: ac si correpti non sunt, diutius quidem vivunt; sed raro tamen ad sanitatem perveniunt, et plerumque miserum spiritum trahunt, memoria quoque amissa. In partibus vero numquam acutus, saepe longus, fere insanabilis morbus est. Si omnia membra vehementer resoluta sunt, sanguinis detractio vel liberat, vel occidit: aliud curationis genus vix unquam sanitatem restituit, saepe mortem tantum differt, vitam interim infestat. Post sanguinis missionem, si non redit et motus et mens, nihil spei superest: si redit, sanitas quoque prospicitur. At ubi pars resoluta est, pro vi et mali, et corporis, vel sanguis mittendus, vel alvus ducenda. Cetera eadem in utroque casu facienda sunt; siquidem vitare praecipue convenit frigus; paulatimque ad exercitationes revertendum est sic, ut ingrediatur ipse protinus, si potest: si id crurum imbecillitas prohibet, vel gestetur, vel motu lecti concutiat: dum id membrum quod deficit, si potest, per se, sin minus, per alium moveatur, et vi quadam ad consuetudinem redeat. Prodest etiam torpentis membri sum-

mam

mam cutem exasperasse, vel urticis caesam, vel imposito sinapi sic, ut ubi rubere coeperit corpus, haec removeantur. Scilla quoque contrita, bulbiue contriti cum thure recte imponuntur. Neque alienum est, resina cutem tertio quoque die diutius vellere, pluribus etiam locis; aliquando sine ferro cucurbitulas admovere. Vnctioni vero aptissimum est vetus oleum, vel nitrum aceto et oleo mixtum. Quin etiam fovere aqua calida marina, vel, si ea non est, tamen salsa magnopere necessarium est. Ac si quo loco vel naturales, vel etiam manufactae tales natationes sunt, iis potissimum utendum est; praecipueque in his agitando membra, quae maxime deficiunt: si id non est, balneum tamen proddest. Cibus esse debet ex media materia, maximeque ex venatione; potio sine vino aquae calidae: si tamen vetus morbus est, interponi quarto vel quinto die purgationis causa vinum graecum salsum potest. Post coenam utilis vomitus est.

De dolore nervorum.

2. Interdum vero etiam nervorum dolor oriri solet. In hoc casu non vomere, non medicamentis urinam movere, non exercitatione sudorem, ut quidam praecipiunt, expedit. Bibenda aqua est, bis die in lectulo leniter satis diu corpus perfricandum est, deinde retento spiritu: ab ipsa exercitatione potius superiores partes movendae: balneo raro utendum: mutandum subinde peregrinationibus coelum. Si dolor est, ea ipsa pars sine oleo, nitro ex aqua perungenda est; deinde involvenda, et subiicienda pruna lenis, et sulphur, atque ita id suffumigandum; idque aliquamdiu faciendum, sed ieiuno, cum bene iam concoxerit. Cucurbitulae quoque saepe dolenti parti admovendae sunt, pulsandusque leniter inflatis vesicis bubulis is locus est. Utile est etiam

etiam sebum miscere cum hyoscyami et urticae contritis seminibus sic, ut omnium par modus sit, idque imponere: fovere aqua, in qua sulphur decoctum sit. Vtriculi quoque recte imponuntur aqua calida repleti, aut bitumen cum hordeacea farina mixtum. Atque in ipso potissimum dolore utendum gestatione vehementi est: quod in aliis doloribus pessimum est.

De tremore nervorum.

3. Tremor autem nervorum aequè vomitu, medicamentisque urinam moventibus intenditur. Inimica etiam habet balnea, assasque sudationes. Bibenda aqua est: acri ambulatione utendum; itemque unctionibus, frictionibusque, maxime per seipsum: pila, similibusque superiores partes dimovendae: cibo quolibet utendum, dummodo concoctioni utique studeatur: secundum cibum curis abstinendum: rarissima venere utendum est. Si quando quis in eam prolapsus est, tum oleo leniter diuque in lectulo perfricari manibus puerilibus potius, quam virilibus debet.

De suppurationibus internis.

4. Suppurationes autem quae in aliqua interiori parte oriuntur, ubi natae fuerint, primum id agere oportet per ea cataplasmata quae reprimunt, ne coitus inutilis materiae fiat; deinde si haec victa sunt, per ea malagmata quae digerunt, ut dissipetur. Quod si consecuti non sumus, sequitur ut evocetur: deinde ut maturescat. Omnis tum vomicae finis est, ut rumpatur: indiciumque est pus vel alvo vel ore redditum. Sed nihil facere oportet, quo minus quidquid est puris excedat. Utendum maxime sorbitione est, et aqua calida. Vbi pus ferri desiit, transeundum
ad

ad faciles quidem , sed tamen validiores et frigidos cibos , frigidamque aquam sic , ut ab egelidis tamen initium fiat. Primoque cum melle quaedam edenda , ut nuclei pinei , vel graecae nuces , vel abellanae : postea submovendam id ipsum , quo maturius induci cicatrix possit. Medicamentum eo tempore ulceri est , succus assumptus vel porri vel marrubii , et omni cibo porrum ipsum adiectum. Oportebit autem uti in iis partibus quae non afficientur , frictionibus ; item ambulationibus lenibus : vitandumque erit , ne vel luctando , vel currendo , vel alia ratione sanescientia ulcera exasperentur. In hoc enim morbo perniciosus , ideoque omni modo cavendus sanguinis vomitus est .



A. CORNELII CELSI
ARTIUM LIBER NONUS
IDEM
MEDICINAE QUARTUS.

C A P U T I.

DE HUMANI CORPORIS INTERIORIBUS SEDIBUS.

Hactenus reperiuntur ea genera morborum quae in totis corporibus ita sunt, ut iis certae sedes assignari non possint : nunc de iis dicam quae sunt in partibus. Facilius autem omnium interiorum morbi curationesque in notitiam venient, si prius eorum sedes breviter ostendero. Caput igitur, eaque quae in ore sunt, non lingua tantummodo palatoque terminantur, sed etiam quatenus oculis nostris exposita sunt. In dextra sinistraque circa guttur venae grandes, quae *σπαιρίδες* nominantur; itemque arteriae, quas *καρτίδες* vocant, sursum procedentes ultra aures feruntur. At in ipsis cervicibus glandulae positae sunt, quae interdum cum dolore intumescunt. Deinde duo itinera incipiunt : alterum asperam arteriam nominant : alterum stomachum. Arteria exterior ad pulmonem; stomachus interior ad ventriculum fertur : illa spiritum; hic cibum recipit. Quibus cum diversae viae sint, qua coeunt, exigua in arteria sub ipsis faucibus lingua est; quae cum spiramus, attollitur; cum cibum potionemque assumimus, arteriam claudit. Ipsa autem arteria dura et cartilaginosa in gutture assurgit; ceteris partibus residet. Constat ex circulis quibusdam compositis ad imaginem earum vertebrarum quae in spina sunt :

Cels. T. I.

K

ita

ita tamen , ut ex parte exteriori aspera , ex interiori stomachi modo laevis sit : eaque descendens ad praecordia cum pulmone committitur . Is spongiosus , ideoque spiritus capax , et a tergo spinae ipsi iunctus , in duas fibras ungulae bubulae modo dividitur . Huic cor annexum est , natura musculosum , in pectore sub sinisteriore mamma situm ; duosque quasi ventriculos habet . At sub corde atque pulmone transversum ex valida membrana septum est , quod a praecordiis uterum diducit ; idque nervosum , multis etiam venis per id discurrentibus , a superiore parte non solum intestina , sed iecur quoque lienemque discernit . Haec viscera proxime , sed infra tamen posita dextra sinistraque sunt . Iecur a dextra parte sub praecordiis ab ipso septo orsum , intrinsecus cavum , extrinsecus gibbum : quod prominens leviter ventriculo insidet , et in quatuor fibras dividitur . Ex inferiore , vero parte ei fel inhaeret . At lienis sinistra , non eidem septo , sed intestino innexus est , natura mollis et rarus , longitudinis crassitudinisque modicae ; isque paulum a costarum regione in uterum excedens , ex maxima parte sub his conditur . Atque haec quidem iuncta sunt . Renes vero diversi ; qui lumbis sub imis costis inhaerent , a parte earum rotundi , ab altera resimi ; qui et venosi sunt , et ventriculos habent , et tunicis super conteguntur . Ac viscerum quidem hae sedes sunt . Stomachus vero , qui intestinorum principium est , nervosus . a septima spinae vertebra incipit ; circa praecordia cum ventriculo committitur . Ventriculus autem , qui receptaculum cibi est , constat ex duobus tergoribus ; isque inter lienem et iecur positus est , utroque ex his paulum super eum ingrediente . Suntque etiam membranulae tenues , per quas inter se tria ista connectuntur , iungunturque ei septo , quod transversum esse supra posui . Inde ima ventriculi pars

pars paulum in dexteriores partem conversa , in
sumum intestinum coarctatur. Hanc iuncturam *πυ-
λωρον* Graeci vocant , quoniam portae modo in in-
feriores partes ea quae excreturi sumus , emittit .
Ab ea ieiunum intestinum incipit , non ita implici-
tum : cui tale vocabulum est , quia numquam , quod
accipit , continet ; sed protius in inferiores partes
transmittit . Inde tenuius intestinum est , in sinus
vehementer implicitum : orbes vero eius per mem-
branulas singuli cum inferioribus connectuntur ; qui
in dexteriores partem conversi , et e regione dex-
terioris coxae finiti , superiores tamen partes ma-
gis complent . Deinde id intestinum cum crassiore
altero transverso committitur , quod a dextra parte
incipiens , in sinisteriores pervium et longum est ,
in dexteriores non est ; ideoque caecum nomina-
tur . At id quod pervium est , late fusum atque si-
nuatum , minusque quam superiora intestina nervo-
rum , ab utraque parte huc atque illuc volutum ,
magis tamen sinisteriores inferioresque partes tenens
contingit iecur atque ventriculum : deinde cum qui-
busdam membranulis a sinistro rene venientibus iun-
gitur ; atque hinc dextra recurvatum in imo diri-
gitur , qua excernit ; ideoque id ibi rectum intesti-
num nominatur . Contegit vero universa haec omen-
tum , ex inferiore parte laeve et strictum , ex su-
periore mollius ; cui adeps quoque innascitur ; quae
sensu , sicut cerebrum quoque et medulla , caret .
At a renibus singulae venae colore albae ad vesicam
feruntur : *ούρητηρας* Graeci vocant , quod per eas
inde descendentem urinam in vesicam destillare con-
cipiunt . Vesica autem in ipso sinu nervosa et du-
plex , cervice plena atque carnosae , iungitur per ve-
nas cum intestino , eoque osse quod pubi subest :
ipsa soluta atque liberior est : aliter in viris atque
in feminis posita . Nam in viris iuxta rectum inte-
stinum est , potius in sinistram partem inclinata ;

in feminis super genitale earum sita est, supraque elapsa ab ipsa vulva sustinetur. Tum in masculis inter urinae spatiosius et compressius a cervice huius descendit ad colem: in feminis brevius et plenius super vulvae cervicem se ostendit. Vulva autem in virginibus quidem admodum exigua est: in mulieribus vero, nisi ubi gravidae sunt, non multo maior, quam ut manu comprehendatur. Ea recta tenuataque cervice, quem canalem vocant, contra mediam alvum orsa, inde paulum ad dexteriorem coxam convertitur; deinde super rectum intestinum progressa, illis feminae latera sua innectit. Ipsa autem ilia inter coxas et pubem imo ventre posita sunt. A quibus ac pube abdomen sursum versus ad praecordia pervenit; ab exteriori parte evidenti cute; ab interiori lacvi membrana inclusum, quae omento iungitur; περιτόναιος autem a Graecis nominatur.

C A P U T II.

DE CURATIONIBUS MORBORUM, QUI NASCUNTUR

A CAPITIS.

His veluti in conspectum quemdam, quatenus scire curanti necessarium est, adductis, remedia singularum laborantium partium exsequar, orsus a capite: sub quo nomine nunc significo eam partem quae capillo tegitur: nam oculorum, aurium, dentium dolor, et si quis similis est, alias erit explicandus.

De Capitis dolore.

In capite autem interdum acutus et pestifer morbus est, quam κεφαλαία Graeci vocant: cuius notae sunt horror validus, nervorum resolutio, oculorum caligo, mentis alienatio, vomitus sic, ut vox
sup-

supprimatur ; vel sanguinis ex naribus cursus sic , ut corpus frigescat , anima deficiat : praeter haec dolor intolerabilis , maxime circa tempora , vel occipitium . Interdum autem in capite longa imbecillitas , sed neque gravis , neque periculosa , per hominis aetatem est : interdum gravior dolor , sed brevis , neque tamen mortiferus ; qui vel vino , vel cruditate , vel frigore , vel igne , aut sole contrahitur . Hique omnes dolores modo cum febre , modo sine hac sunt ; modo in toto capite , modo in parte ; interdum sic , ut oris quoque proximam partem excrucient . Praeter haec etiamnum invenitur genus , quod potest longum esse ; ubi humor cutem inflat , eaque intumescit , et prementi digito cedit : ὄδρονι-
πλον Graeci appellant . Ex his id quod secundo loco positum est , dum leve est , qua sit ratione curandum , dixi , cum persequerer ea quae sani homines in imbecillitate partis alicuius facere deberent . Quae vero auxilia sunt capitis , ubi cum febre dolor est , eo loco explicitum est quo febrim curatio exposita est . Nunc de ceteris dicendum est . Ex quibus id quod acutum est , et id quod supra consuetudinem intenditur , idque quod ex subita causa , etsi non pestiferum , tamen vehemens est , primam curationem habet , qua sanguis mittatur . Sed id , nisi intolerabilis dolor est , supervacuum est : satiusque est abstinere a cibo ; si fieri potest , etiam a potione ; si non potest , aquam bibere . Si postero die dolor remanet , alvum ducere , sternutamenta evocare , nihil assumere , nisi aquam . Saepe enim dies unus aut alter totum dolorem hac ratione discutit ; utique si ex vino vel cruditate origo est . Si vero in his auxilii parum est , tonderi oportet ad cutem : deinde considerandum est quae causa dolorem excitarit . Si calor , aqua frigida multa perfundere caput expedit : spongiam concavam imponere , subinde in aqua frigida expressam : ungere rosa et ace-

to, vel potius his tinctam lanam succidam impo-
nere, aliave refrigerantia cataplasmata. At si frigus
nocuit, caput oportet perfundere aqua calida mari-
na, vel certe salsa, aut in qua laurus decocta sit:
tum caput vehementer perfricare: deinde calido oleo
implere et veste velare. Quidam etiam id devinciunt;
alii cervicalibus vestimentisque onerant, et sic le-
vantur; alios calida cataplasmata adjuvant. Ergo
etiam, ubi causa incognita est, videre oportet, re-
frigerantia magis, an calefacientia leniant; et iis
uti, quae experimentum approbarit. At si parum
causa discernitur, perfundere caput primum aqua
calida, sicut supra praeceptum est, vel salsa, vel
ex lauro decocta; tum frigida posca. Illa in omni
vetusto capitis dolore communia sunt: sternutamenta
excitare; inferiores partes vehementer perfricare;
gargarizare iis quae salivam movent; cucurbitulas
temporibus et occipitio admoveere; sanguinem ex na-
ribus detrahere; resina subinde tempora pervellere,
et imposito sinapi exulcerare ea quae male habent,
ante linteolo subiecto, ne vehementer arrodat; can-
dentibus ferramentis, ubi dolor est, ulcera excita-
re; cibum permodicum cum aqua sumere: ubi le-
vatus est dolor, in balneum ire, ibi multa aqua
prius calida, deinde frigida per caput perfundi: si
discussus ex toto dolor est, etiam ad vinum rever-
ti; sed postea semper antequam quidquam aliud,
aquam bibere. Dissimile est id genus quod humo-
rem in caput contrahit. In hoc tonderi ad cutem
necessarium est; deinde imponere sinapi sic, ut
exulceret: si id parum profuit, scalpello utendum
est. Illa cum hydropicis communia sunt, ut exer-
ceatur, insudet, vehementer perfricetur, cibis po-
tionibusque utatur urinam praecipue moventibus.

C A P U T III.

DE MORBO , QUI CIRCA FACIEM NASCITUR .

Circa faciem vero morbus innascitur, quem Graeci *χυνικὸν σπασμὸν* nominant. Is cum acuta fere febre oritur; os cum motu quodam pervertitur; ideoque nihil aliud est, quam distentio oris. Accedit crebra coloris in facie totoque corpore mutatio; somnus in promptu est. In hoc sanguinem mittere optimum est: si finitum eo malum non est, ducere alium: si ne sic quidem discussum est, albo vatro vomitum movere. Praeter haec necessarium est vitare solem, lassitudinem, vinum. Si discussum his non est, utendum est cursu; frictione in eo quod laesum est leni et multa; in reliquis partibus breviori, sed vehementi. Prodest etiam movere sternutamenta; caput radere; idque perfundere aqua calida, vel marina, vel certe salsa sic, ut ei sulphur quoque adiiciatur; post perfusionem iterum perfricare; sinapi manducare; eodemque tempore affectis oris partibus ceratum, integris idem sinapi, donec arrodant, imponere. Cibus aptissimus ex media materia est.

C A P U T IV.

DE RESOLUTIONE LINGUAE.

At si lingua resoluta est; quod interdum per se, interdum ex morbo aliquo fit, sic ut sermo hominis non explicetur; oportet gargarizare ex aqua in qua vel thymum, vel hyssopum, vel nepeta decocta sit; aquam bibere; caput, et os, et ea quae sub mento sunt, et cervicem vehementer perfricare; lasere linguam ipsam linere; manducare quae

sunt acerrima, id est sinapi, allium, cepam; magna vi luctari, ut verba exprimantur; exerceri retento spiritu; caput saepe aqua frigida perfundere; nonnumquam multam esse radiculam, deinde vomere.

CAPUT V.

DE DESTILLATIONE, AC GRAVEDINE.

Destillat autem humor de capite interdum in nares, quod leve est; interdum in fauces, quod peius est; interdum etiam in pulmonem, quod pessimum est. Si in nares destillat, tenuis per has pituita profluit, caput leviter dolet, gravitas eius sentitur, frequentia sternutamenta sunt. Si in fauces: has exasperat, tussiculam movet. Si in pulmonem, praeter sternutamenta, et tussim, est etiam capitis gravitas, lassitudo, sitis, aestus, biliosa urina. Aliud autem, quamvis non multum distans, malum gravedo est. Haec nares claudit, vocem obtundit, tussim siccam movet: sub eadem salsa est saliva, sonant aures, venae moventur in capite, turbida urina est. Haec omnia *κορυζας* Hippocrates nominat: nunc video apud Graecos in gravedine hoc nomen servari; destillationem *καταρρυμόν* appellari. Haec autem et brevia, et si neglecta sunt, longa esse consuerunt. Nihil pestiferum est, nisi quod pulmonem exulcerat. Vbi aliquid eiusmodi sentimus, protinus abstinere a sole, balneo, vino, venere debemus: inter quae unctione, et assueto cibo nihilo minus uti licet. Ambulatione tantum acri, sed tecta utendum est, et post eam caput atque os supra quinquagies perfricandum. Raroque fit, ut si bi-duo, vel certe triduo nobis temperavimus, id vitium non levetur. Quo levato, si in destillatione crassa facta pituita est, vel in gravedine nares magis patent, balneo utendum est; multaue aqua prius ca-
li-

lida , post egelida fovendum os , caputque ; deinde cum cibo pleniore vinum bibendum . At si aequae tenuis quarto die pituita est , vel nares aequae clausae videntur , assumendum est vinum Amineum austerum ; deinde rursus biduo aqua ; post quae ad balneum , et ad consuetudinem revertendum est . Neque tamen illis ipsis diebus , quibus aliqua omit- tenda sunt , expedit tamquam aegros agere ; sed ce- tera omnia quasi sanis facienda sunt , praeterquam si diutius aliquem et vehementius ista sollicitare consuerunt : huic enim quaedam curiosior observa- tio necessaria est . Igitur huic , si in nares vel in fauces destillat , praeter ea quae supra retuli , pro- tinus primis diebus multum ambulandum est ; per- fricandae vehementer inferiores partes ; lenior fri- ctio adhibenda thoraci , ori , capiti ; demenda as- sueto cibo pars dimidia ; sumenda ova , amyllum , similiaque , quae pituitam faciunt crassiorem ; siti contra , quanta maxima sustineri potest , pugnan- dum . Vbi per haec idoneus aliquis balneo fa- ctus , eoque usus est , adiiciendus est cibo pisci- culus , aut caro ; sic tamen , ne protinus iustus mo- dus cibi sumatur : vino meraco copiosius utendum est . At si in pulmonem quoque destillat , multo magis et ambulatione et frictione opus est ; eadem- que adhibita ratione in cibis , si non satis illi pro- ficiunt , acrioribus utendum est ; magis somno in- dulgendum , abstinendumque a negotiis omnibus ; aliquando , sed serius , balneum tentandum . In gra- vedine autem primo die quiescere , neque esse , ne- que bibere , caput velare , fauces lana circumdare : postero die surgere , abstinere a potione , aut si res coëgerit , non ultra heminam aquae assumere : ter- tio die panis non ita multum ex parte interiore cum pisciculus , vel levi carne sumere , aquam bibere : si quis sibi temperare non potuerit , quo minus ple- niore victu utatur , vomere : ubi in balneum ven- tum

tum est, multa calida aqua caput et os fovere usque ad sudorem: tum ad vinum redire. Post quae vix fieri potest, ut idem incommodum maneat: sed si manserit, utendum erit cibis frigidis, aridis, levibus, humore quam minimo, servatis frictionibus exercitationibusque, quae in omni tali genere valetudinis necessariae sunt.

CAPUT VI.

DE CERVICIS MORBIS.

A capite transitus ad cervicem est; quae gravibus admodum morbis obnoxia est. Neque tamen alius inportunior acutiorque morbus est, quam is qui quodam rigore nervorum, modo caput scapulis, modo mentum pectori adnectit, modo rectam et immobilem cervicem intendit. Priorem Graeci *ὀπισθοδύστροφον*, insequentem *ὑποπροσδύστροφον*, ultimum *τέτανον* appellant: quamvis minus subtiliter quidam indiscretis his nominibus utuntur. Ea saepe intra quartum diem tollunt; si hunc evaserunt, sine periculo sunt. Eadem omnia ratione curantur; idque convenit. Sed Asclepiades utique mittendum sanguinem credidit: quod quidam vitandum esse dixerunt, eo quod maxime tum corpus calore egeret; isque esset in sanguine. Verum hoc quidem falsum est. Neque enim natura sanguinis est, ut utique caleat; sed ex iis quae in homine sunt, hic celerrime vel calescit, vel refrigescit. Mitti vero necne debeat, ex iis intelligi potest, quae de sanguinis missione praecepta sunt. Utique autem recte datur castoreum, et cum hoc piper, vel laser: deinde opus est fomento humido et calido. Itaque plerique aqua calida multa cervices subinde perfundunt. Id in praesentia levat; sed opportuniore nervos frigori reddit: quod utique vitandum est. Vtilius igitur est cerato
li-

liquido primum cervicem perungere ; deinde admove-
vere vesicas bubulas, vel utriculos oleo calido reple-
tos, vel ex farina calidum cataplasma, vel piper
rotundum cum ficu contusum . Vtilissimum tamen
est humido sale fovere : quod quomodo fieret, iam
ostendi . Vbi eorum aliquid factum est, admove-
re ad ignem, vel si aestas est, in sole aegrum oportet ;
maximeque oleo vetere ; si id non est, syriaco ; si ne id quidem est, adipe quam vetustissima
cervicem, et scapulas, et spinam perfricare . Fri-
ctio cum omnibus in homine vertebrae utilis sit,
tum iis praecipue quae in collo sunt . Ergo die no-
cteque, interpositis tamen quibusdam temporibus,
hoc remedio utendum est : dum id intermittitur,
imponendum malagma aliquod ex calefacientibus .
Cavendum vero praecipue frigus ; ideoque in eo
conclavi quo cubabit aeger, ignis continuus esse de-
bebit, maximeque tempore antelucano, quo praeci-
pue frigus intenditur . Neque inutile erit, caput
attonsum habere, idque irino vel cyprino calido ma-
defacere, et superimposito pileo velare : nonnum-
quam etiam in calidum oleum totum descendere,
vel in aquam calidam, in qua foenum graecum de-
coctum sit, et adiecta olei pars tertia . Alvus quo-
que ducta saepe superiores partes resolvit . Si vero
etiam vehementius dolor crevit, admovendae cervi-
cibus cucurbitulae sunt sic, ut cutis incidatur : eadem
aut ferramentis, aut sinapi adurenda . Vbi levatus
est dolor, moverique cervix coepit, scire licet ce-
dere remediis morbum . Sed diu vitandus cibis,
quisquis mandendus est . Sorbitionibus utendum,
itemque ovis sorbilibus, aut mollibus ; ius aliquod
assumendum . Id si bene processerit, iamque ex to-
to recte se habere cervices videntur, incipiendum
erit a pulicula, vel intrita bene madida . Celerius
tamen etiam panis mandendus, quam vinum gustan-
dum :

dum: siquidem huius usus praecipue periculosus; ideoque in longius tempus differendus est.

CAPUT VII.

DE FAUCIUM MORBIS: ET PRIMUM DE ANGINA.

Vt hoc autem morbi genus circa totam cervicem; sic alterum aequè pestiferum acutumque in faucibus esse consuevit. Nostri anginam vocant: apud Graecos nomen, prout species est. Interdum enim neque rubor, neque tumor ullus apparet; sed corpus aridum est, vix spiritus trahitur, membra solvuntur: id *συνάγχην* vocant. Interdum lingua faucesque cum rubore intumescunt, vox nihil significat, oculi vertuntur, facies pallet, singultusque est: id *κυνάγχην* vocant. Illa communia sunt; aeger non cibum devorare, non potionem potest, spiritus eius in tercluditur. Levius est, ubi tumor tantummodo et rubor est, cetera non sequuntur: id *παρασυνάγχην* appellant. Quidquid est, si vires patiuntur, sanguis mittendus est: secundum est ducere alvum. Cucurbitula quoque recte sub mento, et circa fauces admovetur; ut id, quod strangulat, evocet. Opus est deinde fomentis humidis: nam sicca spiritum elidunt. Ergo admoveere spongas oportet; quae melius in calidum oleum, quam in calidam aquam subinde demittuntur: efficacissimusque est hic quoque salis calidus succus. Tunc commodum est hyssopum, vel nepetam, vel thymum, vel absynthium, vel etiam furfures, aut ficus aridas cum mulsa aqua decoquere, eaque gargarizare: post haec palatum ungere vel felle taurino, vel eo medicamento, quod ex moris est. Polline etiam piperis id recte respergitur. Si per haec parum proficitur, ultimum est incidere satis altis plagis sub ipsis maxillis supra collum, et in palato circa uvam,
vel

vel eas venas quae sub lingua sunt; ut per ea vulnera morbus erumpat. Quibus si non fuerit eger adiutus, scire licet malo victum esse. Si vero his morbus levatus est, iamque fauces et cibum et spiritum capiunt, facilis ad bonam valetudinem recursus est. Atque interdum natura quoque adiuvat, si ex angustiore sede vitium transit in latiore: itaque rubore et tumore in praecordiis orto, scire licet fauces liberari. Quidquid autem eas levarit, incipiendum est ab humidis, maximeque aqua mulsa decocta: deinde assumendi molles et non acres cibi sunt, donec fauces ad pristinum habitum revertantur. Vulgo audio, si quis pullum hirundinum ederit, angina toto anno non periclitari; servatumque eum ex sale, cum is morbus urget, comburi, carbonemque eius contritum in aquam mulsam, quae potui detur, infriari, et prodesse. Id cum idoneos auctores ex populo habeat, neque habere quidquam periculi possit, quamvis in monumentis medicorum non legerim, tamen inserendum huic operi meo credidi.

C A P U T VII.

DE DIFFICULTATE SPIRANDI.

Est etiam circa fauces malum, quod apud Graecos aliud aliudque nomen habet, prout se intendit. Omne in difficultate spirandi consistit: sed haec dum modica est, neque ex toto strangulat, δύσπνοια appellatur: cum vehementior est, ut spirare aeger sine sono et anhelatione non possit, ἀσθμα: cum accessit id quoque, ne nisi recta cervice spiritus trahatur, ὀρθόπνοια. Ex quibus id quod primum est, potest diutius trahi; duo insequentia acuta esse consuerunt. His communia sunt: quod propter angustias, per quas spiritus evadit, sibilum edit; dolor

in pectore praecordiisque est, interdum etiam in scapulis, isque modo decedit, modo revertitur; ad haec tussicula accedit. Auxilium est, nisi aliquid prohibet, in sanguinis detractione. Neque id satis est, sed lacte quoque venter solvendus est: liquanda alvus, interdum etiam ducenda: quibus extenuatum corpus incipit spiritum trahere commodius. Caput autem etiam in lecto sublime habendum est: thorax fomentis, cataplasmatisque calidis, aut siccis, aut etiam humidis adiuvandus est; et postea vel malagma superimponendum, vel certe ceratum ex cyprino, vel irino unguento. Sumenda deinde ieiuno potui mulsa aqua, cum qua vel hyssopus cocta, vel contrita capparidis radix sit. Delingitur etiam utiliter aut nitrum, aut nasturtium, aut allium frictum, deinde contritum et cum melle mixtum: simulque coquuntur mel, galbanum, resina terebinthina, et ubi coierunt, ex his quod fabae magnitudinem habet, quotidie sub lingua liquatur: aut sulphuris ignem non experti p. ꝯ. =. abrotoni p. ꝯ. in vini ciatho teruntur, idque tepefactum sorbetur. Est etiam non vana opinio, vulpinum iecur, ubi siccum et aridum factum est, contundi oportere, polentamque ex eo potioni aspergi: vel eiusdem pulmonem quam recentissimum assum, sed sine ferro coctum, edendum esse. Praeter haec sorbitionibus et lenibus cibis utendum est; interdum vino tenui austero; nonnumquam vomitu. Prosunt etiam quaecumque urinam movent: sed nihil magis quam ambulatio lenta pene usque ad lassitudinem; frictio multa, praecipue inferiorum partium, vel in sole, vel ad ignem, et per seipsum, et per alios, usque ad sudorem.

C A P U T IX.

DE FAUCIUM EXULCERATIONE .

In interiore vero faucium parte interdum exulceratio esse consuevit . In hac plerique extrinsecus cataplasmatibus calidis , fomentisque humidis utuntur : volunt etiam vaporem calidum ore recipi : per quae molliores alii partes eas fieri dicunt , opportuniioresque vitio iam haerenti . Sed si bene vitari frigus potest , tuta illa praesidia ; si metus eius est , supervacua sunt . Vtique autem perfricare fauces periculosum est : exulcerat enim . Neque utilia sunt , quae urinae movendae sunt ; quia possunt , dum transeunt , ibi quoque pituitam extenuare ; quam suppressi melius est . Asclepiades multarum rerum , quas ipsi quoque secuti sumus , auctor bonus , acutum ait quam acerrimum esse sorbendum : hoc enim sine ulla noxa comprimere ulcera . Sed id suppressere sanguinem potest , ulcera ipsa sanare non potest . Melius huic rei lycium est ; quod idem quoque aequè probat : vel porri , vel marrubii succus , vel nuces graecae cum tragacantho contritae et cum passo mixtae , vel lini semen contritum et cum dulci vino mixtum . Exercitatio quoque ambulandi currendique necessaria est : frictio a pectore vehemens toti inferiori parti adhibenda . Cibi vero esse debent neque nimium acres , neque asperi ; mel , lenticula , tragus , lac , ptisana , pinguis caro , praecipueque porrum , et quidquid cum hoc mixtum est . Potionis quam minimum esse convenit . Aqua dari potest , vel pura , vel in qua malum cotoneum , palmulaeve decoctae sint . Gargarizationes quoque lenes ; sin haeparum proficiunt , reprimentes utiles sunt . Hoc genus neque acutum est , et potest esse non longum : curationem tamen maturam , ne vehementer et diu laedat , desiderat .

CA-

CAPUT X.

DE TUSSI.

Tussis vero fere propter faucium exulcerationem molesta est; quae multis modis contrahitur. Itaque illis restitutis, ipsa finitur. Solet tamen interdum per se quoque male habere; et vix, cum vetus facta est, eliditur. Ac modo arida est, modo pituitam citat. Oportet hyssopum altero quoque die bibere; spiritu retento currere, sed minime in pulvere; ac lectione uti vehementi, quae primo impeditur a tussi, post eam vincit: tum ambulare: deinde per manus quoque exerceri, et pectus diu perfricare: post haec quam pinguissimae ficus uncias tres super prunam incoctas, esse. Praeter haec, si humida est, prosunt frictiones validae cum quibusdam calefacientibus sic, ut caput quoque simul vehementer perfricetur; item cucurbitulae pectori admotae; sinapi ex parte exteriori faucibus impositum, donec leviter exulceret; potio ex mentha, nucibusque graecis et amylo; primoque assumptus panis aridus, deinde aliquis cibus lenis. At si sicca tussis est, cum ea vehementissime urget, adiuvat vini austeri cyathus assumptus, dum ne amplius id, interposito tempore aliquo, quam ter aut quater fiat: item lascris quam optimi paulum devorare opus est; porri vel marrubii succum assumere; scillam delingere; acetum ex ea, vel certe acre sorbere, aut cum spica allii contriti duos vini cyathos. Vtilis etiam in omni tussi est peregrinatio, navigatio longa, loca maritima, natationes: cibus interdum mollis, ut malva, ut urtica; interdum acer, ut lac cum allio coctum: sorbitiones quibus laser sit adiectum, aut in quibus porrum incoctum tabuerit: ovum sorbile sulphure adiecto; potui primum

num aqua calida, deinde invicem aliis diebus haec, aliis vinum .

C A P U T X I .

DE SANGUINIS SPUTU .

Magis terreri potest aliquis , cum sanguinem exspuit : sed id modo minus , modo plus periculi habet . Exit modo ex gingivis , modo ex ore : et quidem ex hoc interdum etiam copiose , sed sine tussi , sine ulcere , sine gingivarum ullo vitio ; ita ut nihil exscreetur : verum ut ex naribus , sic ex ore aliquando prorumpit . Atque interdum sanguis profluit , interdum simile aquae quiddam , in qua caro recens lota est . Nonnumquam autem is a summis faucibus fertur , modo exulcerata ea parte , modo non exulcerata ; sed aut ore venae alicuius adaperito , aut tuberculis quibusdam natis , exque his sanguine erumpente : Quod ubi incidit , neque laedit potio aut cibus , neque quidquam ut ex ulcere exscreatur . Aliquando vero gutture et arteriis exulceratis , frequens tussis sanguinem quoque extundit : interdum etiam fieri solet , ut aut ex pulmone , aut ex pectore , aut ex latere , aut ex iecinore feratur : saepe feminae , quibus sanguis per menstrua non respondet , hunc exspuunt . Auctoresque medici sunt , vel exesa parte aliqua sanguinem exire , vel rupta , vel ore alicuius venae patefacto . Primam διασπρωσις , secundam ρήξιν , tertiam ἀνασπόμεσιν appellant . Ultima minime nocet ; prima gravissime . Ac saepe quidem evenit , ut sanguinem pus sequatur . Interdum autem qui sanguinem ipsum suppressit , satis ad valetudinem profuit . Sed si secuta ulcera sunt , si pus , si tussis est , prout sedes ipsa est , ita varia et periculosa genera morborum fiunt . Si vero sanguis tantum fluit , expeditius et remedium et finis est . Neque

Cels. T. I. L igno-

ignorari oportet, iis quibus fluere sanguis solet, aut quibus dolet spina, coxaeve, aut post cursum vehementem vel ambulationem, dum febris absit, non esse inutile sanguinis mediocre profluvium: idque per urinam redditum ipsam quoque lassitudinem solvere: ac ne in eo quidem terribile esse, qui ex superiore loco decidit; si tamen in eius urina nihil novabit; neque vomitum huius asferre periculum, etiam cum repetit, si autem confirmare et implere corpus licuit: et ex toto nullum nocere, qui in corpore robusto, neque nimius est, neque tussim aut calorem movet. Haec pertinent ad universum: nunc ad ea loca quae proposui, veniam. Si ex gingivis exit, portulacam manducasse satis est. Si ex ore, continuisse eo merum vinum: si parum id proficit, acetum: si inter haec quoque graviter erumpit, quia consumere hominem potest, commodissimum est, impetum eius, admota occipitio cucurbitula sic, ut cutis quoque incidatur, avertere: si id mulieri cui menstrua non feruntur, evenit, eandem cucurbitulam incisissimam inguinibus eius admove-
re. At si ex faucibus, interioribusve partibus processit, et metus maior est, et cura maior adhibenda. Sanguis mittendus est; et si nihilominus ex ore processit, iterum tertioque, et quotidie paulum aliquid: protinus autem debet sorbere vel acetum, vel cum thure plantaginis aut porri succum; imponendaque extrinsecus supra id quod dolet, lana succida ex aceto est, et id spongia subinde refrigerandum. Erasistratus horum crura quoque et femora brachiaque pluribus locis deligabat. Id Asclepiades, adeo non prodesse, etiam inimicum esse proposuit. Sed id saepe commode respondere experimenta testantur. Neque tamen pluribus locis deligari necesse est: sed satis est infra inguina, et super talos, summosque humeros, etiam brachia. Tum si febris urget, danda est sorbitio, et potui aqua, in qua
ali-

aliquid ex iis , quae alvum adstringunt , decoctum sit : at si abest febris , vel elota alica , vel panis ex aqua frigida , et molle quoque ovum dari potest ; potui vel idem quod supra scriptum est , vel vinum dulce , vel aqua frigida . Sed sic bibendum erit , ut sciamus huic morbo sitim prodesse . Praeter haec necessaria sunt quies , securitas , silentium . Caput huius quoque cubantis sublime esse debet ; recteque tondetur . Facies saepe aqua frigida fovenda est . At inimica sunt vinum , balneum , venus , in cibo oleum , acria omnia , item calida fomenta , conclave calidum et inclusum , multa vestimenta corpori iniecta , etiam frictiones . Vbi bene sanguis conquievit , tum vero incipiendum est a brachiis , cruribusque ; a thorace abstinendum . In hoc casu per hiemem locis maritimis ; per aestatem mediterraneis opus est .

C A P U T XII.

DE STOMACRI MORBIS .

Faucibus subest stomachus ; in quo plura longa vitia incidere consuerunt . Nam modo ingens calor , modo inflatio hunc , modo inflammatio , modo exulceratio afficit : interdum pituita , interdum bilis oritur : frequentissimumque eius malum est , quo resolvitur ; neque ulla re magis aut afficitur , aut corpus afficit . Diversa autem , ut vitia eius , sic etiam remedia sunt . Vbi exaestuat , aceto cum rosa extrinsecus subinde fovendus est ; imponendusque pulvis cum oleo , et ea cataplasmata , quae simul et reprimunt , et emolliunt . Potui , nisi quid obstat , gelida aqua praestanda . Si inflatio est , prosunt admotae cucurbitulae ; neque incidere cutem necesse est : prosunt sicca et calida fomenta , sed non vehementissima . Interponenda abstinencia est . Vtilis in

ieiuno potio est absinthii, vel hyssopi, aut rutae. Exercitatio primo lenis, deinde maior adhibenda est; maximeque quae superiores partes moveat: quod genus in omnibus stomachi vitiis aptissimum est. Post exercitationem opus est unctione, frictione; balneo quoque nonnumquam, sed rarius; interdum alvi ductione; cibis deinde calidis, neque infantibus; eodemque modo calidis potionibus, primo aquae, post, ubi resedit inflatio, vini austeri. Illud quoque in omnibus stomachi vitiis praecipendum est, ut quo modo se quisque aeger refecerit, eo sanus utatur: nam redit huic imbecillitas sua, nisi iisdem defenditur bona valetudo, quibus reddita est. At si inflammatio aliqua est, quam fere tumor et dolor sequitur, prima sunt quies, abstinentia, lana sulphurata circumdata, in ieiuno absinthium. Si ardor stomachum urget, aceto cum rosa subinde fovendus est: deinde cibus quidem utendum est modicis; imponenda vero extrinsecus quae simul et reprimunt et emolliunt: deinde his detractis, utendum calidis ex farina cataplasmatibus, quae reliquias digerant: interdum alvus ducenda: adhibenda exercitatio, et cibus plenior. At si exulceratio stomachum infestat, eadem fere facienda sunt, quae in faucibus exulceratis praecepta sunt. Exercitatio, frictio inferiorum partium adhibenda; adhibendi lenes et glutinosi cibi, sed citra satietatem; omnia acria atque acida removenda; vino, si febris non est, dulci, aut si id inflat, certe leni utendum; sed neque praefrigido, neque nimis calido. Si vero pituita stomachus impletur, necessarius modo in ieiuno, modo post cibum vomitus est: utilis exercitatio, gestatio, navigatio, frictio: nihil edendum, bibendumque, nisi calidum; vitatis tantum iis quae pituitam contrahere consueverunt. Molestius est, si stomachus bile vitiosus est. Solent autem ii qui sic tentantur, interpositis quibusdam diebus, hanc, et qui-

quidem , quod pessimum est ; atram vomere . His recte alvus ducitur : potiones ex absinthio dantur : necessaria gestatio , navigatio est ; si fieri potest , ex nausea vomitus : vitanda cruditas : sumendi cibi faciles et stomacho non alieni , vinum austerum : Vulgatissimum vero pessimumque stomachi vitium est resolutio , id est cum cibi non tenax est , soletque desinere ali corpus , ac sic tabe consumi . Huic generi inutilissimum balneum est ; lectiones , exercitationesque superioris partis necessariae ; item unctiones , frictionesque . Hic perfundi frigida , atque in eadem natare ; canalibus eiusdem subiicere et stomachum ipsum , et magis etiam a scapulis id quod contra stomachum est ; consistere in frigidis medicatisque fontibus , quales Cutiliarum Sumbriinarumque sunt , salutare est . Cibi quoque assumendi sunt frigidi , qui potius difficulter concoquuntur , quam facile vitiantur . Ergo plerique , qui nihil aliud concoquere possunt , bubulam concoquunt . Ex quo colligi potest neque avem , neque venationem , neque piscem dari debere , nisi generis durioris . Potui quidem aptissimum est vinum frigidum , vel certe bene calidum , meracum , potissimum rheticum , vel allobrogicum , aliudve , quod et austerum et resina conditum sit ; si id non est , quam asperrimum , maximeque signinum . Si cibus non continetur , danda aqua , et eliciendus plenior vomitus est , iterumque dandus cibus ; et tum admovendae duobus infra stomachum digitis cucurbitulae , ibique duabus aut tribus horis continendae sunt . Si simul et vomitus et dolor est , imponenda supra stomachum est lana sucida , vel spongia ex aceto , vel cataplasma quod refrigeret : perfricanda vero non diu , sed vehementer brachia et crura , et calefacienda . Si plus doloris est , infra praecordia quatuor digitis cucurbitula utendum est ; et protinus dandus panis ex posca frigida : si non continuit , post vomitum leve-

aliquid ex iis quae non aliena stomacho sint : si ne id quidem tenuit, singuli cyathi vini singulis interpositis horis, donec stomachus consistat. Valens, etiam medicamentum est radiculæ succus: valentius, acidi punici mali, cum pari modo succi, qui ex dulci punico malo est, adiecto etiam intubi succo, et menthae, sed huius minima parte; quibus tantumdem, quantum in his omnibus est, aquae frigidae, quam optime miscetur. Id enim plus quam vinum ad comprimendum stomachum potest. Supprimendus autem vomitus est, qui per se venit, etsi nausea est. Sed si coacuit intus cibus, aut computruit, quorum utrumlibet ructus ostendit, eiiciendus est; protinusque cibus assumptis iisdem quos proxime posui, stomachus restituendus. Vbi sublatus est praesens metus, ad ea redeundum est quae supra praecpta sunt.

CAPUT XIII.

DE LATERUM DOLORIBUS.

Stomachus lateribus cingitur; atque in his quoque vehementes dolores esse consuerunt. Et initium vel ex frigore, vel ex ictu, vel ex nimio cursu, vel ex morbo est: sed interdum malum intra dolorem est, isque modo tarde, modo celeriter solvitur; interdum ad perniciem quoque procedit, oriturque acutus morbus, qui πλωριτικός a Graecis nominatur. Huic dolori lateris febris et tussis accedit: et per hanc exscreatur, si tolerabilis morbus est, pituita; si gravis, sanguis. Interdum etiam sicca tussis est, quae nihil emolitur: idque primo vitio gravius, secundo tolerabilius est. Remedium vero est magni et recentis doloris, sanguis missus. At sive levior, sive vetustior casus est, vel supervacuum, vel serum id auxilium est; confugiendumque ad cucurbitulas est,

est, ante summam cute incisa. Recte etiam sinapi ex aceto super pectus imponitur, donec ulcera pustulasque excitet; et tum medicamentum, quod humorem illuc citet. Praeter haec circumdare primum oportet latus hapso lauae sulphuratae: deinde cum paulum inflammatio se remisit, siccis et calidis fomentis uti. Ab his transitus ad malagmata est. Si vetustior dolor remanet, novissime resina imposita discutitur. Utendum cibus potionibusque calidis; vitandum frigus: inter haec tamen non alienum est extremas partes oleo et sulphure perfricare. Si levata tussis est, leni lectione uti; iamque et acres cibos, et vinum meracius assumere. Quae ita a medicis praecipiuntur, ut tamen sine his rusticos nostros epota ex aqua herba trixago satis adiuvet. Haec in omni lateris dolore communia sunt: plus negotii est, si acutus quoque morbus is factus est. In hoc praeter ea, quae supra posita sunt, haec animadvertenda sunt: ut cibus sit quam maxime tenuis et lenis, praecipueque sorbitio, eaque ex ptisana potissimum; aut ius in quo porrus cum pullo gallinaceo coctus sit; idque non nisi tertio quoque die detur, si tamen per vires licebit: potui vero aqua mulsae, in qua hyssopum, aut ruta decocta sit. Quae quibus temporibus dauda sint, ex ratione vel adiectae, vel levatae febris apparebit, sic ut in remissione quam maxima dentur: cum eo tamen, ut sciamus non esse eius generis tussi aridas fauces committendas: saepe enim, ubi nihil est quod excreetur, continuatur, et strangulat. Ob quam causam dixi etiam peius id genus esse tussis, quod nihil, quam quod pituitam moveret. Sed hic vinum sorbere, ut supra praecepimus, morbus ipse non patitur: in vicem eius cremor ptisanæ sumendus est. Ut his autem in ipso morbi fervore sustinendus aeger est, sic ubi paulum is se remisit, alimenta pleniora, et vini quoque aliquid dari potest:

dum nihil detur, quod aut refrigeret corpus, aut fauces asperet. Si in refectione quoque manserit tussis, intermittere oportebit uno die: posteroque cum cibo vini paulo plus assumere. Atque incipiente quoque tussi, tum non erit alienum, ut supra quoque positum est, vini cyathos sorbere; sed in hoc genere valetudinis dulce, vel certe lene commodius est. Si malum inveteravit, athletico victu corpus firmandum est.

C A P U T XIV.

DE VISCERUM MORBIS, ET PRIMO DE PULMONE.

A compagine corporis ad viscera transeundum est; et in primis ad pulmonem veniendum; ex quo vehemens et acutus morbus oritur, quem *πνευμονι-
κός* Graeci vocant. Eius haec conditio est: pulmo totus afficitur: hunc casum eius subsequitur tussis, bilem vel pus trahens, praecordiorum totiusque pectoris gravitas, spiritus difficultas, magnae febres, continua vigilia, cibi fastidium, tabes. Id genus morbi plus periculi quam doloris habet. Oportet, si satis validae vires sunt, sanguinem mittere: si minores, cucurbitulas sine ferro praecordiis admove-
vere. Tum, si satis valet, gestando aegrum, digerere: si parum, intra domum tamen dimovere. Potionem autem hyssopi dare, cum quo ficus arida sit incocta; aut aquam mulsam, in qua vel hyssopum vel ruta decocta sit: frictione uti diutissime in scapulis, proxime ab his in brachiis et pedibus et cruribus, leniter contra pulmonem; idque bis quotidie facere. Quod ad cibum vero pertinet, huic nec salsis opus est, neque acribus, neque amaris, neque alvum adstringentibus, sed paulo lenioribus. Ergo primis diebus danda est sorbitio ptisanæ, vel alicac, vel oryzac, cum qua recens adeps cocta sit:
cum

cum hac sorbibile ovum , nuclei pinei ex melle , panis vel elota alica ex aqua mulsa: potui deinde non solum pura aqua , sed etiam mulsa egelida , aut si aestas est , etiam frigida ; nisi quid obstat . Haec autem altero quoque die , increscente morbo , dare satis est : ubi in incremento constitit , quantum res patitur , ab omnibus abstinendum est , praeterquam aqua egelida . Si vires desunt , adjuvandae sunt aqua mulsa . Prosuntque adversus dolores imposita calida fomenta , vel ea quae simul et reprimunt et emolliunt : prodest impositus super pectus sal bene contritus , cum cerato mixtus ; quia leviter cutem erodit , eoque impetum materiae , quo pulmo vexatur , evocat . Utile etiam aliquod malagma est . ex iis quae materiam trahunt . Neque alienum est , dum premit morbus , clausis fenestris aegrum continere : ubi paulum levatus est , ter aut quater die , fenestris aliquantum apertis , purum aërem recipere . Deinde in refectione pluribus diebus a vino abstinere ; gestatione , frictione uti ; sorbitionibus et prioribus cibis adiicere , ex oleribus porrum , ex carne ungulas et summa trunculorum atque pisciculos sic , ut diu nihil nisi molle et lene sumatur .

C A P U T X V .

DE HEPATICIS .

Alterius quoque visceris morbus , id est iecinoris , aequè modo longus , modo acutus esse consuevit : *ἥπατις* Graeci vocant . Dextra parte sub praecordiis vehemens dolor est ; idemque ad latus dextrum , et ad iugulum , humerumque partis eiusdem pervenit : nonnumquam manus quoque dextra torquetur : horror validus est : ubi male est , bilis evomitur : interdum singultus prope strangulat . Et haec quidem acuti morbi sunt : longioris vero , ubi suppura-
tio

tio in iecinore est, dolorque modo finitur, modo intenditur; dextra parte praecordia dura sunt, et tument; post cibum maior spiritus difficultas est; accedit maxillarum quaedam resolutio. Vbi inveteravit malum, venter et crura pedesque intumescunt; pectus atque humeri, circaque iugulum utrumque extenuatur. Initio sanguinem mittere optimum est: tum venter solvendus est, si non potest aliter, per nigrum veratrum: imponenda extrinsecus cataplasmata, primum quae reprimant, deinde calida quae diducant; quibus recte iris vel absinthium adicitur: post haec, malagma. Dandae vero sorbitiones sunt omnesque cibi et calidi, et qui non multum alunt, et fere qui pulmonis quoque dolori conveniunt; praeterque eos, qui urinam movent, potionesque ad id efficaces. Vtilia in hoc morbo sunt thynum, satureia, hyssopum, nepeta, amyllum, sesamum, lauri baccae, pini flos, herba sanguinalis, mentha, ex malo cotoneo medium, columbae iecur recens et crudum: ex quibus quaedam per se esse, quaedam adicere vel sorbitioni vel potioni licet; sic tamen, ut parce assumantur. Neque alienum est, absinthium contritum ex melle et pipere, eiusque catapotium quotidie devorare. Abstinendum utique est ab omnibus frigidis: neque enim res ulla magis iecur laedit. Frictionibus utendum in extremis partibus: vitandus omnis labor, omnis vehementior motus: ne spiritus quidem diutius continendus est. Ira, trepidatio, pondus, iatus, cursus inimici sunt. Perfusio corporis multa prodest ex aqua; si hiems est, calida; si aestas, tepida: item liberalis unctio et in balneo sudor. Si vero iecur vomica laborat, eadem facienda sunt quae in ceteris interioribus supurationibus. Quidam etiam contra id scalpello aperiunt, et ipsam vomicam adurant.

C A P U T XVI.

DE LIENOSIS .

At lienis ubi affectus est, intumescit, simulque cum eo pars sinistra, eaque dura est, et prementi renititur: venter intentus est: aliquis etiam in cruribus tumor est: ulcera aut omnino non sanescunt, aut certe cicatricem vix recipiunt; in intenta ambulatione, cursuque dolor, et quaedam difficultas est. Hoc vitium quies auget: itaque exercitatione et labore, opus est; habita tamen ratione, ne febrem ista, si nimium processerint, excitent. Vnctiones, frictionesque, et sudores necessarii sunt. Dulcia omnia inimica sunt; item lac et cascus: acida autem maxime conveniunt. Ergo acetum acre per se sorbere et magis etiam quod scilla conditum est, expedit. Edenda sunt salsamenta, vel oleae ex muria dura, tinctae in aceto lactucae, intubique ex eodem, betae, ex sinapi, asparagus, armoracia, pastinaca, ungulae, rostra, aves macrae, eiusdem generis venatio. Potui vero ieiuno dari debet absinthium incoctum: at post cibum aqua a ferrario fabro, in qua candens ferrum subinde tinctum sit: haec enim vel praecipue lienem coercet. Quod animadversum est in iis animalibus, quae apud hos fabros educata exiguos lienes habent. Potest etiam dari vinum tenue, austerum; omniaque in cibis et potionibus quae urinae movendae sunt. Praecipueque ad id valet vel trifolii semen, vel cuminum, vel apium; vel serpyllum, vel cytissus, vel portulaca, vel nepeta, vel thymum, vel hyssopum, vel satureia: haec enim inde commodissime videntur humorem educere. Lienis quoque bubulus utiliter esui datur: praecipueque eruca et nasturtium lienem extenuant. Imponenda quoque extrinsecus sunt, quae levant.

Fit

Fit ex unguento et palmulis, quod *μυροβάλανον* Graeci vocant: fit ex lini et nasturtii semine, quo vinum et oleum adicitur: fit ex cupresso viridi, et arida ficu: fit ex sinapi, cui sevi hircini a renibus quarta pars ponderis adicitur, teriturque in sole, et protinus imponitur. Multisque modis huic rei capparum aptum est: nam et ipsum cum cibo assumere, et muriam eius cum aceto sorbere commodum est. Quin etiam extrinsecus radicem contritam, vel corticem eius cum surfuribus, aut ipsum capparum cum melle contritum imponere expedit. Malagmata quoque huic rei aptantur.

CAPUT XVII.

DE RENUM MORBIS.

At renes ubi affecti sunt, diu male habent. Perius est, si frequens biliosus vomitus accedit. Oportet conquiescere: cubare molliter: solvere alvum; si aliter non respondet, etiam ducere: saepe desiderare in aqua calida: neque cibum neque potionem frigidam assumere: abstinere ab omnibus salsis, acribus, acidis, pomis: libere liberaliter: adicere modo cibo, modo potioni piper, porrum, ferulam, album papaver, quae maxime inde urinam movere consueverunt. Auxilio quoque his exulceratis sunt, si adhuc ulcera purganda sunt, cucumeris semina detractis corticibus sexaginta, nuclei ex pinu silvestri duodecim, anisi quod tribus digitis sumi possit, croci paulum, contrita et in duas mulsi potiones divisa. Si vero dolor tantum levandus est, eiusdem cucumeris semina triginta, iidem nuclei viginti, nuces graecae quinque, croci paululum, contrita et cum lacte potui data. Ac super quoque recte quaedam malagmata iniiciuntur; maximeque ea quae humori extrahendo sunt.

C A P U T XVIII.

DE INTESTINORUM MORBIS: ET PRIMO DE CHOLERA.

A visceribus ad intestina veniendum est; quae sunt et acutis et longis morbis obnoxia. Primoque facienda mentio est cholerae; quia commune id stomachi atque intestinorum vitium videri potest. Nam simul et deiectio et vomitus est: praeterque haec inflatio est, intestina torquentur, bilis supra infraque erumpit, primum aquae similis, deinde ut in ea recens caro lota esse videatur, interdum alba, nonnumquam nigra, vel varia. Ergo eo nomine morbum hunc *χολέραν* Graeci nominarunt. Praeter ea vero quae supra comprehensa sunt, saepe etiam crura manusque contrahuntur, urget sitis, anima deficit: quibus concurrentibus non mirum est, si subito quis moritur. Neque tamen ulli morbo minori momento succurritur. Protinus ergo ubi ista coeperunt, aquae tepidae quam plurimum bibere oportet, et vomere. Vix unquam sic non vomitus sequitur; sed etiamsi non incidit, miscuisse tamen novam materiam corruptae prodest; parsque sanitatis est, vomitum esse suppressum. Si id incidit, protinus ab omni potione abstinendum est. Si vero tormina sunt, oportet frigidis et humidis fomentis stomachum fovere; vel si venter dolet, iisdem egelidis sic, ut venter ipse mediocriter calentibus iuветur. Quod si vehementer et vomitus, et deiectio, et sitis vexant, et adhuc subcruda sunt quae vomuntur, nondum vino maturum tempus est: aqua, neque ea ipsa frigida, sed potius egelida danda est: admovendumque naribus est pulegium ex aceto, vel polenta vino aspersa, vel menta secundum naturam est. At cum discussa cruditas est, tum magis verendum est, ne anima deficiat. Ergo tum confugiendum est ad vinum. Id

toti ventri imponere, ut dolorem leniant: post cibum vomere, atque ita ventrem exinanire: proximis deinde diebus cucurbitulas sine ferro ventri et coxis admovere: ventrem ipsum liquare dato lacte, et vino salso frigido; si tempus anni patitur, etiam viridibus ficis: sic tamen, ne quis aut cibus, aut humor universus detur, sed paulatim. Ergo per intervalla temporis sat est cyathos binos ternosve sumere, et cibum pro portione huius: commodeque facit cyatho lactis cyathus aquae mixtus, et sic datus: cibique inflantes et acres utiliores sunt; adeo ut lacti quoque recte contritum allium adiiciatur. Procedente vero tempore, opus est gestari; maximeque navigare; perfricari ter aut quater die sic, ut nitrum oleo adiiciatur; perfundi aqua calida post cibum; deinde sinapi imponere per omnia membra, excepto capite, donec arrostantur et rubeant; maximeque si corpus durum et virile est: paulatim deinde faciendus est transitus ad ea quae ventrem comprimunt. Assa caro danda, valens, et quae non facile corrumpatur; potui vero pluvialis aqua decocta, sed quae per binos ternosve cyathos bibatur. Si vetus vitium est, oportet laser quam optimum ad piperis magnitudinem devorare: altero quoque die vinum vel aquam bibere: interdum interposito cibo singulos vini cyathos sorbere: ex inferiori parte infundere pluviatilem egelidam aquam, maximeque si dolor in imis partibus remanet.

C A P U T XX.

DE TENUIORIS INTESTINI MORBO.

Intra ipsa vero intestina consistunt duo morbi, quorum alter in tenuiore, alter in pleniore est: Prior acutus est; insequens esse longus potest. Dioscorides Carystius tenuioris intestini morbum *χρόδαλον*, p'le-

plenioris εἰλεόν nominavit . A plerisque video nunc illum priorem εἰλεόν , hunc κολικόν nominari . Sed prior modo supra umbilicum , modo sub umbilico dolorem movet . Fit alterutro loco inflammatio : nec alvus , nec spiritus infra transmittitur : si superior pars affecta est , cibus si inferior , stercus per os redditur : si utrumlibet vetus est . Adicit periculo vomitus biliosus , mali odoris , aut varius , aut niger . Remedium est sanguinem mittere ; vel cucurbitulas pluribus locis admove , non ubique cute incisa : id enim duobus aut tribus locis satis est ex ceteris spiritum evocare abunde est . Tum animadvertere oportet , quo loco malum sit : solet enim contra id tumere . Et si supra umbilicum est , alvi ductio utilis non est : si infra est , alvum ducere , ut Erasistrato placuit , optimum est ; et saepe id auxilii satis est . Ducitur autem percolato ptisanæ cremore cum oleo et melle sic , ut praeterea nihil adiciatur . Si nihil tumet , duas manus imponere oportet supra summum ventrem , paulatimque deducere : inveniatur enim mali locus , qui necesse est remittatur ; et ex eo deliberari poterit , ducenda , nec ne alvus sit . Illa communia sunt : calida cataplasmata admove , eaque imponere a mammis usque ad inguina et spinam , ac saepe mutare : brachia cruraque perfricare : demittere totum hominem in calidum oleum : si dolor non quiescit , etiam in alvum ex parte inferiore tres aut quatuor cyathos calidi olei dare . Vbi per haec consecuti sumus , ut iam ex inferiore parte spiritus transmittatur , offerre potui mulsum tepidum non multum : nam ante magna cura vitandum est , ne quid bibat . Si id commode cessit , adicere sorbitionem . Vbi dolor et febricula quierunt , tum demum uti cibo plenioræ ; sed neque inflante , neque duro , neque valido , ne intestina adhuc imbecilla laedantur . Potui vero nihil , praeterquam puram aquam . Nam sive quid vi-

nolentum , sive acidum est , id huic morbo alienum est . Ac postea quoque vitare oportet balneum , ambulationem , gestationem , ceterosque corporis motus . Nam facile id malum redire consuevit ; et sive frigus subit , sive aliqua iactatio , nisi bene iam confirmatis intestinis , revertitur .

C A P U T XXI.

DE MORBO INTESTINI PLENIORIS .

Is autem morbus qui in intestino pleniore est , in ea maxime parte est , quam caecam esse proposui . Vehemens sit inflatio , vehementes dolores , dextra magis parte : intestinum quod verti videtur , prope spiritum elidit . In plerisque post frigora cruditatesque oritur , deinde quiescit ; et per actatem saepe repetens sic cruciat , ut vitae spatio nihil demat . Vbi is dolor coepit , admoveere sicca et calida fomenta oportet ; sed primo lenia , deinde validiora ; simulque frictione ad extremas partes , id est crura brachiaque materiam evocare : si discussus non est , qua dolet , cucurbitulas sine ferro defigere . Est etiam medicamentum eius rei causa comparatum , quod *κολικόν* nominatur . Id se reperisse Cassius gloriabatur . Magis prodest potui datum : sed impositum quoque extrinsecus , digerendo spiritum , dolorem levat . Nisi finito vero tormento , recte neque cibus , neque potio assumitur . Quo victu sit utendum iis qui hoc genere tentantur , iam mihi dictum est .

C A P U T XXII.

DE TORMINIBUS .

Proxima his inter intestinorum mala tormina esse consueverunt : *δυσεντερία* Graece vocatur . Intus in-

Cels. T. I.

M

te-

testina exulcerantur : ex his cruor manat ; isque modo cum stercore aliquo semper liquido , modo cum quibusdam quasi mucosis excernitur : interdum simul quaedam carnosa descendunt : frequens deieciendi cupiditas , dolorque in ano est : cum eodem dolore exiguum aliquid emittitur : atque eo quoque tormentum intenditur : idque post tempus aliquod levatur ; exiguaeque requies est : somnus interpellatur : febricula oritur : longoque tempore id malum , cum inveteraverit , aut tollit hominem , aut , etiamsi finitur , excruciat . Oportet in primis conquiescere ; siquidem omnis agitatio exulcerat : deinde ieiunium sorbere vini cyathum cui contrita radix quinquesolii sit adiecta : imponere cataplasmata super ventrem quae reprimant ; quod in superioribus ventris morbis non expedit : quotiesque desedit , subluere aqua calida , in qua decoctae verbenae sint : portulacem vel coctam , vel ex dura muria edisse ; cibos potionesque eas quae adstringunt alvum . Si vetustior morbus est , ex inferioribus partibus tepidum infundere vel ptisanæ cremorem , vel lac , vel adipem liquatam , vel medullam cervinam , vel oleum , vel cum rosa butyrum , vel cum eadem album crudum ex ovis , vel aquam in qua lini semen decoctum sit ; vel , si somnus non accedit , vitellos cum aqua in qua rosae floris folia cocta sint . Levant enim dolorem haec , et mitiora ulcera efficiunt ; maximeque utilia sunt , si cibi quoque secutum fastidium est . Themison muria dura quam asperrima sic utendum memoriae prodidit . Cibi vero esse debent , qui leniter ventrem adstringant . At ea quae urinam movent , si id consecuta sunt , in aliam partem humorem avertendo , prosunt ; si non sunt consecuta , noxam augent : itaque nisi in quibus prompte id facere consuerunt , non sunt adhibenda . Potui , si febricula est , aqua pura calida , vel ea quae ipsa quoque adstringat , dari debet : si non est , vinum
le-

leve, austerum. Si pluribus diebus nihil remedia alia iuverunt; vetusque iam vitium est, aquae bene frigidae potio assumpta ulcera adstringit, et initium secundae valetudinis facit. Sed ubi venter suppressus est, protinus ad calidam potionem revertendum est. Solet autem interdum etiam putris sanies, pessimique odoris descendere: solet purus sanguis profluere. Si superius vitium est, alvus aqua multa duci debet; tum deinde eadem infundi quae supra comprehensa sunt. Valensque est etiam adversus cancerem intestinorum minii gleba cum salis hemina contrita, si mixta his aqua in alvum datur. At si sanguis profluit, cibi potionesque esse debent, quae adstringant.

C A P U T XXIII.

DE LAEVITATE INTESTINORUM.

Ex torminibus interdum intestinorum laevis oritur; qua continere nihil possunt, et quidquid assumptum est, imperfectum protinus reddunt. Id interdum aegros trahit, interdum praecipitat. In hoc utique adhibere oportet comprimentia, quo facilius tenendi aliquid intestinis vis sit. Ergo et super pectus ponatur sinapi, exulcerataque cute, malagma quod humorem evocet: et ex verbenis decocta in aqua desideat: et cibos potionesque assumat, quae alvum adstringant: et frigidis utatur perfusionibus. Oportet tamen prospicere, ne simul his omnibus admotis vitium contrarium per immodicas inflationes oriatur. Paulatim ergo firmari intestina debebunt, aliquibus quotidie adiectis. Et cum in omni fluore ventris, tum in hoc praecipue necessarium est, non quoties libet desiacre, sed quoties necesse est; ut haec ipsa mora in consuetudinem ferendi oneris intestina deducat. Alterum quoque

quod aequè ad omnes similes affectus pertinet, in hoc maxime servandum est; ut cum pleraque utilia insuavia sint, qualis est plantago et rubi et quidquid malicorio mixtum est, ea potissimum ex his dentur, quae maxime aeger volet: deinde, si omnia ista fastidiet, ad excitandam cibi cupiditatem, interponatur aliquid minus utile, sed magis gratum. Exercitationes et frictiones huic quoque morbo necessariae sunt; et cum his sol; ignis, balneum, vomitus, ut Hippocrati visum est, etiam albo veratro, si cetera parum proficiunt, evocatus.

C A P U T XXIV.

DE LUMBRICIS ALVUM OCCUPANTIBUS.

Nonnumquam autem lumbrici quoque occupant alvum; huius modo ex inferioribus partibus, modo foedius ore redduntur: atque interdum latos eos, qui peiores sunt, interdum teretes videmus. Si lati sunt, aqua potui dari debet, in qua lupinum, aut cortex mori decoctus sit; aut cui adiectum sit contritum vel hyssopum, vel piperis acetabulum, vel scammoniae paulum. Vel etiam pridie, cum multum allium ederit, vomat: posteroque die mali punici tenues radículas colligat, quantum manu comprehendet; eas contusas in aquae tribus sextariis decoquat, donec tertia pars supersit; huc adiciat natri paulum, et ieunus bibat. Interpositis deinde tribus horis, duas potiones sumat. At aquae, vel muriae durae sit adiecta: tum desideat subiecta calida aqua in pelve. Si vero teretes sunt, qui pueros maxime exercent; et eadem dari possunt, et quaedam leviora; ut contritum semen urticae, aut brassicae, aut cumini cum aqua, vel mentha cum eadem, vel absinthium decoctum, vel hyssopum ex aqua mulsa, vel nasturtii semen cum aceto contritum.

tum . Edisse etiam et lupinum , et allium prodest ;
vel in alvum oleum subter dedisse .

C A P U T XXV .

DE TENESMO .

Est autem aliud levius omnibus proximis , de quibus supra dictum est , quod *τενέσμων* Graeci vocant . Id neque acutis , neque longis morbis adnumerari debet ; cum et facile tollatur , neque umquam perse iugulet . In hoc aequae atque in torminibus frequens desidendi cupiditas est ; aequae dolor , ubi aliquid excernitur . Descendunt autem pituitae mucis-que similia ; interdum etiam leviter subruenta : sed his interponuntur nonnumquam ex cibo quoque recte coacta . Desidere oportet in aqua calda ; saepiusque ipsum animum nutrire ; cui plura medicamenta idonea sunt : butyrum cum rosa ; acacia ex aceto liquata ; emplastrum id , quod *τετραδάμανον* Graeci vocant , rosa liquatum ; alumen lana circumdatum , et ita appositum ; eademque ex inferiore parte indita , quae torminum auxilia sunt ; eadem verbenae decoctae , ut inferiores partes foveantur . Alternis vero diebus aqua , alternis leve et ansterum vinum bibendum est . Potio esse debet egelida et frigidae propior ; ratio victus talis , qualem in torminibus supra praecepimus .

C A P U T XXVI .

DE VENTRIS FLUXU .

Levior etiam , dum recens , deiectio est ; ubi et liquida alvus , et saepius quam ex consuetudine fertur : atque interdum tolerabilis dolor est , interdum gravissimus ; idque peius est . Sed uno die fluere alvum saepe pro valetudine est ; atque etiam pluribus ,

bus, dum febris absit, et intra septimum diem id conquiescat. Purgatur enim corpus, et quod intus laesurum erat, utiliter effunditur. Verum spatium periculosum est: interdum enim tormina ac febriculas excitat, viresque consumit. Primo die quiescere satis est; neque impetum ventris prohibere. Si per se desiit, balneum uti, paulum cibi capere: si mansit, abstinere non solum a cibo, sed etiam a potione. Postero die, si nihilominus liquida alvus est, aequè conquiescere; paulum adstringentis cibi sumere. Tertio die in balneum ire; vehementer omnia praeter ventrem perfricare: ad ignem lumbos, scapulasque admove: cibis uti, sed ventrem contrahentibus; vino non multo, meraco. Si postero quoque die fluet, plus edisse, sed vomere. Et ex toto, donec conquiescat, contra siti, fame, vomitu niti. Vix enim fieri potest, ut, post hanc animadversionem, alvus non contrahatur. Alia via est, ubi velis suppressere: coenare, deinde vomere: postero die in lecto conquiescere; vespere ungi, sed leniter: deinde panis circa selibram ex vino amineo mero sumere; tum assum aliquid, maximeque avem; et postea vinum idem bibere aqua pluviali mistum: idque usque quintum diem facere, iterumque vomere. Frigidam autem assidue potionem esse debere, contra priores auctores Asclepiades affirmavit, et quidem quam frigidissimam. Ego experimentis quemque in se credere debere existimo, calida potius, an frigida utatur. Interdum autem evenit, ut id pluribus diebus neglectum, curari difficilius possit. A vomitu oportet incipere: deinde postero die vespere tepido loco ungi; cibum modicum assumere, vinum meracum quam asperri-
mum; impositam super ventrem habere cum cerato rutam. In hoc autem affectu corporis neque ambulatione, neque frictione opus est: vehiculo sedisse, vel magis etiam equo prodest: neque enim ulla

res magis intestina confirmat. Si vero etiam medicamentis utendum est, aptissimum est id, quod ex pomis fit. Vindemiae tempore in grande vas coniicienda sunt pira atque mala silvestria: si ea non sunt, pira tarentina viridia, vel signina, mala scandiana vel amerina, myrapia; hisque adicienda sunt cotonea, et cum ipsis corticibus suis punica, sorba, et quibus magis utimur, et torminalia, sic, ut haec tertiam ollae partem teneant: tum deinde ea musto implenda est; coquendumque id, donec omnia, quae indita sunt, liquata, in unitatem quamdam coeant. Id gustui non insuave est; et, quandocumque opus est, assumptum leniter, sine ulla stomachi noxa, ventrem tenet. Duo aut tria cochlearia uno die sumpsisse, satis est. Alterum valentius genus: myrti baccas legere, ex his vinum exprimere, id decoquere, ut decima pars remaneat, cuiusque cyathum sorbere. Tertium, quod quandocumque fieri potest: malum Punicum excavare, exemptisque omnibus seminibus, membranas, quae inter ea fuerunt, iterum coniicere: tum infundere cruda ova, rudiculaque miscere: deinde malum ipsum super prunam imponere: quod, dum humor intus est, non aduritur: ubi siccum esse coepit, remove oportet, extractumque cochleari, quod intus est, edisse. Aliquibus adiectis, maius momentum habet: itaque etiam in piperatum coniicitur, misceturque cum sale et pipere, atque ex his edendum est. Pulticula etiam, cum qua paulum ex favo vetere coctum sit, et lenticula cum malicorio cocta, rubique cacumina in aqua decocta, et ex oleo atque aceto assumpta, assicacia sunt: atque ea aqua, in qua vel palmulae, vel malum cotoneum, vel arida sorba, vel rubi decocti sint, potata: quod genus significo, quoties potionem dandam esse dico, quae adstringat. Tritici quoque hemina in vino aminco austero decoquitur; idque triticum ieiuno

ac sitiēti datur; superque id vinum id sorbetur: quod iure valentissimis medicamentis adnumerari potest. Atque etiam potui datur vinum signinum, vel resinatum austum, vel quodlibet austum. Contunditurque cum corticibus, seminibusque suis punicum malum, vinoque tali miscetur: idque vel merum sorbet aliquis, vel bibit mistum. Sed medicamenti uti, nisi in vehementibus malis, supervacuum est.

C A P U T XXVII.

DE ULVAE MORBO.

1. **E**x vulva quoque foeminis vehemens malum nascitur: proximeque ab stomacho, vel afficitur haec, vel corpus afficit. Interdum etiam sic exanimat, ut tamquam conitiali morbo prosternat. Distat tamen hic casus, eo quod neque oculi vertuntur, nec spumae profluunt, nec nervi distenduntur: sopor tantum est. Idque quibusdam foeminis crebro revertens perpetuum fit. Vbi incidit, si satis virium est, sanguis missus adiuvat: si parum est, cucurbitulae tamen defigendae sunt in *inguinibus*. Si diutius aut iacet aut alioqui iacere consuevit, admovere oportet naribus extinctum ex lucerna luamentum, vel aliud ex iis, quae foedioris esse odoris retuli, quod mulierem excitet. Idemque aquae frigidae perfusio efficit. Adiuvatque ruta contrita cum melle, vel ex cyprino ceratum, vel quodlibet calidum et humidum cataplasma, naturalibus pube tenus impositum. Inter haec etiam perficere coxas, et poplites oportet. Deinde, ubi ad se rediit, circumcidendum vinum est in totum annum, etiamsi casus idem non revertitur: frictione quotidie utendum totius quidem corporis, praecipue vero ventris, et poplitum: cibus ex media materia dandus: sina-
pi

pi super imum ventrem tertio quoque aut quarto die imponendum , donec corpus rubeat . Si durities manet , mollire commodè videtur solanum in lac demissum , deinde contritum ; et cera alba atque medulla cervina cum irino , aut seyum taurinum vel caprinum cum rosa mistum . Dandum etiam potui vel castoreum est , vel git , vel anethum . Si parum pura est , purgetur iunco quadrato . Si vero vulva exulcerata est , ceratum ex rosa fiat , et recens suilla adeps , et ex ovis album misceatur , idque apponatur ; vel album ex ovo cum rosa mistum , adiecto , quo facilius consistat , contritae rosae pulvere . Dolens vero ea sulphure suffumigari debet . At si purgatio nimia mulieri nocet , remedio sunt cucurbitulae , cute incisa , inguinibus vel etiam sub mammis admotae . Si maligna purgatio est , subiicienda sunt coëuntia . Id faciunt etiam albae olivae , et nigrum papaver cum melle assumptum , et gummi cum trito semine apii liquatum , et cum cyatho passi datum . Praeter haec , in omnibus vesicae doloribus idoneae potiones sunt , quae ex odoribus fiunt , id est spica nardi , croco , cinnamo , casia , similibusque : idemque etiam decocta lentiscus praestat . Si tamen intolerabilis dolor est , et sanguis profluit , etiam sanguinis detractio apta est ; aut certe coxis admotae cucurbitulae cute incisa .

De urinae nimia profusione .

2. At cum urina super potionum modum etiam sine dolore profluens maciem et periculum facit , si tenuis est , opus est exercitatione et frictione , maximeque in sole , vel ad ignem : balneum rarum esse debet , neque longa in eo mora : cibus comprimens : vinum austerum meracum , per aestatem , frigidum , per hiemem , egelidum ; sed tantum , quantum minimum sit . Alvus quoque vel ducenda , vel lacte purganda est .

est. Si crassa urina est, vehementior esse debet et exercitatio, et frictio: longior in balneo mora: cibus opus est teneris: vino eodem. In utroque morbo vitanda omnia sunt, quae urinam movere consuerunt.

CAPUT XXVIII.

DE SEMINIS NIMIA EX NATURALIBUS PROFUSIONE.

Est etiam circa naturalia vitium, nimia profusio seminis, quod sine venere, sine nocturnis imaginibus sic fertur, ut, interposito spatio, tabe hominem consumat. In hoc affectu salutare sunt vehementes frictiones, perfusiones, natationesque quam frigidissimae: neque cibi, nec potio, nisi frigida assumpta. Vitare autem oportet cruditates, et omnia instantia: nihil ex iis assumere, quae contrahere semen videntur; qualia sunt, siligo, simila, ova, alica, amyllum, omnis caro glutinosa, piper, eruca, bulbi, nuclei pinci. Neque alienum est, fovere inferiores partes aqua decocta ex verbenis compimentibus: ex iisdem aliqua cataplasmata imo ventri inguinibusque circumdare; praecipueque ex aceto rutam: vitare etiam ne supinus obdormiat.

CAPUT XXIX.

DE COXARUM MORBIS.

Superest, ut ad extremas partes corporis veniam, quae articulis inter se conseruntur. Initium a coxis faciam. Harum ingens dolor esse consuevit: isque hominem saepe debilitat, et quosdam non dimittit. Eoque id genus difficillime curatur, quod fere post longos morbos vis pestifera huc se inclinat: quae ut alias partes liberat, sic hanc iam ipsam quoque affectam prehendit. Fovendum primum aqua calida
est:

est: deinde utendum calidis cataplasmatibus. Maxime prodesse videtur, aut cum hordeacea farina, aut cum ficu ex aqua decocta mistus capparis cortex concisus, vel lolii farina ex vino diluto cocta, et mista cum arida faece: quae quia refrigescunt, imponere noctu malagmata commodius est. Inulae quoque radix contusa, et ex vino austero postea cocta, et late super coxam imposita, inter valentissima auxilia est. Si ista non solverunt, sale calido et humido utendum est. Si ne sic quidem finitus dolor est, aut tumor ei accedit, incisa cute admovendae sunt cucurbitulae; movenda urina; alvus, si compressa est, ducenda. Ultimum est, et in veteribus quoque morbis efficacissimum, tribus aut quatuor locis super coxam, cutem candentibus ferramentis exulcerare. Sed frictione quoque utendum est, maxime in sole, et eodem die saepius; quo facillius ea, quae coeundo nocuerunt, digerantur: eaque, si nulla exulceratio est, etiam ipsis coxis; si est, ceteris partibus adhibenda est. Cum vero saepe aliquid exulcerandum candenti ferramento sit, ut materia inutilis evocetur, illud perpetuum est, non, ut primum fieri potest, huius generis ulcera sanare; sed ea trahere, donec id vitium cui per haec opitulamur, conquiescat.

C A P U T XXX.

DE GENUUM DOLORE.

Coxis proxima genua sunt; in quibus ipsis nonnumquam dolor esse consuevit: In iisdem autem cataplasmatibus cucurbitulisque praesidium est: sicut etiam, cum in humeris, aliisque commissuris dolor aliquis exortus est. Equitare ei, cui genua dolent, inimicissimum omnium est. Omnes autem eiusmodi dolores, ubi inveteraverunt, vix citra ustionem finiuntur.

CA.

CAPUT XXXI.

DE MANUUM ET PEDUM ARTICULORUMQUE VITIIS.

In manibus pedibusque articulorum vitia frequentiora longioraque sunt; quae in podagris chiragrisve esse consuerunt. Ea raro vel castratos, vel pueros ante foeminae coitum, vel mulieres, nisi quibus menstrua suppressa sunt, tentant. Vbi sentiri coeperunt sanguis mittendus est: id enim inter initia statim factum, saepe annuam, nonnumquam perpetuam valetudinem bonam praestat. Quidam etiam, cum asinino lacte epoto sese eluissent, in perpetuum hoc malum evaserunt. Quidam cum toto anno a viuo, mulso, venere sibi temperassent, securitatem totius vitae consecuti sunt. Idque utique post primum dolorem servandum est, etiamsi quievit. Quod si iam consuetudo eius facta est, potest quidem aliquis esse securior iis temporibus, quibus dolor se remisit: maiorem vero curam adhibere debet iis, quibus id revertitur; quod fere vere autumnove fieri solet. Cum vero dolor urget, mané gestari debet; deinde ferri, in ambulationem ibi se dimovere et, si podagra est, interpositis temporibus exiguis, invicem modo sedere, modo ingredi; tum antequam cibum capiat, sine balneo loco calido leniter perfricari, sudare, perfundi aqua egelida; deinde cibum sumere ex media materia, interpositis rebus urinam moventibus; quotiesque plenior est, evomere. Vbi dolor vehemens urget, interest, sine tumore is sit, an tumor cum calore, an tumor iam etiam obcaluerit. Nam si tumor nullus est, calidis fomentis opus est. Aquam marinam, vel muriam duram servescere oportet, deinde in pelvem conicere, et, cum iam homo pati potest, pedes demittere, superque pallam dare, et vestimento tegere; paulatim dein-

deinde iuxta labrum ipsum ex eadem aqua leniter infundere, ne calor intus destituat; ac deinde noctu cataplasmata calefacientia imponere maximeque hibisci radicem ex vino coctam. Si vero tumor calorque est, utiliora sunt refrigerantia; recteque in aqua quam frigidissima articuli continentur; sed neque quotidie, neque diu, ne nervi indurescant. Imponendum vero est cataplasma, quod refrigeret: neque tamen in hoc ipso diu permanendum; sed ad ea transeundum, quae sic reprimunt, ut emolliant. Si maior est dolor, papaveris cortices in vino coquendi, miscendique cum cerato sunt, quod ex rosa factum sit: vel cerae et adipis suillae tantundem una liquandum, deinde his vinum miscendum, atque ubi quod ex eo impositum est, incaluit, detrahendum, et subinde aliud imponendum est. Si vero tumores etiam obcalluerunt, et dolent, levat spongia imposita, quae subinde ex oleo, et aceto; vel aqua frigida exprimitur; aut pari portione inter se mista pix, cera, alumen. Sunt etiam plura idonea manibus pedibusque malagmata. Quod si nihil superimponi dolor patitur, id quod sine tumore est, fovere oportet spongia, quae in aquam calidam demittatur, in qua vel papaveris cortices, vel cucumeris silvestris radix decocta sit: tum inducere articulis crocum cum succo papaveris et ovillo lacte. At si tumor est, foveri quidem debet aqua egelida, in qua lentiscus, aliave verbenae ex reprimentibus decocta sit: induci vero medicamentum ex nucibus amaris cum aceto tritis; aut ex cerussa, cui contritae herbae muralis sucus sit adiectus. Lapis etiam, qui carnem exedit, quem *σαρκοφάγον* Graeci vocant, excisus sic, ut pedes capiat, demissos eos, cum dolent, retentosque ibi levare consuevit. Ex quo in Asia lapidi asio gratia est. Vbi dolor et inflammatio se remiserunt quod intra dies quadraginta sit, nisi vitium hominis accessit; modicis exercitationibus,

abstinentia, unctionibus lenibus utendum est sic, ut etiam cum acopo, vel liquido cerato cyprino articuli perfricentur. Equitare podagricis quoque alienum est. Quibus vero articulorum dolor certis temporibus revertitur, hos ante et curioso victu cavere oportet, ne inutilis materia corpori supersit, et crebriore vomitu; et, si quis ex corpore metus est, vel alvi ductione uti, vel lacte purgari. Quod Erasistratus in podagricis expulit, ne in inferiores parte factus cursus pedes replet: cum evidens sit omni purgatione non superiora tantummodo, sed etiam inferiora exinaniri.

CAPUT XXXII.

DE REFECTIONE CONVALESCENTIUM A MORBO.

Ex quocumque autem morbo quis convalescit, si tarde confirmatur, vigilare prima luce debet; nihilominus in lecto conquiescere: circa tertiam horam leniter unctis manibus corpus permulcere: deinde delectationis causa, quantum iuvat, ambulare, circumcisa omni negotiosa cogitatione, vel actione: tum gestari diu: multa frictione uti: loca, coelum, cibos saepe mutare: ubi triduo quatrduove vinum bibit, uno aut etiam altero die interponere aquam. Per haec enim fiet, ne in vitia tabem inferentia incidat, et ut mature vires suas recipiat. Cum vero ex toto convaluerit, periculose vitae genus subito mutabit, et inordinate aget. Paulatim ergo debet, omissis his legibus, eo transire, ut arbitrio suo vivat.

A. CORNELII CELSI
ARTIUM LIBER DECIMUS
IDEM
MEDICINAE QUINTUS .

Dixi de iis malis corporis, quibus victus ratio maxime subvenit: nunc transeundum est ad eam medicinae partem, quae magis medicamentis pugnat. His multum antiqui auctores tribuerunt, et Erasistratus, et ii qui se *ἐμπειρικοὺς* nominaverunt; praecipue tamen Herophilus, deductique ab illo viri; adeo ut nullum morbi genus sine is curarent. Multaque etiam de facultatibus medicamentorum memoriae prodiderunt, qualia sunt vel Zenonis, vel Andreae, vel Apollonii, qui Mys cognominatus est. Horum autem usum ex magna parte Asclepiades non sine causa sustulit; et, cum omnia fere medicamenta stomachum laedant, malique succi sint, ad ipsius victus rationem potius omnem curam suam transtulit. Verum ut illud in plerisque morbis utilius est, sic multa admodum corporibus nostris incidere consuerunt, quae sine medicamentis ad sanitatem pervenire non possunt. Illud ante omnia scire convenit, quod omnes medicinae partes ita innexae sunt, ut ex toto separari non possint; sed ab eo nomen trahant, a quo plurimum petunt. Ergo ut illa, quae victu curat, aliquando medicamentum adhibet, ita illa, quae praecipue medicamentis pugnat, adhibere etiam rationem victus debet; quae multum admodum in omnibus malis corporis proficit. Sed cum omnia medicamenta proprias facultates habeant, ac saepe simplicia opitulentur, saepe mista; non alienum vide-

detur ante proponere et nomina, et vires, et mīsturas eorum; quo minor ipsas curationes exsequen-
tibus mora sit.

C A P U T I.

DE SIMPLICIBUS FACULTATIBUS QUARUMCUMQUE RERUM,
EX QUIBUS MEDICAMENTA SUNT: ET PRIMO
DE HIS, QUAE SANGUINEM SUPPRIMUNT.

Sanguinem supprimunt, atramentum sutorium, quod
Graeci *Χάλκανθον* appellant, chalcitis, acacia, et ex
aqua lycium, thus, aloe, gummi, plumbum com-
bustum, porrum, herba sanguinalis, creta vel Ci-
molia vel figularis, misy, frigida aqua, vinum,
acetum, alumen, melinum, squama et ferri et aeris;
atque huius quoque duae species sunt, alia tantum
aeris, alia rubri aeris.

C A P U T, II.

QUAE VULNUS GLUTINENT.

Glutinant vulnus, myrrha, thus, gummi, praeci-
pueque acanthinum, psyllium, tragacantha, carda-
momum, bulbi, lini semen, nasturtium, ovi album,
gluten, ichthyocolla, vitis alba, contusae cum testis
suis cochleae, mel coctum, spongia vel ex aqua fri-
gida, vel ex vino, vel ex aceto expressa; ex iisdem
lana sucida; si levis plaga est, etiam aranea.

Reprimunt, alumen et scissile, quod *σχιστόν* vo-
catur, et liquidum, melinum, auripigmentum, aeru-
go, chalcitis, atramentum sutorium.

C A P U T III.

QUAE CONCOQUANT , ET MOVEANT PUS .

Concoquunt et movent pus , nardum , myrrha , costum , balsamum , galbanum , propolis , styrax , thuris et fuligo et cortex , bitumen , pix , sulphur , resina , sebum , adeps , oleum .

C A P U T IV.

QUAE APERIANT VULNERA .

Aperiunt tamquam ora in corporibus, quod στόμα Graece dicitur, cinnamomum , balsamum , panaces , iuncus quadratus , pulegium , flos albae violae , bdellium , galbanum , resina terebinthina et pinea , propolis , oleum vetus , piper , pyrethrum , chamaepitys ; uva taminia , sulphur , alumen , rutae semen .

C A P U T V.

QUAE PURGENT .

Purgant aerugo , auripigmentum , quod ἀρσενικός a Graecis nominatur ; huic autem et sandarachae in omnia eadem vis , sed validior est ; squama aeris , pumex , iris , balsamum , styrax , thus , thuris cortex , resina , et pinea , et terebinthina liquida , oenanthe , lacerti stercus , sanguis columbae , et palumbi , et hirundinis , ammoniacum , bdellium ; quod in omnia idem , quod ammoniacum , potest , sed valentius est ; abrotonum , ficus arida , coccum guidium , scobis eboris , omphacium , radícula , coagulum , sed maxime leporinum ; cui eadem , quae ceteris coagulis , facultas , sed utique validior est ;

Cels. T. I.

N

fel ,

fel, vitellus crudus, cornu cervinum, gluten taurinum, mel crudum, misy, chalcitis, crocum, uva taminia, spuma argenti, galla, squama aeris, lapis haematites, minium, costum, sulphur, pix cruda, sebum, adeps, oleum, ruta, porrum, lenticula, ervum.

CAPUT VI.

QUAE RODANT.

Rodunt alumen liquidum, sed magis rotundum, aerugo, chalcitis, misy, squama aeris, sed magis rubri, aes combustum, sandaracha, minium Sinopicum, galla, balsamum, myrrha, thus, thuris cortex, galbanum, resina terebinthina humida, piper utrumque, sed rotundum magis, cardamomum, auripigmentum, calx, nitrum, et spuma eius, apii semen, narcissi radix, omphacium, alcyonium, oleum ex amaris nucibus, allium, mel crudum, vinum, lentiscus, squama ferri, fel taurinum, scammonia, uva taminia, cinnamomum, styrax, cicutae semen, resina, narcissi semen, fel, nucis amarae, oleumque earum, atramentum sutorium, chrysocolla, veratrum, cinis.

CAPUT VII.

QUAE EXEDANT CORPUS.

Exedunt corpus acaciae succus, hebenus, aerugo, squama aeris, chrysocolla, cinis Cyprius, nitrum, cadmia, spuma argenti, hypocistis, diphryges, sal, auripigmentum, sulphur, eruca, sandaracha, salamandra, alcyonium, aeris flos, chalcitis, atramentum sutorium, ochra, calx, acetum, galla, alumen, lac caprifisci, vel lactucae marinae, quae *τιθύμαλλος* a Graecis nominatur, fel, thuris

fin-

fuligo , spodium , lenticula , mel , oleae folia , mar-
rubium , lapis haematites , et phrygius , et asius , et
scissilis , misy , vinum , acetum .

C A P U T . VIII.

QUAE ADURANT .

Adurunt auripigmentum , atramentum sutorium ,
chalcitis , misy , aerugo , calx , charta combusta ,
sal , squama aeris , faex combusta , myrrha , stercus
et lacerti , et columbae , et palumbi , et hirundinis ,
piper , coccum gnidium , allium , diphryges , lac
utrumque , quod proximo capite supra comprehen-
sum est , veratrum et album et nigrum , canthari-
des , corallium , pyrethrum , thus , salamandra , cru-
ca , sandaracha , uva taminia , chrysocolla , ochra ,
alumen scissile , ovillum stercus , oenanthe .

C A P U T . IX.

QUAE CRUSTAS ULCERIBUS INDUCANT .

Eadem fere crustas ulceribus tamquam igne adustis
inducunt ; sed praecipue chalcitis , utique si cocta
est , flos aeris , aerugo , auripigmentum , misy , et id
quoque magis coctum .

C A P U T . X.

QUAE CRUSTAS ULCERIBUS RESOLVANT .

Crustas vero has resolvit farina triticea cum ruta ,
vel porro , aut lenticula , cui mellis aliquid adie-
ctum sit .

CAPUT XI.

QUAE DISCUTIANT EA, QUAE IN ALIQUA PARTE
CORPORIS COIERUNT.

Ad discutienda vero ea, quae in corporis parte aliqua coierunt, maxime possunt, abrotonum, heleenium, amaracus, alba viola, mel, lilium, sampsonus Cyprius, lac, sertula Campana, serpillum, cupressus, cedrus, iris, viola purpurea, narcissus, rosa, crocum, passum, iuncus quadratus, nardum, cinnamomum, casia, ammoniacum, cera, resina, uva taminia, spuma argenti, styrax, ficus arida, tragoriganus, lini et narcissi semen, bitumen, sordes ex gymnasio, pyrites lapis, aut molaris, crudus vitellus, amarae nuces, sulphur.

CAPUT XII.

QUAE EVOCENT, ET EDUCANT.

Evocat et educit ladanum, alumen rotundum, hebenus, lini semen, omphacium, fel, chalcitis, bdellium, resina terebinthina et pinea, propolis, ficus arida decocta, stercus columbae, pumex, farina lolii, grossi in aqua cocti, elaterium, lauri baccae, nitrum, sal.

C A P U T X I I I .

QUAE EXASPERATA LAEVENT .

Laevat id, quod exasperatum est, spodium, hebenus, gummi, ovi album, lac, tragacanthum .

C A P U T X I V .

QUAE CARNEM NUTRIANT, ET ULCUS IMPLEANT .

Carnem alit et ulcus implet resina pinea, ochra Attice, mel, asterace, cera, butyrum .

C A P U T X V .

QUAE MOLLIANT .

Molliunt aes combustum, terra eretria, nitrum, papaveris lacrima, ammoniacum, bdellium, cera, sebum, adeps, oleum, ficus arida, sesamum, sertula Campana, narcissi et radix et semen, rosae folia, coagulum, vitellus crudus, amarae nuces, medulla omnis, stibi, pix, cochlea cocta, cicutae semen, plumbi recrementum; *σκαρίαν μολύβδου* Graeci vocant; panaces, cardamomum, galbanum, resina, uva taminia, styrax, iris, balsamum, sordes ex gymnasio, sulphur, butyrum, ruta .

C A P U T X V I .

QUAE CUTEM PURGENT .

Cutem purgat mel, sed magis, si est cum galla, vel ervo, vel lenticula, vel marrubio, vel iride, vel ruta, vel nitro, vel aerugine .

CAPUT XVII.

DE MISTURIS SIMPLICIUM RERUM, ET DE RATIONE
PONDERUM.

1. **E**xpositis simplicibus facultatibus, dicendum est, quemadmodum misceantur, quaeque ex his fiant. Miscentur autem varie, neque huius ullus modus est; cum ex simplicibus alia demantur, alia adii-
ciantur; iisdemque servatis, ponderum ratio mute-
tur. Itaque, cum facultatum materia non ita multi-
plex sit, innumerabilia misturarum genera sunt;
quae comprehendi si possent, tamen esset superva-
cuum. Nam et iidem effectus intra paucas compo-
sitiones sunt, et mutare eas cuilibet, cognitis fa-
cultatibus, facile est. Itaque contentus iis ero, quas
accepi velut nobilissimas. In hoc autem volumine
cas explicabo, quae vel desiderari in prioribus po-
tuerunt, vel ad eas curationes pertinent, quas pro-
tinus hic comprehendam, sic, ut tamen, quae ma-
gis communia sunt, simul iungam. Si qua singulis,
vel etiam paucis accommodata sunt, in ipsarum lo-
cum differam. Sed et ante sciri volo, in uncia pon-
dus denariorum septem esse: unius deinde denarii
pondus dividi a me in sex partes, id est sextantes,
ut idem in sextante denarii habeam, quod Graeci
habent in eo, quem *ὀβολός* appellant. Id ad nostra
pondera relatum paulo plus dimidio scrupulo facit.

*Quid malagma et emplastrum, et pastillus
inter se differant.*

2. Malagmata vero, atque emplastra, pastillique,
quos *τροχίσκος* Graeci vocant, cum plurima eadem
habeant; differunt eo, quod malagmata maxime ex
odoribus eorumque etiam surculis, emplastra pastil-
lique

lique magis ex quibusdam metallicis fiunt . Deinde malagmata confusa abunde mollescunt : nam super integram cutem iniiciuntur : laboriose vero conteruntur ea , ex quibus emplastra pastillique fiunt ; ne laedant vulnera , cum imposita sunt . Inter emplastrum autem et pastillum hoc interest , quod emplastrum utique liquati aliquid accipit : in pastillo tantum arida medicamenta aliquo humore iunguntur . Tum emplastrum hoc modo fit : arida medicamenta per se teruntur ; deinde mistis his instillatur aut acetum , aut si quis alius non pinguis humor accessurus est , et ea rursus ex eo teruntur : ea vero , quae liquari possunt , ad ignem simul liquantur ; et si quid olei misceri debet , tum infunditur : interdum etiam aridum aliquod ex oleo prius coquitur . Vbi facta sunt , quae separatim fieri debuerunt , in unum omnia miscentur . At pastilli haec ratio est : arida medicamenta contrita humore non pingui , ut vino vel aceto , coguntur , et rursus coacta , inarescunt ; atque , ubi utendum est , eiusdem generis humore diluuntur . Tum emplastrum imponitur , pastillus illinitur , aut alicui molliori , ut cerato , miscetur ,

C A P U T XVIII.

DE MALAGMATIS .

Malagma adversus calidas podagras .

1. **H**is cognitis , primum malagmata subiiciam , quae fere non sunt refrigerandi , sed calefaciendi causa reperta . Est tamen , quod refrigerare possit , ad calidas podagras aptum . Habet gallae et immaturae et alterius , coriandri seminis , cicutae , lacrimae aridae , gummi , singulorum plenum acetabulum , cerati eloti , quod *πεπλωμένον* Graeci vocant , selibram . Reliqua fere calefaciunt : sed quaedam ex-

trahunt, quae *ἰτισπασικά* vocantur; pleraque certis magis partibus membrorum accommodata sunt.

Malagma ad materiam extrahendam.

2. Si materia extrahenda est, ut in hydropico, in lateris dolore, in incipiente abscessu, in suppuratione quoque mediocri, aptum est id, quod habet resinae aridae, nitri, ammoniaci, galbani, singulorum pondo, cerae pondo. Aut in quo haec sunt: aeruginis rasae, thuris, singulorum p. ꝯ. ii. ammoniaci salis p. ꝯ. vi. squamae aeris, cerae, singulorum p. ꝯ. viii. resinae aridae, p. ꝯ. xii. aceti cyathus. Idem praestat cumini farina cum struthio, et melle.

Malagma ad iecur dolens.

3. Si iecur dolet, id in quo est balsami lacrimae p. ꝯ. xii. costi, cinnamomi, casiae corticis, myrrhae, croci, iunci rotundi, balsami seminis, iridis illiricae, cardamomi, amomi, nardi, singulorum p. ꝯ. xvi. quibus adiicitur nardinum unguentum, donec cerati crassitudo sit. Et huius quidem recentis usus est: si vero servandum est, resinae terebinthinae p. ꝯ. xvi. cerae p. ꝯ. x. ex vino leni contunduntur, tum eo miscentur.

Malagma ad lienem.

4. At si lienis torquet, glandis, quam *βάλανον μυρτίδιον* Graeci vocant, cortex et nitrum paribus portionibus contunduntur, respergunturque aceto quam acerrimo: ubi cerati crassitudinem habet, lintheo, ante in aqua frigida madefacto illinitur, et sic imponitur, supraque farina hordeacea iniicitur: sed manere ibi non amplius sex horis debet, ne lienem consumat; satiusque est id bis, aut ter fieri.

Ma-

Malagma commune pluribus .

5. Commune autem et iecinori , et lieni , et abscessibus , et strumae , parotidibus , articulis , cal-
cibus quoque suppurantibus , aut aliter dolentibus ,
etiam concoctioni ventris , Lysias composuit ex his :
epopanax , styracis , galbani , resinae , singulorum
p. ꝯ. ii. ammoniaci , bdellii , cerae , sevi taurini ,
iridis aridae p. ꝯ. iii. cachryos acetabulo , piperis
granis quadraginta : quae contrita iriño unguento
temperantur .

Malagma ad laterum dolores .

6. Ad laterum autem dolores compositio est Apol-
lophanis : in qua sunt resinae terebinthinae , thuris
fuliginis , singulorum p. ꝯ. iv. bdellii , ammoniaci ,
iridis , sevi vitulini , aut caprini a renibus , visci ,
singulorum p. ꝯ. iv. Haec autem eadem omnem
dolorē levant , dura emolliunt , mediocriter cale-
faciunt .

Ad idem Andreae .

7. Ad idem Andreae quoque malagma est ; quod
etiam resolvit , humorem educit , pus maturat , ubi
id maturum est , cutem rumpit , ad cicatricem per-
ducit . Prodest impositum minutis maioribusque ab-
scessibus : item articulis , ideoque et coxis , et pe-
dibus dolentibus : item , si quid in corpore collisum
est , reficit ; praecordia quoque dura et inflata emol-
lit : ossa extrahit : ad omnia denique valet , quae
adiuvare calor potest . Id habet cerae p. ꝯ. xi. vi-
sci , sycamini , quam alias sycomorum vocant , la-
crimae , singulorum p. ꝯ. i. piperis et rotundi , et
longi , ammoniaci thymiamatis , bdellii , iridis illy-
ri-

ricae, cardamomi, amomi, xylobalsami, thuris masculi, myrrhae, resinae aridae, singulorum p. ꝥ. x. pyrethri, cocci gnidii, spumae nitri, salis ammoniaci, aristolochiae creticae, radices ex cucumere agresti, resinae terebinthinae liquidae, singulorum p. ꝥ. xx. quibus adiicitur unguenti irini, quantum satis est ad ea mollienda, atque cogenda.

Malagma ad resolvenda, quae adstricta sunt, et mollienda, quae dura sunt, et digerenda, quae coeunt.

8. Praecipuum vero est ad resolvenda, quae adstricta sunt, mollienda, quae dura sunt, digerenda, quae coeunt, id, quod ad Polyarchum auctorem refertur. Habet iunci quadrati, cardamomi, thuris fuliginis, amomi, cerae, resinae liquidae pares portiones.

Aliud malagma ad eadem.

9. Aliud ad eadem Nilei: crocomagmatis, quod quasi recrementum eius est, p. ꝥ. iv. ammoniaci thymiamatis, cerae, singulorum p. ꝥ. xx. ex quibus duo priora ex aceto teruntur, cera cum rosa liquatur, et tum omnia iunguntur.

Malagma Moschi ad molliendum.

10. Proprie etiam dura emollit id, quod Moschi esse dicitur. Habet galbani unciam, thuris fuliginis p. =. cerae, ammoniaci thymiamatis trientes, picis aridae p. 11. aceti heminas tres.

Malagma Medi ad digerenda, quae coeunt.

11. Fertur etiam ad digerenda, quae coeunt, sub aucto-

auctore Medio , quod habet cerae p. \equiv . panacis p. \times . s. squamae aeris , aluminis rotundi , item scissilis , singulorum p. \times . 1. plumbi combusti p. \times . 1. s.

Malagma Panthemi ad eadem .

12. Ad eadem Panthemus utebatur , calcis p. s. sinapis contriti , item foeni graeci , aluminis , singulorum p. 1. sevi bubuli p. 11. s.

Malagma ad strumas .

13. 14. Ad strumam multa malagmata invenio . Credo autem , quo peius id malum est , minusque facile discutitur , eo plura esse tentata ; quae in personis varie responderunt . Andreas auctor est , ut haec misceantur : urticae seminis p. \times . 1. piperis rotundi , bdellii , galbani , ammoniaci thymiamatis , resinae aridae , singulorum p. \times . 1v. resinae liquidae , cerae , pyrethri , piperis longi , lactucae marinae seminis , sulphuris ignem non experti , quod $\alpha\pi\rho\rho\upsilon$ vocatur , faccis aridae aceti , spumae nitri , salis ammoniaci , sinapis , cardamomi , radicis ex cucumere silvestri , resinae , singulorum p. \times . viii. quae ex leni vino contunduntur .

Aliud malagma ad idem valens .

15. Expeditius ad idem fit , quod habet visci simini , stercoris , resinae sulphuris ignem non experti pares portiones . Et in quo est sulphuris p. \times . 1. lapidis , quem $\pi\rho\rho\iota\tau\eta\upsilon$ vocant , p. \times . 1v. cumini acetabulum . Item in quo est lapidis eiusdem pars una , sulphuris duae partes , resinae terebinthinae partes tres .

Malagma ad strumam, et phymata.

16. Arabis autem cuiusdam est ad strumam, et orientia tubercula, quae φύματα vocantur, quod haec digerit. Habet myrrhae, salis ammoniaci, thuris, resinae et liquidiae et aridae; crocomagnatis, cerae, singulorum p. ꝯ. i. lapidis eius, quem πυρίτην vocant, p. ꝯ. iv. quibus quidam adiciunt sulphuris p. ꝯ. ii.

Malagma ad strumam, et tubera et καρκινώδη

17. Est etiam proficiens in struma, et in iis tuberculis, quae difficiliter concoquuntur, et in iis, quae καρκινώδη vocantur, quod ex his constat; sulphuris p. ꝯ. ii. nitri p. ꝯ. i. myrrhae p. ꝯ. vi. fuliginis thuris p. s. salis Ammoniaci p. =. cerae p. i.

Malagma Protarchi ad parotidas, et favum, et mala ulcera.

18. Protarchus autem ad παρωτίδας, eaque tubercula, quae μελικήρια, id est favi, vel φύματα nominantur, item mala ulcera, pumicis, resinae pineae liquidiae, thuris fuliginis, spumae nitri, iridis, singulorum p. ꝯ. viii. cum cerae p. ꝯ. ix. miscebat, hisque olei cyathum et dimidium adiciebat.

Malagma adversus panum, et phymata.

19. At adversus panum, tum primum orientem, quod φύγεθλον Graeci vocant, et omne tuberculum, quod φύμα nominatur, miscetur ochra, quae Attice nominatur, cum duabus partibus similae, hisque, dum contunduntur, subinde mel instillatur, donec malagmatis crassitudo sit.

Ma-

Malagma adversus phymata .

20. Discutit etiam omne tuberculum , quod $\phi\upsilon\mu\alpha$ vocatur , id , quod habet calcis , nitri spumae , piperis rotundi , singulorum p. \mathfrak{x} . 1. galbani p. \mathfrak{x} . 11. salis p. \mathfrak{x} . 1v. quae excipiuntur cerato ex rosa facto.

Malagma ad supprimendum omne , quod abscedit .

21. Supprimitque omne , quod abscedit , id , in quo est galbani , fabae fresae , singulorum p. \mathfrak{x} . 1. myrrhae , thuris , ex radice capparis corticis , singulorum p. \mathfrak{x} . 1v. Satisque omnia abscedentia digerit murex combustus , et bene contritus , aceto subinde adiecto .

Malagma ad sanguinem supprimendum .

22. At si satis sanguis subit , recte imponitur , quod adversus phymata quoque potest . Constat ex his : bdellii , styracis , ammoniaci , galbani , resinae et aridae et liquidae pineae , item ex lentisco , thuris , iridis , singulorum p. \mathfrak{x} . 11.

Malagma ad carcinomata , et phymata lenienda .

23. Καρκινώδη vero , phymata , commode his leniuntur : galbani , visci , ammoniaci , resinae terebinthinae , singulorum p. \mathfrak{x} . 1. sevi taurini p. s. faecis combustae quam maxima portione , dum id siccius non faciat , quam esse malagma oportet .

Malagma ad faciem contusam , eiusque livorem .

24. Quod si facie contusa livor subcruentus est , haec compositio nocte et die imposita tollit . Aristol-

lochiae, thapsiae, singulorum p. ꝥ. 11. bdellii, styracis, ammoniaci thymiamatis, galbani, resinae aridae, et ex lentisco liquidae, thuris masculi, iridis illyricae, cerae, singulorum p. ꝥ. 1v. Idem faba quoque imposita proficit.

Malagma ἀνασσυμωτικά.

25. Sunt etiam quaedam malagmata, quae συμωτικά Graeci vocant, quoniam aperiendi vim habent. Quale est, quod ex his constat: piperis longi, spumae nitri, singulorum p. ꝥ. 11. erysini p. ꝥ. 1v. quae cum melle miscentur. Idoneaeque etiam strumae aperiendae sunt. Eius generis, vehementiusque ex his est id, quod habet calcis p. ꝥ. 1v. piperis grana sex, nitri, cerae, singulorum p. ꝥ. x. mellis p. =. olei heminam.

Niconis Malagma ad resolvendum, aperiendumque, ac purgandum.

26. Niconis quoque est, quod resolvit, aperit, purgat. Habet alcyonium, sulphur, nitrum, pumicem, paribus portionibus; quibus tantum picis, et cerae adiicitur, ut fiat cerati crassitudo.

Malagma ad ossa, et nervos.

27. Ad ossa autem Arislogenis, fit ex his: sulphuris p. ꝥ. 1. resinae terebinthinae, nitri spumae, et ex scilla partis interioris, plumbi cloti, singulorum p. ꝥ. 11. thuris fuliginis p. ꝥ. viii. ficus aridae quam pinguissimae, sevi taurini, singulorum p. ꝥ. viii. cerae p. ꝥ. xii. iridis macedonicae p. ꝥ. vi. sesami fricti acetabulum.

Malagma Euthylei ad articulos , et ad omnem dolorem .

28. Maximeque nervis et articulis malagma convenit . Igitur Euthylei est , et ad articulos , et ad omnem dolorem , et ad vesicae , et ad recenti cicatrice contractos articulos , quae ἀγκύλας Graeci nominant , quod habet fuliginis thuris acetabulum , resinae tantumdem , galbani sine surculis sescunciam , ammoniaci , bdellii , singulorum p. = . ceræ p. s. Ad eosdem digitos : iridis , ammoniaci , galbani , nitri , singulorum p. ꝯ. xiv. resinae liquidæ p. ꝯ. vi. ceræ p. ꝯ. xvi.

Malagma Sosagoræ ad dolores articulorum .

29. Ad dolores articulorum Sosagoræ : plumbi combusti , papaveris lacrimae , corticis hyoscyami , styracis , peucedani , sevi , resinae , ceræ pares portiones .

Chrysippi Malagma ad idem valens .

30. Chrysippi : resinae liquidæ , sandarachæ , piperis , singulorum p. ꝯ. xii. quibus ceræ paululum adiicitur .

Ctesiphontis Malagma ad idem valens et ad parotidas , et phymata , et strumam .

31. Ctesiphontis : ceræ creticae , resinae terebinthinae , nitri quam ruberrimi , singulorum p. s. olei cyathi tres . Sed id nitrum ante per triduum , instillata aqua , teritur , et cum sextario eius incoquitur , donec omnis humor consumatur . Potest vero ea compositio etiam ad parotidas , phymata , strumam , omnemque coitum humoris emolliendum .

Ma-

Malagma ad articulos .

32. Ad articulos , fici quoque aridae partem nepetae mistam ; vel uvam taminiam sine seminibus cum pulegio recte aliquis imponit .

Malagma Aristonis , adversus podagras , et recentia phymata , et omnes dolores .

33. Eadem podagrae praesidio sunt . Sed ad eam fit Aristonis quoque , quod habet nardi , cinnamomi , casiae , chamaeleontis , iunci rotundi , singulorum p. ꝯ. vii. sevi caprini ex irino liquati p. ꝯ. xx. iridis p. ꝯ. i. quae in aceto quam acerrimo iacere per xx. dies debet . Idem autem etiam recentia phymata doloresque omnes discutit .

Theoxeni Malagma ad pedum dolores .

34. At Theoxenus ad pedum dolores , sevi a renibus partem tertiam , salis partes duas miscebat , hisque membranulam illitam imponebat ; tum superiniiciebat ammoniacum thymiana in aceto liquatum .

Numenii Malagma ad podagram , caeterosque articulos induratos .

35. At Numenius podagram , ceterosque articulos induratos hoc mollicbat : abrotoni , rosae aridae , papaveris lacrimae , singulorum p. ꝯ. iiii. resinae terebinthinae p. ꝯ. iv. thuris , spumae nitri , singulorum p. ꝯ. vii. iridis , aristolochiae , singulorum p. ꝯ. xii. cerae p. iiii. quibus adducitur cedri cyathus unus , olei laurei cyathi tres , olei acerbi sextarius .

Dexii Malagma , si quando callus in articulis increvit .

36. Si quando autem in articulis callus increvit , Dexius docuit imponere calcis p. ꝥ. iv. cerussae p. ꝥ. viii. resinae pineae p. ꝥ. xx. piperis grana xxx. cerae p. =. quibus , dum contunduntur , hemina vini lenis instillatur .

C A P U T XIX.

DE EMPLASTRIS .

Ex emplastris autem nulla maiorem usum praestant, quam quae cruentis protinus vulneribus iniiciuntur , *ἐναιμα* Graeci vocant . Haec enim reprimunt inflammationem , nisi magna vis eam cogit , atque illius quoque impetum minuunt : tum glutinant vulnera , quae id patiuntur , cicatricem iisdem inducunt . Constant autem ex medicamentis non pinguibus ; ideoque *ἀλίπαικα* nominantur .

Barbarum Emplastrum nigrum , quod cruentis protinus vulneribus iniicitur .

1. Optimum ex his est quod barbarum vocatur . Habet aeruginis rasae p. ꝥ. xii. spumae argenti p. ꝥ. xx. aluminis , picis aridae , resinae pineae aridae , singulorum p. ꝥ. i. quibus adiiciuntur olei et aceti singulae heminae .

Choacōn Emplastrum nigrum ad idem valens .

2. Alterum ad idem , quod *κοακόν* vocant , habet spumae argenti p. ꝥ. c. resinae aridae tantundem : sed spuma prius ex tribus olei heminis coquitur .

Cels. T. I.

()

His

His duobus emplastris color niger est qui fere talis fit ex pice atque resina: at ex bitumine nigerrimus; ex aerugine, aut aeris squama, viridis; ex minio ruber; ex cerussa albus.

Basilicon Emplastrum nigrum ad idem.

3. Paucae admodum compositiones sunt, in quibus aliquid misturae varietas novat. Ergo id quoque nigrum est, quod βασιλικόν nominatur. Habet opoponacis p. x. 1. galbani p. x. 11. picis, et resinae, singulorum p. x. x. olei dimidium cyathum.

Zmaragdinum Emplastrum ad idem.

4. At quia perviride est, zmaragdinum appellatur: in quo sunt resinae. pineae p. x. 111. cerae p. x. 1. aeruginis p. s. thuris fuliginis p. =. olei tantundem, aceti, quo fuligo et aerugo in unum cogantur.

Emplastrum rufum ad idem.

5. Est etiam coloris fere rufi, quod celeriter ad cicatricem vulnera perducere videtur. Habet thuris p. x. 1. resinae p. x. 11. squamae aeris p. x. 1v. spumae argenti p. x. xx. cerae p. x. c. olei heminam.

Ράπτουσαν Emplastrum ad idem.

6. Praeterea est, quam ράπτουσαν a glutinando vocant. Constat ex his: bituminis, aluminis scissilis, p. x. 1v. spumae argenti p. x. xl. olei veteris hemina.

Cephalicum Emplastrum Philotae , capiti conveniens .

7. Praeterea sunt quaedam generis eiusdem , quae , quia capitibus fractis maxime conveniunt , κεφαλικά a Graecis nominantur . Philotae compositio habet terrae eretriae , chalcitidis , singulorum p. x. iv. myrrhae , aeris combusti , singulorum p. x. x. ichthyocollae p. x. vi. aeruginis rasae , aluminis rotundi , misy crudi , aristolochiae , singulorum p. x. viii. squamae aeris p. x. x. thuris masculi p. x. ii. cerae p. i. rosae , et olei acerbi ternos cyathos , aceti quantum satis est , dum arida ex eo conteruntur .

Emplastrum viride ad idem valens .

8. Aliud ad idem viride : aeris combusti , squamae aeris , myrrhae , ichthyocollae , singulorum p. x. vi. misy crudi , aeruginis rasae , aristolochiae aluminis rotundi , singulorum p. x. viii. cerae p. x. i. olei hemina , aceti quod satis sit .

Tetrapharmacum Emplastrum ad pus movendum .

9. Puri autem movendo non aliud melius , quam quod expeditissimum est : τετραφάρμακον a Graecis nominatur . Habet pares portiones cerae , picis , resinae , sevi taurini ; si id non est , vituliui .

Enneapharmacum Emplastrum ad pus movendum , et ad purgandum valens .

10. Alterum ad idem , ἐννεαφάρμακον nominatur ; quod magis purgat . Constat ex novem rebus , cera , melle , sevo , resina , myrrha , rosa , medulla vel cervina vel vitulina vel bubula , oesypo , butyro : quorum ipsorum quoque pondera paria miscentur .

Emplastra quibus utriusque rei facultas est .

11. Sunt autem quaedam emplastra, quibus utriusque rei facultas est: quae, si singula habenda sunt, meliora sunt; sed in copia reiicienda sunt; iis potius adhibitis, quae proprie id, quod eo tempore opus est, consequuntur. Exempli causa duo proponam. Est igitur ad vulnera attalum; quod habet squamae aeris p. ꝥ. xvi. thuris fuliginis p. ꝥ. xv. ammoniaci tantundem, resinac terebinthinae liquidae p. ꝥ. xxv. sevi taurini tantundem, aceti heminas tres, olei sextarium. At inter ea quae fracto capiti accommodantur, habent quidam id quod ad auctorem Judaeum refertur. Constat ex his: salis p. ꝥ. iv. squamae aeris rubri, aëris combusti, singulorum p. ꝥ. xii. ammoniaci thymiamatis, thuris fuliginis, resinae aridae, singulorum p. ꝥ. xvi. resinae colophoniacae, cerae, sevi vitulini curati, singulorum p. ꝥ. xx. aceti sesquicyathos, olei minus cyathos. *Ἱσπατικὰ* Graeci appellant, quae curata vocant; cum ex sevo, puta, omnes membranulae diligenter exemptae sunt, ex alio medicamento.

Emplastra ἱσπατικά .

12. Sunt etiam quaedam emplastra nobilia ad extrahendum; quae ipsa quoque *ἱσπατικά* nominantur: quale est, quod, quia lauri baccas habet *δία δαρνίδων* appellatur. In eo est resinae terebinthinae p. ꝥ. x. nitri, cerae, picis aridae, baccarum lauri, singulorum p. ꝥ. xx. olei paulum. Quoties aut baccam, aut nucem, aut simile aliquid posnero, scire oportebit, antequam expendatur, ei summam pelli-
culam esse demendam.

Aliud

Aliud δια δαφνίδου ad extrahendum, et pus movendum.

13. Aliud eodem nomine, quod puri quoque movendo est. Sevi vitulini, ammoniaci thymiamatis, picis, cerae, nitri, baccarum lauri, resinae aridae, aristolochiae, pyrethri pares portiones.

Philocratis Emplastrum ad extrahendum et pus movendum.

14. Praeter haec est Philocratis, quod habet salis ammoniaci p. ꝥ. vii. aristolochiae p. ꝥ. viii. cerae, resinae terebinthinae, fuliginis thuris, singulorum p. ꝥ. xv. spumae argenti p. ꝥ. xxxii. Quibus, ut pus quoque moveant, iridis p. ꝥ. iv. et galbani p. ꝥ. vi. adiiiciuntur.

Ρυτῶδες Emplastrum ad extrahendum.

15. Optimum tamen ad extrahendum est id quod a similitudine sordium ρυτῶδες Graeci appellant. Habet myrrhae, croci, iridis, propolis, bdellii, capitulorum punici mali, aluminis et scissilis et rotundi, misy, chalcitidis, atramenti sutorii cocti, opopanax, salis Ammoniaci, visci, singulorum p. ꝥ. iv. aristolochiae p. ꝥ. viii. squamae acris p. ꝥ. xvi. resinae terebinthinae p. ꝥ. lxxv. cerae, et sevi vel taurini vel hircini, singulorum p. ꝥ. c.

Emplastrum Hecataei ad extrahendum.

16. Hecataeo quoque auctore emplastrum generis eiusdem fit ex his: galbani p. ꝥ. ii. fuliginis thuris p. ꝥ. iv. picis p. ꝥ. vi. cerae, et resinae terebinthinae, singulorum p. ꝥ. viii, quibus paulum irini unguenti miscetur.

Alexandrinum Emplastrum viride ad extrahendum .

17. Valensque ad idem emplastrum viride Alexandrinum est. Habet aluminis scissilis p. ꝥ. viiij. salis ammoniaci p. ꝥ. viiij. = . squamae aeris p. ꝥ. xvi. myrrhae , thuris , singulorum p. ꝥ. xviii. ceræ p. ꝥ. cl. resinae colophoniacae aut pineae p. ꝥ. cc. olei heminam , aceti sextarium .

De Emplastris exedentibus .

18. Quaedam autem sunt emplastra exedentia , quae *σπυρα* Graeci vocant : quale est id , quod habet resinae terebinthinae , fuliginis thuris , singulorum p. = . squamae aeris p. ꝥ. i. ladanii p. ꝥ. ii. aluminis tantundem , spumae argenti p. ꝥ. iv.

Emplastrum quod exest corpus , ossa resolvit , et supererescentem carnem cōercet .

19. Exest etiam vehementer corpus , atque ossa quoque resolvit , et supererescentem carnem cōercet , id quod habet spumae argenti , squamae aeris , uncias singulas , nitri ignem nōn experti , lapidis asii , aristolochiae p. sextantes , ceræ , resinae terebinthinae , thuris , olei veteris , atramenti sutorii , salis ammoniaci p. s. aeruginis rasae p. bessem , aceti scillitici heminam , vini aminaei tantundem .

*Emplastra adversus morsus , et alia recentiora vulnera ,
Emplastrum Diogenis nigrum .*

20. Sunt etiam adversus morsus quaedam accommodata ; quale est Diogenis nigrum , quod habet bituminis , ceræ , resinae pineae aridae , singulorum p. ꝥ. xx. squamae argenti p. ꝥ. c. olei sextarium .

Aut

Aut in quo sunt squamae aeris p. ꝥ. iv. cerussae ,
et aeruginis rasae , singulorum p. ꝥ. viii. ammo-
niaci p. ꝥ. xii. cerae , resinae pineae , singulorum
p. ꝥ. xxv. spumae argenti p. ꝥ. c. olei sextarium .
Aut in quo sunt squamae aeris p. ꝥ. xiv. galbani
p. ꝥ. vi. cerussae , et aeruginis rasae , singulorum
p. ꝥ. viii. ammoniaci p. ꝥ. xii. cerae , resinae
pineae , singulorum p. ꝥ. xxxv. spuma argenti con-
coquitur .

Ephesium Emplastrum rubrum ad idem valens.

21. Rubrum quoque emplastrum, quod ephesium
vocatur, huc aptum est. Habet resinae terebinthinae
p. ꝥ. ii. galbani p. ꝥ. iv. minii sinopici p. ꝥ. vi.
thuris fuliginis p. ꝥ. vi. cerae p. ꝥ. viii. spumae
argenti p. ꝥ. xxxvi. olei veteris heminam .

Aliud Emplastrum ad idem valens.

22. Item id, quod ex his constat : squamae aeris,
thuris fuliginis, singulorum p. ꝥ. iv. galbani p. ꝥ.
vi. salis ammoniaci p. ꝥ. xii. = .cerae p. ꝥ. xxv.
olei tribus heminis . Haec autem aliis quoque re-
centioribus vulneribus recte imponuntur .

*Λευκά Emplastra non gravibus vulneribus accomodata,
et maxime senilibus.*

23. Sunt etiam alba lenia ; λευκά Graeci vocant ;
fere non gravibus vulneribus accomodata , praeci-
pueque senilibus : quale est quod habet cerussae
p. ꝥ. xxxii. sevi vitulini curati , et cerae , singu-
lorum p. ꝥ. xlvi. olei heminas tres , ex quibus
cerussa coquitur .

Elephantinum Emplastrum.

24. Aliud quod habet cerussae p. ꝯ. xx. ceræ p. ꝯ. xxxv. olei heminam, aquae sextarium. Quæ quoties adiiciuntur cerussae vel spumae argenti, scire licet, illa ex his coquenda esse. Est autem ea percandida compositio, quæ supra posita est, ideoque *ἐλεφαντίνη* nominatur.

Lenia Emplastra.

25. Lenia quoque quaedam emplastra sunt, quæ *λεπράς* fere Graeci nominant; ut id quod habet minii p. ꝯ. iv. spumae argenti p. ꝯ. xxv. ceræ; et adipis suillae, singulorum p. ꝯ. xxxvii. vitellos quatuor.

Emplastrum lene.

26. Alia compositio generis eiusdem: ceræ, resinae terebinthinae, singulorum p. ꝯ. vi. cerussae p. ꝯ. viii. spumae argenti, plumbi recrementi, *σκαρίαν μολύβδου* Graeci vocant, singulorum p. ꝯ. xx. cicini olei, et myrtei, singulae heminae.

Archagathi Emplastrum lene.

27. Tertia quæ ad auctorem Archagathum refertur: misy cocti, aeris combusti, singulorum p. ꝯ. iv. cerussae coctae p. ꝯ. viii. resinae terebinthinae p. ꝯ. x. spumae argenti p. ꝯ. vi.

Emplastra eiusdem generis, ad leniendum apta.

28. Etiamnum generis eiusdem: spumae argenti, ceræ, adipis suillae, singulorum p. ꝯ. xxvii. vitel-

tel.

telli cocti quatuor, rosae hemina. Aut cerati ex oleo myrteo facti partes tres, adipis suillae pars quarta, paulum ex plumbi recremento. Aut spumae argenti selibra, ex olei hemina, et aquae marinae altera, cocta, donec bullire desierit, cui paulum cerae sit adiectum. Aut pares portiones cerae, sevi, stibi, spumae argenti, cerussae.

C A P U T XX.

DE PASTILLIS.

Et primo de his qui ad recentia vulnera glutinanda, sanandaque apti sunt.

Pastilli quoque facultates diversas habent. Sunt enim ad recentia vulnera glutinanda sanandaque apti: qualis est qui habet chalcitidis, misy, spumae nitri, floris aeris, gallae, aluminis scissilis modice cocti, singulorum p. ꝯ. i. aeris combusti, capitulorum mali punici, singulorum p. ꝯ. iiii. Hunc oportet diluere aceto, ac sic, ubi vulnus glutinandum est, illinere. At si nervosus aut musculosus is locus est, commodius est cerato miscere sic, ut illius octo partes, nona huius sit.

Alius pastillus ad glutinanda vulnera.

Alius ad idem constat ex his: bituminis, aluminis scissilis, singulorum p. ꝯ. i. aeris combusti p. ꝯ. iv. spumae argenti p. ꝯ. xi. olei sextario.

De Sphagide Pastillo, quem Polyidas confecit ad glutinandum vulnus.

2: Sed longe Polyidae celeberrimus est; σφαγίς autem nominatur: qui habet aluminis scissilis p. ꝯ. i. =.

1. = . atramenti sutorii p. ꝯ. 11. myrrhae p. ꝯ. v. aloes tantumdem , capitulorum punici mali , fellis taurini , singulorum p. ꝯ. vi. quae contrita vino austero excipiuntur .

Pastillus ad ulcera sordida , et nigritiem in auribus , naribus , et obscoenis partibus , inflammationesque eorum.

3. Ad ulcera sordida , et nigritiem in auribus , naribus , obscoenis partibus , inflammationesque eorum : chrysocollae p. ꝯ. 1. atramenti sutorii , aluminis scissilis , singulorum p. ꝯ. 11. halicabi corticis p. ꝯ. 1v. minii p. ꝯ. vi. spumae argenti p. ꝯ. x11. cerussae p. ꝯ. xvi. quae ex aceto , et coguntur , et , ubi utendum est , diluuntur .

Pastillus Andronis ad uvam inflamatam , ad naturalia sordida , etiam cancro laborantia.

4. Andronis vero est ad uvam inflamatam , ad naturalia sordida , etiam cancro laborantia : gallae , atramenti sutorii , myrrhae , singulorum p. ꝯ. 1. aristolochiae , aluminis scissilis , singulorum p. ꝯ. 11. capitulorum punici mali p. ꝯ. xxv. ex passo coacta , et cum usus exigit , aceto vel vino diluta , prout valentius aut levius vitium est , cui medendum est .

Pastillus ad fissa ani , vel ora venarum fundentia sanguinem , vel cancerum.

5. Proprie autem ad ani fissa , vel ora venarum fundentia sanguinem , vel cancerum , aeruginis p. ꝯ. 11. myrrhae p. ꝯ. x11. stibis , lacrimae papaveris , acaciae , singulorum p. ꝯ. xvi. quae ex vino et teruntur , et in ipso usu delinquantur .

Pa-

Pastillus ad expellendum calculum ex vesica.

6. Expellere autem ex vesica cum urina calculum videtur haec compositio; casiae, croci, myrrhae; costi, nardi, cinnamomi, dulcis radice, balsami, hyperici pares portiones conteruntur; deinde vinum lene instillatur, et pastilli fiunt, qui singuli habeant p. $\text{℥} \text{ } \frac{1}{2}$. hique singuli quotidie mane ieiuno dantur.

C A P U T XXI.

DE PESSIS.

Haec tria compositionum genera, id est, quae in malagmatis, emplastris, pastillisque sunt, maximum praecipueque varium usum praestant. Sed alia quoque utilia sunt; ut ea quae foeminis subiiciuntur: $\pi\sigma\sigma\upsilon\upsilon\varsigma$ Graeci vocant. Eorum haec proprietas est: medicamenta composita molli lana excipiuntur, eaque lana naturalibus conditur.

Ad sanguinem evocandum.

1. Ad sanguinem autem evocandum, cauneis duabus adiicitur nitri p. $\text{℥} \text{ } 1$. aut allii semen conteritur, adiicitur myrrhae paululum, et unguento susino miscetur: aut cucumeris silvestris pars interior ex lacte muliebri diluitur.

Ad vulvam molliendam.

2. Ad vulvam molliendam, ovi vitellus, et foenum graecum, et rosa, et crocum temperantur. Aut elaterii p. $\text{℥} \text{ } \frac{1}{2}$. salis tantumdem, uvae taminiae p. $\text{℥} \text{ } \text{vi}$. melle excipiuntur.

Alia

Alia Pessi compositio, ad idem valens.

3. Aut Boetho auctore: croci, resinae terebinthinae, singulorum p. ꝥ. 1v. myrrhae p. ꝥ. = = . rosae p. ꝥ. 1. sevi vitulini p. ꝥ. 1. = . cerae p. ꝥ. 11. miscentur*.

Ad inflammationes vulvae Numenii Pessus.

4. Optima autem adversus inflammationes vulvae Numenii compositio est, quae habet croci p. ꝥ. = . cerae p. ꝥ. 1. butyri p. ꝥ. viii. adipis anserinae p. ꝥ. xii. vitellos coctos duos, rosae minus cyatho.

Ad eiciendum e vulva infantem mortuum.

5. Si vero infans intus decessit, quo facilius eiciatur, malicorium ex aqua terendum, eoque utendum est.

Si mulier vitio locorum concidit, qua curatione utendum sit.

6. Si concidere vitio locorum mulier solet, coctae cum testis suis comburendae, conterendaeque, deinde his mel adiciendum est.

Si mulier non comprehendit.

7. Si non comprehendit, adeps leonina ex rosa mollienda est.

C A P U T XXII.

DE MEDICAMENTIS , QUIBUS ARIDIS UTIMUR.

Ad carnem supercrescentem exedendam.

1. **Q**uaedam autem misturae medicamentorum sunt, quibus aridis neque coactis utimur, sic, ut inspergamus, aut cum aliquo mista illinamus: quale est, ad carnem supercrescentem exedendam, quod habet squamae aeris, fuliginis thuris, singulorum p. ꝯ. i. aeruginis p. ꝯ. ii. Haec autem eadem cum melle purgant ulcera; cum cera, implent. Misy quoque et galla, si paribus portionibus miscentur, corpus consumunt: eaque vel arida inspergere licet, vel excepta cadmia illinere.

*Ad putrem carnem continendam, ne ultra serpat,
eamque leniter exedendam plures
compositiones.*

2. Putrem vero carnem continet, neque ultra serpere patitur et leniter exest, mel vel cum lentacula, vel cum marrubio, vel cum oleae foliis, ante ex vino decoctis: item sertula Campana in mulso cocta, deinde contrita: aut calx cum cerato: aut amarae nuces cum allio, sic, ut huius pars tertia sit, paulumque his croci adiiciatur: aut quod habet spumae argenti p. ꝯ. vi. cornu bubuli combusti p. ꝯ. x. olei myrtei, et vini cyathos ternos: aut quod ex his constat: floris punici mali, atramenti sutorii, aloes, singulorum p. ꝯ. ii. aluminis scissilis, thuris, singulorum p. ꝯ. iv. gal-lae p. ꝯ. vi. aristolochiae p. ꝯ. x. Vehementius idem facit, etiam adurendo, anripigmentum cum chal-

chalcitide, et aut nitro, aut calce, aut charta combusta: item sal cum aceto: vel ea compositio, quae habet chalcitidis, capitulorum punici mali, aloes, singulorum p. ꝥ. 11. aluminis scissilis, thuris, singulorum p. ꝥ. 1v. gallae p. ꝥ. viii. aristolochiae p. ꝥ. x. mellis quantum satis sit ad ea cogenda: vel cantharides ꝥ. 1. sulphuris p. ꝥ. 1. lolii p. ꝥ. 11r. quibus adiicitur picis liquidae quantum satis est ad iungendum: vel chalcitis quoque cum resina et ruta mixta: aut cum eadem resina diphyrges: aut uva taminia cum pice liquida. Idem vero possunt et faecis vini combustae, et calcis et nitri pares portiones: vel aluminis scissilis p. ꝥ. = =. thuris, sandarachae, nitri, singulorum p. ꝥ. 1. gallae p. ꝥ. viii. aristolochiae p. ꝥ. x. mellis quantum satis est. .

Herae compositio.

3. Est etiam Herae compositio, quae habet myrrhae, chalcitidis, singulorum p. ꝥ. 11. aloes, thuris, aluminis scissilis, singulorum p. ꝥ. 1v. aristolochiae, gallae immaturae, singulorum p. ꝥ. viii. malicorii contriti p. ꝥ. x.

Iudaei compositio.

4. Est Iudaei, in qua sunt calcis partes duae, nitri quam ruberrimi pars tertia: quae urina impuberis pueri coguntur, donec strigimenti crassitudo sit. Sed subinde is locus, cui id illinitur, madesaciendus est.

Iollae compositio.

5. At Iollae, chartae combustae, sandarachae, singulorum p. ꝥ. 1. calcis p. ꝥ. 11. auripigmenti tantumdem miscebat.

Ad

*Ad sanguinis profluvia vel ex membrana cerebri,
vel aliis locis; et ad cancerum, et ad indu-
cendam cicatricem, et ad cöercendam
carnem increscentem.*

6. Si vero ex membrana, quae super cerebrum est, profluit sanguis, vitellus combustus et contritus inspergi debet: si alio loco sanguinis profluvium est, auripigmenti, squamae aeris, singulorum p. ꝯ. 1. sandarachae p. ꝯ. 11. marmoris cocti p. ꝯ. 1v. inspergi debet. Eadem cancro quoque obsistunt. Ad inducendam cicatricem, squamae aeris, thuris fuliginis, singulorum p. ꝯ. 11. calcis p. ꝯ. 1111. Eadem increscentem quoque carnem cöercant.

Timaei compositio ad ignem sacrum, vel cancerum.

7. Timacus autem ad ignem sacrum, et ad cancerum his utebatur: myrrhae p. ꝯ. 11. thuris, atramenti sutorii, singulorum p. ꝯ. 111. sandarachae, auripigmenti, squamae aeris, singulorum p. ꝯ. 1v. gallae p. ꝯ. vi. cerussae combustae p. ꝯ. vi111. Ea vel arida inspersa, vel melle excepta idem praestant.

Ad sternutamenta excitanda.

8. Sternutamenta vero vel albo veratro, vel struthio coniecto in nares excitantur, vel his mixtis: piperis, veratri albi, singulorum p. ꝯ. =. Castorei p. ꝯ. 1. spumae nitri p. ꝯ. 1. struthii p. ꝯ. 1111.

Gargarizationes quibus fieri debeant.

9. Gargarizationes autem aut laevandi causa fiunt, aut reprimendi, aut evocandi. Laevant lac, cre-
mor

mor vel ptisanæ, vel furfurum: reprimat aqua, in qua vel lenticula, vel rosa, vel rubus, vel coto-neum malum, vel palmulae decoctæ sunt: evocant sinapi, piper.

CAPUT XXIII.

DE ANTIDOTIS; ET QUIBUS MALIS OPITULENTUR

Antidota raro, sed præcipue interdum necessaria sunt, quia gravissimis casibus opitulantur. Ea recte quidem dantur collisis corporibus vel per ictus, vel ubi ex alto deciderunt, vel in viscerum, laterum, faucium, interiorumque partium doloribus: maxime autem desideranda sunt adversus venena, vel per morsus, vel per cibos, aut potiones nostris corporibus inserta.

Compositio antidoti.

1. Vnum est, quod habet lacrimae papaveris p. ꝥ. ==. acori, malobathri, p. ꝥ. v. iridis illyricæ, gummi, singulorum p. ꝥ. ii. anisi p. ꝥ. ii. nardi gallici, foliorum rosae aridorum, cardamomi, singulorum p. ꝥ. xv. petroselini p. ꝥ. ii. ==. trifolii p. ꝥ. v. casiae nigrae, silis, bdellii, balsami seminis, piperis albi, singulorum p. ꝥ. v. ==. styracis p. ꝥ. v. ==. myrrhae, opopanax, nardi Syri, thuris masculi, hypocistidis suci, singulorum p. ꝥ. vi. castorei p. ꝥ. vi. costi, piperis albi, galbani, resinae terebinthinae, croci, iunci rotundi, singulorum p. ꝥ. vi. ==. dulcis radices p. ꝥ. viii. ==. quæ vel melle vel passo excipiuntur.

Aliud

datur : in ceteris autem affectibus corporis pro modo eorum , vel quod aegyptiae fabae , vel quod ervi magnitudinem impleat , satis est .

C A P U T XXIV.

DE ACOPIS.

Acopum nervis utile.

1. **A**copa quoque utilia nervis sunt : quale est , quod habet floris iunci rotundi p. x. 11. == . costi , iunci quadrati , lauri baccarum , ammoniaci , cardamomi , singulorum p. x. 1111. = . myrrhae , aeris combusti , singulorum p. x. vii. iridis illyricae , cerac , singulorum p. x. x1111. alexandrini calami , iunci rotundi , aspalathi , xylobalsami , singulorum p. x. xxv111. sevi p. 1. unguenti irini cyathum.

Acopum Eloeodes , nervis utile.

2. Alterum , quod *νωδης* vocant , hoc modo fit : cerac p. = . olei tantumdem , resinae terebinthinae ad nucis iuglandis magnitudinem , simul incoquuntur ; deinde in mortario teruntur , instillaturque subinde quam optimi mellis acetabulum , tum irini unguenti , et rosae terni cyathi .

Εγχεῖσα ad ulcera purganda , et implenda.

3. **Εγχεῖσα** autem Graeci vocant liquida , quae illinuntur : quale est , quod fit ad ulcera purganda et implenda , maxime inter nervos , paribus portionibus inter se mistis , butyri , medullae vitulinae , sevi vitulini , adipis anserinae , cerac , mellis , resinae terebinthinae , rosae , olei cicini : quae sepa-
ra-

ratim omnia liquantur , deinde liquida miscentur , et tum simul teruntur . Et hoc quidem magis purgat : magis vero emollit , si pro rosa cyprus infunditur .

Ad sacrum ignem.

4. Ad sacrum ignem , spumae argenti p. ꝥ. vi. cornu bubuli combusti p. ꝥ. xii. conteruntur , addiciturque invicem vinum , et id , quod specialiter sic vocatur , et myrteum , donec utriusque terni cyathi conficiantur .

C A P U T XXV.

DE CATAPOTHS.

Catapotium ad somnum accersendum , et levationem doloris , et simul ad coquendum.

1. **C**atapotia quoque multa sunt , variisque de causis fiunt . *Ανάδουρα* vocant , quae somno dolorem levant : quibus uti , nisi nimia necessitas urget , alienum est . Sunt enim ex vehementibus medicamentis , et stomacho alienis . Potest tamen etiam ad concoquendum , quod habet papaveris lacrimae , galbani , singulorum p. ꝥ. i. myrrhae , castorei , piperis , singulorum p. ꝥ. ii. ex quibus , quod ervi magnitudinem habet , satis est devorasse .

Catapotium valentius ad somnum.

2. Alterum , stomacho peius , ad somnum valentius , ex his fit : mandragorae p. ꝥ. = . apii seminis , item hyoscyani seminis , singulorum p. ꝥ. iv. quae ex vino teruntur . Vnum autem eiusdem magnitudinis , quae supra posita est , abunde est sumpsisse .

*Catapodium ad plurimos dolores
per somnum leniendos.*

3. Sive autem capitis dolores, sive ulcera, sive lippitudo, sive dentes, sive spiritus difficultas, sive intestinorum tormenta, sive inflammatio vulvae est, sive coxa, sive iecur, aut lienis, aut latus torquet, sive vitio locorum aliqua prolabitur et obmutescit, occurrit dolori per quietem eiusmodi catapodium. Silis, acori, rutae silvestris seminis, singulorum p. ꝥ. 1. castorei, cinnamomi, singulorum p. ꝥ. 11. papaveris lacrimae, panacis radicis, mandregorae malorum aridorum, iunci rotundi floris, singulorum p. ꝥ. 111. piperis grana LV1. Haec per se contrita, rursus instillato subinde passo simul omnia teruntur, donec crassitudo sordium fiat. Ex eo paulum aut devoratur, aut aqua diluitur, et potui datur.

Catapodium aliud ad multa valens.

4. Quin etiam silvestris papaveris, cum iam ad excipiendam lacrimam maturum est, manipulus, qui manu comprehendi potest, in vas demittitur, et superinfunditur aqua, quae id contegat, atque ita coquitur. Vbi iam bene manipulus is coctus est, ibidem expressus proicitur, et cum eo humore passum pari mensura miscetur, infervetque, donec crassitudinem sordium habeat. Cum infrixit, catapodia ex eo fiunt; ad nostrae fabae magnitudinem, habentque usum multiplicem. Nam et somnum faciunt, vel per se assumpta, vel ex aqua data: et aurium dolores levant, adiecto exiguo modo rutae succi, ac passi: et tormina supprimunt ex vino liquata: et inflammationem vulvae coercent, mista cerato ex rosa facto, cum paulum his croci quoque accessit: et
ex

ex aqua fronti inducta, pituitam in oculos decurrentem tenent.

*Catapotium ad inducendum somnum, quem
vulva dolens prohibuit.*

5. Item, si vulva dolens somnum prohibet, croci p. ꝯ. = = . anisi, myrrhae, singulorum p. ꝯ. 1. papaveris lacrimae p. ꝯ. 111. cicutae seminis p. ꝯ. v111. miscentur, excipiunturque vino vetere, et quod lupini magnitudinem habet, in tribus cyathis aquae diluitur. Id tamen in febre periculose datur.

Ad iecur sanandum.

6. Ad sanandum iecur: nitri p. ꝯ. = . croci, myrrhae, nardi gallici, singulorum p. ꝯ. 1. melle excipiuntur, daturque, quod aegyptiae fabae magnitudinem habeat.

Ad finiendos dolores lateris.

7. Ad lateris dolores finiendos: piperis, aristolochiae, nardi, myrrhae pares portiones.

Ad thoracis dolores finiendos.

8. Ad thoracis: nardi p. ꝯ. 1. thuris, casiae, singulorum p. ꝯ. 111. myrrhae, cinnamomi, singulorum p. ꝯ. v1. croci p. x. v111. resinae terebinthinae quadrans, mellis heminae tres.

Catapotium Athenionis ad tussim.

9. Ad tussim, Athenionis: myrrhae, piperis, singulorum p. ꝯ. 1. castorei, papaveris lacrimae, singulorum p. ꝯ. 1. quae separatim contusa p. stea
P 3 ium-

iunguntur, et ad magnitudinem fabae nostrae, bina catapotia mane, bina noctu dormituro dantur.

*Catapotium Heraclidis Tarentini ad tussim,
et somnum.*

10. Si tussis somnum prohibet, ad utrumque Heraclidis Tarentini: croci p. \mathfrak{x} . \equiv . myrrhae, piperis longi, costi, galbani, singulorum p. \mathfrak{x} . \equiv . cinnamomi, castorei, papaveris lacrimae, singulorum p. \mathfrak{x} . 1.

*Catapotium ad purganda ulcera in faucibus
tussientibus.*

11. Quod si purganda ulcera in faucibus tussientibus sunt, panacis, myrrhae, resinae terebinthinae, singulorum p. uncia, galbani p. \mathfrak{x} . \equiv . hyssopi p. \mathfrak{x} . \equiv . conterenda sunt, hisque hemina mellis adicienda, et quod digito excipi potest, devorandum est.

Colice Cassii medici.

12. Colice vero Cassii ex his constat: croci, anisi, castorei, singulorum p. \mathfrak{x} . 111. petroselini p. \mathfrak{x} . 1v. piperis et longi et rotundi, singulorum p. \mathfrak{x} . v. papaveris lacrimae, iunci rotundi, myrrhae, nardi, singulorum p. \mathfrak{x} . vi. quae melle excipiuntur. Id autem et devorari potest, et ex aqua calida sumi.

Ad infantem mortuum, aut secundas expellendas.

13. Infantem vero mortuum, aut secundas expellit aquae potio, cui salis ammoniaci p. \mathfrak{x} . 1. aut cui dictami cretici p. \mathfrak{x} . 1. adiectum sit.

La-

Laborantibus ex partu quid dari debeat .

14. Ex partu laboranti.erysimum ex vino tepido
ieiunae dari debet .

Ad adiuuandum vocem .

15. Vocem adiuuat thuris p. ꝥ. 1. in duobus cya-
this vini datum .

Adversus difficultatem urinae .

16. Adversus urinae difficultatem : piperis longi ,
castorei , myrrhae , galbani , papaveris lacrimae , cro-
ci , costi , unciae singulae , styracis , resinae tere-
binthinae , pondo sextantes , melampsithii , cyathus :
ex quibus ad magnitudinem fabae aegyptiae et mane
et coenato dari debet .

Arteriacae compositio quomodo fiat .

17. Arteriacae vero hoc modo fit : casiae , iridis ,
cinnamomi , nardi , myrrhae , thuris , singulorum
p. ꝥ. 1. croci p. ꝥ. 1. = . piperis grana xxx. ex
passi tribus sextariis decoquuntur , donec mellis cras-
situs his fiat : aut croci , myrrhae , thuris , singu-
lorum p. ꝥ. 1. coniiciuntur in passi eundem modum ,
eodemque modo decoquuntur : aut eiusdem passi he-
minae tres usque eo coquuntur , donec extracta in-
de gutta indurescat ; eo adicitur tritae casiae p. ꝥ. 1.

CAPUT XXVI.

DE QUINQUE GENERIBUS NOXARUM CORPORIS .

Cum facultates medicamentorum proposuerim , genera in quibus noxa corpori est , proponam . Ea quinque sunt : cum quid extrinsecus laesit , ut in vulneribus ; cum quid intra seipsum corruptum est , ut in cancro ; cum quid innatum est , ut in vesica calculus ; cum quid increvit , ut vena quae intumescens in varicem convertitur ; cum quid deest , ut cum curta pars aliqua est . Ex his alia sunt in quibus medicamenta , alia in quibus plus manus proficit . Ego , dilatis iis quae praecipue scalpellum et manum postulant , nunc de iis dicam , quae maxime medicamentis egent . Dividam autem hanc quoque curandi partem , sicut priorem ; et ante dicam de iis quae in quamlibet partem corporis incidunt ; tum de iis quae certas partes infestant . Incipiam a vulneribus .

De vulneribus , quae per tela inferuntur .

1. In his autem ante omnia scire medicus debet , quae insanabilia sint , quae difficilem curationem habeant , quae promptiorem . Est enim prudentis hominis , primum eum qui servari non potest , non attingere , nec subire speciem eius ut occisi , quem sors ipsius interemit : deinde ubi gravis metus sine certa tamen desperatione est , indicare necessariis periclitantis in difficili rem esse ; ne , si victa ars malo fuerit , vel ignorasse , vel fefellisse videatur . Sed ut haec prudenti viro conveniunt sic rursus histrionis est , parvam rem attollere , quo plus praestitisse videatur . Obligarique aequum est confessione promptae rei , quo curiosius etiam circumspiciat ,
ne

ne quod per se exiguum est , maius curantis negligentia fiat .

Quae vulnera insanabilia sunt .

2. Servari non potest , cui basis cerebri , cui cor , cui stomachus , cui iecinoris portae , cui in spina medulla percussa est ; cuive aut pulmo medius , aut ieium , aut tenuius intestinum , aut ventriculus , aut renes vulnerati sunt ; cuive circa fauces grandes venae , vel arteriae praecisae sunt .

3. Vix autem ad sanitatem perveniunt , quibus ulla parte aut pulmo , aut iecinoris crassum , aut membrana quae continet cerebrum , aut lienis , aut vulva , aut vesica , aut ullum intestinum , aut septum transversum vulneratum est . Ii quoque in praecipiti sunt in quibus usque ad grandes intusque conditas venas in alis vel poplitibus mucro desedit . Periculosa etiam vulnera sunt , ubicumque venae maiores sunt , quoniam exhaurire hominem profusione sanguinis possunt : idque evenit non in alis tantum , atque poplitibus ; sed etiam in iis venis , quae ad anum testiculosque perveniunt . Praeter haec malum vulnus est , quodcumque in alis vel feminibus , vel inanibus locis , vel in articulis , vel inter digitos est : item quodcumque musculum , aut nervum , aut arteriam , aut membranam , aut os , aut cartilagineum laesit . Tutissimum omnium , quod in carne est .

Quae vulnera tutiorem curationem habeant .

4. Et haec quidem loco vel peiora , vel meliora sunt . Modo vero periculum facit quodcumque magnum est .

Obser-

Observationes in vulneris genere, et figura.

5. Aliquid etiam in vulneris genere figuraque est. Nam peius est quod etiam collisum, quam quod tantum discissum est: adeo ut acuto quoque, quam retuso telo, vulnerari commodius sit. Peius etiam vulnus est, ex quo aliquid excisum est; ex quoque caro alia parte abscissa, alia dependet. Pessimaque plaga in orbem est; tutissima, quae lineae modo recta est. Quo deinde proprius huic illive figurae vulnus est, eo vel deterius vel tolerabilius est.

Aetatis observatio, et corporis, et vitae, et temporis.

6. Quin etiam confert aliquid et aetas, et corpus, et vitae propositum, et anni tempus: quia facilius sanescit puer vel adolescens, quam senior; valeus, quam infirmus; neque nimis tenuis, neque nimis plenus, quam si alterum ex his est; integri habitus, quam corrupti; exercitatus, quam iners; sobrius et temperans, quam vino venerique deditus. Opportunissimumque curationi tempus vernum est, aut certe neque fervens, neque frigidum: siquidem vulnera et nimius calor et nimium frigus infestant; maxime tamen horum varietas: ideoque perniciosissimus autumnus est.

Signa eorum quae intus laesa sunt.

7. Sed pleraque ex vulneribus oculis subiecta sunt: quorundam ipsae sedes indices sunt; quas alio loco demonstravimus, cum positus interiorum partium ostendimus. Verumtamen, quia quaedam vicina sunt, interestque, vulnus in summa parte sit, an penitus penetraverit, necessarium est notas subiicere, per quas

quas quid intus ictum sit, scire possimus; et ex quibus vel spes, vel desperatio oriatur.

Signa percussæ cordis.

8. Igitur, corde percusso, sanguis multus fertur, venae elanguescunt, color pallidissimus, sudores frigidi, malique odoris, tamquam irrorato corpore oriuntur: extremisque partibus frigidis matura mors sequitur.

Signa pulmonis icti.

9. Pulmonē vero icto, spirandi difficultas est; sanguis ex ore spumans, ex plaga rubens, simulque etiam spiritus cum sono fertur; in vulnus inclinari iuvat: quidam sine ratione consurgunt: multi si in ipsum vulnus inclinati sunt, loquuntur; si in aliam partem, obmutescunt.

Signa iecinoris vulnerati.

10. Iecinoris autem vulnerati notae sunt: multus sub dextra parte praecordiorum profusus sanguis; ad spinam reducta praecordia; in ventrem cubandi dulcedo; punctiones, doloresque usque ad iugulum, iunctumque ei latum scapularum os, intenti: quibus nonnunquam etiam biliosus vomitus accedit.

Signa percussorum renum.

11. Renibus vero percussis, dolor ad inguina testiculosque descendit; difficulter urina redditur; eaque aut est cruenta, aut cruor fertur.

Signa vulnerati lienis.

12. At liene icto, sanguis niger a sinistra parte prorumpit; praecordia cum ventriculo ab eadem parte indurescunt; sitis ingens oritur; dolor ad iugulum, sicut iecinore vulnerato, venit.

Signa percussae vulvae.

13. At cum vulva percussa est, dolor in inguinibus, et coxis, et feminibus est; sanguinis pars per vulnus, pars per naturale descendit; vomitus bilis insequitur; quaedam obmutescunt; quaedam mente labuntur; quaedam, sui compotes, nervorum oculorumque dolore urgeri se confitentur; morientesque eadem, quae corde vulnerato patiuntur.

Signa percussi cerebri, vel membranae eius.

14. Sin cerebrum membranave eius vulnus accepit, sanguis per nares, quibusdam etiam per aures exit; fereque bilis vomitus insequitur; quorundam sensus obtunduntur, appellatique ignorant; quorundam trux vultus est; quorundam oculi, quasi resoluti, huc atque illuc moventur; fereque tertio, vel quinto die delirium accedit; multorum etiam nervi distenduntur: ante mortem autem plerique fascias, quibus caput deligatum est, lacerant, ac nudum vulnus frigori obiciunt.

Signa stomachi percussi.

15. Vbi stomachus autem percussus est, singultus, et bilis vomitus insequitur; si quid cibi vel potionis assumptum est, ea redditur cito; venarum motus

tus elanguescent; sudores tenues oriuntur, per quos extremæ partes frigescunt.

Signa ieiuni intestini, et ventriculi vulnerati, et aliorum intestinorum.

16. Communes vero ieiuni intestini et ventriculi vulnerati notae sunt: nam cibus et potio per vulnus exeunt; praecordia indurescunt; nonnumquam bilis per os redditur: intestino tantum sedes inferior est. Cetera intestina icta vel stercus, vel odorem eius exhibent.

Signa percussae medullae, quae in spina est.

17. Medulla vero, quae in spina est, percussa, nervi resolvuntur, aut distenduntur; sensus intercidit; interposito tempore aliquo sine voluntate inferiores partes vel semen, vel urinam, vel etiam stercus excernunt.

Signa septi transversi percussi.

18. At si septum transversum percussum est, praecordia sursum contrahuntur; spina dolet; spiritus rarus est; sanguis spumans fertur.

Signa vesicae vulneratae.

19. Vesica vero vulnerata, dolent inguina; quod super pubem est, intenditur; pro urina, sanguis; at ex ipso vulnere urina descendit; stomachus afficitur; itaque aut bilem vomunt, aut singultiant; frigus, et ex eo mors sequitur.

*De Sanguine, et sanie, et pure, et eorum speciebus:
quandoque meliora, deteriorave sint.*

20. His cognitis, etiamnum quaedam alia noscenda sunt, ad omnia vulnera ulceraque, de quibus dicturi sumus, pertinentia. Ex his autem exit sanguis, sanies, pus. Sanguis omnibus notus est; sanies est tenuior hoc, varie crassa, et glutinosa, et colorata; pus crassissimum albidissimumque, glutinosius et sanguine et sanie. Exit autem sanguis ex vulnere recenti, aut iam sanescente; sanies est inter utrumque tempus; pus ex ulcere iam ad sanitatem spectante. Rursus et sanies et pus quasdam species Gracis nominibus distinctas habent. Est enim quaedam sanies, quae vel *ἰκὼρ*, vel *μελίχροα* nominatur: est pus, quod *ἐλαϊώδες* appellatur. *Ἰκὼρ* tenuis, subalbidus, ex malo ulcere exit, maximeque ubi nervo laeso inflammatio secuta est. *Μελίχροα* crassior est, glutinosior, subalbida, mellique albo subsimilis. Fertur haec quoque ex malis ulceribus, ubi nervi circa articulos laesi sunt; et inter haec loca, maxime ex genibus. *Ελαϊώδες* tenue, subalbidum, quasi unctum, colore atque pinguitudine oleo albo non dissimile apparet in magnis ulceribus sanescentibus. Malus autem est sanguis, nimium aut tenuis, aut crassus, colore vel lividus, vel niger, aut pituita mixtus, aut varius: optimus calidus, rubens, modice crassus, non glutinosus. Itaque protinus eius vulneris expedita magis curatio est, ex quo sanguis bonus fluxit: itemque postea spes in iis maior est, ex quibus melioris generis quaeque proveniunt. Sanies igitur mala est, multa, nimis tenuis, livida, aut pallida, aut nigra, aut glutinosa, aut mali odoris, aut quae, et ipsum ulcus, et iunctam ei cutem erodit: melior est non multa, modice crassa, subrubicunda, aut subalbida. *Ἰκὼρ* autem peior est multus, crassus, sublividus

dus glutinosus , acer , calidus , mali odoris : tolerabilior est subalbidus , qui cetera omnia contraria prioribus habet . *Μελίχρρα* autem mala est , multa , et percrassa : melior , quae et tenuior , et minus copiosa est . Pus inter haec optimum est . Sed id quoque peius est , multum , tenue , dilutum ; magisque , si ab initio tale est : itemque , si colore sero simile , si pallidum , si lividum , si faeculentum est : praeter haec , si male olet ; nisi tamen locus hunc odorem excitat . Melius est , quo minus est , quo crassius , quo albidius : itemque , si laeve est , si nihil olet , si aequale est . Modo tamen convenire et magnitudini vulneris , et tempori debet : nam plus ex maiore , plus nondum solutis inflammationibus naturaliter fertur . *Ελαιώδες* quoque peius est multum , et parum pingue : quo minus eius , quoque id ipsum pinguius , eo melius est .

Curatio adversus profusionem sanguinis in vulneribus.

21. Quibus exploratis , ubi aliquis ictus est , qui servari potest , protinus prospicienda duo sunt ; ne sanguinis profusio , neve inflammatio interimat . Si profusionem timemus (quod ex sede vulneris , et ex magnitudine eius , et ex impetu ruentis sanguinis intelligi potest) siccis linamentis vulnus implendum est , supraque imponenda spongia ex aqua frigida expressa , ac manu super comprimenda . Si parum sic sanguis conquiescit , saepius linamenta mutanda sunt ; et , si sicca parum valent , aceto madefacienda sunt . Id vehemens ad sanguinem suppressendum est : ideoque quidam id vulneri infundunt . Sed alius rursus metus subest ; ne nimis valenter ibi retenta materia magnam inflammationem postea moveat . Quae res efficit , ut neque rodentibus medicamentis , neque adurentibus , et ob id ipsum inducentibus crustam , sit utendum ; quamvis pleraque ex his san-

gui-

guinem supprimunt : sed , si semel ad ea decurritur , iis potius , quae mitius idem efficiunt . Quod si illa quoque profluvio vincuntur , venae , quae sanguinem fundunt , apprehendendae , circaque id , quod ictum est , duobus locis deligandae , intercidendaeque sunt , ut et in se ipsae coeant , et nihilominus ora praeclosa habeant . Vbi ne id quidem res patitur , possunt ferro candenti aduri . Sed etiam satis multo sanguine effuso ex eo loco quo neque nervus , quo neque musculus est , ut puta , in fronte , vel superiore capitis parte , commodissimum tamen est cucurbitulam admoveere a diversa parte , ut illuc sanguinis cursus revocetur .

Curationes adversus vulnere inflammationem .

22. Et adversus profusionem quidem in his auxilium est : adversus inflammationem autem , in ipso Sanguinis cursu . Ea timeri potest , ubi laesum est vel os , vel nervus , vel cartilago , vel musculus : aut ubi parum sanguinis pro modo vulneris fluxit . Ergo quoties quid tale erit , sanguinem mature suppressere non oportebit ; sed pati fluere , dum tutum erit , adeo ut , si parum fluxisse videbitur , mitti quoque ex brachio debeat ; utique si corpus invenire et robustum , et exercitatum est : multoque magis , si id vulnus ebrietas praecessit . Quod si musculus laesus videbitur , praecidendus erit : nam percussus mortiferus est ; praecisus sanitatem recipit .

De glutinatione vulnerum .

23. Sanguine autem vel suppresso , si nimius erumpit ; vel exhausto , si per se parum fluxit ; longe optimum est vulnus glutinari . Potest autem id quod vel in cute , vel etiam in carne est , si nihil ei praeterea mali accedit : potest caro alia parte de-

dependens, alia inhaerens; si tamen etiamnum integra est, et coniunctione corporis sovetur. In iis vero quae glutinantur, duplex curatio est. Nam si plaga in molli parte est, sui debet; maximeque, si discissa auris ina est, vel imus nasus, vel frons, vel bucca, vel palpebra, vel labrum, vel circa guttur cutis, vel venter. Si vero in carne vulnus est, hiatque, neque in unum orae facile attrahuntur, sutura quidem aliena est; imponendae vero fibulae sunt ἀγκυραί Graeci nominant; quae oras, paulum tamen contrahant, quo minus lata postea cicatrix sit. Ex his autem colligi potest, id quoque quod alia parte dependens, alia inhaerebit, si alienatum adhuc non est, suturam, an fibulam postulet. Ex quibus neutra ante debet imponi, quam intus vulnus purgatum est; ne quid ibi concreti sanguinis relinquantur. Id enim et in pus vertitur, et inflammationem movet, et glutinari vulnus prohibet. Ne linamentum quidem, quod supprimendi sanguinis causa inditum est, ibi relinquendum est; nam id quoque inflammat. Comprehendi vero sutura, vel fibula, non cutem tantum, sed etiam aliquid ex carne, ubi suberit haec, oportebit; quo valentius haereat, neque cutem abrumpat. Vtraque optima est ex acia molli, non nimis torta, quo mitius corpori insadat. Vtraque neque nimis rara, neque nimis crebra iniicienda est. Si nimis rara est, non continet: si nimis crebra est, vehementer afficit; quia, quo saepius acus corpus transiit, quoque plura loca iniectum vinculum mordet, eo maiores inflammationes oriuntur; magisque aestate. Neutra etiam vim ullam desiderat; sed eatenus utilis est, qua cutis ducentem quasi sua sponte subsequitur. Fere, tamen fibulae latius vulnus esse patiuntur: sutura oras iungit, quae ne ipsae quidem inter se collingere ex toto debent, ut si quid intus humoris concrevit, sit qua emanet. Si quod vulnus neu-

Cels. T. I.

Q

trupa

trum horum recipit, id tamen purgari debet. Deinde omni vulneri primo imponenda est spongia ex aceto expressa: si sustinere aliquis aceti vim non potest, vino utendum est. Levis plaga iuvatur etiam, si ex aqua frigida expressa spongia imponitur. Sed ea, quocumque modo imposita est, dum madet, prodest: itaque, ut inarescat, non est committendum. Licetque sine peregrinis, et conquisitis, et compositis medicamentis vulnus curare. Sed si quis huic parum confidit, imponere medicamentum debet, quod sine sevo compositum sit ex iis quae cruentis vulneribus apta esse proposui; maximeque si caro est, barbarum; si nervi, vel cartilago, vel aliquid ex eminentibus, quales aures, vel labra sunt, Polyidae sphragidem. Alexandrinum quoque viride nervis idoneum est: eminentibusque partibus ea quam Graeci *πάπρουςαν* vocant. Solet etiam, colliso corpore, exigua parte findi cutis. Quod ubi incidit, non alienum est, scalpello latius aperire; nisi musculi, nervique iuxta sunt, quos incidi non expedit: ubi satis diductum est, medicamentum imponendum est. At si id quod collisum est, quamvis parum diductum est, latius tamen aperiri propter nervos aut musculos non licet, adhibenda sunt ea quae humorem leniter extrahant; praecipueque ex his id quod *ρύπιδης* vocari proposui. Non alienum est etiam, ubicumque vulnus grave est, imposito quo id iuvetur, insuper circumdare lanam succidam ex aceto et oleo; vel cataplasma, si mollis is locus est, quod leniter reprimat; si nervosus; aut musculosus, quod emolliat.

Quomodo vulnus ligari conveniat.

24. Fascia vero ad vulnus deligandum lintea aptissima est; eaque lata esse debet, ut semel injecta non vulnus tantum, sed paulum utrinque etiam oras eius

eius comprehendat . Si ab altera parte caro magis recessit , ab ea melius attrahitur : si aequè ab utraque , transversa comprehendere oras debet ; aut si id vulneris ratio non patitur , media primum inficienda est , ut tum in utramque partem ducatur , Sic autem deliganda est , ut et contineat , neque adstringat : quod non continetur , elabitur ; quod nimis adstrictum est , cancro periclitatur . Hieme saepius fascia circuire debet : aestate quoties necesse est . Tum extrema pars eius inferioribus acu assuenda est : nam nodus vulnus laedit , nisi tamen longe est . Illo neminem decipi decet , ut propriam viscera curationem requirant , de quibus supra posui . Nam plaga ipsa curanda extrinsecus vel sutura , vel alio medicinae genere est . In visceribus nihil movendum est ; nisi , ut si quid aut ex iecinore , aut liene , aut pulmone dumtaxat extremo dependet , praecidatur . Alioquin vulnus interius ea victus ratio eaque medicamenta sanabunt , quae cuique visceri convenire superiore libro proposui . ●

Quomodo vulnerato agendum sit .

25. His ita primo die ordinatis , homo in lecto collocandus est ; isque si grave vulnus est , abstinere , quantum vires patiuntur , ante inflammationem , a cibo debet ; bibere , donec sitim finiat , aquam calidam , vel , si aestas est , ac neque febris , neque dolor est , etiam frigidam . Adeo tamen nihil perpetuum est , sed semper pro vi corporis aestimandum , ut imbecillitas etiam cibum protinus facere necessarium possit ; tenuem scilicet , et exiguum , qui tantum sustineat . Multique etiam ex profluvio sanguinis intermorientes ante ullam curationem vino reficiendi sunt ; quod alioqui inimicissimum vulneri est .

De notis vulnerum.

26. Nimis verò intumescere vulnus, periculosum; nihil intumescere, periculosissimum est: illud indicium est magnae inflammationis; hoc emortui corporis. Protinusque, si mens homini consistit, si nulla febris accessit, scire licet, maturè vulnus sanum fore. Ac ne febris quidem terrere debet, si in magno vulnere, dum inflammatio est, permanet. Illa perniciosa est, quae vel levi vulnere supervenit, vel ultra tempus inflammationis durat, vel delirium movet: vel si nervorum rigor aut distentio quae ex vulnere orta est, ea non finitur. Vomitus quoque biliosus non voluntarius, vel protinus, ut percussus est aliquis, vel dum inflammatio manet, malum signum est in iis dumtaxat, quorum vel nervi, vel etiam nervosi loci vulnerati sunt. Sponte tamen vomere, non alienum est; praecipue iis quibus in consuetudine fuit: sed neque protinus post cibum, neque iam inflammatione orta, neque cum in superioribus partibus plaga est.

De curatione vulnerum.

27. Biduo sic vulnere habito, tertio die id aperiendum, detergendaque sanies ex aqua frigida est, eademque rursus inicienda sunt. Quinto iam die quanta inflammatio futura est, se ostendit. Quo die rursus detecto vulnere, considerandus color est: qui si lividus, aut pallidus, aut varius, aut niger est; scire licet, malum vulnus esse; idque, quandocumque animadversum est, terrere nos potest. Album, aut rubicundum esse vulnus, commodissimum est. Item cutis dura, crassa, dolens, periculum ostendit: bona signa sunt, ubi haec sine dolore, tenuis, et mollis est. Sed si glutinatur vulnus,

nus , aut leviter intumuit , eadem sunt imponenda , quae primo fuerunt : si gravis inflammatio est , utque glutinaudi spes est , ea quae pus moveant . Jamque aquae quoque calidae necessarius usus est , ut et materiam digerat , et duritiā emolliat , et pus citet . Ea sic temperanda est , ut mani contingenti incunda sit ; et usque eo adhibenda , donec aliquid minuisse ex tumore , coloremque ulceri magis naturalem reddidisse videatur . Post id fomentum , si late plaga non patet , imponi protinus emplastrum debet ; maximeque , si grande vulnus est , tetrapharmacum ; si in articulis , digitis , locis cartilaginis , rhyppodes : at si latius hiat , idem illud emplastrum liquari ex irino iungento oportet , eoque illita linamenta disponi per plagam ; deinde emplastrum supra dari , et super id succidam lanam ; minusque etiam , quam primo , fasciae adstringendae sunt .

Curationes propriae articularum .

28. Proprie quaedam in articulis visenda sunt . In quibus si praecisi nervi sunt , qui continebant , debilitas eius partis sequitur . Si id dubium est ; et ex acuta telo plaga est , ea transversa commodior est : si ex recluso et gravi , nullum in figura discrimen est ; sed videndum est , pus supra articulum , an infra nascatur . Si sub eo nascitur , albumque et crassum diu fertur , nervum praecisum esse credibile est ; magisque , quo maiores dolores inflammationesque , et quo maturius excitatae sunt . Quamvis autem non abscissus nervus est ; tamen , si circa tumor durus diu permanet , necesse est , et diuturnum ulcus esse , et , sano quoque eo , tumorem permanere : futurumque est , ut tarde membrum id vel extendatur , vel contrahatur . Maior tamen in extendendo mora est , ubi recurvato articulo cura-

tio adhibita est; quam in recurvando eo, quod rectum continuerimus. Collocari quoque membrum, quod ictum est, ratione certa debet: si glutinandum est, ut superius sit; si in inflammatione est, ut in neutram partem inclinatum sit; si iam pus profluit, ut devexum sit. Optimum etiam medicamentum, quies est: moveri, ambulare, nisi sanis, alienum est. Minus tamen iis periculosum qui in capite vel brachiis, quam qui in inferioribus partibus vulnerati sunt. Minimeque ambulatio convenit, femine, aut crure, aut pede laborante. Locus, in quo cubabit, tepidus esse debet. Balneum quoque, dum parum vulnus purum est, inter res infestissimas est: nam id et tumidum et sordidum reddit: ex quibus ad cancrum transitus esse consuevit. Lenis frictio recte adhibetur; sed iis partibus, quae longius absunt a vulnere.

Vulnus quomodo purgandum est.

29. Inflammatione finita, vulnus purgandum est. Id optime faciunt tincta in melle linamenta; supraque idem emplastrum, vel enneapharmacum dandum est. Tum demum vero purum ulcus est, cum rubet, ac nimium neque siccum, neque humidum est. At quodcumque sensu caret, quod non naturaliter sentit, quod nimium aut aridum aut humidum est, quod aut albidum, aut pallidum, aut lividum, aut nigrum est, id purum non est.

Quomodo vulnus implendum est.

30. Purgato, sequitur ut impleatur, iamque calida aqua eatenus necessaria est, ut sanies removeatur. Lane sucidae supervacuus usus est: lota, melius circumdatur. Ad implendum autem vulnus proficiunt quidem etiam medicamenta aliqua: itaque
ea

ea adhiberi non alienum est ; ut butyrum cum rosa , et exigua mellis parte ; aut cum eadem rosa tetrapharmacum ; aut ex rosa linamenta . Plus tamen proficit balneum rarum , cibi boni succi , vitatis omnibus acribus ; sed iam pleniores . Nam et avis , et venatio , et suilla elixa dari potest . Vinum omnibus , dum febris , dum inflammatio est , alienum est : itemque usque ad cicatricem , si nervi , musculive vulnerati sunt ; etiam , si alte caro . At si plaga in summa cute , generis tutioris est , potest non pervetus , modice tamen datum , ad implendum quoque proficere . Si quid molliendum est , quod in nervosis locis musculosisque necessarium est , cerato quoque super vulnus utendum est . At si caro supercrevit , modice reprimit siccum linamentum ; vehementius squama aeris . Si plus est , quod tolli opus est , adhibenda sunt etiamnum vehementiora , quae corpus exsedant . Cicatricem , post omnia haec , commode inducit lycium ex passo aut lacte dilutum ; vel etiam per se impositum siccum linamentum .

De ulceribus , quae extrinsecus per vulnera incidunt , curationibusque eorum .

31. Hic ordo felicitis curationis est : sed quaedam tamen pericula incidere consuerunt . Interdum enim vetustas ulcus occupat , induciturque ei callus , et circum ore crassae livent : post quae , quidquid medicamentorum ingeritur , parum proficit : quod fere negligenter curato ulceri supervenit . Interdum vel ex nimia inflammatione , vel ob aestus immodicos , vel ob nimia frigora , vel quia nimis vulnus adstrictum est , vel quia corpus aut senile , aut mali habitus est , cancer occupat . Id genus a Graecis diductum in species est ; nostris vocabulis non est . Omnis autem cancer non solum id corrumpit , quod

occupavit; sed etiam serpit: deinde aliis aliisque signis discernitur. Nam modo super inflammationem rubor ulcus ambit, isque cum dolore procedit; *ἔρυσίπτελας* Graeci nominant. Modo ulcus nigrum est, quia caro eius corrupta est: idque vehementius etiam putrescendo intenditur, ubi vulnus humidum est, et ex nigro ulcere humor pallidus fertur, malique odoris est; carunculaeque corruptae, interdum etiam nervi ac membranae resolvuntur; specillumque demissum descendit aut in latus, aut deorsum: eoque vitio nonnumquam os quoque afficitur. Modo oritur ea, quam Graeci *γάγγραινα* appellant. Priora in qualibet parte corporis fiunt: hoc in prominentibus membris, id est inter ungues; et alas, vel inguina; fereque in senibus, vel in iis quorum corpus mali habitus est. Caro in ulcere vel nigra, vel livida est, sed sicca et arida; proximaque cutis plerumque subnigris pustulis impletur: deinde ei proxima vel pallida, vel livida, fereque rugosa et sine sensu est; ulterior in inflammatione est: omniaque ea simul serpunt: ulcus in locum pustulosum; pustulae in eum qui pallet aut livet; pallor aut livor in id quod inflammatum est; inflammatio in id quod integrum est, transit. Inter haec deinde febris acuta oritur, ingensque sitis: quibusdam etiam delirium accedit: alii, quamvis mentis suae compotes sunt, balbutiendo tamen vix sensus suos explicant: incipit affici stomachus: fit foedi spiritus ipse odoris. Atque initium quidem eius mali recipit curationem: ubi vero penitus insedit, insanabile est; plurimique sub frigido sudore moriuntur.

Curatio veteris ulceris.

32. Ac pericula quidem vulnerum haec sunt. Vetus autem ulcus scalpello concidendum est, exci-

den-

dendaeque eius orae , et quidquid super eas livet
aeque incidendum . Si varicula intus est , quae id
sanari prohibet , ea quoque excidenda . Deinde ubi
sanguis emissus , novatumque vulnus est , eadem cu-
ratio adhibenda quae in recentibus vulneribus ex-
posita est . Si scalpello aliquis uti non vult , pot-
est sanare id emplastrum quod ex ladano fit : et ,
cum ulcus sub eo exesum est , id quo cicatrix in-
ducitur .

Curatio Erysipelatum .

33. Id autem , quod *ερυσίπτελας* vocari dixi , non
solum vulnere supervenire , sed sine hoc quoque
oriri consuevit : atque interdum periculum magnum
affert ; utique si circa cervices aut caput constitit .
Oportet , si vires patiuntur , sanguinem mittere :
deinde imponere simul reprimentia et refrigerantia ;
maximeque cerussam solani succo , aut cimoliam
cretam aqua pluviali exceptam , aut ex eadem aqua
subactam farinam , cupresso adiecta , aut , si tene-
rius corpus est , lenticula . Quidquid impositum est ,
betae folio contegendum est , et super linteolum
frigida aqua madens imponendum . Si per se refri-
gerantia parum proderunt , miscenda erunt hoc
modo : sulphuris p. ꝯ. i. cerussae et croci , singu-
lorum p. ꝯ. xii s. , eaque cum vino conterenda
sunt , et id his illinendum . At si durior locus est ,
solani folia contrita suillae adipi miscenda sunt , et
illita linteolo superiniicienda .

At si nigrities est , nequedum serpit , imponenda
sunt , quae carnem putrem lenius exedant : repur-
gatumque ulcus sic , ut cetera , nutriendum est .
Si magis putre est , iamque procedit ac serpit , opus
est vehementius erodentibus . Si ne haec quidem
evincunt , aduri locus debet , donec ex eo nullus
humor feratur : nam quod sanum est , siccum est ,
cum

cum aduritur. Post unctionem putris ulceris, superponenda sunt quae crustas a vivo resolvant; eas *σχαΐρας* Graeci nominant. Vbi eae exciderunt, purgandum ulcus maxime melle et resina est: sed aliis quoque purgari potest, quibus purulenta curantur; eodemque modo ad sanitatem perducendum est.

Curatio Gangraenae.

34. Gangraenam vero, si nondum plane tenet, sed adhuc incipit, curare non difficillimum est: utique in corpore iuvenili: et magis etiam, si musculi integri sunt; si nervi vel laesi non sunt, vel leviter affecti sunt; neque ullus magnus articulus nudatus est; aut carnis in eo loco paulum est, ideoque non multum, quod putresceret, fuit consistitque eo loco vitium; quod maxime fieri in digito potest. In eiusmodi casu primum est, si vires patiuntur, sanguinem mittere: deinde, quidquid aridum est, et intentione quadam proximum quoque locum male habet, usque sanum corpus concidere. Medicamenta vero, dum malum serpit, adhibenda nulla sunt, quae pus movere consuerunt: ideoque ne aqua quidem calida. Gravia quoque, quamvis reprimantia, aliena sunt; sed his quam levissimis opus est: superque ea, quae inflammata sunt, utendum est refrigerantibus. Si nihilo magis malum constitit, uri id, quod est inter integrum ac vitiatum locum, debet. Praecipueque in hoc casu petendum, non a medicamentis solum, sed etiam a victus ratione praesidium est: neque enim id malum, nisi corrupti vitiosique corporis est. Ergo primo, nisi imbecillitas prohibet, abstinencia utendum: deinde danda, quae per cibum potionemque alvum, ideoque etiam corpus adstringant; sed ea levia. Postea si vitium constitit, imponi super vulnus eadem debent, quae in putri ulcere praescri-

scripta sunt : ac tum quoque plenioribus cibis uti licebit ex media materia ; sed tamen non nisi alvum corpusque siccantibus : aqua vero pluviali frigida . Balneum , nisi iam certa fiducia redditae sanitatis est , alienum est : siquidem emollitum in eo vulnus cito rursus eodem malo afficitur . Solent vero nonnumquam nihil omnia auxilia proficere , ac nihilominus serpere is cancer : inter quae miserum , sed unicum auxilium est , ut cetera pars corporis tuta sit , membrum quod paulatim emoritur abscindere .

*Curatio vulnorum ubi quid collisum est ,
aut detritum , aut infixum .*

35. Hae gravissimorum vulnorum curationes sunt . Sed ne illa quidem negligenda , ubi integra cute interior pars collisa est ; aut ubi derasum , attritumve aliquid est ; aut ubi surculus corpori infixus est ; aut ubi tenue , sed altum vulnus insedit . In primo casu commodissimum est malicorium ex vino coquere , interioremque eius partem conterere , et cerato miscere ex rosa facto , idque superponere : deinde ubi cutis ipsa exasperata est , inducere lene medicamentum , qualis lipara est . Deraso vero detritoque , imponendum est emplastrum tetrapharmacum , minuendusque cibus , et vinum subtrahendum , Neque id , quia non habebit altiores ictus , contemnendum erit : siquidem ex eiusmodi casibus saepe canceri fiunt . Quod si levius id erit , et in parte exigua , contenti esse poterimus eodem leni medicamento . Surculum vero , si fieri potest , oportet vel manu , vel etiam ferramento eiicere . Si vel prae fractus est , vel altius descendit , quam ut id ita fieri possit , medicamento evocandus est . Optime autem educit superimposita arundinis radix : si tenera est , protinus contrita , si iam durior , ante in mulso decocta ; cui semper mel adiiciendum est :
aut

aut aristolochia cum eodem melle . Pessima ex surculis , arundo est , quia aspera est : eademque offensa etiam in filice est . Sed usu cognitum est , utramque adversus alteram medicamentum esse , si contrita ac superimposita est . Facit autem idem in omnibus surculis , quodcumque medicamentum extrahendi vim habet . Idem altis tenuibusque vulneribus aptissimum est . Priori rei Philocratis ; huic Hecataei emplastrum maxime convenit .

Quomodo cicatrix vulnere inducenda, purgandaque sit.

36. Vbi vero in quolibet vulnere ventum ad inducendam cicatricem est ; quod perpurgatis iam , repletisque ulceribus necessarium est ; primum ex aqua frigida linamentum , dum caro alitur ; deinde , cum iam continenda est , siccum imponendum est , donec cicatrix inducatur : tum deligari super album plumbum oportet , quo et reprimitur cicatrix , et colorem maxime sano corpori similem accipit . Idem radix silvestris cucumeris praestat : idem compositio , quae habet elaterii p. ꝯ. i. spūmae argenti p. ꝯ. i. i. unguenti p. ꝯ. iv. quae excipiuntur resina terebinthina , donec emplastri crassitudo ex omnibus fiat . Ac nigras quoque cicatrices leniter purgant paribus portionibus mista , aerugo et plumbum elotum , eademque resina coacta ; sive ungitur cicatrix , quod in facie fieri potest ; sive id ut emplastrum imponitur , quod in aliis partibus commodius est . At si vel excrevit cicatrix , vel concava est , stultum est , decoris causa , rursus et dolorem et medicinam sustinere : alioquin res utrique succurri patitur . Siquidem utraque cicatrix exulcerari scalpello potest : si medicamentum aliquis mavult , idem efficiunt compositiones eae quae corpus exedunt . Cute exulcerata , super eminentem carnem exedentia medicamenta coniicienda sunt ; super concavam implentia ; donec utrumque ul-

ulcus sanæ cuti aequetur: et tum cicatrix inducatur.

C A P U T XXVII.

DE VULNERIBUS, QUAE PER MORSUS INFERUNTUR,
EORUMQUE CURATIONIBUS .

1. **D**ixi de iis vulneribus quae maxime per tela inferuntur: sequitur, ut de iis dicam quae morsu fiunt, interdum hominis, interdum simiae, saepe canis, nonnumquam ferorum animalium, aut serpentium. Omnis autem fere morsus habet quoddam virus. Itaque si vehemens vulnus est, cucurbitula admovenda est: si levius, protinus emplastrum iniiciendum, praecipueque Diogenis; si id non est, quodlibet ex iis, quae adversus morsus proposui; si ea non sunt, viride alexandrinum; si ne id quidem est, quodlibet non pingue ex iis quae recentibus vulneribus accommodantur. Sal quoque his, praecipueque ei quod canis fecit, medicamentum est, si manus vulneri imponitur, superque id duobus digitis verberatur: exsaniat enim. Ac salsamentum quoque recte super id vulnus deligatur.

Curatio adversus rabiosi canis morsum.

2. **U**tique autem si rabiosus canis fuit, cucurbitula virus eius extrahendum est. Deinde si locus neque nervosus, neque musculosus est, vulnus id adurendum est: si uri non potest, sanguinem homini mitti non alienum est. Tum isto quidem vulneri superimponenda quae ceteris ustis sunt: ei vero, quod expertum ignem non est, ea medicamenta quae vehementer exedunt. Post quae nullo novo magisterio, sed iam supra posito vulnus erit implendum, et ad sanitatem perducendum. Quidam post rabiosi canis morsum protinus in balneum mittunt,

tunt; ibique patiuntur desudare, dum vires corporis sinunt, vulnere adaperto, quo magis ex eo quoque virus destillet: deinde multo meracoque vino excipiunt, quod omnibus venenis contrarium est. Idque cum ita per triduum factum est, tutus esse homo a periculo videtur.

Solet autem ex eo vulnere, ubi parum occursum est, aquae timor nasci ὕδρφοβος Graeci appellant. Miserrimum genus morbi; in quo simul aeger et siti et aquae metu cruciatur: quo oppressus in angusto spes est. Sed unicum tamen remedium est, nec opinantem in piscinam non ante ei provisam proiicere, et, si natandi scientiam non habet, modo mersum bibere pati, modo attollere; si habet, interdum deprimere, ut invitus quoque aqua satietur: sic enim simul et sitis, et aquae metus tollitur. Sed aliud periculum excipit, ne infirmum corpus in aqua frigida vexatum, nervorum distentio absumat. Id ne incidat, a piscina protinus in oleum calidum demittendus est. Antidotum autem, praecipue id quod primo loco posui; ubi id non est, aliud, si nondum aeger aquam horret, potui ex aqua dandum est; et si amaritudine offendit, mel adiiciendum est: si iam is morbus occupavit, per catapotia sumi potest.

• *Curationes communes adversus omnes morsus serpentium.*

3. Serpentium quoque morsus non nimium distantem curationem desiderant: quamvis in ea multum antiqui variarunt; ut in singula genera anguium singula medendi genera praeciperent; alique alia. Sed in omnibus eadem maxime proficiunt. Igitur in primis super vlnus id membrum deligandum est; non tamen nimium vehementer, ne torpeat: dein venenum extrahendum est. Id cucurbitula optime facit: neque alienum est, ante scalpello circa vulnus in-

incidere , quo plus vitiatum iam sanguinis extrahatur . Si cucurbitula non est ; quod tamen vix incidere potest ; tum quodlibet simile vas , quod idem possit : si ne id quidem est , homo adhibendus est , qui id vulnus exsugat . Neque hercules , scientiam praecipuam habent ii qui Psylli nominantur ; sed audaciam usu ipso confirmatam . Nam venenum serpentis , ut quaedam etiam venatoria venena , quibus Galli praecipue utuntur , non gustu , sed in vulnere nocent . Ideoque colubra ipsa tuto estur : ictus eius occidit . Et si stupente ea ; quod per quaedam medicamenta circulatores faciunt ; in os digitum quis indidit , neque percussus est , nulla in ea saliva noxa est . Ergo quisquis , exemplum Psylli secutus , id vulnus exsuxerit , et ipse tutus erit , et tutum hominem praestabit . Illud interea ante debet attendere , ne quod in gingivis , palatove , aliave parte oris ulcus habeat . Post haec is homo loco calido collocandus est , sic ut id , quod percussus erit , in inferiorem partem inclinetur . Si neque qui exsugat , neque cucurbitula est , sorbere oportet ius anserinum , vel ovillum , vel vitulinum , et vomere : vivum autem gallinaceum pullum per medium dividere , et protinus calidum super vulnus imponere , sic , ut pars interior corpori iungatur . Facit id etiam hoedus agnusve discissus , et calida eius caro statim super vulnus imposita : emplastra quoque , quae supra comprehensa sunt ; aptissimumque est vel ephesium , vel id quod ei subiectum est . Praesensque in aliquo antidoto praesidium est . Si id non est , necessarium est exsorbere potionem meri vini cum pipere , vel quodlibet aliud quod calori movendo est , nec humorem intus coire patitur : nam maxima pars venenorum frigore interimit . Omnia etiam urinam moventia , quia materiam extenuant , utilia sunt .

*Speciales curationes adversus ictus serpentium : et
primo adversus ictum aspidis .*

4. Haec adversus omnes ictus communia sunt :
usus tamen ipse docuit , eum quem aspis percus-
sit , acetum potius bibere debere . Quod demonstras-
se dicitur casus cuiusdam pueri , qui cum ab hac
ictus esset , et partim ob ipsum vulnus , partim ob
immodicos aestus siti premeretur , ac locis siccis ali-
um humorem non reperiret , acetum , quod forte
secum habebat , ebibit , et liberatus est . Credo quo-
niam id , quamvis refrigerandi vim habet , tamen ha-
bet etiam dissipandi . Quo fit , ut terra respersa eo
spumet . Eadem ergo vi verisimile est spisscentem
quoque intus humorem hominis ab eo discuti , et
sic dari sanitatem .

Adversus ictum scorpionis .

5. In quibusdam etiam aliis serpentibus certa quae-
dam auxilia satis nota sunt . Nam scorpio ipse sibi
pulcherrimum medicamentum est . Quidam contri-
tum cum vino bibunt : quidam eodem modo contri-
tum super vulnus imponunt : quidam super prunam
eo imposito , vulnus suffumigant , undique veste cir-
cumdata , ne is fumus dilabatur ; tum carbonem eius
super vulnus deligant . Bibere autem oportet herbae
solaris , quam *ἡλιοτρόπιον* Graeci vocant , semen ,
vel certe folia ex vino . Super vulnus vero etiam
furfures ex aceto , vel ruta silvatica recte imponitur ,
vel cum melle sal tostus . Cognovi tamen medicos ,
qui ab scorpione ictis nihil aliud , quam ex brachio
sanguinem miserunt .

Ad

Adversus aranei , et scorpionis ictum .

6. Et ad scorpionis autem et ad aranei ictum , allium cum ruta recte miscetur , ex oleoque contritum superimponitur .

Adversus cerastis , et dipsadis , et haemorrhoidis ictum .

7. At si cerastes , aut dipsas , aut haemorrhoids percussit , polii , quod Aegyptiae fabae magnitudinem aequet , arefactum , in duas potiones dividendum est sic , ut ei rutae paulum adiciatur . Trifolium quoque , et mentastrum , et cum acetò panaces aequè proficiunt . Costumque , et casia , et cinnamomum recte per potionem assumuntur .

Adversus chelydri ictum , et cerastis .

8. Adversus chelydri vero ictum , panaces , aut laser , vel porri succus cum hemina vini sumendus est , et edenda multa satureia . Imponendum autem super vulnus stercus caprinum ex aceto coactum ; aut ex eodem hordeacea farina ; aut ruta , vel nepeta , cum sale contrita , melle adiecto . Quod in eo quoque vulnere , quod cerastes fecit , aequè valet .

Adversus Phalangii ictum .

9. Vbi vero phalangium nocuit , praeter eam curationem quae manu redditur , saepe homo demittendus in solium est , dandusque ei myrrhae et uvae taminiae par modus ex passi hemina ; vel radiculae semen , aut polii radix ex vino ; et super vulnus furfures ex aceto coacti , imperandumque , ut is conquiescat .

*Adversus ictus Italorum anguim , qui minus
terribiles peregrinis sunt .*

10. Verum haec genera serpentium et peregrina , et aliquanto magis pestifera sunt ; maximeque aestuosis locis gignuntur . Italia , frigidioresque regiones hac quoque parte salubritatem habent , quod minus terribiles angues edunt . Adversus quos satis proficit herba vettonica , vel cantabrica , vel centaurion , vel argemonia , vel trixago , vel personata , vel marina pastinaca , singulae binaeve tritae , et cum vino potui datae , et super vulnus impositae . Illud ignorari non oportet , omnis serpentis ictum et ieiuni et ieiuno magis nocere : ideoque perniciosissimi sunt , cum incubant ; utilissimumque est , ubi ex anguibus metus est , non ante progredi , quam quis aliquid assumpsit .

*Remedium generale adversus omnia venena , vel in
cibo , vel in potione assumpta .*

11. Non tam facile iis opitulari est , qui venenum , vel in cibo , vel in potione sumpserunt : primum , quia non protinus sentiunt , ut ab angue icti ; ita ne succurrere quidem statim sibi possunt : deinde , quia noxa non a cute , sed ab interioribus partibus incipit . Commodissimum est tamen , ubi primum sensit aliquis , protinus oleo multo epoto vomere : deinde , ubi praecordia exhaustit , bibere antidotum ; si id non est , vel merum vinum .

*Specialia remedia adversus quaedam venena ; et primo
adversus Cantharidas .*

12. Sunt tamen quaedam remedia propria adversus quaedam venena , maximeque leviora . Nam si
can-

cantharidas aliquis ebibit , panaces cum lacte contusa , vel galbanum vino adiecto dari , vel lac per se debet .

Adversus Cicutam .

13. Si cicutam , vinum merum calidum cum ruta quamplurimum ingerendum est ; deinde is vomere cogendus ; posteaque laser ex vino dandum : isque , si febre vacat , in calidum balneum mittendus ; si non vacat , ungendus ex calefacientibus est : post quae quies ei necessaria est .

Adversus Hyoscyamum .

14. Si hyoscyamum , fervens mulsum bibendum est , aut quodlibet lac , maxime tamen asinium .

Adversus Cerussam .

15. Si cerussam , ius malvae , vel iuglandes ex vino contritae maxime prosunt .

*Adversus sanguisugam , si epota est , et lac ,
quod intus coit .*

16. Si sanguisuga epota est , acetum cum sale bibendum est . Si lac intus coit , aut passum , aut coagulum , aut cum aceto laser .

Adversus Fungos inutiles .

17. Si fungos inutiles quis assumpsit , radigula aut e posca , aut cum sale et aceto edenda est . Ipsi vero hi et specie quidem discerni possunt ab utilibus , et cocturae genere idonei fieri . Nam sive ex oleo inferbuerunt , sive piri surculis cum his inferbuit , omni noxa vacant .

De adustis corporis locis, et quomodo curari debeant.

18. Adustis quoque locis extrinsecus vis infertur: itaque sequi videtur, ut de his dicam. Haec autem optime curantur foliis aut lilii, aut linguae caninae, aut betae in vetere vino oleoque decoctis: quorum quidlibet protinus impositum ad sanitatem perducit. Sed dividi quoque curatio potest in ea, quae mediocriter exedentia reprimentiaque, primo et pusulas prohibeant, et summam pelliculam exasperent: deinde ea, quae lenia ad sanitatem perducant. Ex prioribus est lenticulae cum melle farina, vel myrrha cum vino, vel creta cimolia cum thuris cortice contrita, et aqua coacta, atque ubi usus necessitas incidit, aceto diluta: ex iusequentibus, quaelibet lipara; sed idonea maxime est, quae vel plumbi recrementum, vel vitellos habet. Est etiam illa adustorum curatio, dum inflammatio est, impositam habere cum melle lenticulam: ubi ea declinavit, farinam cum ruta, vel porro, vel marrubio, donec crustae cadant: tunc ervum cum melle, aut irim, aut resinam terebinthinam, donec ulcus purum sit: novissime siccum linamentum.

CAPUT XXVIII.

DE INTERIORIBUS ULCERIBUS; QUAE ALIQUA CORPORUM PARTE CORRUPTA NASCUNTUR.

De carbunculo.

1. **A**b iis quae extrinsecus incidunt, ad ea veniendum est, quae interius, corrupta aliqua corporum parte, nascuntur. Ex quibus non aliud carbunculo peius est. Eius hae notae sunt: rubor est, superque eum non nimium pusulae eminent, maxime nigrae,

grae, interdum sublividae, aut pallidae; in his sanies esse videtur; infra color niger est; ipsum corpus aridum, et durius, quam naturaliter oportet; circaque quasi crusta est; eaque inflammatione cingitur; neque in eo loco levare cutis potest, sed inferiori carni quasi affixa est; somnus urget; nonnumquam horror, aut febris oritur, aut utrumque. Idque vitium subteractis quasi quibusdam radicibus serpit, interdum celerius, interdum tardius: supra quoque, procedens inalbescit; dein lividum fit, circumque exiguae pusulae oriuntur: et si circa stomachum faucesve incidit, subito spiritum saepe elidit. Nihil melius est, quam protinus adurere. Neque id grave est: nam non sentit: quoniam ea caro mortua est. Finisque adurendi est, dum ex omni parte sensus doloris est. Tum deinde vulnus, sicut cetera adusta, curandum est. Sequitur enim sub medicamentis erodentibus crusta, undique a viva carne diducta, quae trahit secum quidquid corruptum erat; purusque iam sinus curari potest implentibus. At si in summa cute vitium est, possunt succurrere quaedam vel exedentia tantum, vel etiam adurentia: vis pro magnitudine adhibenda est. Quodcumque vero medicamentum impositum est, si satis proficiet, protinus a viva corruptam partem resolvit; certaue esse fiducia potest fere, ut undique vitiosa caro excidat, qua huiusce rei medicamentum exest. Si id non fit, medicamentumque malo vincitur, utique ad ustionem properandum est. Sed in eiusmodi casu abstinendum a cibo, a vino est: aquam liberaliter bibere expedit: magisque ea servanda sunt, si febricula quoque accessit.

De carcinomate.

2. Non idem periculum carcinoma affert, nisi imprudentia curantis agitata est. Id vitium fit ma-

xime in superioribus partibus, circa faciem, nares, aures, labra, mammas foeminarum. Et in iecore autem, aut splene hoc nascitur. Circa locum aliqua quasi puncta sentiuntur; isque immobilis, inaequalis tumet; interdum etiam torpet. Circa eum inflatae venae quasi recurvantur, laeque pallent, aut livent; nonnumquam etiam in quibusdam delitescunt: tactusque is locus, aliis dolorem affert, in aliis eum non habet: et nonnumquam sine ulcere durior aut mollior est, quam esse naturaliter debet; nonnumquam iisdem omnibus ulcus accedit: interdumque nullam habet proprietatem; interdum simile iis est, quae vocant Graeci *κονδυλώματα*, aspreдине quadam et magnitudine sua: colorque eius ruber est, aut lenticulae similis; neque tuto aufertur: nam protinus aut resolutio nervorum, aut distentio insequitur. Saepe homo ictus obmutescit, atque eius anima deficit. Quibusdam etiam, si id ipsum pressum est, quae circa sunt, intenduntur et intumescunt. Ob quae pessimum id genus est. Fereque primum id fit, quod *κακῆδης*, a Graecis nominatur: deinde ex eo id carcinoma quod sine ulcere est: deinde ulcus: ex eo thymium. Tolle nihil, nisi cacoethes potest: reliqua curationibus irritantur; et quo maior vis adhibita est, eo magis. Quidam usi sunt medicamentis adurentibus; quidam ferro adusserunt; quidam scalpello exciderunt: neque ulla umquam medicina profecit: sed adusta, protinus concitata sunt, et increverunt, donec occiderent; excisa, etiam post inductam cicatricem, tamen reverterunt, et causam mortis attulerunt: cum interim plerique nullam vim adhibendo, qua tollere id malum tentent, sed imponendo tantum lenia medicamenta, quae quasi blandiantur, quominus ad ultimam senectutem perveniant, non prohibeantur. Discernere autem cacoethes, quod curationem recipit, a carcinomate, quod non recipit, nemo statim potest, sed tempore et experimento.

Er-

Ergo ubi primum id vitium notatum est, imponi debent medicamenta adurentia. Si levatur malum, minuanturque eius indicia, procedere curatio potest et ad scalpellum, et ad ustionem: si protinus irritatum est, scire licet, iam carcinoma esse; removendaque sunt omnia acria, omnia vehementia. Sed si sine ulcere is locus durus est, imponi ficum quam pinguiissimam, aut rhyodes emplastrum satis est. Si ulcus aequale est, ceratum ex rosa iniciendum est, adiciendusque ei pulvis ex contrita testa, ex qua faber ferrarius tingere caudens ferrum solitus est. Si id nimium supercrevit, tentanda squama aeris est, quae lenissima ex adurentibus est; eatenus, ne quid eminere patiatur: sed ita, si nihil exacerbat: sin minus, eodem cerato contenti esse debemus.

De Theriomate.

3. Est etiam ulcus, quod *ἰσχυρά* Graeci vocant. Id et per se nascitur, et interdum ulceri ex alia causa facto supervenit. Color est vel lividus, vel niger; odor foedus; multus, et muco similis humor: ipsum ulcus neque tactum, neque medicamentum sentit; prurigne tantum movetur: at circa dolor est, et inflammatio: interdum etiam febris oritur: nonnumquam ex ulcere sanguis erumpit: atque id quoque malum serpit. Quae omnia saepe intenduntur; fitque ex his ulcus, quod *φυλάκισμα* Graeci vocant; quia celeriter serpendo, penetrandoque usque ossa, corpus vorat. Id ulcus inaequale est, coeno simile, inestque multus humor glutinosus, odor intolerabilis, maiorque, quam pro modo ulceris, inflammatio. Vtrumque, sicut omnis cancer, fit maxime in senibus, vel iis, quorum corpora mali habitus sunt. Curatio utriusque eadem est: sed in maiore malo maior vis necessaria. Ac primum a victus ratione ordiendum est: ut quiescat in lectu.

lo: ut primis diebus a cibo abstineat, aquam quam plurimam assumat: alvus quoque ei ducatur: dein post inflammationem, cibum boni succi capiat, vitatis omnibus acribus; potionis quantum volet, sic, ut interdium quidem aqua contentus sit; in coena vero etiam vini austeri aliquid bibat. Non aequè tamen fame in iis, quos *πενία* urgebit, atque iis, qui *ἀπρία* adhuc habebunt, utendum erit. Et victus quidem talis necessarius est. Super ulcus vero inspergenda arida oenanthe est, et, si parum proficiet, chalcitis. Ac si quis nervus exesa carne nudatus est, contegendus ante linteolo est, ne sub eo medicamento aduratur. Si validioribus etiamnum remediis opus est, ad eas compositiones veniendum est, quae vehementius adurant. Quidquid autem inspergitur, averso specillo infundi debet. Superdanda cum melle sunt vel linamenta, vel oleae folia ex vino decocta, vel marrubium: eaque linteolo contegenda in aqua frigida madefacto, dein bene expresso: circaque, qua tumor ex inflammatione est, imponenda, quae reprimant, cataplasmata. Si sub his nihil proficitur, ferro locus aduri debet; diligenter nervis, si qui apparent, ante contextis. Adustum vel medicamentis vel ferro corpus, primum purgandum, deinde implendum esse, apparere cuilibet ex prioribus potest.

De sacro igne.

4. Sacer quoque ignis malis ulceribus adnumerari debet. Eius duae species sunt. Alterum est subrubicundum, aut mistum rubore atque pallore, exasperatumque per pusulas continuas, quarum nulla altera maior est, sed plurimae perexiguæ. In his semper fere pus, et saepe rubor cum calore est; serpitque id nonnumquam sanescente eo, quod primum vitiatum est: nonnumquam etiam exulcerato, ubi

ubi raptis pusulis ulcus continuatur, humorque exit, qui esse inter saniem et pus videri potest. Fit maxime in pectore, aut lateribus, aut eminentibus partibus, praecipueque in plantis. Alterum autem est in summae cutis exulceratione, sed sine altitudine, latum, sublividum, inaequaliter tamen; mediumque sanescit, extremis procedentibus: ac saepe id, quod iam sanum videbatur, iterum exulceratur: at circa, proxima cutis, quae vitium receptura est, tumidior et durior est, coloremque habet ex rubro subnigrum. Atque hoc quoque malo fere corpora saniora tentantur, aut quae mali habitus sunt; sed in cruribus maxime. Omnis autem sacer ignis, ut minimum periculum habet ex iis, quae serpunt; sic prope difficillimè tollitur. Medicamentum eius fortuitum est, uno die febris, quae humorem noxium absumat. Pus, quo crassius et albidius est, eo periculi minus est. Prodest etiam infra ulcera locum caedi, quo plus puris exeat; et id, quo ibi corruptum corpus est, extrahatur. Sed tamen, si febricula accessit, abstinencia, lectulo, alvi ductione opus est. In omni vero sacro igni, neque lenibus et glutinosis cibis, neque salsis et acribus utendum est: sed iis, qui inter utrumque sunt: qualis est panis sine fermento, piscis, hoedus, aves, exceptoque apro, omnis fere venatio. Si non est febricula, et gestatio utilis est, et ambulatio, et vinum austerum, et balneum. Atque in hoc quoque genere potio magis liberalis esse, quam cibus, debet. Ipsa autem ulcera, si mediocriter serpunt, aqua calida; si vehementius, vino calido fovenda sunt: deinde acu pustulae, quaecumque sunt, aperiendae: tum imponenda ea, quae putrem carnem exedunt. Vbi inflammatio sublata, ulcusque purgatum est, imponi lene medicamentum debet. In altero autem genere, possunt proficere mala cotonea in vino cocta, atque contrita: potest emplastrum
vel

vel Here, vel tetrapharmacum, cui quinta pars thuris adiecta sit: potest nigra hedera ex vino austero cocta; ac, si celeriter malum serpit, non aliud magis proficit. Purgato ulcere, quod in summa cute esse proposui, satis ad sanitatem eadem lenia medicamenta proficient.

De chironio ulcere

5. Chironium autem ulcus appellatur, quod et magnum est, et habet oras duras, callosas, tumentes. Exit sanies non multa, sed tenuis; odor malus, neque in ulcere, neque in eius humore est; nulla inflammatio, dolor modicus est; nihil serpit; ideoque nullum periculum affert; sed non facile sanescit. Interdum tenuis cicatrix inducitur, deinde iterum rumpitur, ulcusque renovatur. Fit maxime in pedibus et cruribus. Super id imponi debet; quod et lene aliquid, et vehemens, et reprimens habeat; quale eius rei causa fit ex his: squamae aeris, plumbi eloti, combusti, singulorum p. ꝯ. 1111. cadmiae, cerae, singulorum p. ꝯ. v111. rosae quantum satis sit ad ceram simul cum eis molliendam.

*De Ulceribus, quae ex frigore in pedibus,
et manibus oriuntur.*

6. Fiunt etiam ex frigore hiberno ulcera, maxime in pueris, et praecipue pedibus, digitisque eorum, nonnumquam etiam in manibus. Rubor cum inflammatione mediocri est: interdum pusulae oriuntur, deinde exulceratio: dolor autem modicus: prurigo maior est: nonnumquam humor exit, sed non multus, qui referre vel pus, vel saniem videtur. In primis multa calida aqua fovendum est, in qua rapa decocta sint; aut si ea non sunt, aliquae verbenae ex reprimentibus. Si nondum adaperitum ulcus

cus est , aes quam maxime calidum quis pati potest admovendum est . Si iam exulceratio est , imponi debet alumen aequa portione cum thure contritum , vino adiecto , aut malicorium in aqua coctum , deinde contritum . Si summa detracta pellucula est , hic quoque melius lenia medicamenta proficiunt .

De Struma .

7. Struma quoque est tumor , in quo subter coëta quaedam ex pure et sanguine quasi glandulae oriuntur : quae vel praecipue fatigare medicos solent ; quoniam et febres movent , nec umquam facile maturescunt ; et sive ferro , sive medicamentis curantur , plerumque iterum iuxta cicatrices ipsas resurgunt ; multoque post medicamenta saepius : quibus id quoque accedit , quod longo spatio detinent . Nascuntur maxime in cervice ; sed etiam in alis , et inguinibus , in lateribus . In mammis quoque foeminarum se reperisse , Meges auctor est . Propter haec et album veratrum recte datur , atque etiam saepius , donec ea digerantur : et medicamenta imponuntur , quae humorem vel educant , vel dissipent ; quorum supra mentio facta est . Adurentibus quoque quidam utuntur , quae exedant , crustaque eum locum adstringant : tum vero ut ulcus curant . Quaecumque autem ratio curandi est , corpus , puro ulcere , exercendum atque alendum est , donec ad cicatricem perveniat . Quae cum medici doceant , quorundam rusticorum experimento cognitum , quem struma male habet , cum , si anguem edit , liberari .

De Furunculo .

8. Furunculus vero est tuberculum tantum tunc inflammatione , et dolore ; maximeque ubi iam impus vertitur : Qui ubi ad apertus est , et exiit pus ,

apparet pars carnis in pus versa, pars corrupta, subalbida, subrubra; quem ventriculum quidam furunculi nominant. In eo nullum periculum est, etiamsi nulla curatio adhibeatur: maturescit enim per se, atque erumpit. Sed dolor efficit, ut potior medicinâ sit, quae maturius liberet. Proprium eius medicamentum galbanum est: sed alia quoque supra comprehensa sunt. Si cetera desunt, imponi debet, primum non pingue emplastrum, ut id reprimat: deinde, si non repressit, quodlibet puri movendo accommodatum: si ne id quidem est, vel resina, vel fermentum. Expresso pure, nulla ultra curatio necessaria est.

De Phymate.

9. Phyma vero nominatur tuberculum furunculo simile, sed rotundius et planius, saepe etiam maius. Nam furunculus ovi dimidii magnitudinem raro explet, numquam excedit: phyma etiam latius patere consuevit; sed inflammatio dolorque sub eo minores sunt. Vbi divisum est, pus eodem modo apparet: ventriculus, ut in furunculo, non invenitur: verum omnis corrupta caro in pus vertitur. Id autem in pueris et saepius nascitur et facilius tollitur: in iuvenibus rarius oritur, et difficilius curatur: ubi aetas induravit, ne nascitur quidem: Quibus vero medicamentis discuteretur, supra propositum est.

De Phygethlo.

10. Φύγεθλον autem est tumor, non altus, latus, in quo quiddam pusulae simile est. Dolor distentioneque vehemens est, et maior quam pro magnitudine tumoris; interdum etiam febricula: idque tarde maturescit, neque magnopere in pus convertitur. Fit maxime aut in cervice, aut in alis, aut in

in inguinibus . Panem , ad similitudinem figurae , nostri vocant . Atque id ipsum quo medicamento tolleretur , supra demonstravi .

De Abscessibus .

11. Sed cum omnes hi nihil nisi minuti abscessus sint , generale nomen trahit latius vitium ad suppurationem spectans . Idque fere fit aut post febres , aut post dolores partis alicuius , maximeque eos , qui ventrem infestarunt . Saepiusque oculis expositum est ; siquidem latius aliquid intumescit ad similitudinem eius , quod phyma vocari proposui , rubetque cum calore , et paulo post etiam cum duritia , magisque nocenter adolescit , et sitim vigiliamque exprimit . Interdum tamen nihil horum in cute deprehendi potest ; maximeque , ubi altius pus movetur : sed cum siti vigiliaque sentiuntur intus aliquae punctiones . Et quod de subito durius non est , melius est : et quamvis non rubet , coloris tamen aliter mutati est . Quae signa iam pure oriente nascuntur : tumor ruborque multo ante incipiunt . Sed si locus mollis est , avertendus materiae aditus est per cataplasmata , quae simul et reprimunt , et refrigerant : qualia et alias et paulo ante in erysipellate proposui . Si iam durior est , ad ea veniendum est , quae digerant , et resolvant : qualis est ficus arida contusa ; aut cucumeris radix , cui ex farina duae partes adiectae sint , ante ex mulso decoctae . Licet etiam miscere aequis portionibus ammoniacum , galbanum , propolim , viscum ; pondusque adicere myrrhae dimidio minus , quam in prioribus singulis erit . Atque emplastra quoque et malagmata idem efficiunt , quae supra explicui . Quod per haec discussum non est , necesse est , maturescat . Idque quo celerius fiat , imponenda est farina hordeacea , ex aqua cocta *** recte miscetur . Eadem autem haec in minori-

ribus quoque abscessibus, quorum nomina proprietatesque supra reddidi, recte fiunt. Eadenique omnium curatio: tantum modo distat. Crudum est autem, in quo maior quasi venarum motus est, et gravitas, et ardor, et distentio, et dolor, et rubor, et durities; et, si maior abscessus est, horror, aut etiam febricula permanet: penitusque condita suppuratione, si pro his, quae alibi cutis ostendit, punctiones sunt. Vbi ista se remiserunt, iamque is locus prurit, et aut sublividus, aut subalbidus est, matura suppuratio est: eaque, ubi vel per ipsa medicamenta, vel etiam ferro aperta est, pus debet emitti. Tum si qua in alis, vel inguinibus sunt, sine linamento nutrienda sunt. In ceteris quoque partibus, si una plaga exigua est, si mediocris suppuratio fuit, si non alte penetravit, si febris non est, si valet corpus, aequae linamenta supervacua sunt: in reliquis, parce tamen, nec, nisi magna plaga est, imponi debent. Commode vero vel super linamenta, vel sine his imponitur lenticula ex melle, aut malicorium ex vino coctum: quae et per se et mista idonea sunt. Si quae circa duriora sunt, ad ea mollienda, vel malva contrita, vel foeni Graeci linive semen ex passo coctum superdandum est. Quidquid deinde impositum est, non adstringi, sed modice deligari debet. Illo neminem decipi decet, ut in hoc genere cerato utatur. Cetera, quae pertinent ad purgandum ulcus, ad implendum, ad cicatricem inducendam, conveniunt quae in vulneribus exposita sunt.

De Fistulis.

12. Nonnumquam autem ex eiusmodi abscessibus, et ex aliis ulcerum generibus, fistulae oriuntur. Id nomen est ulceri alto, angusto, calloso. Fit in omni fere parte corporis: habetque quaedam in
sin-

singulis locis propria. Prius de communibus dicam. Genera igitur fistularum plura sunt: siquidem aliae breves sunt, aliae altius penetrant; aliae rectae intus feruntur, aliae multoque plures transversae; aliae simplices sunt, aliae duplices triplicesve, ab uno ore orsae: aut etiam in plures sinus dividuntur: aliae rectae, aliae flexae, et tortuosae sunt; aliae intra carnem desinunt, aliae ad ossa aut cartilaginem penetrant, aut, ubi neutrum horum subest, ad interiora perveniunt: aliae deinde facile, aliae cum difficultate curantur, atque etiam quaedam insanabiles reperiuntur. Expedita curatio est in fistula simplici, recenti, intra carnem: adiuvatque ipsam corpus, si iuvenile, si firmum est. Inimica contraria his sunt: itemque, si fistula os, vel cartilaginem, vel nervum, vel musculus laesit; si articulum occupavit; si vel ad vesicam, vel ad pulmonem, vel ad vulvam, vel ad grandes venas arteriasve, vel ad inania, ut guttur, stomachum, thoracem penetravit. Ad intestina quoque eam tendere, semper periculosum, saepe pestiferum est. Quibus multum mali accedit, si corpus vel aegrum, vel senile, vel mali habitus est. Ante omnia autem demitti specillum in fistulam convenit, ut, quo tendat, et quam alte perveniat, scire possimus; simul etiam protinus humida, an siccior sit: quod extracto specillo patet. Si vero os in vicino est, id quoque disci potest, iamne eo fistula pervenerit, et quatenus nocuerit. Nam si molle est, quod ultimo specillo contingitur, intra carnem adhuc vitium est: si magis id renititur, ad eos ventum est. Ibi deinde si labitur specillum, nondum caries est: si non labitur, sed aequale innititur, caries quidem, verum adhuc levis est: si inaequale quoque et asperum subest, vehementius os exesum est. At cartilago ubi subsit, ipsa sedes docet; perventumque esse ad eam, ex renisu patet. Et ex his quidem colliguntur fistularum

rum sedes, spatia, noxae. Simples vero eae sint, an in plures partes diducantur, cognosci potest ex modo puris: cuius si plus fertur, quam quod simplici spatio convenit, plures sinus esse manifestum est. Cumque fere iuxta sint caro, et nervus, et aliqua nervosa, quales fere tunicae membranaeque sunt, genus quoque puris docebit, num plures sinus intus diversa corporis genera perroserint. Siquidem ex carne pus laeve, album, copiosius fertur: at ex nervoso loco, coloris quidem eiusdem, sed tenuius et minus: ex nervo, pingue et oleo non dissimile. Denique etiam corporis inclinatio docet, num in plures partes fistulae penetrarint; quia saepe, cum quis aliter decubuit, aliterque membrum collocavit, pus ferri, quod iam desierat, iterum incipit; testaturque, non solum alium sinum esse, ex quo descendat, sed etiam in aliam corporis partem eum tendere. Sed si et in carne et recens et simplex est, ac neque rugosa neque cava sede, neque in articulo, sed in eo membro, quod per se immobile, non nisi cum toto corpore movetur; satis proficiet emplastrum, quod recentibus vulneribus imponitur, dum habeat vel salem vel alumen, vel squamam aeris, vel aeruginem, vel ex metallicis aliquid: exque eo collyrium fieri debet altera parte tenuius, altera paulo plenius, idque ea parte, qua tenuius est, antecedente demitti oportet in fistulam, donec purus sanguis se ostendat: quae in omnibus fistularum collyriis perpetua sunt. Idem deinde emplastrum in linteolo superimponendum, supraque iniicienda spongia est, in acetum ante demissa: solvique quinto die satis est. Genusque victus adhibendum est, quo carnem ali docui. Ac si longius a praecordiis fistula est, ex intervallo ieiunum radículas esse, deinde vomere, necessarium est. Vetustate callosa fit fistula. Callus autem neminem fallit, quia durus est, et aut albus, aut pallidus. Sed tum

validioribus medicamentis opus est: quale est, quod habet papaveris lacrimae p. ꝥ. 1. gummi p. ꝥ. 111. =. cadmiae p. ꝥ. 1111, atramenti sutorii p. ꝥ. vii. ex quibus aqua coactis collyrium fit: aut in quo sunt gallae p. ꝥ. =. aeruginis, sandarachae, aluminis aegyptii, singulorum p. ꝥ. 1. atramenti sutorii combusti p. ꝥ. 11. aut quod constat ex chalcitide, et saxo calcis; quibus auripigmenti dimidio minus, quam in singulis prioribus est, adiicitur, eaque melle cocto excipiuntur. Expeditissimum autem est ex praeccepto Megetis, aeruginis rasae p. ꝥ. 11. conterere, deinde ammoniaci thymiamatis p. ꝥ. 11. aceto liquare, coque infuso aeruginem cogere: idque ex primis medicamentis est. Sed ut haec maximi effectus sunt, si cui ista non adsunt, facile tamen est callum quibuscumlibet adurentibus medicamentis erodere: satisque est vel papyrus intortum, vel aliquid ex penicillo in modum collyrii adstrictum eo illinere. Scilla quoque cocta et mista cum calce callum exest. Si quando vero longior et transversa fistula est, demisso specillo, contra principium huius incidi commodissimum est, et collyrium utrimque demitti. At si duplicem esse fistulam aut multiplicem existimamus, sic tamen ut brevis, intraque carnem sit, collyrio uti non debemus quod unam partem curet, reliquas omittat; sed eadem medicamenta arida in calamus scriptorium coniicienda sunt, isque ori fistulae aptandus, inspirandumque, ut ea medicamenta intus compellantur: aut eadem ex vino liquanda; vel si sordidior fistula est, ex mulso; si callosior, ex aceto sunt; idque intus infundendum. Quidquid inditum est, superponenda sunt quae refrigerent et reprimant: nam fere, quae circa fistulam sunt, habent aliquid inflammationis. Neque alienum est ubi quis resolverit, antequam rursus alia medicamenta coniiciat, per oricularium clysterem fistulam eluere, si plus puris fertur, vino; si callus durior

Cels. T. I.

S

est,

est, aceto; si iam purgatur, mulso, vel aqua, in qua ervum coctum sit sic, ut huic quoque mellis paulum adiiciatur. Fere vero fit, ut ea tunica, quae inter foramen et integram carnem est, victa medicamentis tota exeat, infraque ulcus purum sit. Quod ubi contigit, imponenda glutinantia sunt; praecipueque spongia melle cocto illita. Neque ignoro multis placuisse, linamentum in modum collyrii compositum tinctum melle demitti: sed celerius id glutinatur, quam impletur. Neque verendum est, ne purum corpus puro corpori iunctum non coëat; adiectis quoque medicamentis ad id efficacibus; cum saepe exulceratio digitorum, nisi magna cura prospeximus, sanescendo in unum eos iungat.

De Ulceris genere quod $\chi\upsilon\pi\iota\omicron\nu$ nominatur.

13. Est etiam ulceris genus, quod a favi similitudine $\chi\upsilon\pi\iota\omicron\nu$ a Graecis nominatur: idque duas species habet. Alterum est subalbidum, furunculo simile; sed maius, et cum dolore maiore: quod ubi maturescit, habet foramina, per quae fertur humor glutinosus et purulentus; neque tamen ad iustam maturitatem pervenit. Si divisum est, multo plus intus corrupti, quam in furunculo, apparet, altiusque descendit. Raro fit nisi in capillis. Alterum est minus, super corpus eminens, durum, latum, subviride, subpallidum, magis exulceratum: siquidem ad singulorum pilorum radices foramina sunt, per quae fertur humor glutinosus, subpallidus, crassitudinem mellis, aut visci referens, interdum olei: si inciditur, viridis intus caro apparet. Dolor autem, et inflammatio ingens est, adeo ut acutum quoque febrem movere consuerit. Super id quod minus crebris foraminibus exasperatum est, recte imponitur et ficus arida, et lini semen in mulso coctum, et emplastra ac malagmata materiam edu-
cen-

centia , aut quae proprie huc pertinentia supra posui . Super alterum , et eadem medicamenta , et farina ex mulso cocta sic , ut ei dimidium resinae terebinthinae misceatur ; et ficus in mulso decocta ; cui paulum hyssopi contriti sit adiectum ; et uvae taminiae pars quarta fico adiecta . Quod si parum in utrolibet genere medicamenta proficiunt , totum ulcus usque ad sanam carnem excidi oportet . Ulcere ablato , super plagam medicamenta danda sunt , primum , quae pus citent ; deinde , quae purgent ; tum , quae impleant .

*De Acrochordone , et Thymio , et Myrmeciis ,
et Clavo .*

14. Sunt vero quaedam verrucis similia , quorum diversa nomina , ut vitia sunt . *Ἀκροχόρδονα* Graeci vocant , ubi sub cute coit aliquid durius , et interdum paulo asperius , coloris eiusdem ; infra tenue , ad cutem latius : idque modicum est , quia raro fabae magnitudinem excedit . Vix unum tantum eodem tempore nascitur ; sed fere plura , maximeque in pueris ; eaque nonnumquam subito desinunt , nonnumquam mediocrem inflammationem excitant ; sub qua etiam in pus convertuntur . At *Θύμιον* nominatur , quod super corpus quasi verrucula eminet , ad cutem tenue , supra latius , subdurum , et in summo perasperum : idque summum colorem floris thymi repraesentat , unde ei nomen est ; ibique facile finditur , et cruentatur ; nonnumquam aliquantum sanguinis fundit : fereque citra magnitudinem fabae aegyptiae est , raro maius , interdum perexiguum . Modo autem unum , inodo plura nascuntur , vel in palmis , vel in inferioribus pedum partibus : pessima tamen in obscoenis sunt ; maximeque ibi sanguinem fundunt . *Μυρμηκία* autem vocantur humiliora thymio durioraque : quae radices altius exigunt , maio-

remque dolorem movent; infra lata, supra autem tenuia; minus sanguinis mittunt; magnitudine vix umquam lupini modum excedunt. Nascuntur ea quoque aut in palmis, aut in inferioribus partibus pedum. Clavus autem nonnumquam quidem etiam alibi, sed in pedibus tamen maxime nascitur, praecipue ex contuso; quamvis interdum aliter: doloremque, etiamsi non alias, tamen ingredienti movet. Ex his acrochordon et thymium saepe etiam per se finiuntur; et quo minora sunt, eo magis: myrmecia et clavi sine curatione vix umquam desinunt. Acrochordon, si excisa est, nullam radiculam relinquit, ideoque ne renascitur quidem: thymio clavoque excisis subter rotunda radícula nascitur, quae penitus descendit ad carnem; eaque relictā idem rursus exigit: myrmecia latissimis radicibus inhaerent; ideoque ne excidi quidem sine magna exulceratione possunt. Clavum subinde radere, commodissimum est: nam sine ulla vi sic mollescit, ac si sanguinis quoque aliquid emissum est, saepe euoritur. Tollitur etiam, si quis eum circumpurgat, deinde imponit resinam, cui miscuit pulveris paulum, quem ex lapide molari contrito fecit. Cetera vero genera medicamentis adurenda sunt: aliisque id quod ex faece vini; myrmeciis id, quod ex alumine et sandaracha fit, aptissimum est. Sed ea, quae circa sunt, foliis contegi debent, ne ipsa quoque exulcerentur: deinde postea lenticula imponi. Tollit thymium etiam ficus in aqua cocta.

De Pustularum generibus.

15. At pustulae maxime vernis temporibus oriuntur. Earum plura genera sunt. Nam modo circa totum corpus partemve aspritudo quaedam sit, similis iis pustulis, quae ex urtica, vel ex sudore nascuntur: *ἰζανθήματα* Graeci vocant. Eaque modo

ru-

rubent, modo colorem cutis non excedunt. Nonnumquam plures similes varis oriuntur; nonnumquam maiores: pustulae lividae, aut pallidae, aut nigrae, aut aliter naturali colore mutato; subestque iis humor: ubi eae ruptae sunt, infra quasi exulcerata caro apparet: *κλύκταιναι* Graece nominantur. Fiunt vel ex frigore, vel ex igne, vel ex medicamentis. *Φλυζάκιον* autem paulo durior pustula est, subalbida, acuta; ex qua ipsa quod exprimitur, humidum est. Ex pustulis vero nonnumquam etiam ulcuscula fiunt, aut aridiora, aut humidiora; et modo tantum cum prurigine, modo etiam cum inflammatione ac dolore; exitque aut pus, aut sanies, aut utrumque. Maximeque id evenit in aetate puerili; raro in medio corpore; saepe in eminentibus partibus. Pessima pustula est, quae *ἐπινοκτίς* vocatur. Ea colore vel sublivida, vel subnigra, vel alba esse consuevit: circa hanc autem vehemens inflammatio est; et cum adapertha est, reperitur intus exulceratio mucosa, colore humori suo similis. Dolor ex ea supra magnitudinem eius est: neque enim ea faba maior est. Atque haec quoque oritur in eminentibus partibus, et fere noctu; unde nomen quoque a Graecis ei est impositum. In omnium vero pustularum curatione primum est, multum ambulare atque exerceri; si quid ista prohibet, gestari: secundum est, cibum minuere, abstinere ab omnibus acribus et extenuantibus: eademque nutrices facere oportet, si lactens puer ita affectus est. Praeter haec is, qui iam robustus est, si pustulae minutae sunt, desudare in balneo debet; simulque super eas nitrum inspergere, oleoque vinum miscere, et sic ungi; tum descendere in solium. Si nihil sic proficitur, aut si maius pustularum genus occupavit, imponenda lenticula est; detractaque summa pellicula, ad medicamenta lenia transcendendum. Epinyctis post lenticulam, recte herba quoque sanguinali, vel viridi co-

riandro curatur. Ulcera ex pustulis facta tollit spuma argenti cum semine foeni graeci mista, sic ut his invicem rosa atque intubi succus adiiiciatur, donec mellis crassitudo fiat. Proprie ad eas pustulas, quae infantes male habent, lapidis, quem *πυρίτην* vocant, p. \mathfrak{x} viii. cum quinquaginta amaris nucibus miscetur, adiiiciunturque olei cyathi tres. Sed prius ungi ex cerussa pustulae debent, tum hoc illini.

De Scabie.

16. Scabies vero est asperitudo cutis, rubicunda; ex qua pustulae oriuntur, quaedam humidiores, quaedam sicciore. Exit ex quibusdam sanies, sitque ex his continuata exulceratio pruriens, serpitque in quibusdam cito. Atque in aliis quidem ex toto desinit, in aliis vero certo tempore anni revertitur. Quo asperior est, quoque prurit magis, eo difficilius tollitur. Itaque eam, quae talis est, *ἀγρίαν*, id est feram, Graeci appellant. In hac quoque victus ratio eadem quae supra, necessaria est. Medicamentum autem ad incipientem hanc idoneum est quod fit ex spodii, croci, aeruginis, singulorum p. \mathfrak{x} . \equiv . piperis albi, omphacii, singulorum p. \mathfrak{x} . i. cadmiac p. \mathfrak{x} . viii. At ubi iam exulceratio est, id quod fit ex sulphuris p. \mathfrak{x} . i. cerae p. \mathfrak{x} . iv. picis liquidae hemina, olei sextariis duobus: quae simul incoquantur, dum crassitudo mellis fiat. Est etiam, quod ad Protarchum auctorem refertur. Habet farinae lupinorum sextarium, nitri cyathos quatuor, picis liquidae heminam, resinae humidae selibram, aceti cyathos tres. Crocum quoque, lycium, aerugo, myrrha, cinis, aquis portionibus recte miscentur, et ex passo coquantur: idque omnem pituitam utique sustinet. Ac si nihil aliud est, amurca ad tertiam partem decocta, vel sulphur picis liquidae mistum, si-

sicut in pecoribus proposui, hominibus quoque scabie laborantibus opitulantur.

De Impetiginis speciebus .

17. Impetiginis vero species sunt quatuor . Minimè mala est, quae similitudine scabiem repraesentat: nam et rubet, et durior est, et exulcerata est, et rodit . Distat autem ab ea, quod magis exulcerata est, et varis similes pustulas habet; videnturque esse in ea quasi bullulae quaedam, ex quibus interposito tempore squamulae resolvuntur; certioribusque haec temporibus revertitur . Alterum genus peius est, simile papulae fere, sed asperius rubicundiusque, figuras varias habens: squamulae ex summa cute decidunt, rosio maior est, celerius et latius procedit, certioribusque etiamnum, quam prior, temporibus et fit, et desinit . Rubra cognominatur . Tertia etiamnum deterior est: nam et crassior est, et durior et magis tumet; in summa cute finditur, et vehementius rodit; ipsa quoque squamosa, sed nigra; proceditque et late, nec tarde; et minus errat in temporibus, quibus aut oritur, aut desinit; neque ex toto tollitur . Nigrae cognomen est . Quartum genus est, quod curationem omnino non recipit, distans colore: nam subalbidum est, et recenti cicatrici simile; squamulasque habet pallidas, quasdam subalbidas, quasdam lenticulae similes; quibus demptis, nonnumquam profluit sanguis . Alioquin vero humor eius albicus est, cutis dura atque fissa est; proceditque latius . Haec vero omnia genera maxime oriuntur in pedibus, et manibus, atque ungues quoque infestant . Medicamentum nostrum aliud valentius est, quam quod ad scabiem quoque pertinere sub auctore Protarcho retuli . Serapion autem nitri p. ꝯ. 11. sulphuris p. ꝯ. 1v. excipiebat resina copiosa, eoque utebatur .

De Papulis .

18. Papularum vero duo genera sunt . Alterum , in quo per minimas pustulas cutis exasperatur , et rubet , leviterque roditur ; medium habet pauxillo laevius ; tarde serpi ; idque vitium maxime rotundum incipit , eademque ratione in orbem procedit . Altera autem est , quam ἀγρία Græci appellant ; in qua similiter quidem , sed magis cutis exasperatur , exulceraturque , ac vehementius et roditur , et rubet , et interdum etiam pilos remittit . Quae minus rotunda est , difficilius sanescit : nisi sublata est , in impetiginem vertitur . Sed levis papula etiam , si ieiuna saliva quotidie defricatur , sanescit : maior commodissime murali herba tollitur , si super eadem trita est . Vt vero ad composita medicamenta veniamus , idem illud Protarchi tanto valentius in his est , quanto minus in his vitii est . Alterum ad idem Myronis : nitri rubri , thuris , singulorum p. ꝯ. 1. cantharidum purgatarum p. ꝯ. 11. sulphuris ignem non experti tantundem , resinae terebinthinae liquidæ p. ꝯ. xx. farinae lolii ꝑ. 1. gith cyathos tres , picis crudæ ꝑ. 1.

*De Vitiliginis speciebus , id est de Alpha ,
et Melane et Leuce .*

19. Vitiligo quoque , quamvis per se nullum periculum adfert , tamen et foeda est , et ex malo corporis habitu fit . Eius tres species sunt . Ἀλφός vocatur , ubi color albus est , fere subasper et non continuus , ut quaedam quasi guttae dispersae esse videantur : interdum etiam latius , et cum quibusdam intermissionibus serpit . Μέλας colore ab hoc differt , quia niger est , et umbrae similis : cetera eadem sunt . Λευκή habet quiddam simile alpha , sed magis al-

albida est, et altius descendit; in eaque albi pili sunt, et lanugini similes. Omnia haec serpunt: sed in aliis celerius, in aliis tardius. Alphos et Melas in quibusdam variis temporibus et oriuntur et desinunt: Leuce, quem occupavit, non facile dimittit. Priora curationem non difficillimam recipiunt: ultimum vix umquam sanescit; ac, si quid ei vitio demptum est, tamen non ex toto sanus color redditur. Vtrum autem aliquod horum sanabile sit, an non sit, experimento facile colligitur. Incidi enim cutis debet, aut acu pungi: si sanguis exit, quod fere fit in duobus prioribus, remedio locus est; si humor albidus, sanari non potest. Itaque ab hoc quidem abstinendum est. Super id vero quod curationem recipit, imponenda lenticula mista cum sulphure et thure sic, ut ea contrita ex aceto sit. Aliud ad idem, quod ad Irenaeum auctorem refertur. Alcyonium, nitrum, cuminum, fici folia arida paribus portionibus contunduntur, adiecto aceto. His in sole vitiligo perungitur; deinde non ita multo post, ne nimis erodatur, eluitur. Proprie quidam, Myrone auctore, eos, quos Alphos vocari dixi, hoc medicamento perungunt: sulphuris p. x. =. aluminis scissilis p. x. =. nitri p. x. =. myrti aridae contritae acetabulum miscent, deinde in balneo super vitiliginem inspergunt farinam ex faba; tum haec inducunt. Ii vero, quos Melanas vocari dixi, curantur, cum simul contrita sunt alcyonium, thus, hordeum, faba, eaque sine oleo in balneo ante sudorem insperguntur, tum genus id vitiliginis defricatur.

Finis Lib. V.

517368





A. CORNELII CELSI

MEDICINAE

INDEX LIBRORUM ET CAPITUM.



LIBER PRIMUS.

Praefatio.		1
Cap. I.	<i>Quemadmodum sanos agere conveniat.</i>	15
Cap. II.	<i>Quae imbecillis servanda sunt.</i>	16
Cap. III.	<i>Observationes quaedam, prout res novae incidunt, et corporum genera et sexus, et aetates, et tempora anni sunt.</i>	19
Cap. IV.	<i>De his, quibus caput infirmum est.</i>	27
Cap. V.	<i>De his, qui lippitudine, gravedine, destillatione, tonsillisque laborant.</i>	28
Cap. VI.	<i>Ad solutam alvum remedia.</i>	29
Cap. VII.	<i>Remedia ad coli dolorem.</i>	<i>ibid.</i>
Cap. VIII.	<i>Quae agenda sint stomacho laborantibus.</i>	30
Cap. IX.	<i>Quid observandum sit dolore nervorum laborantibus.</i>	31
Cap. X.	<i>Observatio in Pestilentia.</i>	32

LIBER SECUNDUS.

Praefatio.		33
Cap. I.	<i>Quae anni tempora, quae tempestatum genera, quae partes aetatis, qualia corpora vel tuta,</i>	<i>vel</i>

	<i>vel morbis opportuna sint , et quod valetudinis genus in quoque timeri possit .</i>	33
Cap. II.	<i>De signis adversae valetudinis futurae .</i>	38
Cap. III.	<i>Quae bona in aegrotantibus signa sint .</i>	39
Cap. IV.	<i>Mala signa aegrotantium .</i>	40
Cap. V.	<i>De signis longae valetudinis .</i>	42
Cap. VI.	<i>De indiciis mortis .</i>	<i>ibid.</i>
Cap. VII.	<i>De notis , quas aliquis in singulis morborum generibus habere possit .</i>	46
Cap. VIII.	<i>Quae notae in quoque morbi genere vel spem , vel pericula ostendant .</i>	52
Cap. IX.	<i>De morborum curationibus .</i>	60
Cap. X.	<i>De sanguinis detractioe pervenas .</i>	<i>ibid.</i>
Cap. XI.	<i>De sanguinis detractioe per cucurbitulas .</i>	65
Cap. XII.	<i>De deiectione .</i>	66
Cap. XIII.	<i>De vomitu .</i>	68
Cap. XIV.	<i>De frictione .</i>	69
Cap. XV.	<i>De gestatione .</i>	71
Cap. XVI.	<i>De abstinentia .</i>	72
Cap. XVII.	<i>De sudore .</i>	73
Cap. XVIII.	<i>Qui cibi , potionesve , aut valentis , aut modicae , aut imbecillae materiae sint .</i>	75
Cap. XIX.	<i>Quae natura ac proprietas cuiusque rei sit , qua vescimur .</i>	79
Cap. XX.	<i>De his , quae boni succi sunt .</i>	<i>ibid.</i>
Cap. XXI.	<i>De his , quae mali succi sunt .</i>	80
Cap. XXII.	<i>Quae res lenes , quae acres sint .</i>	<i>ibid.</i>
Cap. XXIII.	<i>De his , quae crassiorem , quaeve tenuiorem pituitum faciunt .</i>	81
Cap. XXIV.	<i>De his , quae stomacho idonea sunt .</i>	<i>ibid.</i>
	Cap.	

		285
Cap. XXV.	<i>Quae res alienae stomacho sint.</i>	82
Cap. XXVI.	<i>De his, quae instant.</i>	<i>ibid.</i>
Cap. XXVII.	<i>De his, quae calefaciunt, aut refrigerant.</i>	83
Cap. XXVIII.	<i>De his, quae intus facile corrumpuntur.</i>	<i>ibid.</i>
Cap. XXIX.	<i>De his, quae alvum movent.</i>	84
Cap. XXX.	<i>De his, quae alvum adstringunt.</i>	<i>ibid.</i>
Cap. XXXI.	<i>De his, quae urinam movent.</i>	85
Cap. XXXII.	<i>De his, quae ad somnum apta sunt.</i>	86
Cap. XXXIII.	<i>De his, quae materiam evocant.</i>	<i>ibid.</i>

LIBER TERTIUS.

Cap. I.	<i>De morborum generibus.</i>	89
Cap. II.	<i>Quomodo morbi cognoscantur, et an increcant, an minuantur, et qua ratione ab initio, qui languere incipit, curari debeat.</i>	90
Cap. III.	<i>De febrium generibus.</i>	92
Cap. IV.	<i>De curationum diversis generibus.</i>	94
Cap. V.	<i>De febrium speciebus, et singularum curationibus: et primo, quando cibus febricitantibus dandus sit.</i>	99
Cap. VI.	<i>Quando potiones febricitantibus dari expediat.</i>	102
Cap. VII.	<i>Quomodo pestilentes febres curari debeant.</i>	106
Cap. VIII.	<i>Curatio semitertianae febris, quae <i>ἡμικριταία</i> dicitur.</i>	108
Cap. IX.	<i>Curatio lentarum febrium.</i>	109
Cap. X.	<i>Remedia in febribus ad capitis dolorem, et praecordiorum inflammationem, et ariditatem, et scabritiem linguae.</i>	110
		Cap-

Cap. XI.	<i>Remedia contra frigus , quod febrem praecedit .</i>	111
Cap. XII.	<i>Curatio horroris in febris .</i>	112
Cap. XIII.	<i>Curatio quotidianae febris .</i>	114
Cap. XIV.	<i>Curatio tertianae febris .</i>	ibid.
Cap. XV.	<i>Curatio quartanae febris .</i>	115
Cap. XVI.	<i>Curatio duarum quartanarum .</i>	117
Cap. XVII.	<i>Curatio quotidianae febris , quae ex quartana facta sit .</i>	118
Cap. XVIII.	<i>De tribus insaniae generibus : et primo de eius curatione , quae a Graecis dicitur $\phi\rho\epsilon\nu\iota\tau\iota\varsigma$.</i>	ibid.
Cap. XIX.	<i>De Cardiacis .</i>	124
Cap. XX.	<i>De Lethargicis .</i>	126
Cap. XXI.	<i>De Hydropicis .</i>	127
Cap. XXII.	<i>De Tabe , et eius speciebus .</i>	132
Cap. XXIII.	<i>De Comitiali morbo .</i>	136
Cap. XXIV.	<i>De Regio morbo .</i>	138
Cap. XXV.	<i>De Elephantia .</i>	140
Cap. XXVI.	<i>De Attonitis .</i>	ibid.
Cap. XXVII.	<i>De Resolutione nervorum .</i>	141

LIBER QUARTUS .

Cap. I.	<i>De humani corporis interioribus sedibus .</i>	145
Cap. II.	<i>De curationibus morborum , qui nascuntur a capite .</i>	148
Cap. III.	<i>De morbo qui circa faciem nascitur .</i>	151
Cap. IV.	<i>De resolutione linguae .</i>	ibid.
Cap. V.	<i>De destillatione et gravedine .</i>	152
Cap. VI.	<i>De cervicis morbis .</i>	154
Cap. VII.	<i>De faucium morbis : et primum de angina .</i>	156
Cap. VIII.	<i>De difficultate spirandi .</i>	157
Cap. IX.	<i>De faucium exulceratione .</i>	159
	Cap.	

		287
Cap. X.	<i>De Tussi.</i>	160
Cap. XI.	<i>De sanguinis sputu.</i>	161
Cap. XII.	<i>De stomachi morbis.</i>	163
Cap. XIII.	<i>De laterum doloribus.</i>	166
Cap. XIV.	<i>De viscerum morbis; et primo. de pulmone.</i>	168
Cap. XV.	<i>De Hepaticis.</i>	169
Cap. XVI.	<i>De Lienosis.</i>	171
Cap. XVII.	<i>De renum morbis.</i>	172
Cap. XVIII.	<i>De intestinorum morbis: et primo de Cholera.</i>	173
Cap. XIX.	<i>De coeliaco ventriculi morbo.</i>	174
Cap. XX.	<i>De tenuioris intestini morbo.</i>	175
Cap. XXI.	<i>De morbo intestini plenioris.</i>	177
Cap. XXII.	<i>De Torminibus.</i>	<i>ibid.</i>
Cap. XXIII.	<i>De Laevitate intestinorum.</i>	179
Cap. XXIV.	<i>De Lumbricis alvum occupantibus.</i>	180
Cap. XXV.	<i>De Tenesmo.</i>	181
Cap. XXVI.	<i>De ventris fluxu.</i>	<i>ibid.</i>
Cap. XXVII.	<i>De vulvae morbo.</i>	184
Cap. XXVIII.	<i>De seminis nimia ex naturalibus profusione.</i>	186
Cap. XXIX.	<i>De coxarum morbis.</i>	<i>ibid.</i>
Cap. XXX.	<i>De genuum dolore.</i>	187
Cap. XXXI.	<i>De manuum, et pedum, articu- lorumque vitiis.</i>	188
Cap. XXXII.	<i>De refectiōe convalescentium a morbo.</i>	190

LIBER QUINTUS.

Praefatio.		191
Cap. I.	<i>De simplicibus facultatibus qua- rumque rerum, ex quibus me- dicamenta sunt: et primo de his quae sanguinem supprimunt.</i>	192
Cap. II.	<i>Quae vulnus glutinent.</i>	<i>ibid.</i>
		Cap.

Cap. III.	<i>Quae concoquant, et moveant pus.</i>	193
Cap. IV.	<i>Quae aperiant vulnera.</i>	<i>ibid.</i>
Cap. V.	<i>Quae purgent.</i>	<i>ibid.</i>
Cap. VI.	<i>Quae rodant.</i>	194
Cap. VII.	<i>Quae exedant corpus.</i>	<i>ibid.</i>
Cap. VIII.	<i>Quae adurant.</i>	195
Cap. IX.	<i>Quae crustas ulceribus inducant.</i>	<i>ibid.</i>
Cap. X.	<i>Quae crustas ulceribus resolvant.</i>	<i>ibid.</i>
Cap. XI.	<i>Quae discutiant ea, quae in aliqua parte corporis coëerunt.</i>	196
Cap. XII.	<i>Quae evocent, et educant.</i>	<i>ibid.</i>
Cap. XIII.	<i>Quae exasperata laeuent.</i>	197
Cap. XIV.	<i>Quae carnem nutriant, et ulcus impleant.</i>	<i>ibid.</i>
Cap. XV.	<i>Quae molliant.</i>	<i>ibid.</i>
Cap. XVI.	<i>Quae cutem purgent.</i>	<i>ibid.</i>
Cap. XVII.	<i>De misturis simplicium rerum; et de ratione ponderum.</i>	198
Cap. XVIII.	<i>De Malagmatis.</i>	199
Cap. XIX.	<i>De Emplastris.</i>	209
Cap. XX.	<i>De Pastillis.</i>	217
Cap. XXI.	<i>De Pessis.</i>	219
Cap. XXII.	<i>De medicamentis, quibus aridis utimur.</i>	221
Cap. XXIII.	<i>De Antidotis, et quibus malis opitulantur.</i>	224
Cap. XXIV.	<i>De Acopis.</i>	226
Cap. XXV.	<i>De Catapotiiis.</i>	227
Cap. XXVI.	<i>De quinque generibus nozarum corporis.</i>	232
Cap. XXVII.	<i>De vulneribus, quae per morsus inferuntur, eorumque curationibus.</i>	253
Cap. XXVIII.	<i>De interioribus ulceribus, quae aliqua corporum parte corrupta nascuntur.</i>	260

Finis Vol. Primi.